

# **JAHON MAMLAKATLARI**

*Qisqa ma'lumotnoma*

Qayta ishlangan uchinchi nashri

◀SHARQ▶ NASHRIYOT-MATBAA  
AKSIYADORLIK kompaniyasi  
BOSH TAHRIRIYATI  
TOSHKENT – 2009

**M u a l l i f t u z u v c h i l a r :**

*Shuhrat Ergashev, To'iqin Bobomatov, Nodir Tursunov,  
Nozim Sariqulov, Komil Ahmedov, Sharif Shoniyozov,  
Nizomiddin Saxiyev, Umid Bobomatov*

**M a s' u l m u h a r r i r :**

*tarix fanlari doktori, professor R. Farmonov*

**T a q r i z c h i l a r :**

*tarix fanlari nomzodi, dotsent U. To'ychiyev,  
geografiya fanlari nomzodi, dotsent F. Pardayev*

*Tarix fanlari nomzodi  
Shuhrat Ergashev tahriri ostida*

**Jahon mamlakatlari:**

Qisqa ma'lumotnoma /mas'ul muharrir R. Farmonov. — T.: «Sharq», 2009 — 416 b.

**ББК.26.89**

**ISBN 978-9943-00-109-1**

© «Sharq» nashriyot-matbaa aksiyadorlik kompaniyasi  
Bosh tahririyati, 2006, 2007, 2009-y.

## K I R I SH

O'zbekiston Respublikasi mustaqillikka erishgandan buyon o'tgan vaqt ichida jahon hamjamiyatida o'z o'rniga, dunyo siyosati maydonida o'z mustaqil ovozigaga ega bo'lgan davlat sifatida tan olindi. Respublikamiz Prezidenti I. A. Karimov olib borayotgan oqilona tashqi siyosat tufayli yurtdoshlarimiz jahon mamlakatlari bo'ylab erkin safar qilish imkoniyatiga ega bo'ldilar.

«Jahon mamlakatlari» deb atalgan ushbu kitobda dunyoning 224 ta davlati to'g'risida qisqa ma'lumotlar to'plangan. Dastlab O'zbekiston Respublikasi, keyin esa chet mamlakatlar alifbo bo'yicha joylashtirilgan. Har bir davlat to'g'risidagi ma'lumotlar davlatning rasmiy nomi, poytaxti, hududi, aholisi, tili, dini, pul birligi kabilar bilan boshlanadi. Geografik joylashuvi va tabiati, davlat tuzilishi, siyosiy partiyalari, iqtisodi, transport kommunikatsiyalari va tarixiga esa kengroq o'rin berilgan. Buning sababi davlatlar haqidagi faqat rasmiy, siyosiy ma'lumotlar bilan cheklanib qolmasdan, balki o'g'uvchi uchun qiziqarli ma'lumotlarni ham berishga harakat qilindi. Ayniqsa, tabiati va tarixini yoritishda bunga katta e'tibor berilgan.

Hozir adabiyotlarda keng qo'llaniladigan qisqartma so'zlar bu yerda ham shunday ishlatilgan. Masalan, MDH — Mustaqil Davlatlar Hamdo'stligi, AQSH — Amerika Qo'shma Shtatlari, m.a. — miloddan avvalgi kabilar. Aytilganidek, bu so'zlar muomalada keng qo'llanilganligi sababli ularga alohida izoh berish lozim topilmadi.

Barcha davlatlar haqidagi ma'lumotlar bir xil tuzilishga ega, biroq ayrim davlatlar (masalan, Rossiya, AQSH, Xitoy) to'g'risida ma'lumotlarning ko'pligi sababli ularga kitobda kengroq o'rin berilgan.

Umuman, bunday nashrlar rus, ingliz tillarida anchagina bo'lishiga qaramasdan, ushbu kitob o'zbek kitobxonlarida qiziqish uyg'otadi, degan umiddamiz.

## O'ZBEKISTON

*Rasmiy nomi — O'zbekiston Respublikasi. Poytaxti — Toshkent. Hududi — 447400 km<sup>2</sup>. Aholisi — 27829290 kishi (2007). Davlat tili — o'zbek. Dini — islom. Pul birligi — o'zbek so'mi.*

**Geografik joylashuvi va tabiati.** Markaziy Osiyodagi davlat. Shimolda va g'arbda — Qozog'iston (chegaraning uzunligi — 2203 km), janubda — Turkmaniston (1621 km) va Afg'oniston (137 km), janubi sharqda — Tojikiston (1161 km), sharqda Qirg'iziston (1099 km) davlatlari bilan chegaradosh. Chegarasining umumiy uzunligi — 6221 km. O'zbekiston relyefiga ko'ra tekislik va adir-tog' qismlarga bo'linadi. Hududning 4/5 qismini tekisliklar, aksari Turon pasttekisligi ishg'ol qilgan. O'zbekistonning shimoli g'arbida Ustyurt platosi, markaziy qismining sharqida Qizilqum sahrosi joylashgan. Turon pasttekisligi sharqqa tomon davom etib, tog'lar orasiga kirib borgan: shimolda — Mirzacho'l, o'rta qismida — Qarnob cho'li va Qarshi cho'li joylashgan. Bu cho'llar bora-bora tog'oldi qiya tekisliklariga qo'shilib ketadi. Farg'ona, Ohangaron vodiylari, Sangzor—Nurota soyligi, Samarqand, Qashqadaryo va Surxondaryo soylilari tog'lar orasida joylashgan tekisliklardir. O'zbekiston hududidagi tog'lar Tyan-Shan va Hisor—Oloy tog' tizmalariga kiradi. Tizmalarning balandligi 4000 m dan ziyod. Hisor tizmasida joylashgan Hazrati Sulton cho'qqisi (4683 m) O'zbekistonning eng baland nuqtasidir. Asosiy daryolari: Amudaryo, Sirdaryo, Zarafshon, Chirchiq, Ohangaron. Yirik ko'llari: Orol dengizi (global ekologik muammo), Aydarko'l. Tabiiy gaz, neft, qo'ng'ir ko'mir, toshko'mir, oltin, kumush, mis, qalay, molibden, marganes, xrom, volfram, vismut, uran, flyuorit, granit, marmar, ohaktosh, kaolin, topaz, feruza, amitist, tog' xrustali, xalsedon, yashma, nefrit,

amazonit, rodonit, marmar oniksi — O‘zbekiston qazilma boyliklarini tashkil etadi.

Iqlimi — issiq, quruq, kontinental. Janubi subtropik mintaqaga kiradi. O‘zbekiston hududida 120 oilaga kiradigan 3700 ga yaqin turdagi yovvoyi o‘simliklar uchraydi. Cho‘llarda juzg‘un, saksovul, iloq, quyonsuyak, cherkez, qumarchiq, biyurg‘un, shuvoq, tuyapaypoq; qolgan hududlarda tog‘olcha, yong‘oq, pista, archa, zarang, do‘lana, tol, terak, omonqora, suvqalampir, bargizub, zira, qizilpoycha, zirk, kiyiko‘t va boshqa o‘simliklar o‘sadi. Yumronqoziq, qumsichqon, qo‘shoyoq, bo‘ri, tulki, jayron, sayg‘oq, bo‘rsiq, to‘ng‘iz, morxo‘r, arxar, ayiq, bars, chiyabo‘ri, sug‘ur, sassiqko‘zan, bir necha tur ilon, kaltakesak, zaharli hasharotlar, burgut, qora tasqara, qumoy, boltayutar, qirg‘ovul, kaklik, bedana va boshqa qushlar hayvonot olamini tashkil etadi.

**Davlat tuzilishi, siyosiy partiyalari.** Davlat tuzilishi — Respublika. Mamlakat tarkibiga 12 viloyat va Qoraqalpog‘iston Respublikasi kiradi. O‘zbekiston o‘z mustaqilligini 1991-yil 31-avgustda e‘lon qilgan. Milliy bayrami — 1-sentabr (Mustaqillik kuni). Ijro etuvchi hokimiyat — Prezident (davlat boshlig‘i) va Vazirlar Mahkamasini boshqaradigan Bosh vazirga tegishli. Qonun chiqaruvchi hokimiyat Senat (yuqori palata) va Qonunchilik palatasi (quyi palata)dan iborat ikki palatali parlament — Oliy Majlisga tegishli. Siyosiy partiyalari: Xalq demokratik partiyasi, «Adolat» sotsial-demokratik partiyasi, «Milliy tiklanish» demokratik partiyasi, Fidokorlar partiyasi, O‘zbekiston liberal-demokratik partiyasi, Xalq birligi harakati.

**Iqtisodi, transport kommunikatsiyalari.** So‘nggi yillarda hukumat tomonidan olib borilayotgan iqtisodiy siyosat bozor islohotlarini chuqurlashtirishga, xususiy lashtirish va tadbirkorlikni kengaytirishga, moliyaviy va makroiqtisodiy barqarorlikni ta‘minlashga, milliy valutani mustahkamlashga qaratilgan. Chet el investitsiyalari kirib kelishiga imkoniyatlarning yaratilishi ishlab chiqarishning taraqqiy etishiga turtki bo‘ldi. Sanoatning rivojlangan tarmoqlari: rangli metallurgiya, to‘qimachilik, yonilg‘i, kimyo, oziq-ovqat, qurilish,

mashinasozlik, avtomobilsozlik, samolyotsozlik. Paxta, bug'doy, sholi, turli meva va sabzavotlar, poliz mahsulotlari yetishtiriladi. Chorvachilik rivojlangan. Tola, tabiiy gaz, rangli metallar, kimyo va neft kimyosi mahsulotlari, avtomobil, meva va sabzavotlar, qorako'l terilari eksport qilinadi. 2006-yil YIM miqdori 48514 mln dollarni (aholi jon boshiga — 1800 doll.) tashkil etgan. Asosiy savdo hamkorlari: MDH davlatlari, Germaniya, Yaponiya, XXR, Janubiy Koreya.

Temiryo'llarining umumiy uzunligi — 7000 km dan oshiq, avtomobil yo'llari — 80 000 km.

**Tarixi.** Hozirgi O'zbekiston hududida m.a. I ming yillikdayoq dastlabki quldorlik davlatlar — Xorazm, Baqtriya, Sug'd, Parfiya vujudga keladi. M.a. VI asrda ahamoniylar O'rta Osiyoning ko'pchilik yerlarida mahalliy aholining qarshiligiga qaramay (Shiroq, To'maris) o'z hokimiyatini o'rnatdi. M.a. 329—327-yillarda makedoniyalik Iskandar bu hududlarni o'z imperiyasi tarkibiga qo'shib oladi. Mahalliy aholining bosqinchilarga qarshi eng yirik qo'zg'oloniga sug'd lashkarboshisi Spitamen bohchilik qiladi. Iskandarning vafotidan so'ng hozirgi O'zbekiston hududlari Salavkiylar davlati tarkibiga kiradi. M. a. 250-yilda Grek—Baqtriya podsholigi tashkil topadi. M. a II asrda Qang', Parfiya, Farg'ona davlatlari vujudga keladi. Grek—Baqtriya podsholigi toharlar tomonidan tor-mor etilgandan so'ng Toharlar davlati tashkil topadi. II—IV asrlarda O'rta Osiyo, Afg'oniston, Shimoliy Hindiston hududlarida Kushon podsholigi mavjud bo'lgan. V asrda Eftalitlar davlati, VI asrning o'rtalarida Turk xoqonligi tashkil topadi. VIII asrda O'rta Osiyo Arab xalifaligi tomonidan zabt etiladi. O'rta Osiyo xalqlari arab hukmronligiga qarshi muttasil kurash olib boradi (G'urak, Divashti, Sharik, Muqanna, Rofe' ibn Lays qo'zg'olonlari). Qo'zg'olonlarni bostirishda katta xizmat ko'rsatgan tohiriylar, so'ngra somoniylarga hokimiyat topshirib qo'yiladi. Natijada IX asrning oxirlarida Somoniylar davlati O'rta Osiyo hududlarini mustaqil boshqara boshlaydi. X asr oxiri XI asrlarda O'rta Osiyoda Qoraxoniylar, G'aznaviylar, Saljuqiylar davlatlari mavjud bo'lgan. XII asrda Xorazmshohlar davlati yuk-

saladi. IX—XII asrlarda O'rta Osiyoda ilm-fan taraqqiyoti yuksak darajaga ko'tariladi. Abu Ali ibn Sino, Abu Rayhon Beruniy, Mahmud az-Zamaxshariy, Ahmad Farg'oniy, Abu Nasr Forobiy kabi qomusiy olimlar, Najmiddin Kubro, Abduxoliq G'ijduvoni, Imom al-Buxoriy, Ahmad Yassaviy kabi tasavvuf namoyandalari yetishib chiqdi. 1218—1221-yillarda mo'g'ullar mahalliy aholining qattiq qarshiligiga qaramay (Jaloliddin Manguberdi, Temur Malik) O'rta Osiyoni bosib oladi. 1238-yili Buxoroda mo'g'ullar istibdodiga qarshi Mahmud Torobiy boshchiligidagi yirik xalq qo'zg'oloni bo'lib o'tadi. 1370-yilda Amir Temur Samarqandda hokimiyatni qo'lga kiritib, yirik markazlashgan davlatga asos soldi. O'ttiz besh yillik hukmronligi davrida Temur katta hududlarni zabt etib, ulkan imperiya tashkil etdi. Temur vafotidan so'ng (1405) Movarounnahrda temuriylar o'rtasida taxt uchun kurash kechadi. 1409-yili Samarqand taxtiga Mirzo Ulug'bek o'tiradi. Temuriylar Movarounnahrda XVI asrgacha hukmronlik qilishadi. Temur va temuriylar hukmronligi davrida Movarounnahrda hunarmandchilik, me'morchilik va adabiyot ravnaq topdi, ilm-fan yuksaldi, savdo rivojlandi. 1500-yili Dashti Qipchoqdan ko'chmanchi o'zbeklar xoni Muhammad Shayboniyxon Samarqandga hujum qiladi. Unga qarshi Samarqand taxti uchun Zahiriddin Bobur kurash olib boradi. Bir necha samarasiz urinishlardan so'ng Bobur Afg'onistonga ketishga majbur bo'ladi va 1525-yili Hindistonga yurish uyushtirib, u yerda Boburiylar imperiyasiga asos soladi. XVI asrda O'rta Osiyoda ikkita xonlik — Buxoro xonligi va Xiva xonligi vujudga keladi. Shayboniylardan Abdullaxon II (1534—1598) uzoq urushlardan so'ng parchalanib ketgan Movarounnahrni birlashtiradi. 1599-yili Movarounnahrda hokimiyat ashtarxoniylar (1599—1753) sulolasiga o'tadi. 1740-yili Eron shohi Nodirshoh Buxoroni egallaydi va Buxoro 7 yil Eronga tobe bo'ladi. 1753-yili Buxoroda hokimiyat mang'itlar sulolasining birinchi amiri Muhammad Rahim qo'lga o'tadi. XVIII asr boshlarida Qo'qon xonligi tashkil topadi. XIX asrning ikkinchi yarmidan Rossiya O'rta Osiyoga bostirib kira boshlaydi. 1873-yilga kelib O'rta Osiyodagi

uchta davlat ham Rossiyaga qaram bo'ldi. 1917-yilgi oktabr to'ntarishidan so'ng Qo'qon muxtoriyati tashkil topadi, lekin bolsheviklar tomonidan qurol kuchi bilan tugatiladi. O'tgan asrning 20-yillari yarmigacha bolsheviklar va milliy ozodlik harakati o'rtasida keskin kurash kechadi. 1924-yilda SSSR tarkibidagi O'zbekiston SSR tashkil topadi. 1991-yil 31-avgustda O'zbekiston o'z mustaqilligini e'lon qiladi. 2007-yili dekabr oyida bo'lib o'tgan saylovlarda mamlakatning amaldagi prezidenti I.A. Karimov 89 % ovoz bilan g'olib bo'ldi.

## AVSTRALIYA

*Rasmiy nomi – Avstraliya Ittifoqi. Poytaxti – Kanberra. Hududi – 7682300 km<sup>2</sup>. Aholisi – 20293325 kishi (2007). Davlat tili – ingliz. Dini – anglikanlar (26%), katoliklar (26%), protestantlar (20%), pravoslavlar (4%). Pul birligi – Avstraliya dollari.*

**Geografik joylashuvi va tabiati.** Avstraliya materigi Tasmaniya va uning yonidagi mayda orollarda Yerning Janubiy yarim sharida joylashgan davlat. Shimolda Timor dengizi, Arafur dengizi va Torres bo'g'ozini, janubda — Bossa bo'g'ozini va Hind okeani, sharqda — Marjon dengizi, g'arbda — Hind okeani bilan tutashib ketgan. Avstraliya sathi asosan tekisliklardan iborat, baland tog' massivlari yo'q. Mamlakat sharqida, shimoldagi Keyp-Yorkdan janubdagi Boss bo'g'ozini va Tasmaniya orolida davom etgan umumiy uzunligi 3300 km bo'lgan Katta suv ayiruvchi tizma joylashgan. Tizma Nyu-Inglend yassitog'i, Moviy va Avstraliya tog'laridan tashkil topgan. Mamlakatning eng yuqori nuqtasi Kostyushko (2228 m) tog'i.

Iqlimi — subekvatorial, tropik va subtropik. O'simlik dunyosi boy — 20000 dan ortiq o'simlik turlari mavjud. Mamlakat shimoli asosan tropik o'rmonlar bilan qoplangan. Janubda, Avstraliya hududining o'zida 500 turdan ortiq akatsiyalar o'sadi. Hayvonot dunyosi ham boy bo'lib, bu yerda o'rdakburun, kenguru, xaltali hayvonlarning boshqa turlarini, dengizlarda akula,



dengiz iloni, meduza kabi jonivorlarni uchratish mumkin.

**Davlat tuzilishi, siyosiy partiyalari.** Davlat tuzilishi — federal parlamentar davlat. Ijro etuvchi hokimiyat — Britaniya monarxi, general-gubernator, premyer-ministr. Qonun chiqaruvchi hokimiyat — ikki palatali federal parlament (Senat, Deputatlar palatasi). Federatsiya 6 shtatdan iborat: Janubiy Avstraliya, G'arbiy Avstraliya, Yangi Janubiy Uels, Viktoriya, Kvinslend, Tasmaniya hamda Shimoliy Hududlar va Avstraliya poytaxti federal hududi. Siyosiy partiyalari: Avstraliya milliy partiyasi, Avstraliya leyboristik partiyasi, Avstraliya liberal partiyasi, Avstraliya demokratik partiyasi.

**Iqtisodi, transport kommunikatsiyalari.** Avstraliya bozor iqtisodi yuqori rivojlanishga ega bo'lgan industrial-agrar mamlakat. Sanoatning rivojlangan sohalari: mashinasozlik, tog'-kon, kimyo sanoati, oziq-ovqat, po'lat quyish. Qishloq xo'jaligi asosan eksportga ixtisoslashgan. Chorvachilik rivojlangan. 2006-yil YIM miqdori — 605942 mln dollarni (aholi jon boshiga — 29850 doll.) tashkil etgan. Asosiy savdo hamkorlari: Xitoy, Yaponiya, Misr, Indoneziya, MDH mamlakatlari.

**Tarixi.** Avstraliya aboriginlarining ajdodlari bu qit'aga 40000 yil muqaddam ko'chib kelganlar. Avstraliya hududida yevropaliklar kelguniga qadar chorvachilik, dehqonchilik va temir nimaligini bilmagan aborigin qabilalari istiqomat qilishardi. Ularning asosiy mashg'uloti termachilik va ovdan iborat edi. XVIII asr oxirlarida mamlakat hududida 300000 aborigin yashagan. 1606-yili gollandiyalik dengizchi V.Yanszon yevropaliklardan birinchi bo'lib Avstraliya qirg'oqlariga yetib keladi. 1643-yilda yana bir golland dengizchisi A. Tasman mamlakatning shimoliy qirg'oqlari va Tasman orolini o'rganib chiqdi. 1770-yilda ingliz kapitani J. Kuk Avstraliyaning sharqiy qirg'oqlariga kelib tushdi va qit'ani Britaniya mulki deb e'lon qildi. XVIII asr oxirida Avstraliyada birinchi ingliz manzilgohi — Sidney shahriga asos solindi. Angliya Avstraliya hududidan mahbuslarini surgun qilish joyi sifatida

foydalandi. 1901-yilning 1-yanvarida Angliyadan dominion mavqeyini olgan Avstraliya Ittifoqi tashkil topdi. I jahon urushi davrida Avstraliya qo'shinlari Fransiya va Yaqin Sharqda olib borilgan harbiy harakatlarda ishtirok etdi. Urushdan so'ng Avstraliya Nauru oroliga ega bo'ldi. 1931-yilda Avstraliya Vestminster statutiga ko'ra tashqi va ichki siyosatda to'la mustaqillikni qo'lga kiritdi. Avstraliya II jahon urushi davrida antigitlerchilar ittifoqi tarafida turib jang qildi. 1967-yilda aboriginlarga barcha fuqarolik huquqlari berildi. 1968-yil 1 martdan boshlab Avstraliyada Buyuk Britaniya dominionligi bekor qilingan bo'lsa-da, u Hamdo'stlik tarkibidan chiqmadi. 1998—2007-yillarda Avstraliyada respublika boshqaruv shaklini joriy qilish to'g'risida bir qator referendumlar o'tkazildi. Hozirgi kunda Avstraliya britan monarxi bosh bo'lgan mutlaq mustaqil davlat.

## AVSTRIYA

*Rasmiy nomi — Avstriya Respublikasi. Poytaxti — Vena. Hududi — 83500 km<sup>2</sup>. Aholisi — 8168431 kishi (2007). Davlat tili — nemis. Dini — katoliklar (86%), protestantlar (5,5%), boshqa dinlar (8,5%). Pul birligi — yevro.*

**Geografik joylashuvi va tabiati.** Avstriya Markaziy Yevropada joylashgan davlat bo'lib, janubda — Italiya va Sloveniya, janubi g'arbda Shveysariya, g'arbda Germaniya va Lixtenshteyn, shimolda Chexiya, sharqda Vengriya, shimoli sharqda Slovakiya davlatlari bilan chegaradosh. Mamlakat hududining 75% ini Sharqiy Alp tog'lari va tog'oldi hududlari egallagan. Eng baland nuqtasi — Glokner tog'i (3797 m). Alp tog'lari shimolda Tirol va Zalsburg Alplaridan hamda janubda Sillertal va Karnik Alplaridan iborat. Hududning qolgan qismini Dunay daryosi yaqinida joylashgan tekisliklar tashkil etadi.

Iqlimi — mo'tadil-kontinental. Avstriyaning tekislik qismida iqlim issiq va nam. Mamlakatning asosiy suv resurslari: Dunay daryosi va Neyzidler-Ze hamda Boden ko'llaridir. Asosiy foydali qazilmalari: temir

rudasi, neft, yog'och, aluminiy, qo'rg'oshin, mis, toshko'mir va qo'ng'ir ko'mir.

**Davlat tuzilishi va siyosiy partiyalari.** Avstriya 9 federal hududlarga bo'lingan federativ respublika. Federal hududlari: Burgenland, Karintiya, Vena, Yuqori Avstriya, Quyi Avstriya, Zalsburg, Shtiriya, Tirol, Forarlberg. Davlat boshlig'i — prezident, ammo ijro etuvchi hokimiyat boshlig'i — Ministrlar Kengashi raisi — kansler. Ikki palatali parlament (Federal yig'in) — Federal Kengash va Milliy Kengashdan tashkil topgan. Siyosiy partiyalari: Avstriya sotsial-demokratik partiyasi, Avstriya xalq partiyasi, Kommunistik partiya, Yashil muqobilik partiyasi.

**Iqtisodi, transport kommunikatsiyalari.** Avstriya milliy lashtirilgan sanoat va ijtimoiy ta'minotning keng tizimiga ega bo'lgan iqtisodi rivojlangan davlat. Sanoat tarmoqlaridan quyidagilar rivojlangan: metallurgiya, mashinasozlik, oziq-ovqat, to'qimachilik, teri-poyabzal, energetika, sellyuloza-qog'oz ishlab chiqarish. Shu bilan bir qatorda turizm va bank ishi ham rivojlangan. Qishloq xo'jaligining asosiy yo'nalishlari: oziq-ovqat mahsulotlari ishlab chiqarish, boshqoli madaniy o'simliklar, mevalar, kartoshka, qandlavlagi yetishtirish, chorvachilik va parrandalar boqish. 2006-yil YIM miqdori — 261106 mln dollarni (aholi jon boshiga — 31965 doll.) tashkil etgan. Asosiy savdo hamkorlari: YI mamlakatlari, Sharqiy Yevropa va MDH mamlakatlari, Yaponiya, AQSH.

Avtomobil va temiryo'l transport kommunikatsiyalaridan tashqari ichki suv yo'llaridan kema qatnovlari keng yo'lga qo'yilgan.

**Tarixi.** 3000 yil muqaddam zamonaviy Avstriya hududida illiriy qabilalari istiqomat qilishgan. M.a. V asrda kelt qabilalari bostirib kirdi va ularning illiriylar bilan assimilyatsiyasi yuz berdi. Undan so'ng m.a. IV asrda mamlakat hududlari rimliklar tomonidan bosib olinib, Rim provinsiyalari Gretsiya va Pannoniya tarkibiga qo'shildi. VI—VII asrlarda zamonaviy Avstriya hududlariga german va qisman slavyan qabilalari kirib kela boshladi. Shu davrda u Franklar davlati tarkibiga kiradi. 955-yilda Avstriya hududida Sharqiy marka (markgraflik)

tashkil etildi. 1156-yilda Genrix II mustaqil Avstriya ger-sogligini tashkil etdi. Avstriyada gabsburglar sulolasining hukmronligi boshlandi. 1699-yilda Avstriya (Avstriya—Turk urushidan soʻng) Vengriyaning bir qismini, Transilvaniyani, Xorvatiya va Sloveniyani oʻz tarkibiga qoʻshib oldi. Shundan soʻng, 1714-yilda avstriyaliklar uchun gʻalaba bilan tugagan «Ispan taxti uchun urush»-dan soʻng, Gabsburglar imperiyasi tarkibiga janubiy Niderlandiya va shimoliy Italiyadagi yerlar kirdi. XVIII asr oxirlari — XIX asr boshlarida Avstriya Fransiya-ga qarshi gʻarbiy ittifoqlarda ishtirok etdi. 1867-yilda Avstriya imperiyasi dualistik monarxiya — Avstriya—Vengriya imperiyasiga aylandi. Sarayevoda Avstriya taxti merosxoʻri ersgersog Ferdinandning 1914-yil 28-iyunda oʻldirilishi oqibatida I jahon urushi boshlandi. 1918-yil-da urushda magʻlubiyatga uchragan Avstro—Vengriya imperiyasi bir qator mayda mustaqil davlatlarga boʻlinib ketdi. 1918-yil 12-noyabrda Avstriya respublikasi tashkil topgani eʼlon qilindi. 1919-yilda Sen-Jermen tinchlik sulhi zamonaviy Avstriya chegaralarini belgilab berdi. 1938-yil mart oyida nemis qoʻshinlari Avstriyani bosib oladi va uning Germaniyaga qoʻshilishi («anshlyus») roʻy beradi. Ikkinchi jahon urushida Avstriya german rey-xining bir qismi sifatida ishtirok etdi. 1945-yilda mamlakatga SSSR, AQSH, Angliya va Fransiya qoʻshinlari kirib keldi. Venada 1955-yilda mustaqil va demokratik Avstriya davlatining tiklanishi toʻgʻrisida Davlat shartnomasi im-zolandi. 1955-yilning oktabrida Avstriya parlamenti Avstriyaning doimiy betarafligi toʻgʻrisidagi qonunni qa-bul qildi. 1966-yilda Avstriya Yevropa Ittifoqiga aʼzo boʻlib kirdi. XX asrning 70-yillarida Avstriya tarixida bi-rinchi marta hukumat sotsialistlar qoʻliga oʻtdi. 1995-yil 1-yanvardan YI aʼzosi.

## ALBANIYA

*Rasmiy nomi – Albaniya Respublikasi. Poy-taxti – Tirana. Davlat tili – alban. Hududi – 28748 km<sup>2</sup>. Aholisi – 3635125 kishi (2007). Dini – musulmonlar (70%), pravoslavlar (20%), katoliklar (10%). Pul birligi – lek.*

**Geografik joylashuvi va tabiati.** Bolqon yarim-oroqining g'arbiy qismida, Janubiy-sharqiy Yevropada joylashgan davlat. Shimolda va shimoli g'arbda Serbiya va Chernogoriya, sharqda Makedoniya, janubi sharqda va janubda Gretsiya bilan chegaradosh. G'arbda Adriatika dengizi, janubi g'arbda Ion dengizi suvlari qirg'oqlarini yuvib turadi. Qirg'oqbo'yining markaziy qismini tekisliklar, hududning qolgan qismini Shimoliy Alban Alplari, Korabi va Tomori tizmalari egallaydi. Albaniyada kontinental — O'rta Yer dengizi iqlimi hukm suradi. Albaniya hududining uchdan bir qismini o'rmonlar va butazorlar qoplagan, to'rtidan bir qismi esa tog' yaylovlaridan iborat. Aholi kam yashaydigan joylarda bo'ri, shoqol, qobon va qirg'oq bo'ylarida turli qushlarni uchratish mumkin.

**Davlat tuzilishi, siyosiy partiyalari.** Davlat tuzilishi — demokratik respublika. Ma'muriy-hududiy bo'linishi — 26 reti (viloyat). 1912-yil 28-noyabrda Turkiya I Bolqon urushida mag'lubiyatga uchragandan so'ng Usmoniylar imperiyasidan ozod bo'lib, mustaqilligini e'lon qilgan. Milliy bayrami — 28-noyabr — Mustaqillik kuni. Bir palatali parlamenti — Xalq yig'ini. Eng nufuzli siyosiy partiyalari: Alban sotsialistik partiyasi (ASP), Albaniya demokratik partiyasi (DP), Alban respublika partiyasi (RP), Inson huquqlari uchun ittifoq (Olmoniya, INR).

**Iqtisodi, transport kommunikatsiyalari.** 40 yildan ortiq vaqt davomida mamlakat iqtisodi markazdan rejalashtirish va ishlab chiqarish vositalari davlat mulki hisoblanishi tamoyillariga asoslangandi. 1991-yildagi saylovlarda g'alaba qozongan yangi demokratik hukumat «shok terapiyasi» va mamlakat iqtisodini tubdan isloh qilish dasturini qabul qiladi. Sanoatning asosiy tarmoqlari: tog'-konchilik, oziq-ovqat, yengil sanoat, neft, kimyo, metallurgiya, gidroenergetika. Qishloq xo'jaligi YMMning 55% ini ta'minlaydi. 2006-yil YIM miqdori — 15772 mln dollarni (aholi jon boshiga — 4338 doll.) tashkil etgan. Asfalt, neft va neft mahsulotlari, metall va metall rudasi, elektr energiyasi, meva va sabzavotlar, tamaki eksportga chiqariladi. Mamlakatga mashinalar, asbob-uskunalar, temir va po'lat mahsulotlari, to'qimachilik,

farmatsevtika, kimyoviy o'g'itlar import qilinadi. Asosiy savdo hamkorlari: Italiya, sobiq Yugoslaviya davlatlari, Germaniya, Chexiya, Slovakiya.

Temiryo'llar qurilishi sust rivojlangan (543 km), avtomobil yo'llari uzunligi — 18450 km. Asosiy portlari: Durres, Saranda, Vlora.

**Tarixi.** M.a. VII asrda greklar hozirgi Albaniya hududida o'z koloniyalarini tuzgan. Albaniya Makedoniya, Rim (m.a. II asr) va Vizantiya (IV asr) imperiyalari tarkibiga kirgan. IX asrda mamlakat Bolgariya qirolligi, XI asrdan esa yana Vizantiya ta'sirida bo'lgan. 1425-yildan Usmoniylar imperiyasining bir qismi hisoblangan. Turkiyaning I Bolqon urushidagi mag'lubiyatidan so'ng 1912-yil Albaniya mustaqillikka erishgan. 1939-yil Albaniyani fashist Italiyasi bosib oladi. 1946-yili esa Albaniya Xalq Respublikasi e'lon qilinib, kommunistik tuzum o'rnatiladi va ko'p yillarga Albaniya boshqalar uchun yopiq mamlakatga aylanadi. 1976-yil mamlakat Albaniya Xalq Sotsialistik Respublikasi, 1991-yil aprelida esa Albaniya Respublikasi deb e'lon qilinadi.

## AMERIKA QO'SHMA SHTATLARI

*Rasmiy nomi — Amerika Qo'shma Shtatlari. Poytaxti — Vashington. Hududi — 9363200 km<sup>2</sup>. Aholisi — 301139947 kishi (2007). Rasmiy tili — ingliz, (ispan, fransuz, nemis, italyan, polyak, portugal, arman, arab, hind tillari ham keng tarqalgan). Dini — protestantlar (53%), katoliklar (26%), yahudiylar (2%ga yaqin), pravoslavlar (2% ga yaqin), musulmon diniga e'tiqod etuvchilar (2% ga yaqin). Pul birligi — AQSH dollari.*

**Geografik joylashuvi va tabiati.** Shimoliy Amerikadagi davlat. Shimolda Kanada (chegara uzunligi — 8893 km, Shimoliy Amerikaning shimoli g'arbida joylashgan Alyaska shtatining Kanada bilan chegara uzunligi — 2477 km), janubda Meksika (3326 km) bilan chegaradosh. Mamlakat g'arbda Tinch okean, sharqda

Atlantika okeani, janubda Meksika ko'rfazi bilan tutashib ketgan. Undan tashqari, AQSHga Gavay orollari, Guam oroli, Sharqiy Samoa, Virgin orollari hamda Kuba orolidagi Guantanamo harbiy bazasi qarashlidir. Chegaralarning umumiy uzunligi — 12248 km. Qirg'oq bo'ylab chegara uzunligi — 19924 km. AQSH maydon jihatdan dunyoda Rossiya, Kanada va Xitoydan keyin to'rtinchi o'rinda turadi. AQSH tog'lar va bepoyon tekisliklar mamlakati. Mamlakat relyefining g'arbiy qismi tog'li, sharqiy qismi esa tekisliklardan iborat. Mamlakat hududining yarmiga yaqinini tog' tizmalari, tog' tekisliklari va Kordilyer yassi tog'lari egallagan. Kordilyer tog'larining yuqori cho'qqisi balandligi 4000 m bo'lgan Uit (4419 m) hisoblanadi. Sharqda Appalachi tog'lari joylashgan. Ularning baland nuqtasi — Mittchel (2037 m). Mamlakat va Shimoliy Amerikaning yuqori nuqtasi Mak-Kinli tog'i (6199 m) Alyaskada joylashgan. Qit'aning eng past joyi Kaliforniyadagi O'lim vodiysi (dengiz sathidan — 86 m pastda) hisoblanadi. Kordilyer va Appalachi tog'lari orasida Markaziy va Ulug' keng ichki vodiylari hamda Meksika pasttekisliklari yastanib yotibdi. Asosiy daryolari Missisipi, Missuri, Ogayo, Kolorado, Kolumbiya va Yukon (irmoqlari bilan birga). Mamlakatning shimoli sharqida Yuqori Michigan, Guron, Eri, Ontario ko'llaridan iborat Buyuk ko'llar tizimi mavjud. Mamlakatda ko'p sonli muzliklar davri ko'llari bor. Yuta shtatida joylashgan Katta Sho'r ko'l ham muzliklar davrida vujudga kelgan. AQSH quyidagi foydali qazilmalar zaxiralariga ega: ko'mir, tabiiy gaz, neft, oltin, uran, mis, qo'rg'oshin, temir, aluminiy rudalari, fosforitlar hamda yog'och. Haydaladigan yerlar butun hududning 20%, o'rmonlar va dashtliklar 29%, o'tloq va yaylovlar 26% ini tashkil qiladi.

Iqlimi — keskin kontinental. O'simlik dunyosi juda boy. Bu yerda iqlim zonalarining o'zgarishiga qarab flora ham o'zgarib boradi. AQSHda mox va lishayniklardan tortib palma va sekvoyya daraxtlarigacha mavjud. Hayvonot olami ham turfa, u ham flora kabi iqlim zonalarining o'zgarishiga qarab o'zgarib boradi.

**Davlat tuzilishi, siyosiy partiyalari.** Davlat tuzilishi — federativ respublika. Mamlakat tarkibiga

50 ta shtat (Aydaxo, Ayova, Alabama, Alyaska, Arizona, Arkanzas, Virjiniya, Vashington, G'arbiy Virjiniya, Viskonsin, Vayoming, Vermont, Gavayya, Delaver, Jorjiya, Illinoys, Indiana, Kaliforniya, Kolorado, Konnektikut, Kanzas, Kentukki, Luiziana, Men, Merilend, Massachusetts, Michigan, Minnesota, Missisipi, Missuri, Montana, Nebraska, Nevada, Nyu-Hempshir, Nyu-Jersi, Nyu-Meksika, Nyu-York, Ohayo, Oklaxoma, Oregon, Pensilvaniya, Rod-Aylend, Shimoliy Karolina, Shimoliy Dakota, Tennessi, Texas, Florida, Janubiy Karolina, Janubiy Dakota, Yuta va Kolumbiya okrugi kiradi. AQSHga qaram hududlar: Beyker oroli, Xoulend oroli, Kingem-Rif, Sharqiy Samoa, Guam, Jarvis, Jonston attoli, Miduey, Navassa orollari, Palmira attoli, Puerto-Rika, Virginiya orollari, Ueyn orollari. AQSH 1776-yil 4-iyulda mustaqillikka erishdi (ilgari Angliya mustamlakasi). Milliy bayramlari: 4-iyul — Mustaqillik kuni, 22-fevral — Jorj Vashington tug'ilgan kun, 11-noyabr — Urush qahramonlari kuni. Qonunchiligi ingliz umumiy huquqiga asoslangan. Davlat va hukumat boshlig'i Prezident. Qonun chiqaruvchi hokimiyatni Senat va Vakillar palatasidan tashkil topgan ikki palatali parlament amalga oshiradi. AQSHda asosiy ikkita yirik partiya mavjud: Respublikachilar va Demokratlar.

### ***Iqtisodi, transport kommunikatsiyalari.***

AQSH — ilg'or industrial va sanoatning yuqori diversifikatsiyasiga ega davlat bo'lib, neft sanoati (dunyoda ikkinchi o'rinda), metallurgiya (aluminium, qo'rg'oshin, mis ishlab chiqarish bo'yicha eng yirik davlat), mashinasozlik, aerokosmik, kimyo, elektron, oziq-ovqat, yog'ochni qayta ishlash va boshqa sanoat sohalari keng rivojlangan. 2006-yil YIM miqdori — 11628083 mln dollarni (aholi jon boshiga — 38613 doll.) tashkil etgan. Qulay iqlim sharoiti va unumdor yerlarining mavjudligi qishloq xo'jaligi rivojlanishiga yaxshi omil yaratadi. Chorvachilik mahsulotlari ham turfa (dunyoda go'sht mahsulotlarini ishlab chiqarish bo'yicha birinchi o'rinda). Asosiy qishloq xo'jalik mahsulotlari — makkajo'xori, soya, sorgo (uchalasini yetishtirish bo'yicha dunyoda birinchi o'rinda), bug'doy (uchinchi o'rinda), shakarqamish (ikkinchi o'rinda),



tamaki (ikkinchi o'rinda), paxta (uchinchi o'rinda), kartoshka. Shu bilan bir qatorda AQSH baliq ovlash hajmi bo'yicha ham ilg'or mamlakatlardan biri hisoblanadi. Qishloq xo'jaligi mahsulotlarining katta qismi boshqa mamlakatlarga eksport qilinadi. Qo'shma Shtatlar tashqi savdo hajmi bo'yicha dunyo mamalkatlaridan oldinda. Asosiy savdo hamkorlari: G'arbiy Yevropa mamlakatlari, Kanada, Yaponiya.

Temiryo'llarining umumiy uzunligi — 240000 km. Dunyodagi eng zamonaviy avtomobil yo'llari tarmog'iga ega bo'lib, umumiy uzunligi — 6365590 km (ulardan 88641 km tez yurishga mo'ljallangan trassalar), sifati bo'yicha ham oldingi o'rinda. Ichki suv yo'llarining umumiy uzunligi — 41009 km. Mamlakatning asosiy portlari: Ankorij, Boston, Gonolulu, Long-Bich, Los-Anjeles, Mayami, Norfolk, Yangi Orlean, Nyu-York, Portlend, San-Fransisko, Xyuston, Korpus-Kristi, Filadelfiya.

**Tarixi.** Birinchi yevropaliklar hindular istiqomat qilgan hozirgi AQSH hududiga ilk bor XVI asrda kelishgan. Shimoliy Amerikaning mustamlakalashtirishi oqibatida XVIII asrga kelib bu yerda uchta ta'sir zonasi tarkib topdi: ispanlar — Floridada, Texasda va Tinch okean sohillarida, fransuzlar — Buyuk Ko'llar va Luizianada, inglizlar — Atlantika sohillari bo'ylaridagi hududlarda. 1774-yilda 13 ta britan mustamlakasi mustaqillik uchun kurash boshlab, 1776-yil 4-iyulda AQSH tashkil topishi bilan tugadi. J.Vashington va B. Franklin tomonidan tuzilgan demokratik davlatning asosiy tamoyillari bilan birga shtatlarning keng huquqlari hamda kuchli federal hokimiyat tamoyillari chambarchas bog'lanib ketgan Konstitutsiya 1787-yil 17-sentabrda qabul qilindi. XIX asrning birinchi yarmida AQSH hududlarining kengaytirilishi yangi yerlarni xarid qilish bilan birga fransuzlardan Luizianani, ispanlardan Floridani, o'zga davlatlarning koloniyalarini bosib olish vositasida amalga oshirildi. Yangi yerlarni kolonizatsiya qilish mahalliy hindularni bo'ysundirish yo'li bilan olib borildi. Shimoliy va Janubiy shtatlar o'rtasida iqtisodiy va madaniy qarama-qarshiliklar 1781-yilda federatsiyadan ajrab chiqishni e'lon qilgan

11 ta janubiy shtatlar Konfederatsiyasining tashkil etilishiga olib keldi. Fuqarolar urushi boshida bir qator muvaffaqiyatlarni qoʻlga kiritgan janubliklar oxir-oqibat magʻlubiyatga uchrab, Shimol gʻalaba qozondi va federatsiya saqlab qolindi. 1867-yilda AQSH Rossiyadan Alyaskani va Aleut orollarini xarid qildi. XIX asr oxiri — XX asr boshlarida Yevropa va boshqa qitʼalardan koʻplab muhojirlar koʻchib kelishi oqibatida AQSH iqtisodi qudratli davlatga aylandi. Markaziy Amerika, Karib havzasi mamlakatlari va Tinch okeanda oʻz taʼsir zonalarini faollik bilan kengaytirib borgan AQSH uzoq vaqtgacha Yevropada boʻlib oʻtayotgan voqealarga nisbatan betaraflikni saqlab keldi. AQSH 1917-yil 4-aprelda Birinchi jahon urushiga qoʻshilib, urush tugaganidan soʻng Senat Versal shartnomasi qarorlarini qoʻllashdan bosh tortdi. Urushdan keyingi mamlakat iqtisodining tez surʼatlar bilan oʻsishi 1929-yilda Buyuk depressiya — liberal iqtisodning chuqur inqirozi davri bilan almashindi. Inqiroz ishlab chiqarishning qisqarishi va ishsizlar sonining keskin koʻpayishiga olib keldi. Yapon samolyotlari Pyorl-Xarbordagi Amerika harbiy bazasini bombardimon qilishganidan soʻng, AQSH 1941-yil 7-dekabrda Ikkinchi jahon urushiga qoʻshildi. AQSH qoʻshinlari Yaponiyaga qarshi harbiy harakatlarni boshladi. Bu toʻqnashuvlarning asosiy qismi Tinch okean hududlarida va dengizlarda sodir boʻlgan. Tehron konferensiyasidan (1943) soʻng AQSH Fransiyaning Atlantika hududlariga qoʻshin kiritib, Germaniyani tormor qilishda ishtirok etdi. Yaponiyaga qarshi Tinch okean orollari va Janubi sharqiy Osiyoda muvaffaqiyatli harbiy harakatlar olib borayotgan AQSH 1945-yil 6-avgustda Yaponiyaning Xirosima, 9-avgustda esa Nagasaki shaharlariga atom bombasini tashladi. Urushdan soʻng AQSH Gʻarbiy Yevropa mamlakatlari iqtisodini tiklashga (Marshall rejasi) va Yevropa hamda dunyoning boshqa hududlarida kommunistik taʼsirning yoyilishiga qarshilik («sovuq urush») koʻrsatib keldi. Mamlakat ichida 40-yillar oxiri — 50-yillarning boshlarida kommunistik partiyaga moyillikda gumon qilingan fuqarolar AQSH hokimiyati tomonidan taʼqib ostiga olindi. Urushdan keyingi yillarda AQSH toʻgʻridan

to'g'ri yoki bilvosita bir qator yirik xalqaro mojaralarda ishtirok etdi (Karib inqirozi, Vyetnam urushi, arab— isroil urushi). AQSH qo'shinlarining Vyetnamdagi urushda ishtirok etishga qarshi boshlangan patsifistlar (urushga qarshi) harakati qora tanli aholining irqiy segregatsiya (kamsitilish) qilinishiga qarshi kurashning boshlanishiga to'g'ri keldi. Qora tanlilarga o'z haquhuqlari uchun kurashning tinch usullarini targ'ib qilgan Martin Lyuter King 1968-yil aprelda o'ldirildi, ammo uning siyosiy faoliyati qora tanlilarning Amerika jamiyati integratsiyasiga sezilarli ta'sir ko'rsatdi. 70-yillarda AQSHda ro'y bergan asosiy voqealardan biri bu «Uotergeyt mojarosi» bilan bog'liq bo'lib, prezident Niksonning iste'foga chiqishidir. J. Karter prezidentligi davrida AQSH Xitoy bilan munosabatlarini yaxshilab, Misr va Isroil o'rtasida separat tinchlik sulhining imzolanishiga ko'maklashdi, biroq AQSHning Tehrondagi elchixonasidan garovga olinganlarni ozod qilish operatsiyasining muvaffaqiyatsizlik bilan tugashi demokratik partiyaning saylovlarda mag'lubiyatga uchrashi va mamlakat prezidenti etib 1980-yili R. Reyganning saylanishiga olib keldi. R. Reygan Sovet Ittifoqi hukumati bilan boshlagan muzokaralari 1989-yilda prezidentlik lavozimida uni almashtirgan J. Bush tomonidan davom ettirilib, qurollanish poygasining cheklanishiga va «sovuq urush»ning tugashiga olib keldi. Tashqi siyosatdagi muvaffaqiyatlariga qaramasdan (Quvaytning Iroq qo'shinlaridan ozod qilinishi), respublikachilar 1992-yilgi saylovlarda mag'lubiyatga uchradi.

AQSHning yangi prezidenti Bill Klinton davrida mamlakatning tashqi faolligi 1997-yilda Isroil va Falastinni Ozod qilish tashkiloti (TOQT) o'rtasida tinchlik sulhining imzolanishida o'z aksini topib, unga ko'ra Isroil Falastinning avtonomiyaga bo'lgan huquqini tan oldi. Shu bilan bir qatorda AQSH Yugoslaviya mojarosida tinchlik munosabatlarini o'rnatish jaryonida faol ishtirok etdi. Biroq serblar va xorvatlar hamda Bosniya inqirozini chetdan aralashuvsiz hal qilishga erishilgan bo'lsa-da, Yugoslaviyaning Kosovo viloyatida yashovchi albanlar muammosini hal etish

uchun AQSH va uning NATO bo'yicha ittifoqchilari harbiy kuch ishlatishga majbur bo'ldi. Kosovodagi inqirozni to'xtatish uchun Yugoslaviyaning harbiy va fuqarolik obyektlarining bombardimon qilinishi dunyoning ko'pgina mamlakatlarida, xususan Rossiyada ham e'tiroz hamda qarshilikni vujudga keltirdi. 2000-yil prezident etib saylangan kichik J.Bush lokal mojarolarni hal qilishda kuch ishlatish siyosatini olib bordi. 2001-yil 11 sentabr kuni AQSH hududida Al-Qoida terrorchilik tashkiloti tomonidan amalga oshirilgan qo'poruvchilik oqibatida minglab kishilar halok bo'ldi. 2001—2002-yillari AQSH qo'shinlari Afg'onistonga kiritilib u yerdagi tolibonlar hokimiyati ag'darib tashlandi. 2003-yili Iroqqa qarshi urush boshlanib S.Husayn rejimi ag'darib tashlandi. 2008-yil boshlaridan AQSH iqtisodi kuchli inqirozni boshdan kechirmoqda. Mutaxassislar bu inqirozni miqyosi bo'yicha 1929—1933-yillardagi Buyuk depressiya bilan tenglashtirmoqdalar.

## ANGILIYA (Angilya, Anguilla)

*Rasmiy nomi — Buyuk Britaniya mulki Angiliya (Anguilla). Poytaxti — Valli. Hududi — 96 km<sup>2</sup>. Aholisi — 13495 kishi (2007). Davlat tili — ingliz. Dini — xristianlik. Pul birligi — Sharqiy Karib dollari.*

**Geografik joylashuvi va tabiati.** Karib dengizidagi Angiliya (Anguilla) va Sombrero orollarida va Kichik Antil orollarining shimoliy qismida joylashgan davlat. Angiliya ohaktoshli va marjon qoyalari bilan o'ralgan past orollardan iborat.

Iqlimi — tropik passatli va issiq. Ikkilamchi tropik cho'l-biyobonlar bilan qoplangan. Kemiruvchilar va qushlarning bir qancha turlari yashaydi.

**Davlat tuzilishi va siyosiy partiyalari.** Davlat tuzilishi — 1982-yilda qabul qilingan konstitutsiya bo'yicha hudud o'z ichki boshqaruviga ega. Buyuk Britaniya qirolichasi tomonidan B.Kanti gubernator etib tayinlangan. Hukumat boshlig'i — Ijroiya Kengashining bosh ministri — X.Xyuz. Ma'muriy jihatdan bo'linma-

gan. Siyosiy partiyalari: Angiliya birlashgan partiyasi, Angiliya Xalq Ittifoqi.

**Iqtisodi, transport kommunikatsiyalari.** Iqtisodining asosini dengiz ovchiligi, chet el turizmi tashkil etadi. Kartoshka, no'xat, makkajo'xori, jo'xori yetishtiriladi. Qo'y, echki, cho'chqa boqiladi. Baliq, dengiz qisqichbaqasi ovlanadi. Chetga qisqichbaqa, tuz, jun chiqariladi. 2006-yil YIM miqdori 112 mln dollarni (aholi jon boshiga — 7500 doll.) tashkil etgan. Asosiy savdo hamkorlari — AQSH, Trinidad va Tobago, Buyuk Britaniya.

**Tarixi.** 1493-yilda Angiliya orollariga X. Kolumb ekspeditsiyasi kelib tushgan. Dastlabki aholi punktlariga 1631-yilda gollandlar tomonidan asos solingan. XVII asrda Angiliya inglizlar mustamlakasiga aylantirilgan. XVIII asrda Fransiya orolni 2 marta bosib olish uchun uringan. 1882-yili Buyuk Britaniya Angiliyani mustamlakalari Sent-Kits va Nevis orollariga ma'muriy jihatdan birlashtirdi. 1958—1962-yillarda bu orollar Vest-Indiya federatsiyasi tarkibida bo'ldi, 1967-yilda esa «Buyuk Britaniyaga qo'shilgan davlat» maqomini oldi. Shu yili may oyida Angiliya Sent-Kits va Nevisdan ajralganligini e'lon qildi. 1969-yil fevralda Buyuk Britaniyaning tan olishini talab qilib, bir tomonlama tartibda o'zini mustaqil respublika deb e'lon qildi. 1976-yilda orolga qisman o'z-o'zini boshqarish huquqi berildi. 1980-yilda ingliz parlamenti qabul qilgan qonunga binoan Angiliya Sent-Kits va Nevis orollaridan rasmiy ajraldi. Angiliya va Britaniya Virgin orollari 1981-yil 18-iyunda tashkil topgan Karib havzasi davlatlari oilasi, Sharqiy Karib davlatlari tashkilotiga a'zo bo'lib qo'shildi.

## ANGOLA

*Rasmiy nomi — Angola Respublikasi. Poytaxti — Luanda. Hududi — 1246700 km<sup>2</sup>. Aholisi — 12157245 kishi (2007). Davlat tili — portugal. Dini — katoliklar (65%), protestantlar (20%), majusiylar (10%). Pul birligi — kvanza.*

**Geografik joylashuvi va tabiati.** Afrikaning

janubi g'arbidagi davlat. Janubda — Namibiya (chegara uzunligi — 1376 km), sharqda — Kongo Demokratik Respublikasi (2511 km) va Zambiya (1110 km), shimolda — Kongo (201 km) bilan chegaradosh. Angola g'arbda Atlantika okeani bilan tutashgan. Mamlakatning asosiy qismini balandligi dengiz sathidan 1000—1500 m bo'lgan Angola yassitog'ligi egallagan. Eng yuqori nuqtasi — Moko tog'i (2620 m). Angolaning Kongo, Zambezi, Kasai va boshqa daryolari tog'lardan boshlanadi. Angola neft, olmos, temir rudasi, fosfat, mis, oltin, uranga boy.

Iqlimi — ekvatorial-mussonli va tropik passatli. Mamlakat janubiga xos bo'lgan cho'l o'simliklari, shimolda savannalar va quyuq tropik o'rmonlar bilan tugaydi. Angolada Afrika qit'asida uchraydigan barcha yirik hayvonlar yashaydi: fil, jirafa, karkidon, zebra, antilopa, sher, gippopotam va h.k.

**Davlat tuzilishi, siyosiy partiyalari.** Davlat tuzilishi — respublika. Ma'muriy-hududiy jihatdan 18 ta viloyatga bo'lingan. Mustaqilligini Portugaliyadan 1975-yil 11-noyabrda olgan. Qonunchiligi fuqarolik huquqning portugal tizimi va mahalliy urf-odatlariga asoslangan. Milliy bayrami — Mustaqillik kuni 11-noyabrda nishonlanadi. Bir palatali parlamenti — Milliy Assambleya. Angolada 30 dan ortiq partiyalar qayd qilingan.

**Iqtisodi, transport kommunikatsiyalari.** Aholining asosiy qismi qishloq xo'jaligida band. Sanoatning muhim sohasi neft qazib olish bo'lib, YMMning 60% ini tashkil qiladi. 2006-yil YIM miqdori 32224 mln dollarni (aholi jon boshiga — 2650 doll.) tashkil etgan. Neft, suyultirilgan gaz, olmos, qahva, baliq — davlat budjeti kirimining asosiy eksport mahsulotlari hisoblanadi. Asosiy savdo hamkorlari — AQSH, MDH davlatlari, Kuba, Portugaliya, Braziliya. Qishloq xo'jaligi mahsulotlaridan qahva, bug'doy, paxta, shakarqamish, manioka, tamaki eksportga chiqariladi.

Temiryo'llari uzunligi — 3189 km, avtomobil yo'llari — 73828 km. Asosiy portlari — Luanda, Ngenza-Kabolo, Lobitu, Kabinda.

**Tarixi.** Angola portugaliyaliklar tomonidan 1482-yil kashf etilgan. XIX asrdan boshlab Portugaliya

mamlakat ichkarisini egallashga kirishadi. Zambezi va Kongo oralig'ini o'rganib chiqqan portugaliyalik sayohatchi Serpa Pintu 1889-yili Mozambik gubernatori lavozimiga tayinlangandan keyin Angolani Mozambikka qo'shib olishga urinishi muvaffaqiyatsizlikka uchraydi. XX asr boshlarida Angola Portugaliyaning mustamlakasi, 1951-yildan — dengizorti hududi, 1955-yildan — Portugaliya viloyati. 1961-yilda boshlangan milliy-ozodlik kurashi 1975-yil mustaqil Angola Xalq Respublikasi tuzilishi bilan yakunlandi. SSSR qo'llagan Angola ozodligi uchun Xalq harakati va AQSH qo'llab turgan UNITA tashkiloti o'rtasidagi qarama-qarshilik fuqarolar urushiga olib keldi. Bu urushda Janubiy Afrika va Kuba ham ishtirok etgan. 1991-yili tinchlik shartnomasi imzolangan, ammo prezident saylovlarida Dush Santush g'alaba qozonishi yana fuqarolar urushi boshlanishiga sabab bo'lgan. 1992-yildan mamlakatning rasmiy nomi — Angola Respublikasi. 2002-yili rasmiy hukumat va Angolaning to'liq mustaqilligi uchun Milliy ittifoq (UNITA) rahbarlari harbiy harakatlarni to'xtatish to'g'risida qaror qabul qilishdi.

## ANDORRA

*Rasmiy nomi — Andorra Knyazligi. Poytaxti — Andorra-la-Velya. Hududi — 465 km<sup>2</sup>. Aholisi — 70977 kishi (2007). Davlat tili — katalon. Dini — katolik. Pul birligi — yevro.*

**Geografik joylashuvi va tabiati.** Yevropaning janubi g'arbida joylashgan (Sharqiy Pireney) davlat. Janubda va g'arbida Ispaniya (chegara uzunligi — 65 km), sharq va shimolda Fransiya (60 km) bilan chegaradosh. Mamlakat hududi asosan qoyali tog'lardan iborat, eng yuqori nuqtasi — Kama Pedrosa tog'i (2946 m). Ko'p miqdorda muzlik davrida tashkil topgan ko'llar mavjud. Tabiiy boyliklari: gidroenergiya, mineral suv, temir rudasi, qo'rg'oshin, yog'och.

Iqlimi — mo'tadil.

**Davlat tuzilishi, siyosiy partiyalari.** Davlat tuzilishi — suveren parlament knyazligi. Andorra ikkita

knyaz — Fransiya prezidenti hamda Ispaniya yepiskopi-ning mahalliy vakillari tomonidan boshqariladi. Bir palatali parlamenti — Vodiyar Bosh Kengashi, Sud hokimiyati quyidagicha taqsimlangan: fuqarolik ishlarini Perpinyan (Fransiya)dagi Andorra Oliy sudi yoki yepiskop Urnel'skiy cherkov sudi (Ispaniya) hal qilsa, jinoyi ishlarni — Sudlar Tribunali. Birinchi siyosiy partiya — Demokratik ittifoq — 1976-yilda tashkil topgan.

***Iqtisodi, transport kommunikatsiyalari.***

Andorra iqtisodining asosini turizm tashkil qiladi (yiliga 13 mln turist). Sigaretlar, sigaralar va mebel ishlab chiqish yo'lga qo'yilgan. Ekinga yaroqli yer kamligi uchun oziq-ovqatning asosiy qismi import qilinadi. Chorvachilikning asosiy turi — qo'ychilik. 2006-yil YIM miqdori 2113 mln dollarni (aholi jon boshiga — 26800 doll.) tashkil etgan. Asosiy savdo hamkorlari — Fransiya va Ispaniya.

Temiryo'llari yo'q. Avtomobil yo'llari uzunligi — 96 km.

***Tarixi.*** Andorra tarixiy manbalarda dastlab 805-yilda tilga olingan. XIII asrda graf Fua (Fransiya) va katalon yepiskopi Urnel boshqaruviga o'tadi. Ispaniya va Fransiya protektorati ostida bo'lgan Andorra 1993-yilda mustaqil davlat deb e'lon qilinadi.

## ANTIGUA VA BARBUDA

*Rasmiy nomi — Antigua va Barbuda davlati. Poytaxti — Sent-Djons. Hududi — 442 km<sup>2</sup>. Aholisi — 70391 kishi (2007). Davlat tili — ingliz. Dini — protestantlik. Pul birligi — Sharqiy Karib dollari.*

***Geografik joylashuvi va tabiati.*** Vest-Indiyada Karib dengizining sharqiy qismida joylashgan orol-davlat. Mamlakat Antigua, Barbuda va deyarli kimsasiz Redonda orollaridan iborat. Marjon orollarida vulqonlar bor. Tabiiy boyliklari kam.

Iqlimi — tropik.

***Davlat tuzilishi, siyosiy partiyalari.*** Davlat



tuzilishi — konstitutsion monarxiya. 1981-yil 1-noyabr Buyuk Britaniyadan mustaqillikka erishgan (1-noyabr — Milliy bayrami). Davlat boshlig'i — Britaniya monarxi nomidan general-gubernator boshqaradi. Ikki palatali parlament yuqori (Senat) va quyi (Vakillik palatasi) palatalardan iborat. Siyosiy partiyalari — Antigua leyboristlar partiyasi, Birlashgan progressiv partiya.

### ***Iqtisodi, transport kommunikatsiyalari.***

Turizm — iqtisodning muhim sohalaridan bo'lib (YMM — 17%), 2006-yil YIM miqdori 873 mln dollarni (aholi jon boshiga — 12402 doll.) tashkil etgan. Asosiy savdo hamkorlari: AQSH, Buyuk Britaniya, Kanada, Yaponiya, Xitoy va Karib davlatlari. Qishloq xo'jaligi YMMning 5% ini beradi. Paxta, meva va sabzavotlar yetishtirish, chorvachilik rivojlangan.

Temiryo'llari uzunligi — 64 km, avtomobil yo'l-lari — 240 km.

***Tarixi.*** Antigua va Barbuda orollari Kolumb tomonidan 1493-yilda kashf etilgan bo'lib, ispan mustamlakasiga aylandi. 1632-yili Buyuk Britaniya boshqaruvi o'rnatiladi, 1967-yilda Britaniyaning tarkibiy qismiga aylandi. 1981-yilda mustaqillikka erishgan Antigua va Barbuda Britaniya Hamdo'stligi a'zosi bo'lib qolgan.

## **ANTIL OROLLARI**

*Rasmiy nomi — Antil orollari (Niderlndiya mulki). Poytaxti — Villemstad. Hududi — 960 km<sup>2</sup>. Aholisi — 223965 kishi (2007). Davlat tili — niderland. Dini — katoliklar (85%), protestantlar (15%). Pul birligi — Niderlandiya Antil guldeni (florin).*

***Geografik joylashuvi va tabiati.*** Venesuela-dan shimolroqda, Karib dengizi havzasida joylashgan Niderlandiya mulki. Tarkibiga Bonayre, Kyurasao, Saba, Sint-Estatius va Sen-Marten orolining janubiy qismi kiradi. Kyurasao va Bonayre do'ngliklardan iborat marjonli qoyalar bilan o'ralgan orollardir. Kyurasao orolida fosfat konlari, Sen-Marten va Bonayre orollarida tuz konlari mavjud.

Iqlimi — subekvatorial. Janubiy orollarda quruq o'rmonlar va kserafit o'simliklar bilan qoplangan changalzorlar mavjud. Bonayre orolida flamingolar va noyob qushlarning koloniyalari bor.

**Davlat tuzilishi, siyosiy partiyalari.** 1954-yilgi Niderlandiya qirolligi maqomiga ko'ra, Antil orollari qirollikning bir qismi bo'lib, ichki ishlarda muxtoriyatga ega. Niderlandiya qirolligining shaxsiy vakili gubernatordir. Hukumat rahbari — Bosh vazir. Har bir orolda mahalliy boshqaruv organi — vitse-gubernator, kengash va hukumat mavjud. Siyosiy partiyalari: Antil islohot partiyasi, Milliy xalq partiyasi, Yangi Antil harakati, Kyurasao demokratik partiyasi, Ozodlik ishchi fronti, Bonayre vatanparvarlari ittifoqi, Sen-Marten demokratik partiyasi.

**Iqtisodi, transport kommunikatsiyalari.** Iqtisodiyotining asosini chet el turizmi tashkil etadi. Neftni qayta ishlash sohasi rivojlangan. To'qimachilik, sellyuloza-qog'oz, oziq-ovqat, tamaki, spirtli ichimliklar ishlab chiqaruvchi sanoat korxonalari mavjud. 2006-yil YIM miqdori 2500 mln dollarni (aholi jon boshiga — 11400 doll.) tashkil etgan. Asosiy savdo hamkorlari: AQSH, Niderlandiya, Buyuk Britaniya, Venesuela, Kanada.

**Tarixi.** XV asr oxirlarida orollarga dastlab ispanlar kelishdi. 1630—1640-yillarda orollar gollandlar tomonidan, keyinchalik ispanlar, inglizlar, fransuzlar tomonidan istilo qilingan. 1816-yildan Niderlandiya mulkiga aylangan. 1954-yildan Niderlandiya qirolligining o'z-o'zini boshqaruvchi hududidir. Ilgari hudud tarkibiga Aruba oroli ham kirgan. Biroq 1986-yil 1-yanvardan Aruba oroli Niderlandiya qirolligi tarkibidagi alohida hududga aylangan.

## AOMIN

*Rasmiy nomi — Xitoyning ma'muriy hududi Aomin. Ma'muriy markazi — Aomin. Hududi — 15,51 km<sup>2</sup>. Aholisi — 498523 kishi (2005). Davlat tili — portugal. Dini — buddistlar (45%), katoliklar (7%). Pul birligi — pataka.*

**Geografik joylashuvi va tabiati.** Ushbu sobiq portugal mustamlakasi hozirgi kunda Xitoyning bir qismi hisoblanadi. Aomin yarimorolida joylashgan, Janubiy Xitoy dengizi bilan o'ralgan.

Iqlimi — subtropik.

**Davlat tuzilishi, siyosiy partiyalari.** Boshqaruvi tuzilmalari Xitoy hukumati boshqaruv tuzilmalari bilan muvofiqlashtirilgan. Ikkita asosiy siyosiy partiyasi mavjud: Aomin manfaatlari himoyasi Assotsiatsiyasi va Aomin demokratik markazi.

**Iqtisodi, transport kommunikatsiyalari.** Iqtisodining asosiy sohalari — turizm (bunga qimor biznesi ham kiradi), (YMM 25%) va pirotexnika mahsulotlarini ishlab chiqarish. 1998-yilda YMM 3,1 mlrd (aholi jon boshiga — 6900) dollarni tashkil qildi. Asosiy savdo hamkorlari: (Xitoy Aominni oziq-ovqat, chuchuk suv va elektroenergiya bilan ta'minlaydi), AQSH, Yaponiya va Gonkong.

Temiryo'llari yo'q. Bitta avtomobil yo'li va bitta ko'priklar bor. Porti — Makao.

**Tarixi.** Makao shahriga 1557-yilda asos solingan. 1987-yil shartnomasiga binoan Aomin (boshqa nomi — Makao) 1999-yil 20-dekabrda Portugaliya tasarrufidan Xitoyga o'tishi ko'rsatilgan edi. Qo'shma deklaratsiyada Xitoy Makaoning ijtimoiy-iqtisodiy tizimini Makao uning yuridiksiyasiga o'tgandan keyin 50 yil davomida o'zgartirmaslik majburiyatini o'z zimmasiga oldi.

## ARGENTINA

*Rasmiy nomi — Argentina Respublikasi. Poytaxti — Buenos-Ayres. Hududi — 2778417 km<sup>2</sup>. Aholisi — 40258253 kishi (2007). Davlat tili — ispan. Dini — katolik. Pul birligi — pyeso.*

**Geografik joylashuvi va tabiati.** Janubiy Amerikaning janubiy qismida joylashgan. Janubda va g'arbda Chili (chegara uzunligi — 5150 km), sharqda Braziliya (1224 km) va Urugvay (579 km), shimolda Boliviya (832 km) va Paragvay (1880 km) chegaradosh.

Sharq va janubda Atlantika okeani joylashgan. Urugvay va Buyuk Britaniya bilan hududiy kelishmovchiliklar mavjud. Chili va Argentina chegarasida And tog'lari mavjud. Janubiy Amerikaning eng baland cho'qqilari — Akonkagua tog'i (6959 m), Mersedario tog'i (6770 m). Tinch oqar daryo va o'simliklarga boy Gran-Chako tekisligi; Parana va Urugvay daryolari o'rtasidagi Argentina Mesopotamiyasi; Patagoniya cho'llari Argentinaning shimolidan janubigacha joylashgan. Yirik daryolari: Parana, Paragvay, Rio-Salado, Rio-Kolorado. Foydali qazilmalari — qo'rg'oshin, rux, qalay, mis, temir rudasi, neft, uran. Haydaladigan yerlar — 9%, o'tloq va yaylovlar — 52%, o'rmon va butazorlar hududning 22% ini egallagan.

Iqlimi — tropik, subtropik va mo'tadil. Mamlakat qarag'ay, kedr, evkalipt, palma kabi daraxtlarga boy. Argentina shimolida maymunlar, puma va yaguarlar, otselot va tapirlar ko'p. Qushlardan — to'tiqush, flamingo va kolibri uchraydi. Sharqdagi pampaslarda tulkilar, yovvoyi mushuklar, kiyiklar ko'p.

**Davlat tuzilishi, siyosiy partiyalari.** Davlat tuzilishi — respublika. Ma'muriy-hududiy bo'linishi: 22 provinsiya, 1 milliy hudud va poytaxt federal okrugi. 1816-yil 9-iyulda Ispaniyadan mustaqil bo'lib ajrab chiqqan. Milliy bayramlari: 25-may — May inqilobi kuni (1810) va 9-iyul — Mustaqillik kuni. Davlat va hukumat boshlig'i — prezident. Parlamenti ikki palatali — yuqori (Milliy kongress) va quyi (Deputatlar palatasi). Nufuzli siyosiy partiyalari: Xustitsialistlar partiyasi (XP), Fuqarolar radikal ittifoqi (FRI), Demokratik markaz ittifoqi (DMI), Konservativ partiya.

**Iqtisodi, transport kommunikatsiyalari.** Sanoatning asosiy sohalari: oziq-ovqat, avtomobil, to'qimachilik, kimyo va neftkimyo, metallurgiya, matbuot. Qishloq xo'jaligi (bunga baliq ovi ham kiradi) YMM 8% ini beradi. Yetishtiriladigan asosiy qishloq xo'jalik mahsulotlari — bug'doy, sorgo, soya, shakarqamish. 2006-yil YIM miqdori 486366 mln dollarni (aholi jon boshiga — 12081 doll.) tashkil etgan. Argentina bug'doy va mol go'shti eksport qiluvchi

dunyodagi 5 eng yirik davlatlar qatoriga kiradi. Mamlakatga mashina va asbob-uskunalar, ximikatlar, metall, yonilg'i va h.k. import qilinadi. Asosiy savdo hamkorlari: AQSH, Braziliya, Germaniya, Boliviya, Yaponiya, Italiya.

Temiryo'llari uzunligi — 34572 km, avtomobil yo'llari — 208350. Dengiz portlari: Buenos-Ayres, La-Plata, Banya-Blanka.

**Tarixi.** Argentina ispaniyalik Dias de Solis tomonidan 1516-yilda kashf etilganda, bu yerda kam sonli hindu qabilalari yashaganlar, 1536-yilda asos solingan Buenos-Ayres hududi Peru vitse-qirolligiga qo'shib olingan edi. Hozirgi kunda Argentina, Paragvay, Urugvay va Boliviya joylashgan hududda 1776-yili La-Plata vitse-qirolligi tashkil topgan. 1810-yilda qo'zg'olon ko'targan kreol aholisi vitse-qirolni taxtdan ag'darib La-Plata birlashgan provinsiyalar mustaqilligini e'lon qiladi. 1816-yilda ispan qo'shinlari uzil-kesil mag'lubiyatga uchraydilar. 1826-yilda La-Plata birlashgan provinsiyalari Argentina Federativ Respublikasi deb ataladi. XX asrda bir qator harbiy to'ntarishlar amalga oshirilib, oqibatda hokimiyatga 1946—1955 va 1973—1974-yillarda Argentinada hukmronlik qilgan X. D. Peron keladi. 1982-yilda Malvin (Foklend) orollari masalasi bo'yicha harbiy to'qnashuvda Buyuk Britaniyadan mag'lubiyatga uchragan Argentinada harbiy xunta ag'darilib, 1983-yildan hokimiyat tepasiga fuqarolik hukumati keladi.

## ARMANISTON

*Rasmiy nomi — Armaniston Respublikasi. Poytaxti — Yerevan. Hududi — 29800 km<sup>2</sup>. Aholisi — 3007154 kishi (2007). Davlat tili — arman. Dini — xristianlik. Pul birligi — dram.*

**Geografik joylashuvi va tabiati.** G'arbiy Osiyo (Kavkazorti)dagi davlat. Sharqda — Ozarbayjon (chegara uzunligi 566 km), g'arbda — Turkiya (268 km), janubda — Ozarbayjon (Naxichevan, 221 km) va Eron (35 km), shimolda Gruziya (164 km)

bilan chegaradosh. Tog'li Qorabog' muammosi bo'yicha Ozarbayjon bilan jiddiy hududiy kelishmovchiliklar mavjud. Armaniston balandligi dengiz sathidan 1700 m bo'lgan Arman yassitog'ligida joylashgan tog'li o'lka. Eng yuqori nuqtasi — Ararat tog'i (4090 m). Armanistonda yuzdan ortiq ko'llar bor. Eng yirigi — maydoni 1200 km<sup>2</sup> bo'lgan Sevan ko'li. Yirik daryolari — Kaspiy dengiziga quyiladigan Araks va Kura. Mamlakat mineral buloqlari bilan mashhur. Uncha ko'p bo'lmagan oltin, molibden, mis, rux zaxiralari bor. Ko'p miqdorda qurilish toshlari mavjud. Haydaladigan yerlar hududning 17%, yaylov va o'tloqlar 20% ini tashkil qiladi.

Iqlimi — quruq kontinental. Armanistonning tog'oldi hududlari o'rmonlar, tog'lar esa alp yaylovlaridan iborat. Milliy qo'riqxonalarda qo'ng'ir ayiq, yovvoyi cho'chqa, shoqol va boshqa hayvonlar uchraydi.

**Davlat tuzilishi, siyosiy partiyalari.** Davlat tuzilishi — demokratik respublika. 1920-yil 29-noyabrda tuzilgan Armaniston Respublikasi 1922-yil 30-dekabrda SSSR tarkibiga kirgan. 1991-yili Armaniston mustaqilligi to'g'risidagi Deklaratsiya imzolangan. Milliy bayrami — 28-may — Mustaqillik kuni. Davlat boshlig'i — prezident. Bir palatali parlament — Oliy Kengash. Eng nufuzli siyosiy partiyalari: Arman umummilliy harakati, Liberal-demokratik partiya, Respublika partiyasi, Xristian-demokratik partiya, Dashnoqsutyun va h.k.

**Iqtisodi, transport kommunikatsiyalari.** Iqtisodning asosiy sohalari: rangli metallurgiya, mashinasozlik, kimyo, metallni qayta ishlash, yengil oziq-ovqat sanoati, qurilish materiallarini ishlab chiqarish. Qishloq xo'jaligida ishchi kuchining 31% i band. Sitrus mevalar, paxta yetishtiriladi; chorvachilik rivojlangan; mashhur konyak va vino turlari ishlab chiqariladi. 2006-yil YIM miqdori 12875 mln dollarni (aholi jon boshiga — 4281 doll.) tashkil etgan. Eksportga mashinalar va transport uskunalari, qora va rangli metall, kimyoviy o'g'itlar chiqariladi. Asosiy savdo hamkorlari — MDH davlatlari.

Temiryo'llari uzunligi — 840 km, avtomobil yo'llari — 11300 km.

**Tarixi.** Hozirgi Armaniston hududidagi dastlabki

davlat tuzilmasi — Urartu (m.a. XIII asr). Mamlakat ko'p yillar davomida ossuriyaliklar, VII asrda esa mahalliy aholi bilan aralashib arman millatiga asos solgan hind-yevropa qabilalari bosqiniga duchor bo'lgan. Yangi davlat Ahamoniylar, Iskandar Zulqarnayn, Rim imperiyasi hukmronligi ostida bo'lgan. VII—XV asrlarda Armanistonga arablar, vizantiyaliklar, saljuqiy turklar, mo'g'ul-tatarlar hujum qilishgan. XVI—XVIII asrlarda mamlakatni Eron va Turkiya bo'lib oladi, XIX asr boshlarida Armanistonning sharqiy qismi Rossiyaga qo'shib olinadi. Armanlarning Turkiyaga qarshi milliy-ozodlik kurashining 1894—1896-yillari va 1915—1916-yillari bu millat ommaviy qirg'in qilingan (2 million armani halok bo'lgan). Sovet hokimiyatining oxirgi yillarida Armaniston va Ozarboyjon o'rtasida Tog'li Qorabog' hududi bo'yicha mojaro vujudga kelib, bu harbiy to'qnashuvga olib keldi. Bu muammo hozirgi kunda ham oxirigacha hal etilmagan.

## ARUBA

*Rasmiy nomi — Aruba. Poytaxti — Oranestad. Hududi — 193 km<sup>2</sup>. Aholisi — 72145 kishi (2007). Davlat tili — golland. Dini — katolik (82%). Pul birligi — Aruba florini.*

**Geografik joylashuvi va tabiati.** Karib dengizining sharqiy qismida Kichik Antil orollarining birida joylashgan Vest-Indiyadagi davlat. O'simlik dunyosi unchalik boy emas.

Iqlimi — subekvatorial.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Niderland qirolligining sobiq avtonom qismi bo'lgan Aruba 1966-yilda mustaqillikka erishgan. Qonunchiligi niderland fuqarolik huquqi tizimiga asoslangan. Milliy bayrami — 18-mart — Aruba bayrog'i kuni. Davlat boshlig'i — golland monarxi (uning nomidan gubernator ish yuritadi). Asosiy siyosiy partiyalari: Xalq saylov harakati va Aruba xalq partiyasi.

**Iqtisodi, transport kommunikatsiyalari.**

Iqtisodining muhim sektorlaridan biri — turizm. Offshor bank biznesi, neft tozalash va yuk saqlash ham rivojlangan. Qishloq xo'jaligi aloqe yetishtirish, uy hayvonlarini boqish va baliq ovlashdan iborat. 2006-yil YIM miqdori 2130 mln dollarni (aholi jon boshiga — 28000 doll.) tashkil etgan. Asosiy savdo hamkorlari — AQSH va YI davlatlari.

Temiryo'llari yo'q. Avtomobil yo'llari uzunligi — 380 km. Dengiz portlari: Oranestad, Sent-Nikolas.

**Tarixi.** XV asrda ispanlar Antil orollarini kashf etganidan so'ng Aruba dastlab Ispaniya, keyin Gollandiya mustamlakasiga aylanadi. 1986-yili orol muxtoriyat maqomiga, 1996-yildan esa mustaqillikka ega bo'ldi.

## AFG'ONISTON

*Rasmiy nomi — Afg'oniston Respublikasi.  
Poytaxti — Kobul. Hududi — 652090 km<sup>2</sup>.  
Aholisi — 31504069 kishi (2007). Davlat tili —  
doriy (50%), pushtun (35% aholi so'zlashadi).  
Dini — islom. Pul birligi — afg'oni.*

**Geografik joylashuvi va tabiati** Osiyoning janubi g'arbidagi davlat. Janubda — Pokiston (chegara uzunligi 2430 km), g'arbda — Eron (936 km), shimolda — Tojikiston (1206 km), Turkmaniston (744 km) va O'zbekiston (137 km), sharqda — Xitoy (76 km) bilan chegaradosh. Tog'lar mamlakat hududining 75% ini egallaydi. Asosiy tog' tizimi — Hindikush — Afg'onistonning shimoli sharqida joylashgan. Afg'onistonning eng yuqori nuqtasi — Novshak tog'i (7475 m). Shimoli va janubi g'arbida Baqtriya, Registon, Dashti-Margo tekisliklari mavjud. Yirik daryolari — Amudaryo, Hilmand, Herirud, Kobul. Foydali qazilmalari — tabiiy gaz, neft, ko'mir, mis, oltinugurt, sink, temir rudasi, qimmatbaho va yarim qimmatbaho toshlar. Haydaladigan yerlar — 12%, yaylov va o'tloqlar — 46%, o'rmon va butazorlar — 3%.

Iqlimi — kontinental, subtropik. Mamlakatda cho'l



va chala cho'l o'simliklari ko'p, 1800 m dan balandlikda ignabargli o'rmonlar, janubda esa xurmo va sitrus daraxtlari o'sadi. Yovvoyi hayvonlardan tog' echkileri, bo'rilar, shoqollar, ayiqlar, ohular, tukilar, yovvoyi mushuklar uchraydi.

**Davlat tuzilishi, siyosiy partiyalari.** Davlat boshlig'i — prezident. Davlat 30 viloyatga bo'lingan. Mustaqillikka 1919-yil 19-avgustda erishgan. Milliy bayramlari: 19-avgust — Mustaqillik kuni, 4-may — Xotira kuni. Qonun chiqaruvchi hokimiyat — bir palatali parlament. Asosiy siyosiy partiyalari: Afg'oniston Islom jamiyati, Afg'oniston Islom partiyasi va h.k.

**Iqtisodi, transport kommunikatsiyalari.** Iqtisodi asosan qishloq xo'jaligiga yo'naltirilgan. 2006-yil YIM miqdori 21500 mln dollarni (aholi jon boshiga — 800 doll.) tashkil etgan. Eksportga tabiiy gaz, meva va yong'oq, qo'lda to'qilgan gilamlar, movut, paxta, qorako'l chiqaziladi. Oziq-ovqat va neft mahsulotlari import qilinadi. Sanoati sust rivojlangan. Qishloq xo'jaligida natural xo'jalik hukmronlik qiladi.

Temiryo'llari uzunligi — 24,6 km; avtomobil yo'llari — 21000 km; asosan Amudaryodan o'tadigan suv yo'llari uzunligi 1200 km (500 tonnagacha bo'lgan kemalar suzishi mumkin).

**Tarixi.** Eron, Xitoy va Hindistonga boradigan yo'llarda joylashgan Afg'oniston Iskandar Zulqarnayn, hindlar, forsiylar, arablar, mo'g'ul-tatarlar, Bobur tomonidan zabt etilgan edi. 1747-yilda Ahmadshoh boshliq dastlabki afg'on davlati tuziladi. Durroniylar sulolasi 1818-yilgacha, aniqrog'i, Buyuk Britaniya Afg'onistonni o'z nazorati ostiga olgunga qadar hukmronlik qilgan. 1919-yilda hokimiyatni egallagan Omonulloxon Sovet Rossiyasi yordamida mustaqilligini e'lon qiladi. 1929—1973-yillarda hokimiyat Nodirshoh sulolasi qo'lida bo'lgan. 1978-yilgi navbatdagi harbiy to'ntarishdan so'ng hokimiyat tepasiga kelgan Muhammad Taraqqiy Afg'onistonni demokratik respublika deb e'lon qiladi. 1979-yili hokimiyat tepasiga kelgan Babrak Karmalni qo'llash uchun sovet qo'shinlarining «cheklangan kontingenti» mamlakatga kiritiladi.

1986-yilda uning o'rniga Najibullo keladi. Afg'on qurolangan muxolifatchilariga qarshi kurashda 15000 sovet askari halok bo'lgan. 1989-yilda sovet qo'shinlari Afg'onistondan chiqarilgandan keyin ham hukumat va mujohidlar o'rtasidagi kurash davom etgan. Pokiston yordamida hokimiyat Tolibon islom harakati qo'liga o'tadi. 2001—2002-yillarda AQSH boshchiligida tolibonlarga qarshi olib borilgan antiterroristik harakat natijasida hokimiyat demokratik fuqarolar hukumati qo'liga o'tdi. 2004-yili Afg'oniston prezidenti etib Hamid Karzay saylangan.

## BAGAM OROLLARI

*Rasmiy nomi — Bagam orollari Hamdo'stligi. Poytaxti — Nassau. Hududi — 13864 km<sup>2</sup>. Aholisi — 307287 kishi (2007). Davlat tili — ingliz. Dini — katoliklar (26%), anglikanlar (21%), boshqa konfessiyalar (18%). Pul birligi — Bagam dollari.*

**Geografik joylashuvi va tabiati.** Vest-Indiyada, 700 dan ortiq orollarda va ko'plab (2500 ta atrofida) Florida qirg'oqlaridan Kubaning sharqiy qirg'oqlarigacha cho'zilib ketgan marjonli qoyalarda joylashgan davlat. Yirik orollari: Nyu-Providens, Andros, Katta Bagama, Katta Abako, Kichik Abako, Berri va boshqalar. Bagam orollarining relyefi tekis bo'lib, uncha baland bo'lmagan tepaliklar dengiz sathidan 60 metrgacha balandlikda joylashgan.

Iqlimi — tropik, passat. Orollarda daryolar yo'q, lekin dengiz bilan tutashib turadigan ko'plab sho'r ko'llar bor. Orollar tabiiy resurslardan tuz, bo'r, aroqanitlarga boy. Orollar asosan savanna va to'qaylar bilan qoplangan. Qarag'ayli o'rmonlar bor. Yirik orollardan Andros va Katta Abakoda qimmatbaho daraxt turlari (qizil, sariq, temir) bor doimiy yashil tropik o'rmonlar saqlanib qolgan. Qirg'oq bo'ylarida kokos palmalari o'sadi. Bagam orollarining hayvonot dunyosi kambag'al, asosan qushlar ko'p, ko'rshapalak, kaltakesak, ilonlar

uchraydi. Dengizda turli baliqlar, qisqichbaqa va mollyuskalar ko'p.

**Davlat tuzilishi, siyosiy partiyalari.** Bagam orollari Buyuk Britaniya rahbarligidagi Hamdo'stlik tarkibiga kiradi. BMT va XV F a'zosi. Davlat boshlig'i — Britan monarxi, uning nomidan general-gubernator ish yuritadi. Hukumat boshlig'i — premyer-ministr. Qonun chiqaruvchi organi — Senat va Yig'ilish palatasidan iborat ikki palatali parlament. Asosiy siyosiy partiyalari — Taraqqiyot liberal partiyasi, Ozod milliy harakat.

**Iqtisodi, transport kommunikatsiyalari.** Davlat iqtisodiyotining asosini chet el turizmi va bank offshori tashkil etadi. Mamlakat dunyoning ilg'or moliya markazlaridan biridir. Soliq imtiyozlari mavjudligi bois ko'plab kompaniyalar Bagam orollarida o'z banklarini ochishgan. Turizm industriyasidan tashqari sanoatning quyidagi sohalari rivojlangan: neftni qayta ishlash, farmatsevtika, sement, tuz ishlab chiqarish va rom tayyorlanadi. Qishloq xo'jaligida shakarqamish, pomidor, ananas, sitruslar yetishtiriladi, baliq ovlash va dengiz mahsulotlarini qayta ishlash rivojlangan. Yog'och tayyorlanadi. Eksporti: neft mahsulotlari, kimyo-sanoat mahsulotlari, tuz, baliq, rom. Importi: mashina va transport uskunalari, benzin va neft mahsulotlari, to'qimachilik mahsulotlari. 2006-yil YIM miqdori — 5295 mln dollarni (aholi jon boshiga — 17218 doll.) tashkil etgan. Asosiy savdo hamkorlari: AQSH, Kanada, Buyuk Britaniya, Fransiya, Daniya.

Temiryo'llari yo'q, mamlakat iqtisodida undagi ko'plab avtomobil yo'llarining ahamiyati katta.

**Tarixi.** Qadimda mamlakat hududiga dastlab hindular kelib joylashgan. Orollar 1492-yilda X. Kolumb tomonidan kashf qilingan. Oldin Ispaniya koloniyasi, 1783-yildan esa Buyuk Britaniya koloniyasiga aylantirilgan. 1964-yili mamlakatga o'z-o'zini boshqarish huquqi berildi. 1973-yili Bagam orollari mustaqil davlatga aylandi, lekin Britan Hamdo'stligi tarkibida qoldi.

## BANGLADESH

*Rasmiy nomi* — *Bangladesh Xalq Respublikasi*. *Poytaxti* — *Dakka*. *Hududi* — *143998 m<sup>2</sup>*. *Aholisi* — *144746427 kishi (2007)*. *Davlat tili* — *bengal, ingliz*. *Dini* — *islom*. *Pul birligi* — *taka*.

**Geografik joylashuvi va tabiati.** Osiyo janubida joylashgan davlat. Janubi sharqda Myanma, g'arbda, shimolda va sharqda Hindiston bilan chegaradosh. Bengal ko'rfazi mamlakatning janubini yuvib turadi. Bangladesh — tekisliklardan iborat mamlakat. Uni ko'p sonli daryolar kesib o'tadi. Ulardan eng yiriklari Gang va Braxmaputra. Mamlakat maydonining 1/10 qismini Chittagong tepaliklari egallagan. Baland tog'i — Modok-Mual (1003 m).

Iqlimi — subekvatorial, mussonli. Hududning 14% ini tropik o'rmonlar egallagan, palma va mangr daraxtlari keng tarqalgan. Hayvonot dunyosi boy. Bu yerda maymun, lemur, bengal yo'lbarsi va ayiq, chiyabo'ri, yo'l-yo'l sirtlon, to'ngiz, fil, timsoh kabi jonivorlarni uchratish mumkin. Qushlarning 700 dan ziyod turi va ilonlar keng tarqalgan.

**Davlat tuzilishi, siyosiy partiyalari.** Bangladesh Buyuk Britaniya boshqarayotgan Millatlar Hamdo'stligi tarkibiga kiruvchi parlamentar respublika. Davlat boshlig'i — parlament tomonidan 5 yil muddatga saylanadigan prezident. Hukumat boshlig'i — premyer-ministr. Bangladesh tarkibiga 19 okrug kiruvchi 4 viloyatga bo'lingan. Asosiy portlari: Kxulna, Chittagong. Siyosiy partiyalari: Bangladesh Milliy partiyasi, Xalq ligasi, Milliy partiya, Bangladesh millatchilar partiyasi.

**Iqtisodi, transport kommunikatsiyalari.** Bangladesh — agrar mamlakat. Tamaki, choy, shakar-qamish yetishtiriladi. Asosiy madaniy o'simliklar: sholi, bug'doy, dukkaklilar. Sanoat tarmoqlarida to'qimachilik, qog'oz, shakar, mineral o'g'itlar ishlab chiqarish korxonalari mavjud. Metallga ishlov berish, metallurgiya, sement, neftni qayta ishlash zavodlari faoliyat ko'rsatmoqda. Bulardan tashqari kemasozlik, oziq-ovqat, avto va ra-

dio yig'ish korxonalari ham mavjud. 2006-yil YIM miqdori — 263434 mln dollarni (aholi jon boshiga — 1819 doll.) tashkil etgan. Asosiy savdo hamkorlari: Buyuk Britaniya, AQSH, Yaponiya, Singapur.

**Tarixi.** Bengal qabilalari Quyi Gang vodiysiga m.a. 1000-yilda kirib kela boshladilar. Keyinchalik Vanga davlati tashkil topdi. Bangladesh bu yerda islomni tarqatgan boburiylar hukmronligi ostida qoladi. 1757-yilda mamlakat ingliz mustamlakachilari hukmronligiga itoat etishga majbur bo'ldi. 1947-yilda Sharqiy Bengaliya hududlari Pokistonga qo'shib yuborildi. «Bengallar yeri» (Bangladesh) 1971-yilda mustaqil Xalq respublikasi deb e'lon qilindi. 1975-yilda harbiy holat tartibi e'lon qilindi. 1978—1979-yillarda fuqarolik boshqaruvi tiklanadi. 1982-yilda harbiy to'ntarish oqibatida mamlakatda harbiy tuzum o'rnatildi. 1988-yili Bangladesh islom respublikasi deb e'lon qilinadi. 2007-yili harbiylar hokimiyatni o'z qo'liga olib korrupsiyaga va siyosiy vaziyatni sog'lomlashtirishga qaratilgan bir qator favqulodda choralar ko'rishdi.

## BARBADOS

*Rasmiy nomi — Barbados. Poytaxti — Brijtaun. Hududi — 431 km<sup>2</sup>. Aholisi — 281128 kishi (2007). Davlat tili — ingliz. Dini — protestantlar (67%), katoliklar (4%). Pul birligi — Barbados dollari.*

**Geografik joylashuvi va tabiati.** Barbados Karib dengizining sharqidagi shu nomli orolda joylashgan davlat. Orol relyefi tekisliklardan iborat. Orol yuzasi qirg'oqdan markazga qarab terassa shaklida ko'tarilgan. Dengiz sathidan 340 m balandlikda joylashgan (Xilabi — Barbadosning eng yuqori cho'qqisi).

Iqlimi — tropik, passatli. Yog'ingarchilik va to'fonlar tez-tez bo'lib turadi. Tabiiy zaxiralari: neft, tabiiy gaz, baliq. Tropik o'simliklar bilan qoplangan. Hayvonot olami kambag'al: maymunlar, qurbaqa, quyon, mangust, bir necha qush turlari uchraydi.

**Davlat tuzilishi, siyosiy partiyalari.** Barbados

Buyuk Britaniya Hamdo'stligi tarkibiga kiradi. BMT, XVF, ADT a'zosidir. Davlat rahbari — Buyuk Britaniya monarxi nomidan ish yurituvchi general-gubernator. Hukumat rahbari — Bosh vazir. Qonun chiqaruvchi organ — ikki palatali parlament (Senat va Umum-palata). Hududiy jihatdan 11 ta ma'muriy hududga bo'lingan. Asosiy siyosiy partiyalari: Milliy demokratik partiya, Demokratik leyboristlar partiyasi, Barbados leyboristlari partiyasi.

**Iqtisodi, transport kommunikatsiyalari.** Iqtisodiyotining asosini shakar ishlab chiqarish va chet el turizmi tashkil etadi. Turizm industriyasi Karib dengizi havzasidagi aholining yuqori turmush darajasini ta'minlab bermoqda. Yengil, oziq-ovqat, tabiiy gaz va neft qazib olish sanoati rivojlanmoqda. Baliq ovlash rivojlangan. 2006-yil YIM miqdori 4254 mln dollarni (aholi jon boshiga — 15131 doll.) tashkil etgan. Asosiy savdo hamkorlari: AQSH, Kanada, Buyuk Britaniya, Karib dengizi havzasi davlatlari.

Iqtisodiyot uchun avtomobil yo'llari katta ahamiyatga ega. Temiryo'llari yo'q. Asosiy porti — Brijtaun.

**Tarixi.** Qadimda orolda aravak va karib qabilalari yashagan. Orol 1536-yili portugaliyalik Pedro Kamposh tomonidan kashf qilindi. 1625-yildan Barbados Britaniya mustamlakasiga aylandi. Afrikadan keltirilgan qullar hisobiga tamaki va shakar ishlab chiqarish sanoati vujudga keldi. 1834-yilda qullik bekor qilingan. 1961-yili orol o'z-o'zini boshqarish huquqiga ega bo'ldi. 1966-yili Buyuk Britaniyadan to'liq mustaqillikka erishdi, lekin Britaniya Hamdo'stligi tarkibida qoldi.

## BAHRAYN

*Rasmiy nomi — Bahrayn. Poytaxti — Manama. Hududi — 695,15 km<sup>2</sup>. Aholisi 707852 kishi (2007). Davlat tili — arab. Dini — islom. Pul birligi — Bahrayn dinori.*

**Geografik joylashuvi va tabiati.** Yaqin Sharqda joylashgan davlat. Fors ko'rfazining shimoli-g'arbiy qismida Saudiya Arabistoni va qator davlatlar

qirg'oqlari bilan chegaradosh. 33 ta oroldan iborat. Ularning orasida eng yirigi Arabiston yarimoroli bilan uzunligi 25 km gacha yaqin bo'yin vositasida bog'langan Bahrayn orolidir. Bahrayn orolining uzunligi 25 km, eni — 16 km ni tashkil etadi. Orollar materik va marjonli kelib chiqishga ega. Tuproq qatlamida ohaktosh keng tarqalgan. Hududning katta qismini chala-cho'llar egallagan. Arxipelagning yuqori nuqtasi Jabal-ad-Duxan (134 m). Ba'zi orollar Bahrayn va Muharrar bilan to'g'onlar (damba) vositasida bog'langan.

Iqlimi — tropikdan subtropikka o'tuvchi. Vohalarda finik palmalari o'sadi. Hududning katta qismi tropik cho'llardan iborat. Ilonlar, chayonlar, kemiruvchi va shoqollar keng tarqalgan.

#### ***Davlat tuzilishi va siyosiy partiyalari.***

Davlat tuzilishi — monarxiya. Davlat boshlig'i — Amir Shayx. Hukumat boshlig'i — premyer-ministr Shayx. Siyosiy partiyalari yo'q. Siyosiy tashkilotlari: Bahrayn xalq fronti, Bahrayn milliy ozodlik fronti.

#### ***Iqtisodi, transport kommunikatsiyalari.***

Mamlakat iqtisodining asosini neft qazib olish va uni qayta ishlash tashkil etadi. Kema ta'mirlash, sement va boshqa korxonalar bilan bir qatorda hunarmandchilik ham taraqqiy etgan. Kimyo sanoati ham rivojlangan, alumin eritiladi. Madaniy o'simliklardan makkajo'xori, bug'doy, arpa yetishtiriladi. Echki, qo'y, eshak va zebusimon sigirlar boqiladi. 2006-yil YIM miqdori 13599 mln dollarni (aholi jon boshiga — 19211 doll.) tashkil etgan. Asosiy savdo hamkorlari — Buyuk Britaniya, Saudiya Arabistoni, Janubiy Koreya, Yaponiya, AQSH, Avstraliya.

***Tarixi.*** M.a. III ming yillikda zamonaviy Bahrayn kuchli savdo imperiyasi hisoblangan Dilmunning markazi bo'lgan. M.a. 1600-yillarida Dilmun inqirozga yuz tutadi. Bahrayn m.a. 600-yilda Bobil tarkibiga, IV—VI asrlarida Sosoniylar davlati tarkibiga kiradi. VIII asrda esa Bahrayn arab xalifaligi hukmronligi ostida qoldi. IX—X asrlarda Bahrayn Ummaviylar imperiyasi, keyinchalik Abbosiylar davlati tarkibida bo'ldi. XIII asrda Bahrayn ma'lum muddatga mustaqillikni

qo'lga kiritdi. 1487-yilda Bahrayn va Mohara orollari Ummonlik qabilalari tomonidan bosib olindi. 1536-yildan 1602-yilgacha orollarni portugallar nazorat qilishdi. XVIII asr o'rtalarida Bahraynda uni hozirgi kunda ham idora etayotgan Al-Xalifa urug'i vujudga keldi. XIX asrda Bahrayn inglizlar nazorati ostida edi. 1971-yil 14-avgustda Bahrayn mustaqillikka erishdi.

## BELIZ

*Rasmiy nomi — Beliz. Poytaxti — Belmopan. Hududi — 22963 km<sup>2</sup>. Aholisi — 294170 kishi (2007). Davlat tili — ingliz. Dini — katoliklar (60%), protestantlar (35%). Pul birligi — Beliz dollari.*

**Geografik joylashuvi va tabiati.** Beliz Markaziy Amerikaning shimoli sharqida joylashgan davlat. Shimoli g'arbda — Meksika, g'arbda va janubda Gvatemala bilan chegaradosh. Sharqda Karib dengizi bilan tutash. Beliz hududining katta qismini zaxkash pasttekisliklar egallagan, janubi g'arbida Mayya tog'lari joylashgan. Eng yuqori nuqtasi — Viktoriya cho'qqisi (1122 m).

Iqlimi — passatli, tropik. Asosiy daryolari — Beliz, Rio-Onda. Tabiiy resurslardan faqat yog'och va baliqni ko'rsatish mumkin. Tog'lar va tepaliklar tropik o'rmonlar bilan qoplangan. Cho'l-biyobonlar ham uchraydi. Hayvonot dunyosi turli xil yaguar, bug'u, tapirlar, qushlarning ko'p miqdordagi turlaridan iborat.

**Davlat tuzilishi, siyosiy partiyalari.** Beliz davlati Buyuk Britaniya boshchiligidagi Hamdo'stlik tarkibiga kiradi. Davlat boshlig'i — Britaniya monarxi. Hukumat boshlig'i — premyer-ministr. Qonun chiqaruvchi hokimiyat ikki palatali (Senat va Vakillar palatasi) Milliy Kengash. Davlat hududiy jihatdan 6 ta ma'muriy okrugga bo'linadi. Yirik partiyalari: Xalq boshlig'i partiyasi, Birlashgan demokratik partiya.

**Iqtisodi, transport kommunikatsiyalari.** Beliz — agrar davlat. Asosiy qishloq xo'jalik mahsu-



loti — shakarqamish. Sitrus mevalar va banan yetishtiriladi. Sanoat tarmoqlaridan yengil va oziq-ovqat sanoati rivojlangan. Savdo, chet el turizmi va qurilish rivojlanmoqda. Eksporti: shakar, sitrus mevalar, banan, dengiz mahsulotlari va undan tayyorlangan mahsulotlar. Importi: mashina va transport jihozlari, mineral yoqilg'i, kimyoviy sanoat mahsulotlari, farmatsevtik mollar, tikuvchilik mahsulotlari. 2006-yil YIM miqdori 1894 mln dollarni (aholi jon boshiga — 6438 doll.) tashkil etgan. Asosiy savdo hamkorlari: AQSH, Buyuk Britaniya, Kanada, Meksika.

**Tarixi.** Hozirgi Beliz hududlarida IV asrdan X asrgacha Mayya sivilizatsiyasi hukmronlik qilgan. XVI asrda Beliz ispanlar tomonidan bosib olingan va ispan mustamlakasi deb e'lon qilingan. Keyinroq XVII asrda bu yerga inglizlar keldi va hududda birinchi ingliz mustamlakasiga asos solindi. Ular o'rmonlarni kesish bilan faol shug'ullandilar va yangi yerlar ocha boshladilar. Plantatsiyalarda va qimmatbaho yog'och tayyorlashda inglizlar negr qullar mehnatidan foydalandilar. Ispanlar quvib chiqarildi. 1862-yilda bu hudud Britan Gondurasi nomi bilan Britaniya mustamlakasi deb e'lon qilindi. 1964-yilda Beliz to'la ichki o'z-o'zini boshqarish huquqini oldi. Beliz 1981-yilgacha Amerika qit'asidagi Britaniyaning oxirgi mustamlakasi bo'ldi. 1981-yil sentabrda davlat mustaqil deb e'lon qilindi.

## BELARUS

*Rasmiy nomi — Belarus Respublikasi. Poytaxti — Minsk. Hududi — 207600 km<sup>2</sup>. Aholisi — 9709722 kishi (2007). Davlat tili — belarus va rus. Dini — pravoslav (80%), katolik (15%). Pul birligi — Belarus rubli.*

**Geografik joylashuvi va tabiati.** Sharqiy Yevropada joylashgan davlat. Shimoli g'arbda Litva va Latviya, sharqda — Rossiya, janubda Ukraina, g'arbda Polsha davlatlari bilan chegaradosh.

Mamlakat hududi asosan tekisliklardan iborat. Tepaliklar kam uchraydi, ulardan Minsk tepaligi (345 m) alohida ajralib turadi. Iqlimi mamlakatning deyarli hamma joyida bir xil. Asosiy daryolari — Dnepr, Pripyat, Berezina, G'arbiy Dvina, Neman, Soj. Mamlakatda Naroch, Osvey, Svityaz kabi yirik ko'llar bor. Tabiiy qazilma boyliklari: kaliyli va toshli tuzlar, ko'mir, neft, temir rudasi, torf. Belarusda keng bargli o'rmonlar keng tarqalgan bo'lib, ular mamlakat hududining 1/3 qismini egallagan. Belarus o'rmonlarida 8 turdagi daraxtlar (ulardan eng ko'p tarqalganlari — qarag'ay, archa, qayin, eman va shumtol), 70 turdan ortiq butalar va yarimbutalar uchraydi. Mamlakat hududida juda ko'p dorivor o'simliklar — archagul, itburun, zira, landishlar o'sadi. Belarus hayvonot dunyosi 50 turdan ortiq hayvonlar (los, cho'chqa, bo'ri va boshq.), 200 turdan ortiq qushlardan iborat. Shuningdek, Belovej Pushchasi deb ataladigan milliy qo'riqxonada zubrlar va kam uchraydigan botqoq toshbaqasi ham bor.

**Davlat tuzilishi, siyosiy partiyalari.** Davlat tuzilishi — respublika. Davlat boshlig'i — prezident. Hukumat boshlig'i — premyer-ministr. Qonun chiqaruvchi hokimiyat Respublika Kengashi va Vakillar Palatasidan iborat parlament — Milliy yig'inga tegishli. Mamlakat 6 ta: Brest, Gomel, Grodno, Minsk, Mogilyov va Vitebsk viloyatlariga bo'lingan. Yirik siyosiy partiyalari: Belarus birlashgan demokratik partiyasi, Belarus sotsial-demokratik partiyasi, Belarus xalq fronti, Belarus kommunistik partiyasi.

**Iqtisodi, transport kommunikatsiyalari.** Sanoatning asosiy tarmoqlari: avtomobilsozlik va traktor mashinasozligi, radioelektronika, yengil, kimyo sanoatlari, uskunasoziq, oziq-ovqat, harbiy texnika ishlab chiqarish. Qishloq xo'jaligi asosan donli ekinlar, kartoshka, sabzavotlar yetishtirishga hamda go'sht va sut ishlab chiqarishga ixtisoslashgan. Eksporti: mashinasozlik mahsulotlari, kimyo va oziq-ovqat mahsulotlari. Importi: sanoat va oziq-ovqat xomashyosi. 2006-yil YIM miqdori 67902 mln dollarni (aholi jon boshiga — 6993 doll.) tashkil etgan. Asosiy savdo hamkorlari: Rossiya, Ukraina, Polsha, Germaniya, Litva.

**Tarixi.** VII asrdan boshlab hozirgi Belarus hududlarida slavyan qabilalaridan — dregovichlar, radimichlar, krivichlar istiqomat qilganlar. IX asrda Belarus yerlari Kiyev Rusi tarkibiga kirdi. Dastlabki shaharlar — Minsk (1087), Vitebsk, Pinsk, Brest XI asrda paydo bo'ldi. XII asrda feodal tarqoqlik boshlangan bir vaqtda bir qator mayda knyazliklar: Polotsk, Turovo-Pinsk, Grodno, Minsk va boshqalar vujudga keldi. XIV asrda butun Belarus yerlari Litva Buyuk Knyazligi tarkibiga kirdi. 1569-yili Polyak—Litva davlatlarining birlashuvi oqibatida Rech Pospolita davlati tashkil topdi, Belarus ham o'z-o'zidan bu davlat tarkibiga kirdi. XVII asrdan bu hududlar Belaya Rus deb atala boshladi va 1795-yili Rossiya imperiyasi tarkibiga qo'shib olindi. I jahon urushi vaqtida mamlakat deyarli to'liq nemis qo'shinlari tomonidan okkupatsiya qilindi. 1918-yili Belarussiya Xalq Respublikasi e'lon qilindi, biroq tez orada bolsheviklar uni yo'q qilishdi. 1919-yili Sovet Belarussiyasi tuzildi. Polsha 1920-yili vaqtincha Belarussiya hududlarini bosib oldi va 1921-yilgi sovet — polyak «Riga tinchlik sulhi»ga ko'ra unga G'arbiy Belarussiya hududlari o'tdi. 1922-yil 30-dekabrda SSSR tashkil topdi va Belorussiya SSRning tarkibiga kirdi. 1939-yil SSSR va Germaniya o'rtasidagi separat kelishuvlar natijasida G'arbiy Belarussiya respublika tarkibiga qaytarildi. Ikkinchi jahon urushida 1941—1944-yillarda Belarus yerlari nemis bosqinchilariga qarshi jang maydoniga aylandi. Urushda mamlakatning 2,5 mln aholisi qirib tashlandi, yirik shaharlar — Minsk, Brest, Vitebsk, Mogilyov vayron qilindi, 9 mingdan ortiq qishloqlar yondirib yuborildi. Urush vaqtida mamlakat hududida 1100 ta partizan otryadlari (375000 jangchi) harakat qildi. 1944-yilning yozida Belarussiya sovet qo'shinlari tomonidan ozod qilindi. 1945-yili Belarussiya SSSR tarkibida hozirgi hududlariga ega bo'ldi. SSSRning parchalanishi oqibatida 1991-yilning 25-avgustida mustaqil davlat — Belarussiya e'lon qilindi. Mustaqillikning dastlabki yillarida Belarussiya jiddiy iqtisodiy va siyosiy qiyinchiliklarni boshdan kechirdi. Natijada aholining turmush darajasi sezilarli darajada pasaydi. Shunga qaramasdan, hozirgi kunda Belarusda iqtisodiy

va siyosiy ahvol barqarorlashib bormoqda. Keyingi yillarda mamlakat hukumati yuritayotgan oqilona iqtisodiy siyosat tufayli Belarus xalqining ijtimoiy turmushi ancha yaxshilandi va MDH davlatlari orasida oldingi o'rinlardan birini egalladi.

## BELGIYA

*Rasmiy nomi — Belgiya Qirolligi. Poytaxti — Bryussel. Hududi — 30500 km<sup>2</sup>. Aholisi — 10392226 kishi (2007). Davlat tili — flamand, fransuz, nemis. Dini — katolik. Pul birligi — yevro.*

**Geografik joylashuvi va tabiati.** Yevropaning shimoli g'arbida joylashgan davlat. Belgiya shimolda — Niderlandiya, sharqda — Germaniya, janubi sharqda — Lyuksemburg, janub va janubi g'arbda Fransiya bilan chegaradosh. G'arbiy qirg'oqlari Shimoliy dengiz bilan tutashgan. Belgiyani uch geografik hududga bo'lish mumkin, bular: sohilbo'yi tekisligi, markaziy yassitog' va Ardenn tepaliklari. Sohilbo'yi tekisliklari mamlakatning shimoli g'arbida joylashgan bo'lib, qumli tepaliklar va to'g'onlar vositasida dengizdan ajratib olingan yer maydonlaridan iborat. Markaziy yassitog'liklar past tepaliklardan iborat unumdor joylardir. Ardenn tepaligi mamlakatning janubi sharqida joylashgan bo'lib, o'rtacha balandligi 460 m ni tashkil etadi. Belgiyaning eng yuqori nuqtasi — Ardenndagi Botranj tog'i (694 m).

Iqlimi — mo'tadil. Mamlakatning asosiy daryolari — Shelda va Maas. Foydali qazilmalardan ko'mir, tabiiy gaz mavjud. Keng bargli o'rmonlarda eman, qora qayin, grab kabi daraxtlar o'sadi. Qo'riqxonalar va tabiat parklari ko'p. Hayvonlardan qobon, quyon, o'rmon sichqonlari, olmaxon, ohularni uchratish mumkin. Valdshnep, tus-tovuq, o'rdak, kaklik kabi qushlar mavjud.

**Davlat tuzilishi, siyosiy partiyalari.** Davlat tuzilishi — konstitusion monarxiya. Ijro etuvchi hokimiyat monarx va Vazirlar Mahkamasi boshlig'i — premyer-ministriga tegishli. Qonun chiqaruvchi hokimiyat ikki palatali parlament (yuqori palata — Senat va Vakillar

palatasi)dan iborat. Mamlakat 9 provinsiyadan tashkil topgan, bular: Antverpen, Brabant, Sharqiy Flandriya, G'arbiy Flandriya, Lyej, Limburg, Lyuksemburg, Namur, Eno. Siyosiy partiyalari: Sotsialistik partiya, Sotsial-xristianlar partiyasi, Flamand liberallari va demokratlari partiyasi, Belgiya kommunistlari ittifoqi.

***Iqtisodi, transport kommunikatsiyalari.***

Asosiy sanoat tarmoqlari — oziq-ovqat, kimyo, metallurgiya, metallni qayta ishlash, mashinasozlik, to'qimachilik, oyna ishlab chiqarish (oyna va toshoyna eksporti bo'yicha dunyoda birinchi o'rinda turadi). Qishloq xo'jaligida qandlavlagi, meva va sabzavotlar, bug'doy yetishtiriladi. Chorvachilik ham rivojlangan. Belgiya Yevropada yirik sut mahsulotlari ishlab chiqaruvchilaridan biridir. Asosiy savdo hamkorlari: YI mamlakatlari, AQSH.

2006-yil YIM miqdori — 322645 mln dollarni (aholi jon boshiga — 31046 doll.) tashkil etgan. Asosiy portlari: Antverpen, Bryugge, Gent, Ostends va Zebryugge.

***Tarixi.*** Mamlakat hududida qadimda belg qabilalari istiqomat qilishgan. M.a. 57-yilda Belgiya Sezar tomonidan bosib olindi va Rim imperiyasi takibiga qo'shildi. O'rta asrlarda Belgiya hududlari (Braband gersogligi, Flandriya, Lyuksemburg grafliklari) tarixiy Niderlandiya tarkibiga kirgan. XVI asrdagi Niderlandiya burjua inqilobi Belgiya hududida mag'lubiyat bilan yakunlandi. Ispan taxti uchun olib borilgan urushlar oqibatida Belgiya Avstriya Gabsburglari hukmronligi ostiga o'tdi. 1813—1830-yillarda mamlakat Niderlandiya qirolligi tarkibida bo'ldi. 1830-yildagi Belgiya inqilobi mustaqil Belgiya qirolligining e'lon qilinishiga olib keldi. Tez orada uning umrbod betarafligi e'lon qilindi. 1908-yilda Belgiya mustamlaka mulk — Belgiya Kongosiga, 1922-yilda esa Ruanda-Urundu mandatiga ega bo'ldi. I va II jahon urushlari davrida Belgiya hududlari nemis qo'shinlari tomonidan ishg'ol qilingan. 1960-yilda Belgiya Kongoga, 1962-yili esa Ruanda-Urunduga mustaqillik berdi. 1949-yildan buyon Belgiya NATO a'zosi. Bryusselda Yevropadagi qo'shma qurolli kuchlar Bosh qo'mondonligi va NATO kengashi shtab-

kvartiralarini joylashgan. 1958-yilda Belgiya Niderlandiya va Lyuksemburg bilan bojxona ittifoqchilik shartnomalarini imzolaydi. XX asrning 60—70-yillarida Belgiyadagi flamandlar va vallonlar o'rtasidagi munosabatlari keskinlashuvi oqibatida vaziyat birmuncha murakkablashdi. 1993-yilda ushbu mojaro konstitutsiyaga o'zgartirish kiritilishiga olib keldi va unga ko'ra Belgiya federativ davlat bo'lib, Flandriya va Valloniya o'z hukumatlariga ega bo'lish huquqini qo'lga kiritishdi.

## BENIN

*Rasmiy nomi — Benin Respublikasi. Poytaxti — Porto-Novo. Hududi — 112622 km<sup>2</sup>. Aholisi — 8082531 kishi (2007). Davlat tili — fransuz. Dini — majusiylar (70%), xristianlar (15%), musulmonlar (15%). Pul birligi — Afrika franki.*

**Geografik joylashuvi va tabiati.** G'arbiy Afrikada joylashgan davlat. Shimolda — Burkina-Faso, Niger, sharqda — Nigeriya, g'arbda Togo davlati bilan chegaradosh. Janubda sohillari Gvineya ko'rfazi bilan tutashgan. Mamlakat yuzasi janubda pastlikdan, shimolda yassitog'likdan, shimoli g'arbda Atakora tog'laridan iborat. Asosiy daryosi — Veme.

Iqlimi — ekvatorial va subekvatorial. Mamlakatda marmar va neft zaxiralari mavjud. Hududning katta qismi savannalar, janubda daryo bo'ylarida nam tropik o'rmonlar bilan qoplangan. Hayvonlardan fil, antilopa, qo'tos, maymun, timsohlar mavjud. Qushlar ham ko'p.

**Davlat tuzilishi, siyosiy partiyalari.** Davlat tuzilishi — respublika. Davlat va hukumat boshlig'i — prezident. Benin 6 ta viloyatga bo'lingan. Siyosiy partiyalari: Benin Tiklanishi, Demokratik yangilanish partiyasi, Alafiya — yangilanish va rivojlanish uchun harakatlar Fronti.

**Iqtisodi, transport kommunikatsiyalari.** Benin — agrar mamlakat. Qishloq xo'jaligi mahsulotlarini qayta ishlash, oziq-ovqat, to'qimachilik korxonalari faoliyat ko'rsatmoqda. Chorvachilik rivojlangan. Paxta, yeryong'oq, qahva yetishtiriladi. 2006-yil YIM miqdori

7764 mln dollarni (aholi jon boshiga — 960 doll.) tashkil etgan. Asosiy savdo hamkorlari: Marokash, Fransiya, Portugaliya, AQSH, Xitoy, Gana, Italiya, Gollandiya, Nigeriya, Kot-d'Ivuar.

Asosiy porti: Kotonu.

**Tarixi.** XV asrda Beninning qirg'oq hududlariga yevropaliklar kirib keldi va uni qul savdosining yirik tumanlaridan biriga aylantirdi. Benin hududida vujudga kelgan Dagomeya davlati to'grisidagi birinchi ma'lumotlar XVII asrga oiddir. 1890-yillarning boshida Dagomeya fransuz istilochilari tomonidan bosib olindi. XIX asrning oxirlarida Benin hududi ingliz mustamlakachilari tomonidan bosib olinib, keyinchalik Nigeriya mustamlakasi tarkibiga qo'shib yuborildi. Dagomeya 1904-yilda fransuz mustamlakasi bo'lib qoldi va hozirgi kungacha Fransiya mamlakatining asosiy savdo hamkori bo'lib qolmoqda. 1960-yilning 1-avgustidan Benin Dagomeya Respublikasi nomi ostidagi mustaqil davlatdir. 1960—1972-yillarda mamlakatda 10 ta hukumat almashib, 5 ta harbiy to'ntarish bo'lib o'tdi. 1972-yilda hokimiyat tepasiga Harbiy-inqilobiy hukumat keldi. 1990-yil martidan mamlakat Benin respublikasi deb atala boshlandi. 1990-yil dekabrda yangi konstitutsiya qabul qilindi.

## BERMUD OROLLARI

*Rasmiy nomi — Bermud orollari (Buyuk Britaniya mulki). Poytaxti — Gamilton. Hududi — 58,8 km<sup>2</sup>. Aholisi — 65894 kishi (2007). Davlat tili — ingliz. Dini — xristianlik. Pul birligi — Bermud dollari.*

**Geografik joylashuvi va tabiati.** Orollar Atlantika okeanining shimoli g'arbiy qismida joylashgan, 360 ta atrofidagi orollar va qoyalardan iborat, ulardan 20 tasida odam yashamaydi. 10 ta orol o'zaro ko'priklar bilan birlashib asosiy orol — Meyn-Aylendni tashkil etadi. Orollar tekisliklardan iborat.

Iqlimi — tropik, issiq. Tabiiy o'simliklari saqlanib qolmagan. Qayta ekiladigan tropik o'simliklar va daraxtlar

bor. Mayda kemiruvchilar ko'p. Qushlarning bir qancha turlari (to'tiqush, dengiz qushlari), hasharotlar bor.

***Davlat tuzilishi, siyosiy partiyalari.*** Davlat tuzilishi — Buyuk Britaniya mulki. Davlat boshlig'i — Buyuk Britaniya qirolichasi tomonidan tayinlanadigan, tashqi siyosat, mudofaa, politsiya, ichki xavfsizlik masalalari bilan shug'ullanadigan gubernator. Ma'muriy-hududiy jihatdan 9 okrug va 2 munitsipalitetga bo'linadi. Siyosiy partiyalari: Birlashgan Bermud partiyasi, Leyboristik taraqqiyot partiyasi, Milliy liberal partiya.

***Iqtisodi va transport kommunikatsiyalari.*** Iqtisodining asosini chet el turizmi tashkil etadi. Bermud orollari muhim moliyaviy markazdir. Orollarda 6 mingdan ortiq chet el kompaniyalari ro'yxatga olingan. Bermud orollari ro'yxatga olingan chet el kemalarining hajmi jihatidan 5-o'rinni egallaydi. Kemalarni ta'mirlash, qayiqlar yasash, farmatsevtik mahsulotlar ishlab chiqarish, qurilish materiallari korxonalari faoliyat yuritadi. Kartoshka, karam, pomidor, banan, gullar yetishtiriladi. Baliqchilik rivojlangan. 2006-yil YIM miqdori 2498 mln dollarni (aholi jon boshiga —36000 doll.) tashkil etgan. Asosiy savdo hamkorlari: AQSH, Buyuk Britaniya, Venesuela.

***Tarixi.*** Orollar 1522-yilda ispan dengiz sayyohi X. Bermudes tomonidan kashf etilgan. 1609-yilda orollarga inglizlar kelib joylasha boshladi. 1684-yilda bu hududlar Angliya mustamlakasiga aylandi. 1968-yilda orollarga ichki o'z-o'zini boshqarish huquqi berildi. 1989-yilda Britaniya hukumati Bermud orollariga mustaqillik berish talabini rad etdi. 1995-yil avgust oyida o'tkazilgan referendumda aholining ko'pchilik qismi qaram hudud maqomini saqlab qolish uchun ovoz berdi.

## **BIRLASHGAN ARAB AMIRLIKLARI**

*Rasmiy nomi — Birlashgan Arab Amirliklari. Poytaxti — Abu-Dabi. Hududi — 83657 km<sup>2</sup>. Aholisi — 4444011 kishi (2007). Davlat tili — arab. Dini — islom. Pul birligi — dirham.*



**Geografik joylashuvi va tabiati.** Arabiston yarimorolida joylashgan, yetti arab davlatidan iborat federatsiya. Janub va g'arbda Saudiya Arabistoni (chegara uzunligi — 457 km), shimolda — Ummon (410 km), shimoli g'arbda esa Qatar bilan chegaradosh. Shimolda Fors ko'rfazi, sharqda Ummon ko'rfazi bilan tutashib ketgan. Sohil bo'ylab chegara uzunligi — 1318 km. Mamlakat landshaftida tekisliklar ustunlik qiladi. Unumsiz qirg'oq tekisliklari qumli barxanlarga aylanib boradi. Mamlakat ichkarisidagi yirik maydonlar cho'llar va sho'rxok yerlardan iborat. Sharqda Hojar tog' cho'qqilari joylashgan (balandligi 1127 km). BAA uchun cho'l o'simliklari dunyosi xosdir: yantoq va cho'l iqlimiga chidamli o'tlar. Mamlakatning sug'oriladigan maydonlarida yovvoyi va madaniy mevali daraxtlari — xurmo, akatsiya o'stiriladi. Hayvonot dunyosi — kiyik, quyon hamda ilon va kaltakesaklarning har xil turlari uchraydi. Fors va Ummon ko'rfazi suvlari baliqqa boy.

**Davlat tuzilishi, siyosiy partiyalari.** Markaziy hokimiyati maxsus vakolatlarga ega bo'lgan amirliklar federatsiyasi. Federatsiyaga yetti arab amirliklari: Abu-Dabi, Ajiman, Emanay, Ras-al-Xayma, Umm-al-Kavayn, Sharja hamda Al-Fujayra kiradi. BAA 1971-yil 2-dekabrda mustaqillikka erishdi. Mustaqillikka qadar u Buyuk Britaniya protektorati (qaram davlati) hisoblanib, uning oldingi nomi Shartnomaviy Ummon bo'lgan. Buyuk Britaniya BAAga mustaqillik bergan kun (1971-yil 2-dekabr) milliy bayram — Federatsiyaning tashkil topgan kuni sifatida nishonlanadi. Ijro etuvchi hokimiyat Prezidentga hamda hukmdorlarning Oliy Kengashiga tegishlidir. Qonun chiqaruvchi hokimiyatni bir palatali Federal Milliy Kengash amalga oshiradi. Siyosiy partiyalar mavjud emas.

**Iqtisodi, transport kommunikatsiyalari.** Mamlakat iqtisodi neft va gaz eksportiga asoslangan. 1973-yilda dunyoda neft xarid narxining keskin ko'tarilishi mamlakatdagi iqtisodiy ahvolning vaqtinchalik o'zgarishiga olib keldi. Qishloq xo'jaligida mehnatga layoqatli aholining 5% i band bo'lib, yetishtiriladigan mahsulotlar quyidagilar — xurmo, sabzavotlar, tarvuz, parranda, sut mahsulotlari va baliq. Mamlakat o'z ichki

oziq-ovqat mahsulotlariga bo'lgan talabining chorak qisminigina ta'minlaydi. 2006-yil YIM miqdori 63670 mln dollarni (aholi jon boshiga — 25200 doll.) tashkil etgan. Asosiy savdo hamkorlari: Yaponiya, Buyuk Britaniya, Germaniya, Janubiy Koreya.

Avtomobil yo'llarining umumiy uzunligi 2000 km (asfalt yotqizilgan yo'llar — 1800 km). Mamlakatning asosiy portlari: Abu-Dabi, Dubay, Sharja, Al-Fujayra.

**Tarixi.** XIX asr oxirlarigacha BAA Ummon tarkibida bo'lgan. 1892-yilda Arabiston yarimorolining sharqiy qismida joylashgan Arab davlatlari federatsiyasi Fors ko'rfazidagi dengiz qaroqchilariga qarshi kurashish maqsadida Buyuk Britaniya bilan kelishuv imzoladi. 1971-yil, ya'ni BAA davlat mustaqilligi e'lon qilingunga qadar u Buyuk Britaniya protektorati edi.

## BOLGARIYA

*Rasmiy nomi — Bolgariya Respublikasi. Poytaxti — Sofiya. Hududi — 110912 km<sup>2</sup>. Aholisi — 7389678 kishi (2007). Davlat tili — bolgar. Dini — pravoslavlar (85%), musulmonlar (13%). Pul birligi — lev.*

**Geografik joylashuvi va tabiati.** Bolqon yarimorolidagi Janubi sharqiy Yevropa davlati. Shimolda — Ruminiya, g'arbda — Yugoslaviya va Makedoniya, janubda — Gretsiya va Turkiya bilan chegaradosh. Shimolda Qora dengiz bilan tutashgan. Hududining katta qismini tog' va tepaliklar egallagan. Mamlakat markazida shimoli g'arbdan Qora dengiz-gacha cho'zilgan Bolqon tog'lari joylashgan. Janubda — Rodopi tog'lari, janubi g'arbda esa mamlakatning eng yuqori nuqtasi Musala cho'qqisi (2925 m) joylashgan Rila tog'lari mavjud. Bolqon tog'larining janubiy yonbag'irlari va Rodopi tog'lari orasida Meritsa daryosi vodiysi yastanib yotibdi.

Iqlimi — mo'tadil kontinental. Asosiy daryolari: Dunay, Iskar va Maritsa. Foydali qazilmalardan boksitlar, mis, qo'rg'oshin, ko'mir, yog'och mavjud. Mam-

lakat hududining katta qismini o'rmonlar egallagan. Vodiylarda bargli, tog'larda esa ignabargli o'rmonlar ustunlik qiladi. Hayvonlardan quyon, tulki, qobon, bo'rsiq, yumronqoziq, kiyik, ohu kabilar mavjud.

### ***Davlat tuzilishi, siyosiy partiyalari.***

Bolgariya — prezidentlik respublikasi. Davlat boshlig'i — prezident. Ijro etuvchi hokimiyat premyer-ministr boshchiligidagi Ministrlar Kengashiga tegishli. Qonun chiqaruvchi hokimiyat bir palatali parlament — Xalq yig'ini tomonidan amalga oshiriladi. Siyosiy partiyalari: Demokratik kuchlar ittifoqi, Bolgariya sotsialistik partiyasi, Xalq ittifoqi, Huquq va erkinliklar uchun harakat.

### ***Iqtisodi, transport kommunikatsiyalari.***

Rivojlangan sanoat sohalari: mashinasozlik, metallurgiya, oziq-ovqat, to'qimachilik, kimyo, yog'ochni qayta ishlash. Mashinasozlik — xalq xo'jaligining muhim tarmog'idir. Mashinasozlik korxonalari respublikaning ko'pgina shaharlarida qurilgan, ulardan eng yiriklari — Sofiya, Varna, Gusa, Burgos, Plovdiv. Bolgariya mineral resurslar bilan nisbatan yaxshi ta'minlangan. Qishloq xo'jaligi Bolgariya YMMning 1/8 qismini tashkil etib, iqtisodiy faol aholining 1/5 qismini ish bilan band qilgan. Donli ekinlar uchun haydaladigan yerlarning 3/5 qismi ajratilgan. Makkajo'xori, sholi, arpa, bug'doy ekiladi. Texnikaviy o'simliklardan janubda ekiladigan tamakiga va kungaboqarga alohida e'tibor beriladi. Shuningdek, mamlakat pomidor va uzumning yirik eksportchilaridan biridir. So'nggi yillarda turizm ham yaxshi rivojlanmoqda. 2006-yil YIM miqdori 62292 mln dollarni (aholi jon boshiga — 8429 doll.) tashkil etgan. Asosiy savdo hamkorlari — Rossiya, Germaniya, Italiya, Turkiya, Gretsiya.

Asosiy portlari: Burgos, Varna.

**Tarixi.** M. a. VIII asrda zamonaviy Bolgariya hududida frakiyaliklar qabilalari istiqomat qilishgan. M. a. VII asrda mamlakat qirg'oqlarida grek shaharlari — Apolloniya (zamonaviy Sozopol), Odessos (zamonaviy Varna), Mesembri (zamonaviy Nesebir)ga asos solindi. I asrda bu yerlarning Rim tomonidan bosib olinishi

oqibatida Rim provinsiyalari Meziya va Frakiya tashkil topdi. 395-yili Rim imperiyasi inqirozga yuz tutganidan so'ng bu ikki provinsiya Vizantiya imperiyasi tarkibiga kirdi. VI asrdan boshlab mamlakatga slavyan qabilalari kirib kela boshladi. 680-yilda xon Asparux boshchiligida birinchi bolgar qirolligi tashkil etildi. Vizantiya yangi davlatni tan oldi. 894-yilda aka-uka Kirill va Mefodiyalar slavyan yozuvini kiritdilar. 1014-yilda Vizantiya imperatori Vasiliy II Bolgaroboysa Belasitsa yonidagi jangda bolgar qo'shinlarini tor-mor qildi. Tez orada mamlakat Vizantiya tarkibiga qo'shildi. 1187-yilda mustaqil ikkinchi Bolgar qirolligi tashkil etildi. XIV asr oxirlarida Bolgariya turklar tomonidan ishg'ol qilindi. 1878-yili rus—turk urushi oqibatida mamlakatning shimoliy qismida mustaqil Bolgar knyazligi tashkil topdi. Janubiy qismi — Sharqiy Rumeliya Turkiyaning avtonom provinsiyasi edi. 1885-yildagi turklarga qarshi ko'tarilgan Plovdiv qo'zg'oloni mamlakatning birlashishiga olib keldi. 1908-yilda Bolgariya Turkiyadan to'la mustaqilligini e'lon qilib, qirollik sifatida qayta tashkil etildi. I jahon urushida Bolgariya Germaniya tarafida turib urush olib bordi va buning oqibatida Janubiy Dobruja hududini boy berdi. 1940-yili fashistik davlatlar bilan hamkorlik shartnomasini imzoladi va Janubiy Dobrujani Ruminiyadan qaytarib oldi. 1941—1944-yillarda Bolgariya II jahon urushida fashistik blok tarafida ishtirok etdi. 1944-yilda mamlakatga sovet qo'shinlari kirib keldi. Shu vaqtda Sofiyada davlat to'ntarilishi o'tkazilib, yangi tuzilgan hokimiyat Germaniyaga qarshi urush e'lon qildi. 1946-yilda monarxiya yo'q qilinib, Bolgariya Xalq Respublikasi tashkil topganligi e'lon qilindi. Bolgariya 1949-yilda O'YK (SEV)ga, 1955-yilda Varshava Shartnomasi uyushmasiga a'zo bo'lib kirdi. 40 yildan ortiq vaqt davomida mamlakatda Todor Jivkov boshchiligidagi kommunistik tuzum hukmronlik qildi. 1990-yilda bu tuzum ag'darilib, Bolgariya demokratik hukumatini tashkil etish jarayoni boshlandi. 1991-yilda yangi konstitutsiya qabul qilinib, mamlakat nomi Bolgariya Respublikasi deb o'zgartirildi. Bolgariya 2004-yil 2 apreldan NATO, 2007-yil 1-yanvaridan esa YI a'zosi.

## BOLIVIYA

*Rasmiy nomi — Boliviya Respublikasi. Poytaxti — Sukre (rasmiy hukumat joylashgan shahar La-Pas). Hududi — 1098581 km<sup>2</sup>. Aholisi — 9144888 kishi (2007). Davlat tili — ispan. Dini — katoliklar (95%), protestanlar (5%). Pul birligi — boliviano.*

**Geografik joylashuvi va tabiati.** Janubiy Amerikaning markaziy qismida joylashgan davlat. Boliviya shimolda va sharqda Braziliya, janubi sharqda — Paragvay, g'arbda — Chili va Peru, janubda Argentina davlatlari bilan chegaradosh. Boliviyaning janubi g'arbi And tog'larida joylashgan. Ikkiga ajralgan tog' tizmasi G'arbiy va Sharqiy tog' tizmalariga ajralgan bo'lib, ularning orasida dengiz sathidan 4000 m balandlikda joylashgan Puna yassi tog'ligi joylashgan. G'arbda yassi tog'lar, so'ngan vulqonlar zanjiri. Shu yerda dunyodagi eng sirli tog' ko'li Titikaka joylashgan. Sharqda And tog'larining eng yuqori cho'qqilari Illimani (6682 m), Ankouma (6550 m), Illampu (6485 m) joylashgan.

Iqlimi — tropik, subekvatorial. Asosiy daryolari: Benin Mamorye, Desaguadero, Madeyra (Amazonkaning yirik irmog'i). Boliviya ko'llar ko'p bo'lib, ularning orasida Titikaka va Poopo eng kattalari hisoblanadi. Boliviya foydali qazilmalardan qalay, rux, kumush, oltin, mis, qo'rg'oshin, volfram, surma, tabiiy gaz, neft zaxiralari mavjud. Sudralib yuruvchi hayvonlar, qushlar va hasharotlar ham keng tarqalgan.

**Davlat tuzilishi va siyosiy partiyalari.** Davlat va hukumat boshlig'i — prezident. Shuningdek, ijro etuvchi hokimiyat Vazirlar Mahkamasiga ham tegishlidir. Qonun chiqaruvchi hokimiyat ikki palatali, Senatorlar va Deputatlar palatasidan iborat — Milliy Kongress tamonidan amalga oshiriladi. Boliviya 9 departamentdan iborat respublika. Siyosiy partiyalari: Milliy inqilobiy harakat, So'l inqilobiy harakat, Milliy demokratik faoliyat, «Birdamlik» fuqarolik ittifoqi.

**Iqtisodi, transport kommunikatsiyalari.** Boliviya tabiiy resurslarga boy bo'lishiga qaramasdan,

Lotin Amerikasidagi iqtisodiy jihatdan eng qoloq mamlakatlardan biri. Asosiy sanoat tarmoqlari — tog'kon va tabiiy gaz qazib olish. Qalay, volfram, surma, rangli metallarni qazib olish bo'yicha Boliviya dunyoda birinchi o'rinlardan birida turadi. Neftni qayta ishlash, metallga ishlov berish, to'qimachilik sanoati, shuningdek, tamaki va oziq-ovqat ishlab chiqarish rivojlangan. Madaniy o'simliklardan kartoshka, sholi, boshoqlilar, shakarqamish, qahva o'stiriladi. 2006-yil YIM miqdori 24299 mln dollarni (aholi jon boshiga — 2600 doll.) tashkil etgan. Asosiy savdo hamkorlari: AQSH, Argentina, Braziliya, Peru, Chili, Yaponiya, YI mamlakatlari.

Avtomobil va temiryo'llardan tashqari ichki suv yo'llari ham mavjud.

**Tarixi.** Titikaka ko'lining janubida qadimda inklargacha bo'lgan davrda Tiaxuanako davlati mavjud bo'lgan. Bu davlat X asrgacha gullab-yashnagan. XIII asrda davlatni aymora hindulari, keyinchalik zamonaviy Boliviya hududini inklar ishg'ol qildi. XVI asrda ispanlar bosib olib, Boliviya Peru vitse-qirolligi tarkibiga kirdi. 1825-yilda mustaqillik uchun kurash rahbari Simon Bolivar qo'shinlari ispanlar ustidan g'alaba qozondi. 1964-yilda harbiy to'ntarish amalga oshirildi. Harbiy xunta bilan kurashish uchun inqilobiy harakat tashkil etilib, unga Ernesto Che Gevara boshchilik qildi. Mamlakatda bir necha marotaba davlat to'ntarilishlari bo'lib o'tadi va 1982-yildagina hokimiyatni demokratik hukumat egallaydi.

## BOSNIYA VA GERSEGOVINA

*Rasmiy nomi — Bosniya-Gersegovina. Poytaxti — Sarayevo. Hududi — 51129 km<sup>2</sup>. Aholisi — 4438767 (2007). Davlat tili — serb-xorvat. Dini — islom (40%), pravoslav (31%), protestantlik (4%), katolik (2%). Pul birligi — yagona pul birligi yo'q, muomalada Yugoslaviya dinori, Xorvatiya kunasi, yevro.*

**Geografik joylashuvi va tabiati.** Yevropaning janubi sharqida, Bolqon yarimorolida joylashgan. Shimolda va g'arbda Xorvatiya bilan, sharq va janubda Serbiya hamda Chernogoriya bilan chegaradosh. Hududining 90% ini tog'lar egallaydi. Janubroqda past-tog'liklar va hosildor tog' daralari balandligi 2000—2400 m bo'lgan Dinor yassitog'ligiga aylanadi. Tekisliklar shimolda — Sava daryosi bo'yida mavjud.

Iqlimi: markazda — mo'tadil kontinental, sohil bo'yida — subtropik. Asosiy daryolari: Vrbas, Neretva, Bosna, Uva. Tabiiy boyliklari: ko'mir, lignit, temir rudasi, boksitlar. Mamlakatning asosiy qismi O'rtayer dengizi o'simliklari, bargli va ignabargli daraxtlar bilan qoplangan. O'rmonlarda silovsin, bo'ri, ayiq, tulki, ohu va muflonlar yashaydi.

**Davlat tuzilishi, siyosiy partiyalari.** Davlat tuzumi — prezidentlik respublikasi. Davlat va hukumat rahbari — prezident. Ijro etuvchi hokimiyat prezidenti, shuningdek, yetti a'zodan iborat Bosniya-Gersegovina prezidiumiga tegishli. Qonun chiqaruvchi oliy organ — ikki palatali Milliy Assambleya. Asosiy ma'muriy-hududiy birligi — obshchina (mamlakat 109 obshchinaga bo'lingan). Asosiy siyosiy partiyalari: Musulmon demokratik harakat partiyasi, Serb demokratik partiyasi, Xorvat demokratik hamdo'stligi.

**Iqtisodi, transport kommunikatsiyalari.** Mamlakat ulkan qazilma boyliklar zaxiralariga ega. 1991—1992-yillardagi urush natijasida iqtisodiyotda keskin tushkunlik yuz berdi. Hozirda sanoat ishlab chiqarishi juda past darajada. Nisbatan ko'mir, kimyo, elektr energiyasini ishlab chiqarish, asbob-uskuna yasash, yog'ochni qayta ishlash sanoatlari rivojlangan. Temir, ko'mir, boksitlar qazib olinadi. Boshqoqli o'simliklar, tamaki, turli mevalar yetishtiriladi. Eksport: qishloq xo'jalik mahsulotlari, kimyo sanoati mahsulotlari, temir rudasi, yog'och. Import: mashina va uskunalar, yoqilg'i. 2006-yil YIM miqdori 27238 mln dollarni (aholi jon boshiga — 6136 doll.) tashkil etgan. Asosiy savdo hamkorlari: MDH va Sharqiy Yevropa davlatlari.

**Tarixi.** I asrda mamlakatning qadimgi qabilalari —

illiriyaliklar rimliklar tomonidan bosib olinadi va Dalmatsiya provinsiyasiga aylantiriladi. V asrda ostgotlar, 535-yilda esa Vizantiya hukmronligi o'rnatilgan. VII asrga kelib bu hududlarda slavyan qabilalari o'rnatilgan. XII asrda Bosniya mustaqil feodal knyazligi vujudga keldi. 1448-yilda mamlakatning janubiy hukmdorlaridan biri o'zini mustaqil Gersegovina gersogi deb e'lon qildi. XV asrning ikkinchi yarmida Bosniya va Gersegovina turklar tomonidan bosib olindi. 1875—1878-yillarda turklarga qarshi yirik xalq qo'zg'oloni bo'lib o'tdi. 1878-yili Bosniya-Gersegovina hududlari Avstro-Vengriya tarkibiga kiritildi. 1908-yilda avstriyaliklar mamlakatni anneksiya qildilar. 1914-yili Sarayevoda Avstriya taxt vorisi ers-gersog F. Ferdinand o'ldirilishi bilan I jahon urushi boshlanadi. 1918-yilda Bosniya va Gersegovina serblar, xorvatlar va slovenlar qirolligi tarkibiga kiritildi (1929-yildan — Yugoslaviya). II jahon urushi davrida fashistlar tomonidan okkupatsiya qilingan. 1945-yildan — Yugoslaviya Xalq Federativ Respublikasi tarkibida. 1991-yil 15-oktabrda Bosniya-Gersegovina mustaqillik deklaratsiyasini e'lon qildi. Shu davrdan serblar, xorvatlar va bosniyalik musulmonlar o'rtasida fuqarolar urushi avj oldi. 1992-yilda davlatga BMT qo'shinlari kiritildi. 1995-yili Parijda mojaroni tinch yo'l bilan hal etish to'g'risida Parij bitimi imzolandi.

## BOTSVANA

*Rasmiy nomi — Botsvana Respublikasi. Poytaxti — Gaborone. Hududi — 582 ming km<sup>2</sup>. Aholisi — 1815508 kishi (2007). Davlat tili — ingliz. Dini — majusiylar (50%), xristianlar (50%) Pul birligi — pula.*

**Geografik joylashuvi va tabiati.** Botsvana Afrikaning janubida joylashgan. Shimol va g'arbda — Namibiya, shimoli sharqda Zambiya va Zimbabve, janubda va janubi sharqda Janubiy Afrika respublikasi bilan chegaradosh. Botsvana yer sathi tekis mamlakat bo'lib, janubi g'arbiy qismini Kalaxari cho'li egallagan.



Iqlimi — subtropik. Asosiy daryosi — Limpopo. Qazilma boyliklaridan olmos, mis, ko'mir, temir rudasi, kumush, tabiiy gaz mavjud. Cho'l savannalarida o'sadigan o'simliklar florasini tashkil etadi. Hayvonot dunyosida: arslonlar, jirafa, zebra, antilopa, fil, chiyabo'ri, sirtlonlar, timsoh, tuyaqushlarni uchratish mumkin. Ilonlar va kaltakesaklar ham ko'plab uchraydi.

### ***Davlat tuzilishi va siyosiy partiyalari.***

Davlat tuzilishi — respublika. Davlat va hukumat boshlig'i — prezident. Botsvana 10 ta viloyatga bo'lingan. Aholisining katta qismi Limpopo daryosi oqimi bo'ylab cho'zilgan tor vodiya yashaydi. 100 mingga yaqin kishi ko'chmanchi hayot kechiradi. Siyosiy partiyalari: Botsvana demokratik partiyasi, Botsvana Milliy fronti.

### ***Iqtisodi, transport kommunikatsiyalari.***

Botsvana tog'-kon sanoati rivojlanayotgan agrar mamlakat. Olmos, nikel, marganes, mis rudalari qazib olinadi. Chorvachilik yaxshi rivojlangan. Qishloq xo'jaligida sorgo, makkajo'xori va boshqa madaniy o'simliklar yetishtiriladi. 2006-yil YIM miqdori 16005 mln dollarni (aholi jon boshiga — 8815 doll.) tashkil etgan. Asosiy savdo hamkorlari: Lesoto, Namibiya, JAR, Svazilend, Buyuk Britaniya, AQSH va Yevropa mamlakatlari.

**Tarixi.** Botsvana elati XVII asr o'rtalarida yashagan qabila boshlig'i Masilo boshchilik qilgan xalqdan kelib chiqqan deb hisoblaydilar. XIX asr o'rtalarida Botsvana tub aholisi bushmenlarni bo'ysundirib, ularga tegishli bo'lgan hududlarni egallagan. 1820—1870-yillarda Botsvana o'z hududlarini kengaytirayotgan trekker-afrikanerlar o'rtasida qabilalararo mojarolar bo'lib turdi. 1876-yilda qabila boshlig'i Kxama va boshqa qabila boshliqlari Janubiy Afrikadagi Buyuk Britaniya komissariga o'z xalqlarini Britan homiyligiga olishni so'rab murojaat qilishdi. 1895-yilda shu hududning janubiy qismi Kap mustamlakasiga qo'shilgan bir vaqtda shimoliy hududlar ingliz protektorati maqomini saqlab qoldi. 1966-yilgacha mamlakat Bechuanalend nomi bilan ingliz potektorati edi. 1966-yil 30-sentabrda

mamlakat mustaqillikka erishib, nomlanishini ham o'zgartirdi va Botsvana deb atala boshladi. 1998-yil prezident Masire iste'foga chiqqanidan so'ng mamlakatni sobiq vitse-prezident va moliya ministri Festus Mogaye boshqarib kelmoqda.

## BRAZILIYA

*Rasmiy nomi — Braziliya Federativ Respublikasi. Poytaxti — Brazilia. Hududi — 8511965 km<sup>2</sup>. Aholisi — 190256710 kishi (2007). Davlat tili — portugal. Dini — katolik. Pul birligi — real.*

**Geografik joylashuvi va tabiati.** Janubiy Amerikaning sharqiy va markaziy qismida joylashgan davlat. Janubiy Amerika hududining deyarli yarmini egallagan, qit'adagi eng yirik davlatdir. Shimolda — Venesuela, Gayana, Surinam, Fransuz Gvianasi, shimoli g'arbda — Kolumbiya, g'arbda — Peru, Boliviya, Paragvay, Argentina, janubda Urugvay davlatlari bilan chegaradosh. Shimoliy va sharqiy qirg'oqlari Atlantika okeani bilan tutashgan. Mamlakat relyefini Brazil tekis tog'liklari, janubiy balandlik qismini cho'kmalar, tepalikli tekisliklar, daryo vodiylari va shimoliy Amazoniya vodiysi egallagan. Amazonka daryosi havzasi Braziliya maydonining 1/3 qismidan ortiqrog'ini egallagan bo'lib, dunyodagi chuchuk suv zaxiralarining 1/5 qismini tashkil etadi. Mamlakat shimolida Gvian tekistog'liklari joylashgan. Braziliyaning eng yuqori nuqtasi ham aynan shu yerda bo'lib, bu Piko-de Neblina (3014 m) tog'idir.

**Iqlimi.** Braziliya turli iqlim zonalarda joylashgan. G'arbda — ekvatorial, sharqda va markazda — subekvatorial, sharqda — tropik, janubda — subtropik. Asosiy daryolari: Amazonka, Parana, San-Fransisku, Urugvay, Paragvay. Tabiiy boyliklardan temir rudasi, qo'rg'oshin, aluminiy, uran, marganes, neft, ko'mir, tabiiy gaz va yog'och zaxiralari mavjud. O'simlik dunyosi ham juda boy bo'lib, 4000 turdan ziyod daraxtlar mavjud. Hayvonlardan — maymunlar, yaguar, puma, tulki, chumolixo'rlarni uchratish mumkin. Ilonlardan —

anakonda, boa bo'g'ma iloni, bushmaster (zaharli ilon)lar mavjud. Daryolarida xavfli hisoblangan piranya va kaymanlar mavjud.

**Davlat tuzilishi, siyosiy partiyalari.** Davlat va hukumat boshlig'i — prezident. Qonun chiqaruvchi hokimiyatni ikki palatali Senat va Deputatlar palatasidan tashkil topgan — Milliy Kongress amalga oshiradi. Braziliya 26 ta shtat va 1 ta poytaxt federal okrugiga bo'lingan respublikadir. Siyosiy partiyalari: Braziliya sotsial-demokratik partiyasi, Braziliya demokratik harakat partiyasi, Mehnatkashlar partiyasi, Liberal front partiyasi, Milliy qayta tiklanish partiyasi.

**Iqtisodi, transport kommunikatsiyalari.** Braziliya bozor iqtisodi munosabatlarining yuqori rivojlanish darajasiga ega bo'lgan industrial-agrar mamlakat. Sanoatining rivojlangan sohalari quyidagilardan iborat: mashinasozlik (avtomobilsozlik va samolyotsozlik), elektron hisoblash texnikasi, metallurgiya, kimyo, yog'ochni qayta ishlash, to'qimachilik; qahva, shakarqamish, sitruslar, soya, kakao, guruch, manioka o'stiriladi va ishlov beriladi. Chorvachilik rivojlangan. Qoramol, cho'chqa, qo'y, yilqi boqiladi, parrandachilik yaxshi rivojlangan. Braziliya qishloq xo'jalik mahsulotlari eksporti bo'yicha dunyoda uchinchi o'rinda turadi. 2006-yil YIM miqdori 1482859 mln dollarni (aholi jon boshiga — 7793 doll.) tashkil etgan. Asosiy savdo hamkorlari: Lotin Amerikasi mamlakatlari, AQSH, YI mamlakatlari, Osiyo mamlakatlari.

Avtomobil, temiryo'l transporti va daryo kema qatnovlari mamlakat iqtisodida muhim o'rin tutadi. Asosiy portlari: Fortaleza, Salvador, Rio-de-Janeyro, Portu-Alegri, Paramaribo.

**Tarixi.** Qadimda Braziliya hududida hindu qabilalaridan tupi-guaranlar, kariblar, aravaklar, pano, gelar istiqomat qilishgan. Portugallar tomonidan Braziliya hududi kashf qilingandan so'ng Portugaliya uni mustamlakaga aylantirdi. Mahalliy aholi shakarqamish plantatsiyalarida ishlatilgan. Afrikadan olib kelingan negrlar ham qullarga aylantirilgan. XIX asr boshlarida Napoleon urushlari davrida Portugaliya qiroli Joao VI Braziliyaga qochib kelib, bu yerda portugal imperiyasiga

asos soldi. 1782-yilda qirol vataniga qaytdi, Braziliyada esa uning o'rniga o'g'li Pedro I qolib mamlakat idora qilishni boshladi. Tez orada Braziliya mustaqil davlat deb e'lon qilindi. 1888-yili mamlakatda qullik bekor qilindi, 1891-yilda esa Braziliya Qo'shma Shtatlari nomini olgan federativ respublika tashkil topganligi e'lon qilindi. 1930-yili hokimiyatni harbiy xunta egalladi. Bir qator harbiy to'ntarishlardan so'ng, 1985-yilda hokimiyat tepasiga fuqarolik hukumati keldi va mamlakat demokratik rivojlanish yo'liga o'tdi. Hozir dunyoning eng jadal rivojlanayotgan mamlakatlaridan biri hisoblanadi.

## BRUNEY

*Rasmiy nomi – Bruney Dorussalom. Poytaxti – Bandar-Seri-Begavan. Hududi – 5765 km<sup>2</sup>. Aholisi – 384422 kishi (2007). Davlat tili – malay, ingliz. Dini – islom. Pul birligi – bruney dollari.*

**Geografik joylashuvi va tabiati.** Janubi sharqiy Osiyodagi Kalimantan orolining shimolida joylashgan davlat. Shimoliy sohillari Janubiy Xitoy dengizi bilan tutashgan. Mamlakatni ikkiga bo'lib turadigan Saravak (Malayziya) shtati bilan chegaradosh. Mamlakat hududi shimol va janubda tepaliklar bilan o'ralgan sohilbo'yi pastliklaridan iborat.

Iqlimi — musson ekvatorial. Qazilma boyliklardan neft va tabiiy gaz konlari mavjud. Mamlakat hududining 75% ini tropik o'rmonlar egallagan. Hayvonot dunyosida maymun, kiyik, to'ng'iz, tropik kapalaklarni uchratish mumkin.

**Davlat tuzilishi va siyosiy partiyalari.** Davlat tuzilishi — mustaqil sultonlik. Buyuk Britaniya boshchiligidagi Hamdo'stlik a'zosi. Davlat boshlig'i — sulton. Siyosiy partiyalari: Bruney milliy demokratik partiyasi, Bruney xalq partiyasi (barchasi taqiqlangan).

**Iqtisodi, transport kommunikatsiyalari.** Mamlakat iqtisodi rivojlangan bo'lib, uning asosini neft qazib olish, suyultirilgan gaz ishlab chiqarish va neftni

qayta ishlash tashkil etadi. Sholi, saga palmasi kabi madaniy o'simliklar o'stiriladi. Chorvachilik rivojlangan. Daryolarda kema qatnovlari yo'lga qo'yilgan. Savdo hamkorlari: YI mamlakatlari, Janubiy Koreya, Yaponiya, Singapur, AQSH, Malayziya, Tailand.

2006-yil YIM miqdori 6842 mln dollarni (aholi jon boshiga — 23600 doll.) tashkil etgan.

**Tarixi.** Sultonlikka XV asrda asos solingan va o'z tarkibiga butun Borneo orolini hamda uning atrofidagi mayda orollarni egallagan edi. 1888-yilda Bruney ingliz protektarati bo'lib qoldi. 1959-yilning yangi konstitutsiyasi Buyuk Britaniyani Bruney mudofaasi va tashqi aloqalar uchun javobgar bo'lishga majbur qilardi. 1984-yili mustaqillik e'lon qilindi. 1991-yilda Bruney qo'shilmaslik harakati a'zosi bo'ldi.

## BURKINA-FASO

*Rasmiy nomi — Burkina-Faso Respublikasi. Poytaxti — Uagadugu. Hududi — 274122 km<sup>2</sup>. Aholisi — 14311290 kishi (2007). Davlat tili — fransuz. Dini — islom (50%), majusiylar (40%), katoliklar (10%). Pul birligi — afrika franki.*

**Geografik joylashuvi va tabiati.** G'arbiy Afrika davlati. Shimol va g'arbda — Mali, sharqda — Niger, janubda — Benin, Togo, Gana, Kot-d'Ivuar davlatlari bilan chegaradosh. Burkina-Faso hududining katta qismini keng yassitog'lik egallagan. Bobo-Diulasodan g'arbda qum-toshdan yassitog' qad ko'targan. Shu yerda mamlakatning yirik daryolari — Qora, Oq va Qizil Volta joylashgan. Qora Voltadan daryolarning barchasi kema qatnovi uchun yaroqsizdir. Iqlimi uch asosiy davrlar mavjudligi bilan xarakterlanadi — salqin-quruq (noyabrdan martgacha), issiq-quruq (martdan maygacha), issiqnam (yilning qolgan qismida). Mamlakat hududining o'simlik dunyosiga baland o'tli savannalar xosdir. Ba'zi joylarda akatsiya va butazorlar ustunlik qiluvchi o'rmonlar uchrab turadi. O'rmonlar mamlakat maydonining 9% ini egallagan. Hayvonot dunyosi boy bo'lib, bu yerda fil, antilopa, maymun va timsohlarni uchratish mumkin.

Zararli hasharotlar ham ko'plab uchraydi, bular setse pashshasi, bezgak chivinlari, termit va chigirtkalar.

***Davlat tuzilishi va siyosiy partiyalari.*** Davlat tuzilishi — respublika. Davlat boshlig'i — prezident. Burkina-Faso 45 ta viloyat (provinsiya)ga bo'lingan. Burkina-Faso doimiy va sezilarli emigratsiya mamlakati. 700 mingdan oshiq kishi ko'chmanchi hayot kechiradi. Siyosiy partiyalari: Xalq fronti, Progressiv vatanparvarlar milliy konventi — Sotsial-demokratik partiya.

***Iqtisodi, transport kommunikatsiyalari.*** Burkina-Faso agrar mamlakat. Marganes, simob, oltin, fosfatlar, nikel, marmar qazib olinadi, yog'och ishlab chiqariladi. To'qimachilik, teri-poyabzal, go'sht tayyorlash, yog'-moy, paxta tozalash korxonalari mavjud. Daryolarida baliq ovlash keng yo'lga qo'yilgan. Yeryong'oq, shakarqamish, paxta yetishtiriladi. 2006-yil YIM miqdori 15071 mln dollarni (aholi jon boshiga — 1053 doll.) tashkil etgan. Asosiy savdo hamkorlari: Fransiya, Kot-d'Ivuar, Italiya, Tailand, Tayvan, Niger, Nigeriya.

***Tarixi.*** XI asrda gambagilik kelgindi qabilalar Yuqori Volta tekisliklariga bostirib kirishadi. Asta-sekinlik bilan ular kuchli siyosiy uyushmaga ega bo'lgan markaziy va sharqiy tekislikdagi dehqonchilik qabilalarini bo'ysundirdilar. Ammo g'arbiy tumanlardagi zamonaviy bobo, lobe va grusilarning ajdodlari bosqinchilarga qarshilik ko'rsata oldilar. Vaqt o'tib kelgindilar mahalliy aholi bilan aralashib ketib, ularning dini va tilini qabul qilishdi. Keyinchalik bosqinchilarning avlodlari Mosi Yatenga, Uagadugu, Tenkodogo va Fadan-Gurma davlatlarining hukmron doirasini tashkil etdi. XIV—XVI asrlarda Yatenga davlatining qurolli kuchlari Mali va Songay davlatlari hududining bir qismini ishg'ol qildi. XVI asrda mosilar ularni bo'ysundirish va majburan islomlashtirishga intilgan songayliklar hujumlarini qaytardi. 1895-yilda Yatenga davlati ustidan nazorat o'rnatilganidan so'ng, fransuz qo'shinlari Moronaba qo'shinlarini tor-mor qilib, uning mulklarini bosib oldi. 1897-yilda Fada-Gurma qirolligi hukmdori fransuz protektoratiga o'tdi. Shu davrning o'zida fransuzlar grusi, bobo, lobi xalqlariga tegishli yerlarni ishg'ol qildi.

Shunga qaramay, 1903-yilgacha lobelar mustamlakachilarga qarshi tinimsiz kurash olib bordi. 1904—1919-yillarda Yuqori Volta fransuz koloniyasi bo'lgan Yuqori Senegal-Niger tarkibida, 1919-yildan esa alohida koloniyaga ajratib yuborildi. 1932-yilda jahon iqtisodiy inqirozi sharoitida koloniyalar boshqaruviga ajratilayotgan xarajatlarni qisqartirish maqsadida Fransiya Yuqori Volta hududlarini o'zining qo'shni kolonial mulklari o'rtasida bo'lib yubordi. 1960-yil 5-avgustda mamlakat mustaqilligi e'lon qilinib, uning prezidenti M. Yameogo bo'ldi. 1966-yilda harbiy to'ntarish davrida M. Yameogo hokimiyatdan chetlashtirildi. 1970-yilda yangi konstitutsiya qabul qilindi. 1974-yilda prezident Lamizana hokimiyatni o'zlashtirib, o'zini o'zi premyer-ministr lavozimiga tayinladi. Shu yil oxiridagi Mali bilan kechgan chegara mojarasi qurolli to'qnashuvlarga olib keldi va 1975-yilda ikki tarafning tinchlik kelishuvini imzolash bilan barham topdi. 1980-yilda polkovnik Saye Zerbo Lamizanani hokimiyat tepasidan chetlashtirib, Harbiy Kengash boshlig'i sifatida butun davlat hokimiyatini o'z zimmasiga oldi. 1982-yilda Zerbo harbiy to'ntarish natijasida ag'darildi va mayor Uedraogo boshchiligida Millatni qutqarish kengashi tashkil etildi. 1987-yil 15-oktabrda Burkina-Fasoning yangi prezidenti bo'lgan B. Kompaore boshchilik qilgan harbiy to'ntarish oqibatida Sankara ag'darildi va o'ldirildi. Yangi konstitutsiya 1991-yilning 11-iyunidan kuchga kirdi. 1997-yilda Kompaorening ko'rsatmasiga ko'ra konstitutsiyaga o'zgartirish kiritilib, prezidentni qayta saylashga nisbatan qo'yilgan konstitutsiyaviy cheklanish olib tashlandi.

## BURUNDI

*Rasmiy nomi — Burundi Respublikasi. Poytaxti — Bujumbura. Hududi — 27834 km<sup>2</sup>. Aholisi — 8236806 kishi (2007). Davlat tili — fransuz, kirundi. Dini — katoliklar (73%), majusiylar (22%), protestantlar (5%). Pul birligi — burundi franki.*

**Geografik joylashuvi va tabiati.** Sharqiy Afrikada joylashgan davlat. Shimolda Ruanda, sharqda va janubda — Tanzaniya, g'arbda Kongo Demokratik Respublikasi bilan chegaradosh. G'arbiy chegarasining bir qismi Tanganika ko'li bo'ylab o'tgan. Mamlakat hududining katta qismi asosan slanes va qum-toshdan iborat bo'lgan yassitog'liklar egallagan. Eng yuqori nuqtasi — Xexa tog'i (2670 m).

Iqlimi — subekvatorial. Tabiati o'ziga xos bo'lib, yassitog'li hududlarida akatsiyalar va palmalar uchraydigan savannalar hukmron. Ba'zi joylarda park o'rmonlari uchraydi. Hayvonot dunyosi boy bo'lib, bu yerda fil, timsoh, qoplon, begemot, yovvoyi cho'chqa kabi hayvonlarni uchratish mumkin. Qushlar ham ko'p. Qazilma boyliklaridan uran, nikel, mis, kobalt, vanadiy, torf mavjud.

**Davlat tuzilishi va siyosiy partiyalari.** Davlat tuzilishi — respublika. Davlat boshlig'i — prezident. Hukumat boshlig'i — premyer-ministr. Burundi 15 ta viloyatga bo'lingan. Siyosiy partiyalari — Burundi demokratiya tarafdorlari fronti, Milliy birdamlik va taraqqiyot partiyasi.

**Iqtisodi, transport kommunikatsiyalari.** Burundi — agrar mamlakat. Yog'ochni qayta ishlash, to'qimachilik, sement ishlab chiqarish, qishloq xo'jaligi xomashyosini qayta ishlash korxonalari faoliyat ko'rsatmoqda. Baliqchilik, chorvachilik, qahva, choy, paxta yetishtiriladi. 2006-yil YIM miqdori 4957 mln dollarni (aholi jon boshiga — 601 doll.) tashkil etgan. Asosiy savdo hamkorlari: Belgiya, Fransiya, Germaniya, Tanzaniya, Yaponiya, AQSH.

**Tarixi.** Tva pigmeylari Burundining tub aholisi hisoblanadi. Tvalarning katta qismini assimiliatsiya qilgan xutular XIV asrda paydo bo'lgan. XV asrda tutsilar kirib kelganidan so'ng Ruandadagi kabi bu yerda ham qirollik tashkil etildi. XIX asrning 80-yillarida Burundi (bu davrda Urundi) Ruanda bilan birga nemislar tomonidan ishg'ol qilinib, German Sharqiy Afrikasi tarkibiga qo'shildi. Birinchi jahon urushidan so'ng Belgiyaga Ruanda—Urundi hududlari boshqaruv mandati topshiril-



di. 1962-yil 1-iyulda Burundi konstitutsion monarxiya sifatida mustaqillikka erishdi. 1966- yilgi harbiy to'ntarishdan so'ng mamlakat respublika deb e'lon qilindi. 1990-yillarda davlatda xutu va tutsilar o'rtasida harbiy to'qnashuvlar boshlandi. 2004-yilda Burundiga xalqaro harbiy kuchlar kiritilishi natijasida fuqarolar urushi va etnik to'qnashuvlarga barham berildi.

## BUTAN

*Rasmiy nomi — Butan Qirolligi. Poytaxti — Tximpxu. Hududi — 47000 km<sup>2</sup>. Aholisi — 2326883 kishi (2007). Davlat tili — dzong-ke. Dini — maxayan buddaviyligining lamaistik shakli. Pul birligi — ngultrum.*

**Geografik joylashuvi va tabiati.** Markaziy Osiyo janubida, Himolayning sharqida joylashgan davlat. Sharqda, janubda va janubiy g'arbda Hindiston, shimolda va shimoliy g'arbda Tibet bilan chegaradosh. Tog'li mamlakat. Sharqiy Himolayning janubiy qismini egallagan. Eng baland tog'i — Jamolxari (7314 m).

Iqlimi — tropik. Daryolari Braxmaputra havzasiga tegishlidir. Mamlakat kalsiy karbiti, gips zaxiralariga ega. Grafit, mis, qo'rg'oshin, toshko'mir, volfram qazib olinadi. Haydaladigan yerlar mamlakat maydonining 2,8% ini tashkil etadi. Tog' cho'qqilari qor bilan qoplangan. Biraxmaputra irmoqlari vodiysida bananlar o'sadi. Hayvonot dunyosida maymun, yo'lbars, himolay ayiqlari, kiyik, fil kabi hayvonlarni uchratish mumkin.

**Davlat tuzilishi va siyosiy partiyalari.** Davlat 8 ta viloyatga bo'lingan. Davlat tuzilishi — konstitutsiyaviy monarxiya. Davlat boshlig'i — qirol. Hukumat boshlig'i — Ministrlar Kengashi raisi. Siyosiy partiyalar rasman mavjud emas.

**Iqtisodi, transport kommunikatsiyalari.** Iqtisodi natural xo'jalik va feodal munosabatlari ustun bo'lgan agrar mamlakat. Tog'lardagi ekin maydonlarida mango, boshoqlilar, sitrus o'simliklar, ananas yetishtiriladi. Hunarmandchilik rivojlangan bo'lib, ustaxonalarda sovuq qurol, gilam, mato to'quvchiligi, yog'ochga ishlov

berish amalga oshiriladi. Tog'-kon va qishloq xo'jaligi mahsulotlarini qayta ishlash korxonalari faoliyat yuritmoqda. 2006-yil YIM miqdori 2638 mln dollarni (aholi jon boshiga — 1180 dol.) tashkil etgan. Asosiy savdo hamkorlari: Hindiston, Yaqin Sharq mamlakatlari, Yevropa mamlakatlari, Singapur.

**Tarixi.** Zamonaviy Butan hududi m. a. VIII asrda Hindiston hukmronligi ostiga o'tdi. XVI asrda Butan Tibet hukmdorlariga bo'ysundi. 1774-yilda zamonaviy Butan hududida yashagan xalqlar Xitoy hukmronligi ostida qoldi. XIX asrda inglizlar bostirib kirdi. 1907-yilda Tongsi hukmdori Ugiyen Vangchuk monarx deb e'lon qilindi va o'z sulolasiga asos soldi. 1949-yilda Butan Hindistondan mustaqillik oldi. 1954-yilda o'z parlamentini tashkil etdi. 1998-yilda qirol o'z vakolatlarning bir qismidan Milliy Assambleya foydasiga voz kechdi.

## BUYUK BRITANIYA

*Rasmiy nomi — Buyuk Britaniya va Shimoliy Irlandiya birlashgan qirolligi. Poytaxti — London. Hududi — 244100 km<sup>2</sup> (Shotland orollari bilan birga). Aholisi — 60563336 kishi (2007). Davlat tili — ingliz. Dini — protestantlik (90%). Pul birligi — funt-sterling.*

**Geografik joylashuvi va tabiati.** Yevropaning shimoli g'arbida, Britan orollarida joylashgan davlat. Buyuk Britaniya orolida Angliya, Shotlandiya va Uels joylashgan. Shimoliy Irlandiya Irlandiya orolining shimoliy qismida joylashgan. Shimolda Irlandiya bilan chegaradosh, g'arbda Atlantika okeani, sharqda Shimoliy dengiz, janubi sharqda Buyuk Britaniyani Yevropadan ajratib turadigan La-Mansh bo'g'ozini tutashib ketgan. Angliya hududida Pennin tog'lari (eng yuqori nuqtasi — Skeyfel-Payk — 978 m) joylashgan. Pennin tog'laridan janubda va Uelsdan sharqdan Markaziy va Janubiy Angliyaning katta qismini egallagan keng tekislik joylashgan. Mintaqaning chekka janubida Dortmur tepaliklari (dengiz sathidan 610 m baland) bor. Asosiy daryolari: Temza, Severn, Tayn, Mers. Shimoliy Irlan-

diyaning katta qismini tekisliklar egallagan bo'lib, markazida Britan orollaridagi eng yirik ko'l — Lox-Ni (maydoni — 390 km<sup>2</sup>) joylashgan. Shimoliy Irlandiyaning eng baland nuqtasi Muri tog'laridagi Sliv-Donord (852 m) cho'qqisidir. Shimoliy Irlandiyaning eng yirik daryolari: Foyl, Yuqori Bon va Quyi Bon. Shotlandiya hududlari asosan tog'lardan iborat, biroq uni o'z navbatida uch qismga bo'lish mumkin: shimolda — Xeylands, markazda — Sentral Loupends va janubda Sazen Aplends. Shotlandiyaning asosiy daryolari: Kloyd, Tey, Fors, Tvid, Di va Spey. Ko'p sonli ko'llar orasida Lox-Ness, Lox-Tea va Lox-Ketrinlar alohida ajralib turadi. Uels ham Shotlandiya kabi tog'li hudud, biroq tog'lar bu yerda unchalik baland emas. Asosiy tog' tizmasi Uels markazidagi Kembri tog'laridir. Uelsning yirik daryolari: Di, Usk, Teyfi. Eng yirik ko'li — Bala.

Iqlimi — yumshoq va nam. Foydali qazilmalardan Shimoliy dengizdan qazib olinadigan neft va gaz konlariga, shuningdek, ko'mir va ohaktosh konlariga egalik qiladi. Buyuk Britaniyaning 77% yerlari dehqonchilik uchun yaroqlidir. Angliyaning o'simlik dunyosi ancha kambag'al, o'rmonlar faqat 4% hududini egallagan. Hayvonot dunyosida kiyik, tulki, quyon va bo'rilar ko'plab uchraydi. Qushlardan kaklik, kabutar, qarq'a va boshqalar ko'p tarqalgan. Ko'llar va daryolarda turli baliqlar ko'p.

**Davlat tuzilishi, siyosiy partiyalari.** Davlat tuzilishi — parlamentar monarxiya. Davlat boshlig'i — qirol (qirolicha). Monarx qonun loyihalarini tasdiqlaydi, titul va unvonlar beradi, biroq amalda faqat ramziy hokimiyatga ega. Oliy qonun chiqaruvchi organi — Jamoa palatasi (630 deputat) va Lordlar palatasi (1000 ta zodagonlar va diniy perlar)dan iborat parlament. Oliy ijroiya organi — premyer-ministr boshchiligidagi Ministrlar Kabineti. Buyuk Britaniya ma'muriy jihatdan 4 ta ma'muriy-siyosiy qism (tarixiy provinsiyalar)dan: Angliya (39 graflik, 6 metropoliya grafliigi va Katta London), Uels (8 graflik), Shotlandiya (9 rayon va 3 orol hududlar), Shimoliy Irlandiya (26 okrug)lardan tashkil topgan. Men va Normand orollari ustidan alohida nazorat o'rnatilgan. Buyuk

Britaniyaga qaram hududlar: Angilya, Bermud orollari, Hind okeanidagi Britan hududlari, Britan Virgin orollari, Kayman orollari, Folklend orollari, Gibraltar, Jersi, Gernsi, Mel oroli, Montserrat, Pitkerka orollari, Muqaddas Yelena oroli, Janubiy Jorjiya va Janubiy Sandvich orollari, Terks va Kaykos orollari. Qaram hududlar hozirgacha Buyuk Britaniyaning dengizorti mulklari deb nomlanib, to'liq mustaqil davlat hisoblanmaydi. Shunga qaramasdan ular o'z-o'zini idora qilish huquqiga ega bo'lib, o'z qonunchilik organlariga egadirlar. Asosiy siyosiy partiyalari: Konservatorlar partiyasi, Leyboristlar partiyasi, Liberal demokratlar partiyasi, Shotland milliy partiyasi.

### ***Iqtisodi, transport kommunikatsiyalari.***

Buyuk Britaniya iqtisodi rivojlangan davlat bo'lib, jahondagi sakkizta rivojlangan davlatlar qatoriga kiradi. Mamlakat sanoatida qazib olish sohalari alohida ahamiyat kasb etadi. O'z hududidagi shaxtalarining yopilishi va ko'mir qazib olishning qisqarishi bilan bir vaqtda Shimoliy dengizdan neft va gaz qazib olish ko'paytirilmoqda. Sanoatning boshqa tarmoqlaridan — transport mashinasozligi (avtomobilsozlik, kemasozlik), aerokosmik sanoat (AQSH va Fransiyadan keyin uchinchi o'rinda)da oddiy va harbiy samolyotlar, vertolyotlar va aviadvigatellar ishlab chiqariladi, oziq-ovqat sanoati (mashhur shotland viskisi, jun va sut ishlab chiqariladi), umumiy mashinasozlik (qishloq xo'jaligi texnikasi, stanoklar, to'qimachilik asbob-uskunalari), elektronika va elektrotexnika (kompyuterlar, dasturlashtirish, protessorlar, superkompyuterlar, telekommunikatsiya vositalari, tibbiyot anjomlari, maishiy texnika), kimyo sanoati (dori ishlab chiqarish — jahonda 4-o'rinda, agroximiya, parfyumeriya, yangi materiallar va biotexnologiya), metall ishlab chiqarish, sellyuloza-qog'oz sanoat sohalari yuksak taraqqiy etgan. Zamonaviy sanoatning taraqqiyoti yuksak texnologiyalarning taraqqiy etganligi bilan belgilanadi. Buyuk Britaniya ilmiy-texnikaviy potensial darajasi bo'yicha Yevropada eng yuqori o'rinni egallaydi. Mamlakat olimlari olgan Nobel mukofotlari soni bo'yicha AQSHdan keyin 2-o'rinni egallaydi. Buyuk Britaniya mehnat zaxiralarining 12% i moliya sektorida

band. London jahon moliya markazi — sayyoramizning moliya poytaxti hisoblanadi. Shuningdek, Manchester, Kardiff, Liverpool, Edinburg shaharlari ham yirik moliyaviy markazlardir. Ahamiyati bo'yicha 2-o'rinda turadigan soha — turizm. Bu sohada mehnatga layoqatli aholining 7% i band bo'lib, yiliga 8 mlrd dollardan oshiq daromad keltiriladi. London dunyoning yirik turistik markazi hisoblanadi. Buyuk Britaniyaning qishloq xo'jaligi oziq-ovqat mahsulotlari bilan o'z ehtiyojlarining faqat yarminigina qoplaydi. Asosiy qishloq xo'jaligi ekinlari: bug'doy, tariq, qandlavlagi, arpa. Mamlakat chorvachilik sohasiga XXI asr boshlarida tarqalgan epidemiya sezilarli darajada zarar yetkazdi. Eksporti: sanoat mahsulotlari, yoqilg'i, kimyo sanoati mahsulotlari, oziq-ovqat. Importi: sanoat mahsulotlari, oziq-ovqat. 2006-yil YIM miqdori 1832252 mln dollarni (aholi jon boshiga — 30253 doll.) tashkil etgan. Asosiy savdo hamkorlari: YI mamlakatlari, AQSH.

Buyuk Britaniya ilq'or mamlakatlar qatori rivojlangan transport infrastrukturasiga ega. Yevrotunnelning ochilishi mamlakatning materik bilan aloqasini yanada yaxshiladi. Asosiy portlari: Aberdin, Belfast, Bristol, Kardiff, Duvr, Glazgo, Liverpool, London, Manchester, Plimut, Sautgempton.

**Tarixi.** M. a. VIII asrdayoq orollarga kelt-brittlar kelib joylashgan edilar. 43-yilda Britaniya Rim imperiyasi tarkibiga kirdi. VI asrda bir nechta mustaqil feodal qirollik va grafliklar tashkil topdi. Brittlarning bir qismi Fransiyaning shimoliga kelib joylashdi. VIII asrda normandlar asosan Daniyadan tez-tez mamlakat qirg'oqlariga hujum qilib turdilar. Ular orolning shimoli sharqiy qismini egallab olishga muvaffaq bo'lishdi. IX asrda qirol Egbert katta hududlarni bir davlatga birlashtirdi va bu davlat «Angliya» deb atala boshladi. 1066-yili Buyuk Britaniyadagi mayda qirolliklar normand sarkardasi Vilgelm tomonidan bosib olinib yagona davlatga birlashtirildi. 1265-yili tarixda dastlabki ingliz parlamenti tuzildi. 1338-yili Angliya Fransiya qarshi yuz yillik urushga kirdi. Bu urush 1453-yilga qadar davom etdi. Bu urush tugashi bilan Angliya taxti uchun urushlar («gullar urushi») boshlanib, 1485-yili

tyudorlar sulolasining g'alabasi bilan yakunlandi. 1588-yili «Yengilmas Armada»ning (ispan floti) yakson qilinishi Angliyani dengizda asosiy hukmron davlatlar qatoriga olib chiqdi. XVII asrning boshlarida Angliya o'zining Yangi dunyodagi mustamlakalariga ega bo'ldi. 1603-yili shotland qirollari Yakov VI va Yakov I nomini olib ingliz taxtiga o'tirishi bilan amalda Shotlandiya va Angliya bitta davlatga birlashdi. Biroq Buyuk Britaniya qirolligi 1707-yili birlashish to'g'risidagi hujjat imzolanganidan keyingina e'lon qilindi. Shu paytdan boshlab London yagona davlat poytaxtiga aylandi. 1642—1649-yillarda Styuartlar bilan parlament o'rtasidagi tortishuvlar qonli fuqarolar urushining boshlanishiga olib keldi. Natijada Oliver Kromvel boshchiligidagi respublika e'lon qilindi. Monarxiya tez orada qayta tiklandi, biroq qirolning huquqlari sezilarli darajada kamayib, amalda hokimiyat parlament qo'lga o'tdi. 1651-yili Irlandiya, 1652-yili esa Shotlandiya bosib olindi. Britan kolonial imperiyasi asosan XVIII asrda shakllandi. XVIII asrning oxirlarida Buyuk Britaniya Amerikadagi 13 ta mustamlakasidan ajraldi, biroq Kanada va Hindistonda mustahkamlanib oldi. 1805-yili Trafalgar yaqinida admiral Nelson tomonidan ispan-fransuz flotining yakson qilinishi bilan Buyuk Britaniya «dengizlar xo'jayini»ga aylandi. 1793—1815-yillarda Angliya Fransiyaga qarshi urushlarda ishtirok etdi. 1815-yili ingliz sarkardasi gersog Vellington pruss qo'shinlari bilan birga Vaterloo yaqinidagi jangda Napoleon ustidan yirik g'alabaga erishdi. Shundan so'ng mamlakatda butun yuz yil davomida tinchlik hukm surdi. Ayniqsa, qirolcha Viktoriya (1837—1901) davrida Buyuk Britaniya mulklari juda kengaydi. Angliya Antanta tarkibida Birinchi jahon urushida faol ishtirok etdi. Urush natijasida mamlakat Afrika va Osiyodagi nemis koloniyalarining bir qismini qo'lga kiritdi. 1931-yili Britan Millatlar Hamdo'stligi tuzildi. 1939—1945-yillarda Angliya Ikkinchi jahon urushida qatnashdi. 1947-yili Hindiston va Pokistonga mustaqillik berdi, 1949-yili esa mamlakat NATOga a'zo bo'ldi. 1982-yili Folklend orollari uchun Angliya Argentina bilan harbiy to'qnashuvga bordi. Qisqa davom etgan jangovar harakatlar-

dan so'ng inglizlar bu hududlar ustidan o'z nazoratlarini o'rnatdilar. 1979—1990-yillarda konservatorlar hukumati Margaret Tetcher boshchiligida iqtisodiy islohotlar o'tkazdi. 1997-yili umumiy saylovlarda Leyboristlar partiyasi g'alaba qozondi va Toni Bler premyer-ministr lavozimini egalladi. 2007-yili Toni Bler iste'foga chiqdi va hokimiyatga Gordon keldi.

## VANUATU

*Rasmiy nomi — Vanuatu Respublikasi. Poytaxti — Port-Vila. Hududi — 14800 km<sup>2</sup>. Aholisi — 212000 kishi (2007). Davlat tili — bislama, ingliz, fransuz. Dini — protestantlar (58%), katoliklar (15%) va boshqalar. Pul birligi — vatu.*

**Geografik joylashuvi va tabiati.** Tinch okeanining janubi g'arbiy qismidagi Yangi Gibrid orollarida joylashgan Okeaniya davlati. Vanuatu davlati o'z ichiga 80 dan ortiq orolni qamrab olgan bo'lib, ulardan yiriklari — Espiritu-Santo, Malakula, Ambrim, Efate, Eframango. Orollar sathi kelib chiqishi vulqonli bo'lgan tog'lar bilan qoplangan. Jami 60 dan ortiq vulqon mavjud bo'lib, ularning ba'zilar hamon harakatdadir.

Iqlimi — nam, tropik. Asosiy tabiiy zaxiralari: marganes, oltin, kumush, mis, baliq, yog'och, neft. Shimoliy sharqiy so'qmoqlari nam tropik o'rmonlar bilan qoplangan. Orollarda kemiruvchilar, kaltakesaklar, toshbaqalar, qush va hasharotlar mavjud.

**Davlat tuzilishi, siyosiy partiyalari.** Vanuatu davlati Buyuk Britaniya rahbarligidagi Hamdo'stlik tarkibiga kiruvchi respublika. Davlat boshlig'i — prezident, hukumat boshlig'i — premyer-ministr. Mamlakat ma'muriy jihatdan 6 ta provinsiyaga bo'lingan. Poytaxti Efate orolida joylashgan. Qonun chiqaruvchi hokimiyat bir palatali Milliy Assambleyadan iborat. Siyosiy partiyalari: Milliy birlashgan partiya, Vanuatu partiyasi, Yangi xalq partiyasi.

**Iqtisodi, transport kommunikatsiyalari.** Mamlakat iqtisodining asosini qishloq xo'jaligi tashkil

etadi. Madaniy o'simliklardan kakao, qahva, kopra, banan, yams, maniok, mevalar, shokolad daraxti o'stiriladi. Iqtisodning boshqa sohalaridan baliqchilik va turizm ham rivojlangan. Chorvachilik rivojlanmoqda. Sanoat sust rivojlangan bo'lib, korxonalar asosan qishloq xo'jaligi mahsulotlarini qayta ishlashga, yog'och va to'qimachilik mahsulotlarini ishlab chiqarishga ixtisoslashgan. 2006-yil YIM miqdori 5788 mln dollarni (aholi jon boshiga — 2900 doll.) tashkil etgan. Asosiy savdo hamkorlari: Niderlandiya, Yaponiya, Avstraliya, Yangi Zelandiya, Yangi Kaledoniya. Transport kommunikatsiyalari avtomobil yo'llar mavjud. Asosiy porti — Port-Vila.

**Tarixi.** Orollar aholisining ajdodlari m. a. III ming yilliklarda Osiyodan ko'chib kelishgan. 1774-yilda orollar portugallar tomonidan kashf qilindi. XVIII asrda orollar mashhur ingliz dengizchisi J. Kuk tomonidan o'rganildi. XIX asrda orollarni fransuz va inglizlar mustamlakaga aylantirishdi. 1887-yilda Yangi Gibril orollarini boshqarish uchun fransuz va ingliz komissiyasi tashkil etiladi. 1906-yilda ushbu komissiya kondominiy deb atala boshladi. 1980-yili Vanuatu mustaqil deb e'lon qilindi. Mamlakatda chet el kapitalining hukmronligi saqlanib qolmoqda.

## VATIKAN

*Rasmiy nomi — davlat-shahar Vatikan. Poytaxti — Vatikan. Hududi — 0,44 km<sup>2</sup>. Aholisi — 821 kishi (2007). Davlat tili — italyan va lotin. Dini — katoliklar (100%). Pul birligi — yevro.*

**Geografik joylashuvi va tabiati.** Italiyaning poytaxti Rim shahrining g'arbiy qismida (Monte Vatikano tepaligida), katolik cherkovi boshlig'i Rim papasining rezidensiyasi hududida joylashgan kichik davlat.

**Davlat tuzilishi, siyosiy partiyalari.** Davlat tuzilishi — mutlaq teokratik monarxiya. Davlat boshlig'i — hozir Rim papasi Benedikt XVI bo'lib, unga Vatikandagi mutlaq hokimiyat tegishlidir. Rim papasi



yo'qligida Vatikanga Avliyo Rim cherkovi kamerlengi rahbarlik qiladi. Shuningdek, Vatikan o'z hukumati — Rim kuriyasiga ega.

**Iqtisodi, transport kommunikatsiyalari.** Vatikan yirik kapital mablag'lari, bir qator kompaniya va banklarning aksiyalari, Italiya, Ispaniya, Germaniya va Lotin Amerikasi mamlakatlaridagi yirik ko'chmas mulklarning egasi hisoblanadi. Vatikanning mablag'lari AQSHda 50 mlrd dollardan ortiqqa baholangan. Daromadining boshqa manbalari — milliy katolik cherkovlarining badallari, pochta markalari, tangalar, suvenirlar ishlab chiqarish va sotishdan tushadigan mablag'lardir. 2006-yil YIM miqdori 810 mln dollarni (aholi jon boshiga — 0,9 mln doll.) tashkil etgan. Vatikan turli mamlakatlarda 50 dan oshiq tilda 1,5 ming xildan ortiq gazeta va jurnallar nashr qiladi. Dunyoning ko'plab mamlakatlariga o'z radioeshittirishlarini tarqatadi.

**Tarixi.** Rimda papaning doimiy qarorgohi joylashgan qasr XIV asrda qurilgan. XVIII—XIX asrlarda Italiyada mustaqil teokratik davlat sifatida Papa viloyati mavjud edi. Vatikan o'z nomini 1870-yilda Rim papasining qarorgohi bo'lib kelgan saroy nomidan olgan. 1871-yili italyan yerlari birlashtirilib, papa diniy hokimiyatdan mahrum etildi. 1929-yilda tuzilgan Lateran bitimlariga ko'ra Vatikan Rim papasining qarorgohiga aylandi. Vatikanga Rimda va uning tashqarisidagi o'nlab binolar tegishlidir. Vatikan o'z bayrog'i, valyutasi, armiyasi, radiostansiyasi va gazetalariga ega. 2004-yil 2-aprel kuni Ioann Pavel II (Karol Yuzef Voytila—polyak millatiga mansub bo'lgan birinchi papa) vafot etib, uning o'rniga 2005-yil 19-apreldan Benedikt XVI (Yozef Ratsinger) saylandi.

## VENGRIYA

*Rasmiy nomi — Vengriya Respublikasi. Poytaxti — Budapesht. Hududi — 93032 km<sup>2</sup>. Aholisi — 9946231 kishi (2007). Davlat tili — vengr. Dini — katoliklar (68%), protestantlar (25 %). Pul birligi — forint.*

**Geografik joylashuvi va tabiati.** Markaziy Yevropada joylashgan davlat. Shimolda — Slovakiya, sharqda — Ruminiya, shimoli sharqda — Ukraina, janubda — Serbiya, Xorvatiya va Sloveniya, g'arbda — Avstriya bilan chegaradosh. Vengriya hududi asosan tekisliklardan iborat. Vengr-slovak chegarasining bir qismini tashkil qiladigan Dunay keskin janubga burilib, mamlakatni ikki qismga ajratadi. O'rta Dunay tekisligi Dunay daryosidan sharqda joylashgan bo'lib, shimolini Vengriyaning eng yuqori nuqtasi — Kekesh tog'i (1015 m) joylashgan Alp cho'qqilari egallagan. G'arbda baland bo'lmagan Meshek va Bakoni tog'lari hamda Markaziy Yevropadagi eng yirik ko'l — Balaton joylashgan.

Iqlimi — mo'tadil, kontinental. Asosiy daryolari: Dunay, Tisa. Foydali qazilmalardan boksit, ko'mir, tabiiy gaz mavjud. Bargli o'rmonlar mamlakat hududining 17% ini egallagan. Emanzorlar asosan o'rta tog'lik hududlarda saqlanib qolgan. Hayvonot dunyosida tulki, quyon, yovvoyi cho'chqa, kiyiklar mavjud. Qushlardan — laylak, turna, yovvoyi o'rdaklarni ko'plab uchratish mumkin.

**Davlat tuzilishi, siyosiy partiyalari.** Vengriya — parlamentar respublika. Ijro etuvchi hokimiyat prezidentga va premyer-ministr boshchiligidagi hukumatga tegishlidir. Qonun chiqaruvchi hokimiyat bir palatali parlament — Davlat Yig'ini tomonidan amalga oshiriladi. Vengriya 19 ta viloyatga bo'lingan bo'lib, mamlakat poytaxti Budapesht alohida maqomga ega. Mamlakatda 50 dan ortiq siyosiy partiya va uyushmalar ro'yxatga olingan bo'lib, ulardan eng yiriklari — Vengriya demokratik forumi, Xristian-demokratik xalq partiyasi, Erkin demokratlar ittifoqi, Vengriya sotsialistik partiyasi.

**Iqtisodi, transport kommunikatsiyalari.** Vengriya — industrial-agrar davlat. Rivojlangan sanoat sohalari: mashinasozlik (avtomobilsozlik, lokomotiv-kemasozlik), asbob-uskunasozlik (aloqa vositalari, EHM, tibbiyot anjomlari), kimyo, yengil (to'qimachilik, poyabzal) va oziq-ovqat sanoati. Mamlakatda ko'p miqdorda boksitlar qazib olinadi (Yevropada 2-o'rinda). Marganes va temir rudasi konlari ham ko'p. Mamlakatda qora va rangli metallurgiya korxonalari

ham faoliyat ko'rsatmoqda. Kimyo sanoati turli xil o'g'itlar, plastmassa, sintetik materiallar va dori-darmonlar ishlab chiqaradi. To'qimachilik, tikuvchilik va poyabzal sanoati ham rivojlangan. Oziq-ovqat ishlab chiqaruvchi korxonalar mamlakat hududi bo'ylab keng tarqalgan. Qishloq xo'jaligi ekinlari mamlakat hududining 75% ini egallaydi. Bug'doy, tariq, makkajo'xori, qandlavlagi, kartoshka, kungaboqar, mevalar yetishtiriladi. Uzumchilik va bog'dorchilik keng tarqalgan. Bu yerda tayyorlanadigan tokay vinolari dunyoga mashhur. Chorvachilik yirik shoxli qoramollar va cho'chqalarni boqishga ixtisoslashgan. Yilqichilik rivojlangan. Parranda boqish muhim ahamiyatga ega. Keyingi yillarda turizm yaxshi rivojlanmoqda. 2006-yil YIM miqdori 167584 mln dollarni (aholi jon boshiga — 16848 doll.) tashkil etgan. Asosiy savdo hamkorlari: Germaniya, Avstriya, Italiya, Rossiya, Niderlandiya.

Asosiy daryo portlari: Budapesht, Dunayvarosh.

**Tarixi.** M. a. I asr oxirlarida zamonaviy Vengriya hududi Pannoniya provinsiyasi sifatida Rim imperiyasi tarkibiga kirdi. IV asrda Rim imperiyasining inqirozidan so'ng Pannoniyaga V—IX asrlarda xunlar, vestgotlar, avarlar bostirib kirishgan. 1000-yilda Ishtvan I boshchiligida birinchi Vengr qirolligi tashkil topdi. XIII asrda Vengr qirolligi o'zaro urushlar hamda tatarlar bosqinlari (1241) oqibatida zaiflashib qoldi. XVI asrda Vengriya o'z mustaqilligini yo'qotdi. 1526-yili Moxach yonidagi jangda vengr qo'shinlari turklar tomonidan tor-mor qilindi. Turklar Buda shahriga bostirib kirib, uni talon-taroj qilishdi. Mamlakat ikki qismga bo'linib, g'arbiy qismi Gabsburglar, sharqiy qismi esa 1541-yilda Usmoniylar imperiyasi hukmronligi ostiga tushib qoldi. XVII asr oxirlarida turklar hozirgi Vengriya hududidan siqib chiqariladi va u butunlay Gabsburglar hukmronligi ostiga tushib qoladi. 1867-yilda Avstro-Vengriya qirolligi tashkil etiladi. 1914-yilda Avstro-Vengriya I jahon urushiga kirdi. Urush tugaganidan so'ng 1918-yilning oktabrida mamlakatda inqilob boshlandi, natijada Vengriya mustaqil respublika deb e'lon qilindi. 1919-yil 21-martda hokimiyat Bela Kun boshchiligidagi Sotsialistik partiya qo'liga o'tdi. 1919-yil avgustda rumin

qo'shinlari Peshtni bosib olishdi. 1920-yilda esa admiral Xorti diktatorlik rejimi o'rnatildi. 1941-yilda Vengriya II jahon urushiga Germaniyaning ittifoqchisi sifatida kirdi. 1946-yil 1-fevralda Vengriya respublika deb e'lon qilindi. Vengriyaning hozirgi chegaralari 1947-yilgi Parij tinchlik shartnomasiga ko'ra o'rnatilgan. 1949-yilda mamlakat yangi konstitutsiya va yangi nomga — Vengriya Xalq Respublikasi — ega bo'ldi. 1956-yilning oktabrida Rakoshining kommunistik rejimiga qarshi qo'zg'olon ko'tarildi, bu qo'zg'olon sovet qo'shinlari tomonidan bostirildi. 1989-yili kommunistlar hokimiyatdan chetlashtirildi va mamlakat Vengriya Respublikasi deb e'lon qilindi. 1999-yili Vengriya NATONing to'la huquqli a'zosi bo'ldi.

## VENESUELA

*Rasmiy nomi — Venesuela Respublikasi. Poytaxti — Karakas. Hududi — 912100 km<sup>2</sup>. Aholisi — 26094067 kishi (2007). Davlat tili — ispan. Dini — katolik. Pul birligi — bolivar.*

**Geografik joylashuvi va tabiati.** Janubiy Amerikadagi davlat. Janubda — Braziliya, g'arbda va janubi g'arbda — Kolumbiya, sharqda Gayana davlatlari bilan chegaradosh. Shimoliy qirg'oqlari Karib dengizi va Atlantika okeani bilan tutashgan. Mamlakatning shimoli va shimoli g'arbida Karib Andlari tog' zanjirining Siyerra-de-Perixa, Kordilyera-de-Merida tizmalari joylashgan. Venesuelaning eng yuqori nuqtasi — Bolivar cho'qqisi (5007 m). Mamlakat markazida Orinoko pastligi, janubi sharqda Gviana tekis tog'liklari joylashgan. Tog' tizmalari orasida botiqlar va cho'kmalar ko'p bo'lib, u yerlarda ko'llar hosil bo'lgan. Yirik ko'llari — Marakaybo va Valensiya.

Iqlimi — subekvatorial. Asosiy daryosi — Orinoko irmoqlari bilan. Mamlakat neft, tabiiy gaz, temir rudasi, olmos, oltin, kumush, mis, rux, titan, marganes zaxiralariga ega. Venesuelaning doimiy yashil o'rmonlarida qimmatbaho daraxt turlari mavjud. Hayvonot dunyosi-

da maymun, ayiq, yalqov, chumolixo'rlarni uchratish mumkin.

### ***Davlat tuzilishi va siyosiy partiyalari.***

Davlat va hukumat boshlig'i — prezident. Ijro etuvchi hokimiyat Ministrlar Kengashiga ham tegishlidir. Qonun chiqaruvchi hokimiyat — ikki palatali, Senat va Deputatlar palatasidan tashkil topgan — Milliy Kongressdan iborat. Har bir shtatning o'z qonun chiqaruvchi yig'ini mavjud. Venesuela — respublika, 22 ta shtatga bo'lingan. Siyosiy partiyalari: Demokratik faoliyat, Sotsial-xristian partiyasi, Milliy birdamlik.

### ***Iqtisodi va transport kommunikatsiyalari.***

Mamlakat iqtisodining asosini neftni qayta ishlash sanoati tashkil etadi. Neft qazib olishdan keladigan foyda davlat budjetiga tushadigan daromadning asosiy qismini tashkil etadi. Quyidagi sanoat sohalari rivojlangan; temir rudasini qazib olish, neftni qayta ishlash, neft kimyosi, metallurgiya, to'qimachilik, oziq-ovqat, avtomobilsozlik. Makkajo'xori, dukkakkililar, shakarqamish, sholi, sorgo, kartoshka, sabzavotlar, qahva, banan yetishtiriladi. Chorvachilik va chorvachilik mahsulotlarini qayta ishlash ham keng yo'lga qo'yilgan. 2006-yil YIM miqdori 155790 mln dollarni (aholi jon boshiga — 5800 doll.) tashkil etgan. Asosiy savdo hamkorlari: AQSH, Braziliya, Kolumbiya, Yaponiya, Italiya, Germaniya.

***Tarixi.*** 1498-yilda X. Kolumb hozirgi Venesuela yerlarini kashf qildi. XVI asrdan boshlab ispanlar mamlakatni mustamlaka qila boshlaydi. 1567-yilda mamlakat poytaxti Karakasga asos solindi. XVIII asrning birinchi yarmida Venesuela Ispaniya vitse-qirolligining tarkibiy qismiga aylandi. XIX asr boshlaridan mustaqillik uchun kurash boshlandi. Mustaqillik uchun kurashga Simon Bolivar rahbarlik qildi. Bir qator g'alabalar va mag'lubiyatlardan so'ng, Venesuela to'la mustaqillikni 1830-yilda qo'lga kiritdi. XX asrning o'rtalarigacha mamlakatda harbiy to'ntarishlar va inqiloblar bo'lib turdi. 1958-yildagina mamlakatda fuqarolik demokratiyasi o'rnatildi. Mamlakat iqtisodi neft eksporti hisobiga tez sur'atlar bilan rivojlandi. 1974-yilda neft sanoati milliylashtirildi. 1980-yillarning

o'rtalarida mamlakatda moliyaviy-iqtisodiy inqiroz boshlanib, ommaviy namoyishlarga, ish tashlashlarga olib keldi. 90-yillarda bir qator harbiy to'ntarishlarni amalga oshirish uchun harakatlar bo'lib, ularning barchasi hukumat qo'shinlari tomonidan bostirildi. Bir kunda 3 mln barrel neft qazib oladigan Venesuela prezidenti Ugo Chaves AQSH bilan keskin munosabatda bo'lishiga qaramay neft yetkazib berish shartnomasi uzluksiz bajarilib kelingan (Venesuela nefti AQSH neft importining 15% tashkil qiladi). 2006-yil 12 martda Venesuela parlamenti davlat bayrog'iga sakkizinchi yulduzni qo'shish haqidagi qarorni qabul qildi (XIX asrning boshida Guayana viloyati qo'shilganligini ifodalovchi sakkizinchi yulduzni qo'shish 1817-yilda Simon Bolivar tomonidan taklif etilgan edi).

## VIRGIN OROLLARI

*Rasmiy nomi — Virgin orollari (AQSH). Poytaxti — Charlotta-Amaliya. Hududi — 355 km<sup>2</sup>. Aholisi — 110468 kishi (2007). Davlat tili — ingliz. Dini — xristianlik (katoliklar, baptistlar). Pul birligi — AQSH dollari.*

**Geografik joylashuvi va tabiati.** Virgin orollari Shimoliy va Janubiy Amerika orolig'ida Puerto-Riko orolidan sharqda Kichik Antil orollarining shimoliy qismida joylashgan AQSHga qarashli hudud. Virgin orollari tarkibiga 50 dan ortiq orollar kiradi. Ulardan eng yiriklari: Sent-Tomas, Sent-Jon, Santa-Kruz. Orollar ohaktoshli, shuningdek, kristalli va vulqonli dahalar ham bor.

Iqlimi — tropik. Doimiy yashil tropik o'rmonlarning qoldiqlari bor. Qolgan hududlar qishloq xo'jaligida foydalaniladigan yerlar hisoblanadi. Hayvonat dunyosida maymunlar va kolibri, to'ti kabi qushlar bor.

**Davlat tuzilishi, siyosiy partiyalari.** Davlat tuzilishi — orollar ustidan umumiy nazoratni AQSH Ichki Ishlar vazirligi amalga oshiradi. Ijroiya hokimiyat gubernatorga tegishli, ma'muriy jihatdan 3 ta orolga bo'lingan. Poytaxti Charlotta-Amaliya Sent-Tomas

orolida joylashgan. Siyosiy partiyalari: AQSH Demokratik va Respublikachilar partiyalarining bo'limlari, Fuqarolar mustaqilligi harakati.

**Iqtisodi, transport kommunikatsiyalari.** Iqtisodining asosini chet el turizmi tashkil qiladi. Dunyodagi eng yirik neftni qayta ishlash zavodlaridan biri Sen-Kroa orolida joylashgan. Chorvachilik va baliqchilikni rivojlantirish uchun chora-tadbirlar ko'rilmoqda. Chetdan keltiriladigan detallardan soatlar yig'ish, oziq-ovqat mahsulotlari va rom ishlab chiqarish yo'lga qo'yilgan. Qishloq xo'jaligida sorgo, shakarqamish, meva va sabzavotlar yetishtiriladi. Chetdan neft xomashyosi, sanoat mahsulotlari, oziq-ovqat keltiriladi. Chetga neft mahsulotlari, shakar, rom, sitrus mevalar, qahva eksport qilinadi. 2006-yil YIM miqdori 2799 mln dollarni (aholi jon boshiga — 17200 doll.) tashkil etgan. Asosiy savdo hamkorlari: Buyuk Britaniya, Kanada, AQSH, Puerto-Riko.

**Tarixi.** Kolumb ekspeditsiyasi 1493-yili orollarga kelgan. Dastlabki aholi punktlari 1625-yil Santa-Kruz orolida ingliz va fransuz mustamlakachilari tomonidan barpo qilingan. Turli vaqtlarda orollar ustidan inglizlar, fransuzlar, ispanlar o'z nazoratini o'rnatgan. 1733-yili orollarni daniyaliklar sotib olishdi (1754-yil rasmiy ravishda Daniya mustamlakasi deb e'lon qilindi). 1672- va 1683-yillarda daniyaliklar Sent-Tomas va Sent-Jon orollarini ham mustamlakaga aylantirgan edi. Daniyaliklar hukmronligi davrida Sent-Tomas oroli savdo markaziga (shuningdek, qul savdosining ham), Sent-Jon oroli esa shakarqamish plantatsiyalariga aylantirilib, ularda qullar ishlatilgan. Qullik mavjud bo'lgan davrda (1848-yilgacha) orolga 28 ming negr qullar keltirilgan. Daniya orollar ustidan 1917-yilga qadar (Napoleon urushlari davridagi qisqa davrni hisobga olmaganda) egalik qilib keldi. Shundan so'ng, Daniya bu orollarni AQSHga 25 million dollarga sotdi. 1932-yili orolda yashovchilarga AQSH fuqaroligi berildi. Bu yerda AQSH harbiy bazasi qurilgan. 1973-yili Virgin orollari AQSH kongressining deputatlar palatasiga 1 ta deputat o'tkazishga muvaffaq bo'lgan. (Lekin ovoz berish huquqi ega emas.)

## VIRGIN OROLLARI (Buyuk Britaniya)

*Rasmiy nomi – Virgin orollari (Buyuk Britaniya mulki). Poytaxti – Rod-Taun. Hududi – 153,4 km<sup>2</sup>. Aholisi – 23147 kishi (2007). Davlat tili – ingliz. Dini – protestantlik. Pul birligi – sharqiy karib dollari.*

**Geografik joylashuvi va tabiati.** Virgin orollari 400 dan ortiq orollardan iborat (ulardan 16 tasida odam yashaydi). Ulardan eng kattalari Tortola, Virjin-Gorda, Anegada. Virgin orollari Kichik Antil orollarining shimoliy qismida, Puerto-Rikodan sharqda joylashgan. Orollar ohaktoshlar bilan qoplangan.

Iqlimi – tropik. Doimiy yashil tropik o'rmonlarning qoldiqlari bor, qolgan yerlari qishloq xo'jaligida foydalaniladigan yerlar. Maymun, kolibri, to'ti, dengiz qushlari yashaydi.

**Davlat tuzilishi, siyosiy partiyalari.** Davlat tuzilishi – Buyuk Britaniya mulki, alohida hudud. Davlat boshlig'i – moliya, ichki xavfsizlik, mudofaa boshqaruvi, tashqi siyosat, davlat xizmati, huquq-tartibot tizimini boshqaradigan, Buyuk Britaniya qirolichasi tomonidan tayinlanadigan gubernator. Siyosiy partiyalari: Virgin orollari partiyasi, Birlashgan partiya.

**Iqtisodi, transport kommunikatsiyalari.** Iqtisodining asosini chet el turizmi tashkil etadi. Sement, rom, yengil sanoat, qurilish mahsulotlari ishlab chiqaradigan korxonalar faoliyat ko'rsatadi. Kokos yong'og'i, banan, shakarqamish, sabzavotlar yetishtiriladi. Importi: mashina va jihozlar. Eksporti: rom, baliq, qum, shag'al, mevalar, chorvachilik mahsulotlari. 2004-yil YIM miqdori 2590 mln dollarni (aholi jon boshiga – 38500 doll.) tashkil etgan. Asosiy savdo hamkorlari: AQSH, Puerto-Riko, Virgin orollari (AQSH).

**Tarixi.** 1493-yilda X. Kolumb ekspeditsiyasi orolga kelib tushgan. Yevropaliklardan birinchilardan bo'lib gollandlar (1648) yashay boshlaganlar. Angliyaliklar dastlab 1666-yilda orolga kelgan. Ular kelishi bilan qullar mehnatiga asoslangan plantatsiyalar xo'jaligi



rivojlana boshlagan. Qulchilik tugatilguniga qadar (XIX asr o'rtalarida) orolga yetti ming negr qullar keltirilgan. 1762-yildan Buyuk Britaniyaning rasmiy mustamlakasi. 1960-yilda rasman alohida hudud deb e'lon qilindi. 1967-yilda orolga chegaralangan o'z-o'zini boshqarish huquqi berildi.

## VYETNAM

*Rasmiy nomi – Vyetnam Sotsialistik Respublikasi. Poytaxti – Xanoy. Hududi – 329600 km<sup>2</sup>. Aholisi – 85395893 kishi (2007). Davlat tili – vyetnam. Dini – buddaviylar (55%), majusiylar (23%), daosiylar (12%), katoliklar (10%). Pul birligi – dong.*

**Geografik joylashuvi va tabiati.** Janubi Sharqiy Osiyoda joylashgan davlat. G'arbda — Kombodja va Laos, shimolda Xitoy bilan chegaradosh. Sharqiy va Janubiy sohillari Janubiy Xitoy dengizi bilan tutashgan. Vyetnam Hindixitoy yarimorolining sharqiy qismida joylashgan. Mamlakat 4 ta fizik-georafik hududga bo'lingan. Shimolda joylashgan Yunnan tog'ligida mamlakatning eng yuqori nuqtasi — Fon-Si-Pan (3143 m) tog'i joylashgn.

Iqlimi — shimolda subtropik, janubi sharqda va markazida tropik mussonli. Mamlakatning asosiy dar-yolari — Mekong va Xongxa bo'lib, ular Janubiy Xitoy dengiziga quyiladi. Mamlakat hududida temir rudasi, marganes, boksitlar, ko'mir zaxiralari mavjud. Dengiz shelflarida neft va gaz konlari topilgan. Tog'li hududlarda tropik o'rmonlarining katta bo'lmagan maydonlari saqlanib qolgan. Bu yerda keng bargli bambuk, liana, banyan kabi daraxtlar o'sadi. Vyetnam hududida fil, ayiq, yo'lbars, kiyik, maymun, quyon, olmaxon kabi hayvonlarni uchratish mumkin. Timsoh, ilon, kaltake-saklar keng tarqalgan.

**Davlat tuzilishi va siyosiy partiyalari.** Mamlakat hududiy jihatdan 61 ta provinsiyaga bo'lingan. Mamlakat aholisining 90% i Xongxa va Mekong

daryolari havzasida yashaydi. Davlat tuzilishi — respublika. Davlat boshlig'i — prezident. Hukumat boshlig'i — premyer-ministr. Siyosiy partiyalari: Vyetnam kommunistik partiyasi.

***Iqtisodi, transport kommunikatsiyalari.***

Mamlakat iqtisodi davlat, kooperativ va xususiy sektorlaridan tarkib topgan. Vyetnam Janubi Sharqiy Osiyoning «Yangi industrial mamlakat»lari qatoriga kiradi. Sanoatning tog'-kon, metallurgiya, energetika, asbobsozlik tarmoqlari rivojlanmoqda. Neft, apatitlar, xromitlar, qalay, volfram qazib olinadi. Mamlakat o'z-o'zini asosiy oziq-ovqat mahsulotlari bilan to'la ta'minlashga erishdi. Sholi, shakarqamish, choy, qahva, paxta, batat, tropik meva va sabzavotlar yetishtiriladi. 2006-yil YIM miqdori 222172 mln dollarni (aholi jon boshiga — 2601 doll.) tashkil etgan. Asosiy savdo hamkorlari: Xitoy, Yaponiya, Singapur, Janubiy Koreya, Tayvan, Tailand, Rossiya.

***Tarixi.*** Mamlakat hududida m. a. 300-yilda Dongson davlati gullab-yashnadi. M. a. 111-yilda Vyetnam Xitoy tomonidan bosib olindi. 939-yilda xitoyliklar mag'lubiyatga uchrab, dastlabki vyetnam sulolasiga asos solinadi. 1471-yilda Shimoliy va Janubiy Vyetnamning birlashish jarayoni boshlandi. 1858-yilda Fransiya tomonidan Vyetnam bosib olindi. 1930-yilda Xo Shi Min kommunistik partiyani tashkil etdi va mustaqillik uchun kurash boshladi. 1946-yilda Vyetnam fransuzlar va ularning mustamlakachilik siyosatiga qarshi kurash boshladi. 1954-yilda Jeneva kelishuviga asosan Vyetnam 17-parallel bo'ylab ikkiga bo'lindi. Shimolni kommunistlar, janubni AQSH qo'llab-quvvatladi. 1964-yili Shimol qo'shinlari AQSHning kichik kemalariga hujum qilganidan so'ng harbiy harakatlar boshlanib ketdi. 1973-yilda AQSH qo'shinlari Vyetnamdan olib chiqildi.

1992-yilda yangi konstitutsiya qabul qilindi. 1995-yilda Vyetnam AQSH bilan diplomatik munosabatlarini qayta tikladi.

## GABON

*Rasmiy nomi — Gabon Respublikasi. Poytaxti — Librevil. Hududi — 267667 km<sup>2</sup>. Aholisi — 1461725 kishi (2007). Davlat tili — fransuz. Dini — xristianlik (60%), majusiylik (39%), islom (1%). Pul birligi — afrika franki.*

**Geografik joylashuvi va tabiati.** Markaziy Afrikaning g'arbida joylashgan davlat. Sharqda va janubda Kongo (chegara uzunligi — 1903 km), shimolda va g'arbda Kamerun va Ekvatorial Gvineya bilan chegaradosh (648 km). G'arbda Gabon Atlantika okeaniga tutashib ketgan. Asosiy yirik daryosi — Ogove. Asosiy tabiiy boyliklari — neft, uran, oltin, temir rudasi, marganes. Hududining 78% i namlik darajasi yuqori bo'lgan tropik o'rmonlar bilan qoplangan. Gabon hududining deyarli o'rtasidan ekvator kesib o'tadi.

Iqlimi — nam va issiq. Hayvonot dunyosi o'ta boy va xilma-xil. Fil, qo'tos, antilopa, qoplon va boshqalar shular jumlasidandir.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Mamlakat 9 ta viloyatdan iborat. Gabon 1960-yilning 17-avgustida o'z mustaqilligiga erishgan. 17-avgust Milliy mustaqillik kuni sifatida bayram qilinadi. Davlat boshlig'i — prezident. Hukumat va Bosh vazir prezident tomonidan tayinlanadi. Qonun chiqaruvchi oliy organ bir palatali parlament — Milliy Majlis. Mamlakatda 70 dan oshiq siyosiy partiyalar mavjud. Ularning eng yiriklari — Gabon Demokratik Partiyasi, Gabon Taraqqiyoti Partiyasi va Milliy Uyg'onish harakati.

**Iqtisodi, transport kommunikatsiyalari.** Yirik miqdordagi tabiiy boyliklarga ega bo'lganligi sababli Gabon Afrikaning rivojlangan davlatlaridan biri hisoblanadi. Iqtisodiyotning yetakchi sohasi neft eksportidir. Bundan tashqari sanoatning boshqa sohalari — yog'ochni qayta ishlash, to'qimachilik, kon ishlari yaxshi rivojlangan. Qishloq xo'jaligida asosan shakarqamish, kakao, banan, makkajo'xori va sholi yetishtiriladi. Eksportga neft, marganes, toshko'mir, uran xom-

ashyosi chiqariladi. 2006-yil YIM miqdori 9227 mln dollarni (aholi jon boshiga — 5900 doll.) tashkil etgan. Asosiy savdo hamkorlari Fransiya, AQSH va Yaponiya. Yirik portlari: Libervil, Port-Jantil.

**Tarixi.** Bugungi Gabon hududi XV asrda portugallar tomonidan ochilgan. Gabonni mustamlakalashtirish jarayoni uning 1889-yilda Fransuz Kongosiga qoʻshilishi bilan yakunlandi. Gabon 1910-yilda Fransuz Ekvatorial Afrikasining tarkibiy qismiga aylandi. 1960-yildan Gabon oʻz mustaqilligiga erishdi.

## GAITI

*Rasmiy nomi — Gaiti Respublikasi. Poytaxti — Port-o-Prens. Hududi — 27750 km<sup>2</sup>. Aholisi — 8717924 kishi (2007). Davlat tili — fransuz. Dini — xristianlik (95%). Pul birligi — gurd.*

**Geografik joylashuvi va tabiati.** Gaiti — Karib dengizi havzasidagi Gaiti orolining gʻarbiy qismida joylashgan davlat. Sharqda quruqlik orqali orolning sharqiy qismida joylashgan Dominikan Respublikasi bilan chegaradosh. Janubda Karib dengizi, shimolda Atlantika okeani bilan tutashgan. Gʻarbdan tor boʻgʻoz Gaitini Kubadan ajratib turadi. Gaiti hududi asosan togʻ tizmalaridan iborat boʻlib, eng baland choʻqqisi — La-Sel (2680 m). Daryolari uncha katta boʻlmagan togʻ daryolari boʻlib, ular asosan 2 ta — Guayamuk va Artibonite. Hududida ikkita yirik koʻl — Somatr va Pligr mavjud boʻlib, ular shoʻr suvli. Asosiy tabiiy boyliklari: mis, molibden, boksit, oltin va kumush.

Iqlimi — tropik. Oʻsimlik dunyosi oʻta boy va xilma-xil. Gʻarbiy hududlari oʻrmon va butazorlar, togʻli hududlar esa togʻ oʻrmonlari bilan qoplangan. Gaitida palmaning bir necha turi uchraydi. Mapu daraxti va antil emanining balandligi 30 m gacha yetadi. Bundan tashqari, qizil daraxtning qimmatbaho navlari ham saqlanib qolgan. Gaiti hayvonot dunyosining asosiy qismi inson tomonidan qirib tashlangan. Shu sababli uning hududida yirik jonzotlar deyarli saqlanib qolma-

gan. Sohil hududlarida yirik dengiz toshbaqalarini uchratish mumkin.

**Davlat tuzilishi, siyosiy partiyalari.** Davlat tuzilishi — respublika. Mamlakat 9 ta departamentga bo'lingan. Gaiti 1804-yil 1-yanvarda o'z mustaqilligini qo'lga kiritgan. Davlat boshlig'i — prezident. Eng yirik siyosiy partiyalari: O'zgarishlar va Demokratiya milliy fronti, Demokratiyani tiklash harakati, Gaiti kommunistlari birlashgan partiyasi.

**Iqtisodi, transport kommunikatsiyalari.** Gaiti g'arbiy yarim sharning eng qoloq va qashshoq agrar davlatlaridan biri hisoblanadi. Mamlakat tabiiy boyliklarning yirik zaxirasiga ega bo'lishiga qaramay sanoat o'ta sust rivojlangan. Sanoat butunlay xorijiy sarmoya nazoratida. Qishloq xo'jaligi umumiy milliy mahsulotning 40% ini yetkazib beradi. Uning asosini qahva, paxta, shakarqamish, kakao, tamaki yetishtirish tashkil etadi. Qishloq aholisining deyarli yarmini yersiz dehqonlar tashkil etadi. 2006-yil YIM miqdori — 14475 mln dollarni (aholi jon boshiga — 1660 doll.) tashkil etgan. Asosiy savdo hamkorlari: AQSH va Fransiya.

**Tarixi.** Gaiti 1492-yilda Xristofor Kolumb tomonidan kashf qilingan va Espanola nomi bilan Ispaniyaning birinchi mustamlakasi hamda Lotin Amerikasidagi ispan ekspansiyasining asosiy markaziga aylangan. Mahalliy hindular butunlay qirib tashlangan va oroldagi plantatsiyalarda ishlatish uchun Afrikadan qullar olib kelingan. XVII asr o'rtalarida orol ikkiga bo'lindi va sharqiy qismi (hozirgi Dominikan respublikasi) Ispaniya mustamlakasi, g'arbiy qismi esa (hozirgi Gaiti) Fransiya mustamlakasiga aylandi. 1791-yilda Tussen Luvertiur boshchiligidagi qullar qo'zg'oloni ko'tarildi. Tussen Luvertiur 1802-yilda o'zining asir qilinishigacha butun Gaitini boshqardi. 1804-yili Gaiti Yevropa davlatlari mustamlakalari ichida o'z mustaqilligini qo'lga kiritgan birinchi davlat bo'ldi. 1811-yil mamlakatda monarxiya o'rnatildi. 1820-yil — Respublika, 1849-yili Imperiya deb e'lon qilindi. 1859-yilda Gaitida yana Respublika boshqaruvi o'rnatildi. 1915-yil mamlakatga AQSH qo'shinlari bostirib kirdi va 1934-yilgacha boshqaruvni o'z qo'llariga olishdi. Shundan

so'ng 1986-yilgacha Gaitida boshqaruv diktatorlik yo'li bilan amalga oshirildi. 1986-yili harbiylar hokimiyatni o'z qo'llariga olishdi. 1994-yildan hokimiyat fuqarolik hukumati qo'liga o'tdi.

## GAYANA

*Rasmiy nomi – Gayana Kooperativ Respublikasi. Poytaxti – Jorjtaun. Hududi – 214969 km<sup>2</sup>. Aholisi – 780744 kishi (2007). Davlat tili – ingliz. Dini – induizm (54%), xristianlik (27%). Pul birligi – gayana dollari.*

**Geografik joylashuvi va tabiati.** Janubiy Amerikaning shimoliy qismida joylashgan davlat bo'lib, janubda va g'arbda Braziliya, shimoliy g'arbda Venesuela va sharqda Surinam davlatlari bilan chegaradosh. Shimolda Gayana Atlantika okeani bilan tutashgan. Markaziy va janubiy hududlarini Gvian yassitog'liklari egallagan. Eng baland cho'qqisi Rorayma (2772 m). Mamlakat zamini boksit, oltin, olmos kabi tabiiy boyliklarga boy.

Iqlimi — subekvatorial. O'simlik dunyosi o'ta xilmaxil. Gayana hududida dunyoning boshqa joylarida kam uchraydigan qizil daraxt va temir daraxti o'sadi. Hayvonot dunyosi bo'yicha Gayana dunyoning eng boy davlatidan biri desa bo'ladi. Uning hududida dunyoning boshqa hududlarida o'ta noyob hisoblangan 100 dan oshiq jonzot turlari mavjud. Timsoh va maymunlarning eng noyob turlarini Gayanada uchratish mumkin.

**Davlat tuzilishi, siyosiy partiyalari.** Davlat tuzilishi — respublika. Britan Hamdo'stligi a'zosi. Mamlakat 10 ta okrugga bo'lingan. Gayana 1966-yil 26-mayda Britaniya istibdodidan chiqib o'z mustaqilligini e'lon qilgan. 1970-yilning 23-fevralida Gayana respublika deb e'lon qilingan. Ijroiya hokimiyat prezidenti va Bosh vazir boshchiligidagi hukumatga tegishli. Qonun chiqaruvchi oliy organi bir palatali parlament — Milliy Majlis. Asosiy siyosiy partiyalari: Xalq taraqqiyoti partiyasi (XTP), Xalq Milliy Kongressi (XMK).

### ***Iqtisodi, transport kommunikatsiyalari.***

Gayana aholisi ishlab chiqarishdan tushadigan daromadi bo'yicha dunyoning eng qashshoq davlatlaridan biri. Elektroenergetika sohasining sust rivojlanganligi va elektr quv-vatining yetishmasligi xalq xo'jaligining rivojlanishiga juda katta to'siq bo'lmoqda. Sanoatning asosiy sohasi — tog'-kon sanoati hisoblanadi. Gayana agrar davlat bo'lganligi sababli, mamlakat xalq xo'jaligi hayotida qishloq xo'jaligi asosiy o'rinni egallaydi. Qishloq xo'jaligida asosan shakarqamish va sholi yetishtiriladi, bundan tashqari banan, qahva va sitrus mevalari yetishtirish ham yaxshi yo'lga qo'yilgan.

2006-yil YIM miqdori 3315 mln dollarni (aholi jon boshiga — 4245 doll.) tashkil etgan. Asosiy savdo hamkorlari: Buyuk Britaniya, AQSH, Yaponiya.

**Tarixi.** Tub aholisi hindular hisoblangan Gayana XVII asrga kelib Gollandiya istibdodiga tushib qoldi. 1914-yilda Buyuk Britaniya mulkiga aylandi. 1931-yildan butunlay Britaniya mustamlakasiga aylantirildi. II jahon urushidan keyin mustamlakalarda yuzaga kelgan o'zgarishlar tufayli, 1953-yilda Buyuk Britaniya Gayanaga o'z-o'zini boshqarish huquqini berdi. 1966-yilda esa uning mustaqilligini tan oldi.

## **GAMBIYA**

*Rasmiy nomi — Gambiya Respublikasi. Poytaxti — Banjul. Hududi — 10402 km<sup>2</sup>. Aholisi — 1682176 kishi (2007). Davlat tili — ingliz. Dini — islom. Pul birligi — dalasi.*

**Geografik joylashuvi va tabiati.** Gambiya G'arbiy Afrikada joylashgan davlat. Janubda, shimolda va sharqda faqat Senegal bilan chegaradosh. G'arbda Atlantika okeani bilan tutashgan. Mamlakat maydoni asosan tekisliklardan iborat. Eng yirik daryosi — Gambiya.

**Davlat tuzilishi, siyosiy partiyalari.** Davlat tuzilishi — respublika. Mamlakat 6 ta ma'muriy viloyatga bo'lingan. Ijroiya hokimiyat prezidentga tegishli.

Qonun chiqaruvchi oliy organi bir palatali parlament. Gambiya 1965-yilning 18-fevralida o'z mustaqilligini e'lon qilgan. Asosiy siyosiy partiyalari: Milliy Taraqqiyot partiyasi, Gambiya Xalq partiyasi.

**Iqtisodi, transport kommunikatsiyalari.** Tabiiy resurslarning yetishmasligi va dehqonchilikning rivojlanishi uchun tabiiy sharoitning o'ta noqulayligi Gambiyani dunyodagi eng qashshoq mamlakatlardan biriga aylantirgan. Mamlakat sanoati o'ta zaif rivojlangan. Qishloq xo'jaligi YMMning 30% ini yetishtirib beradi. 2006-yil YIM miqdori 2914 mln dollarni (aholi jon boshiga — 1732 doll.) tashkil etgan. Eksportga chiqaradigan mahsulotlarining 75% ini turli yong'oqlar va yong'oq mahsulotlari tashkil etadi.

**Tarixi.** Bugungi Gambiya hududlari XIII—XV asrlarda Mali imperiyasi tarkibiga kirgan. XV asr oxiri va XVI asrda Songay imperiyasi bu yerlarni o'z tarkibiga qo'shib olgan. XV asrda ilk bor portugallar Gambiya sohillariga kelib joylashgan. XVIII asrga kelib portugallarni inglizlar Gambiyadan siqib chiqarishdi. Versal shartnomasiga ko'ra Gambiya 1888-yilda Buyuk Britaniya mulki deb e'lon qilindi. Gambiya 1965-yil 18-fevralda mustaqillikka erishdi. 1981-yil 12-dekabrda Gambiya va Senegal o'rtasidagi o'zaro kelishuvga ko'ra bu ikki davlat Senegambiya erkin konfederatsiyasiga birlashdi. Lekin 1989-yil bu kelishuv bekor qilindi.

## GANNA

*Rasmiy nomi — Gana Respublikasi. Poytaxti — Akkra shahri. Hududi — 238305 km<sup>2</sup>. Aholisi — 22962249 kishi (2007). Davlat tili — ingliz. Dini — aholining asosiy qismi turli mahalliy dinlarga e'tiqod qiladi, qolgan qismi xristianlik va islom dinlariga e'tiqod qilishadi. Pul birligi — sedi.*

**Geografik joylashuvi va tabiati.** Gana G'arbiy Afrikada joylashgan davlat. Sharqda Togo, shimolda va shimoli g'arbda Burkina-Faso, g'arbda



Kot-d'Ivuar davlatlari bilan chegaradosh. Janubda Gana Atlantika okeani bilan tutashgan. Gana hududining asosiy qismi tekisliklardan iborat. Mamlakatning sharqida dunyoning eng katta sun'iy ko'llaridan biri hisoblangan Volta ko'li joylashgan. Gana hududidagi yirik daryolar: Qora Volta, Oq Volta va Volta daryolaridir. Oltin, sanoat olmosi, boksit, marganets, yog'och, baliq va kauchuk bu mamlakatning asosiy boyliklaridan hisoblanadi. Sohilbo'yi o'simlik dunyosi unchalik boy emas. Asosan past bo'yli butazorlar va baobab daraxtlaridan iborat. Markaziy hududlardagi o'rmonzorlarda qizil va qora daraxtning turli navlari va paxta daraxti o'sadi. Gananing hayvonot dunyosi o'ta xilma-xil. Savanna o'rmonzorlarida iser, qoplon, antilopa, fil, turli maymunlarni va suvli hududlarda timsoh va begemotlarni uchratish mumkin.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Mamlakat 10 ta viloyatga bo'lingan. Gana 1957-yilning 6-martida o'z mustaqilligini qo'lga kiritgan. Davlat boshlig'i — prezident. Yirik siyosiy partiyalari: Milliy Demokratik Kongress (MDK), Xalq Vatanparvar partiyasi (XVP).

**Iqtisodi, transport kommunikatsiyalari.** Xo'jalikning asosiy tarmog'i qishloq xo'jaligi. Qishloq xo'jaligi Gana umumiy milliy mahsulotining 50% ini yetishtiradi. Gana kakao eksporti bo'yicha dunyoda uchinchi o'rinda turadi. Bundan tashqari, eksportga oltin, boksit, alyuminiy, yog'och va baliq mahsulotlarini chiqaradi. 2006-yil YIM miqdori 48474 mln dollarni (aholi jon boshiga — 2122 doll.) tashkil etgan. Asosiy savdo hamkorlari: Buyuk Britaniya, AQSH, Germaniya va Yaponiya.

**Tarixi.** Hozirgi Gana hududlarida yevropaliklar tomonidan kashf qilingungacha, Dogomba va Mamprusi qirolliklari mavjud bo'lgan. 1471-yil portugallar Gana qirg'oqlaridagi o'zlarining birinchi qo'nal-g'alariga asos solishgan. Ko'p yillar davomida Gana Afrika qit'asidagi qul savdosining markazi bo'lib kelgan. 1642-yilga kelib portugallar gollandlar tomonidan Ganadan butunlay siqib chiqarildi. 1871-yilgacha Gana

Gollandiya mustamlakasi bo'lib qoldi. 1871-yilda Angliya Ganani Gollandiyadan sotib olib, Oltin qirg'oq deb nomladi. 1957-yilda Gana mustaqillikka erishdi. 1960-yili respublika deb e'lon qilindi.

## GVADELUPA

*Rasmiy nomi – Gvadelupa (Fransiyaning «dengizorti departamenti» va region). Poytaxti – Bas-Ter. Hududi – 1780 km<sup>2</sup>. Aholisi 456888 kishi (2007). Davlat tili – fransuz. Dini – xristianlik. Pul birligi – fransuz franki.*

**Geografik joylashuvi va tabiati.** Karib dengizidagi Kichik Antil orollari arxipelagida joylashgan davlat. Gvadelupa oroli va unga yaqin bo'lgan bir qator orollar (Mari-Galant, Dezirad, Le-Sent, Sen-Bartelmi, Ptit-Ter va Sen-Marten orolining shimoliy qismi)dan tashkil topgan. Gvadelupa oroli vulqonli kelib chiqishga ega. Tor bo'yin orolining ikki qismini — Bas-Ter va Grand-Terni birlashtirib turadi.

Iqlimi — tropik, passat. Tog'lar nam tropik o'rmonlar bilan qoplangan. Hasharotlarning noyob turlari, dengiz hayvonlari, qushlar mavjud.

**Davlat tuzilishi va siyosiy partiyalar.** Davlat tuzilishi — Fransiyaning «dengizorti departamenti» va region. Departamentni keng vakolatlarga ega bo'lgan Fransuz hukumati vakili — prefekt boshqaradi. Gvadelupa hududi uch okrugga bo'lingan. Xalqaro aeroporti Reze Puent-a-Pitradan 3 km uzoqlikda joylashgan. Siyosiy partiyalari: Fransuz sotsialistik partiyasi, Gvadelupa Kommunistik partiyasi, Gvadelupa progressiv demokratik partiyasi va boshqalar.

**Iqtisodi, transport kommunikatsiyalari.** Hudud iqtisodiyotining asosini yengil sanoat mahsulotlarini ishlab chiqarish va turistlarga xizmat ko'rsatish, qishloq xo'jaligi tashkil etadi. Rom, alkagolsiz ichimliklar, qurilish materiallarini ishlab chiqarish korxonalari mavjud. Kokos yong'oqlari, shakarqamish, banan, ananas, baqlajon yetishtiriladi. Dengiz baliqlari va

hayvonlari ovlanadi. 2006-yil YIM miqdori 3513 mln dollarni (aholi jon boshiga — 7900 doll.) tashkil etgan. Asosiy savdo hamkorlari: Fransiya, Germaniya, Yaponiya, AQSH, Italiya, Martinika.

**Tarixi.** Gvadelupa 1493-yilda X. Kolumb tomonidan kashf qilingan. 1635-yilda orol Fransiya mustamlakasiga aylandi. XVII—XVIII asrlar davomida Afrikadan banan va shakarqamish plantatsiyalarida ishlatish uchun olib kelingan, qullar bu yerga istiqomat uchun joylashtirilgan. 1816-yilgacha Fransiya Angliyaga qarshi bu hudud egaligi uchun kurash olib bordi. 1848-yilda qullik bekor qilindi 1946-yilda orollar hududi «dengiz-orti departamenti» statusini oldi. 1973-yilda esa Fransiya regionini deb eʼlon qilindi.

## GVATEMALA

*Rasmiy nomi — Gvatemala Respublikasi. Poytaxti — Gvatemala. Hududi — 108889 km<sup>2</sup>. Aholisi — 12799505 kishi (2007). Davlat tili — ispan. Dini — xristianlik (70%). Pul birligi — ketsal.*

**Geografik joylashuvi va tabiati.** Gvatemala Markaziy Amerika davlati. Shimol va gʻarbda Meksika, sharqda Beliz, janubi sharqda Salvador va Gonduras davlatlari bilan chegaradosh. Janubda Gvatemala Tinch okean bilan tutashgan. Mamlakat shimoli yassi togʻlardan, markaziy viloyatlari esa togʻli hududlardan iborat. Eng yirik togʻ tizmasi — Serra-Madreda bir qancha harakatdagi vulqonlar mavjud. Mamlakatning eng yuqori nuqtasi Taxumulko vulqoni (4220 m). Eng yirik daryosi — Motagua. Gvatemalada qoʻrgʻoshin, nikel, volfram, kumush va neftning unchalik katta boʻlmagan zaxiralari mavjud.

Iqlimi — tropik. Mamlakat hududining yarmi doimo yashil oʻrmonlar bilan qoplangan. Oʻsimlik dunyosi oʻta xilma-xil boʻlib, dunyoning boshqa joylarida uchramaydigan oʻsimliklar Gvatemala oʻrmonlarida mavjud. Hayvonot dunyosi boʻyicha Gvatemala Markaziy

Amerikaning eng boy davlatlaridan biridir. Uning o'rmonlarida tropik hayvonot dunyosining barcha turlarini uchratish mumkin. Qushlarning 2000 dan oshiq turi mavjud.

**Davlat tuzilishi, siyosiy partiyalari.** Davlat tuzilishi — prezidentlik Respublikasi. Mamlakat 22 ta departamentdan iborat. 1821-yil 15-sentabrda Gvatemala o'z mustaqilligiga erishdi. Davlat boshlig'i — prezident. Qonun chiqaruvchi oliy organi bir palatali parlament — Milliy Kongress. Eng yirik siyosiy partiyalari: Milliy Markaz Ittifoqi (MMI), Xristian Demokratik Partiya (XDP), Gvatemala Mehnat Partiyasi.

**Iqtisodi, transport kommunikatsiyalari.** Gvatemala qoloq agrar mamlakat hisoblanadi. Umumiy milliy mahsulotning 30% ini qishloq xo'jaligi yetishtirib beradi. Asosiy qishloq xo'jalik ekinlari: qahva, paxta, shakarqamish va banan. Importga asosan shakar chiqaradi. 2006-yil YIM miqdori 52926 mln dollarni (aholi jon boshiga — 4200 doll.) tashkil etgan. Asosiy savdo hamkorlari: AQSH, Meksika, Yaponiya.

**Tarixi.** Bugungi Gvatemala hududida eramizning III asrida mayyalar imperiyasi tashkil topgan. Imperiyaning gullab-yashnash davri VII—IX asrlarga to'g'ri keladi. 1513-yil ispanlar Gvatemala hududlarini kashf qilishdi va bu yerlarda o'zlarining talonchilik urushlarini olib borishdi. 1821-yil Gvatemala o'z mustaqilligini e'lon qilgan bo'lsa-da, 1847-yilgacha Meksika homiyligi ostida bo'ldi. 1985-yilda birinchi marta erkin demokratik saylovlar o'tkazildi va hokimiyat fuqaro hukumati qo'lga o'tdi.

## GVIANA

*Rasmiy nomi — Gviana (Fransiya «dengizorti departamenti» va region). Poytaxti — Kayenna. Hududi — 91000 km<sup>2</sup>. Aholisi — 201838 kishi (2007). Davlat tili — fransuz. Dini — katolik. Pul birligi — fransiya franki.*

**Geografik joylashuvi va tabiati.** Janubiy Amerikaning shimoli sharqida, Atlantika sohilida

joylashgan davlat. Surinam bilan g'arbda, Braziliya bilan janubda va sharqda chegaradosh. Gviana markazida yassitog'liklar mavjud, shimolda tekislik, janubda esa tog'lar bilan o'ralgan.

Iqlimi — issiq, ekvatorial. Atlantikaga qarab ko'plab daryolar oqadi. Hudud oltin, boksit zaxiralariga boy. Gviana hududining 96,7% i noyob turdagi o'rmonzorlar bilan qoplangan.

**Davlat tuzilishi, siyosiy partiyalari.** Siyosiy tuzumi — region, Fransiyaning «dengizorti departamenti». Region boshlig'i — Fransiya Respublikasi Prefekti, Bosh Kengash Raisi. Gviana 20 okrugga (kanton), okruglar esa kommunalarga bo'lingan. Siyosiy partiyalari: Fransiya siyosiy partiyalarining mahalliy bo'limlari, Gviana demokratiyasi ittifoqi, Gviana xalq milliy partiyasi, Gviana sotsialistik partiyasi, Valvari komiteti, Taraqqiyot kuchlari.

**Iqtisodi, transport kommunikatsiyalari.** Gviana — iqtisodiy qoloq mamlakat. Oltin qazish, elektr quvvati ishlab chiqish, yog'ochni qayta ishlash sanoat korxonalari mavjud. Baliq ovlash — iqtisodning ilg'or tarmog'idir. Chorvachilik, boshqoli o'simliklar, sabzavot, sholi, maniok, banan, ananas, shakarqamish yetishtiriladi. Gviana o'zining Kuru (Kourou) kosmodromidan Ariane raketalarini Yevropa Kosmik Agentligi dasturlari asosida uchiradi. Yirik shaharlari: Kuru, Sen-Loran-dyu-Maroni. Portlari: Kayenna, Degra-de-Kann. Romambo xalqaro aeroporti mavjud.

Asosiy savdo hamkorlari: Fransiya, Germaniya, Italiya, Niderlandiya, Trinidad va Tobago, AQSH, Yaponiya.

**Tarixi.** 1499-yil ispanlar tomonidan kashf qilingan. 1604-yildan Fransiya mustamlakachiligiga asos solindi. Bu hududlar uchun Ispaniya bilan Niderlandiya, Birlashgan Britaniya, Portugaliya urushlar olib borgan. 1817-yildan Fransiya mulkiga aylandi. XVIII asr oxiri — XX asr o'rtalarigacha Gvianaga fransuz siyosiy mahbuslari qatag'on qilinganlar. Gvianaga 1946-yil Fransiyaning dengizorti departamenti, 1975-yil — region maqomi berildi. Gvianada hanuzgacha mustaqillik uchun kurash davom etmoqda.

## GVINEYA

*Rasmiy nomi – Gvineya Respublikasi. Poytaxti – Konakri. Hududi – 245857 km<sup>2</sup>. Aholisi – 9950503 kishi (2007). Davlat tili – fransuz. Dini – islom (70%). Pul birligi – gvineya franki.*

**Geografik joylashuvi va tabiati.** G'arbiy Afrikada joylashgan davlat. Janubda Serra-Leone va Liberiya, sharqda Kot d'Ivuar, shimolda Gvineya-Bisau, Senegal va Mali bilan chegaradosh. G'arbda Atlantika okeaniga tutashgan. Sohilbo'yi tekisliklarini hisobga olmaganda mamlakat hududi asosan pasttog'lar va tepaliklardan iborat. Eng yirik daryolari: Gambiya va Bafing. Gvineyaning eng baland nuqtasi Nimba tog'i hisoblanadi (1752 m). Mamlakat zaminida boksit, temir rudasi, oltin, olmos va uran kabi tabiiy boyliklarning zaxiralari mavjud. Gvineya hududi g'arbiy Afrikada eng ko'p yog'in yog'adigan hududdir. O'simlik dunyosi juda xilma-xil. Bu yerda palmaning noyob navlari o'sadi. Hayvonot dunyosi ham juda boy. Gvineya hududida Afrika tabiatiga xos bo'lgan barcha hayvonlarni uchratish mumkin.

**Davlat tuzilishi, siyosiy partiyalari.** Davlat tuzilishi — respublika. Gvineya 1958-yilning 2-oktabrida Fransiyadan mustaqillikka erishgan. Davlat boshlig'i — prezident. 1984-yilning 3-aprelida 2-respublika e'lon qilingan. Yirik siyosiy partiyalari: Gvineya Xalq Birlashuvi, Yangilanish va Taraqqiyot Partiyasi, Gvineya Xalqi Ittifoqi.

**Iqtisodi, transport kommunikatsiyalari.** Yirik miqdordagi qazilma boyliklar zaxirasiga ega bo'lishiga qaramasdan Gvineya dunyodagi qashshoq davlatlardan biri bo'lib kelmoqda. Jahon boksit zaxiralarining 27% i Gvineya hududida joylashgan bo'lib, uni ishlab chiqarish bo'yicha Gvineya jahonda 2-o'rinda turadi. Qishloq xo'jaligi baliqchilik va o'rmonchilikni ham qo'shib hisoblaganda umumiy milliy mahsulotning 40% ini yetkazib beradi. Asosiy qishloq xo'jalik ekinlari: sholi, qahva va sitrus mevalar. Sanoat umumiy milliy mahsu-

lotning 27% ini yetkazib beradi. 2006-yil YIM miqdori — 17413 mln dollarni (aholi jon boshiga 1750 doll.) tashkil etgan. Gvineyada tog'-kon ishlari yaxshi rivojlangan. Umumiy eksport mahsulotlarining yarmidan ko'pini boksit va aluminiy eksporti tashkil etadi.

**Tarixi.** Gvineya hududining bir qismi XV asrgacha Gana va Mali davlat birlashmalarining tarkibiga kirgan. XVIII asr oxirlarida ko'chmanchi fulbelarning harbiy davlati tashkil topdi. 1893-yildan Gvineya Fransiyaning mustamlakasiga aylandi. 1958-yil Gvineya o'z mustaqilligini e'lon qildi. 1966-yilda Fransiya uning mustaqilligini tan oldi.

## GVINEYA-BISAU

*Rasmiy nomi — Gvineya-Bisau Respublikasi. Poytaxti — Bisau. Hududi — 36125 km<sup>2</sup>. Aholisi — 1473066 kishi (2007). Davlat tili — portugal. Dini — aholining 65%i turli xil mahalliy dinlarga e'tiqod qiladi. Musulmonlar 30%, xristianlar 5%ni tashkil etadi. Pul birligi — gvineya-bisau pyesosi.*

**Geografik joylashuvi va tabiati.** Afrika qit'asining shimoliy g'arbida joylashgan davlat. Sharqda va janubda Gvineya va shimolda Senegal bilan chegaradosh. G'arbda Atlantika okeani bilan tutashgan.

Iqlimi — subekvatorial. Mamlakatning sharqiy qismlari savanna o'rmonzorlari bilan qoplangan. O'rmonzorlarda to'ng'iz, qoplon, qo'tos va maymunlarning ko'plab turlarini uchratish mumkin. Botqoqlik va suvli hududlarda begemot va timsohlar mavjud. Inson hayoti uchun xavfli bo'lgan setse pashshasi va shunga o'xshash hasharotlar tufayli ba'zi hududlar yashashga yaroqsiz.

**Davlat tuzilishi, siyosiy partiyalari.** Davlat tuzilishi — respublika. Mamlakat 8 ta okrugdan tashkil topgan. Gvineya-Bisau 1973-yil 24-sentabrda Portugaliya istibdodidan chiqib, o'z mustaqilligini e'lon qilgan. Ijroiya hokimiyat Davlat Kengashi Raisi va Vazirlar

sozlik bo'yicha dunyoda uchinchi o'rinda turadi. Qishloq xo'jaligi umumiy milliy mahsulotning 15% ini yetkazib beradi. Chorvachilik ayniqsa yaxshi rivojlangan. Qishloq xo'jaligidagi asosiy ekinlar: qandlavlagi, kartoshka va boshoqli ekinlar. Germaniya o'z xalqining oziq-ovqat mahsulotlariga bo'lgan ehtiyojining 90% ini ichki imkoniyatlar hisobida qoplaydi. 2006-yil YIM miqdori 2325828 mln dollarni (aholi jon boshiga — 28387 doll.) tashkil etgan. Asosiy savdo hamkorlari: Rossiya, AQSH va YI davlatlari.

**Tarixi.** Qadimda bugungi Germaniya hududlarida turli german qabilalari yashashgan. Bu qabilalar V asrda Rimni mag'lubiyatga uchratib, Rim imperiyasi inqiroziga sabab bo'lishgan. Rimning inqirozidan so'ng frank qabilalari sardori Xlodvig hozirgi Fransiya va janubiy-g'arbiy Germaniya hududlarida franklar davlatiga asos soldi. Bu davlat Buyuk Karl hukmronligi yillarida butun german yerlarini o'z tarkibiga qo'shib oldi. 843-yil franklar imperiyasi parchalandi va uning sharqiy hududlarida german qirolligi tashkil topdi. Lekin ko'p o'tmay nemis knyazlarining o'zaro nizolari natijasida zaiflashib inqirozga uchradi. X asrda Sakson sulolasi Muqaddas Rim imperiyasiga asos soldi. Fridrix I Barbarossa hukmronligi yillarida imperiya hududlari kengaydi. Ko'p yillik o'zaro kurashlardan so'ng 1438-yil Gabsburglar xonadoni hokimiyatga keldi. XVI asrda Martin Lyuter tomonidan amalga oshirilgan reformatsiya diniy qarashlarga ko'ra mamlakatni parchaladi. Diniy nizolar Yevangeliya ittifoqi va Muqaddas Liga o'rtasida «30 yillik urush»ning boshlanishiga sabab bo'ldi (1618—1648). Urush natijasida mamlakat 350 ta mayda davlatchalarga bo'linib ketdi. 1815-yil 39 ta nemis davlatchalarini o'z ichiga olgan German konfederatsiyasi tashkil topdi. Markazlashgan nemis davlatining tashkil topishida Prussiya kansleri Otto fon Bismark juda katta hissa qo'shdi. U 1871-yilda Prussiya qiroli Vilgelm I ni Germaniya imperatori deb e'lon qildi. Germaniya 1914-yil I jahon urushining boshlanishiga sababchilaridan biri bo'ldi. Urushdan mag'lub davlat sifatida chiqdi. 1918-yil 9-noyabrda imperator



Vilgelm II taxtdan ag'darildi. Germaniyada Veymar respublikasi e'lon qilindi. 1933-yil Gitler boshchiligidagi fashistlar hokimiyatni qo'lga olishdi. 1939-yil 1-sentabrda Germaniyaning Polshaga hujumi bilan II jahon urushi boshlanib ketdi. Germaniya II jahon urushini ham mag'lubiyat bilan yakunladi. 1945-yilda AQSH, Angliya, Fransiya va SSSR nazorati ostidagi to'rt qismga bo'lindi. 1949-yili uning hududida GDR va GFR davlatlari tashkil topdi. 1990-yil 3-oktabrda bu ikki davlat yagona Germaniyaga birlashdi. 1991-yil 20-iyunda Berlin Germaniyaning poytaxti deb e'lon qilindi.

## GIBRALTAR

*Rasmiy nomi – Gibraltar (Buyuk Britaniya mulki). Poytaxti – Gibraltar. Hududi – 6,5 km<sup>2</sup>. Aholisi – 27997 kishi (2007). Davlat tili – ingliz. Dini – katoliklar (75%), qolgan qismi protestantlar, musulmonlar va yahudiylar. Pul birligi – gibraltar funt-sterlingi.*

**Geografik joylashuvi va tabiati.** Gibraltar Pireney yarimorolining janubiy qismida joylashgan Buyuk Britaniyaga qarashli yerlar hisoblanadi. Quruqlik orqali shimolda faqat Ispaniya bilan chegaradosh. Sharqda O'rta Yer dengizi, janub va g'arbda Gibraltar bo'g'ozini va Atlantika okeani bilan tutash. Gibraltar hududlari hali ham Ispaniya va Buyuk Britaniya o'rtasidagi nizoli yerlar hisoblanadi.

**Davlat tuzilishi, siyosiy partiyalari.** Davlat tuzumi – konstitutsion monarxiya. Davlat boshlig'i Britaniya qirolichasi tomonidan tayinlanadigan gubernator. Siyosiy partiyalari: Gibraltar Leyboristlar partiyasi, Britaniya Gibraltari Demokratik partiyasi.

**Iqtisodi, transport kommunikatsiyalari.** Gibraltar asosan dengiz portlaridan iborat bo'lib, uning iqtisodi Britaniya tomonidan beriladigan harbiy-iqtisodiy yordami bilan belgilanadi.

2006-yil YIM miqdori 825 mln dollarni (aholi jon boshiga – 29600 doll.) tashkil etgan.

**Tarixi.** Bugungi Gibraltar hududlari 711-yilda arablar tomonidan bosib olingan. 1462-yilda Gibraltarni ulardan ispanlar tortib olishadi. 1704-yilda Gibraltar Buyuk Britaniya tomonidan istilo qilinadi. 1713-yil Utrext shartnomasiga ko'ra Gibraltar Buyuk Britaniya nazoratidagi yerlar deb e'lon qilinadi. I va II jahon urushi yillarida bu hududlar Britaniyaning harbiy dengiz bazasi sifatida xizmat qildi.

1967-yil BMTning talabi bilan o'tkazilgan referendumlarda Gibraltar xalqi Ispaniya bilan qo'shilishdan bosh tortdi.

## GONDURAS

*Rasmiy nomi – Gonduras Respublikasi. Poytaxti – Tegusigalpa. Hududi – 112100 km<sup>2</sup>. Aholisi – 7516233 kishi (2007). Davlat tili – ispan. Dini – katolik. Pul birligi – lempira.*

**Geografik joylashuvi va tabiati.** Markaziy Amerikada joylashgan davlat. Janubda Nikaragua, g'arbda Gvatemala va Salvador bilan chegaradosh. Shimolda va sharqda Karib dengizi, janubi g'arbda Tinch okean bilan tutashgan. Mamlakat hududi asosan Komayagua, Montesitos, Opalaka kabi yassitog'liklardan iborat. Eng baland nuqtasi Selake cho'qqisi (2865 m). Karib dengizi sohillari tekisliklardan iborat. Asosiy daryolari: Ulda, Aguan, Patuka. Asosiy tabiiy boyliklari: oltin, kumush, mis, qo'rg'oshin, temir rudasi, rux, yog'och va baliq.

Iqlimi – tropik. O'simlik dunyosi o'ta xilma-xil. Bu yerda palma, qizil daraxt, kauchuk daraxti kabi turli daraxtlar o'sadi. Hayvonot dunyosida tropik iqlimga xos bo'lgan deyarli barcha hayvonlar uchraydi. Yaguar, qoplon, maymunlarning turli xillari shular jumlasidandir.

**Davlat tuzilishi, siyosiy partiyalari.** Davlat tuzumi – prezidentlik respublikasi. Mamlakat 18 ta departamentdan iborat. 1921-yil 15-sentabrda Ispaniya istibdodidan ozod bo'lib, o'z mustaqilligini e'lon qilgan. Davlat boshlig'i – prezident. Qonun chiqaruvchi

hokimiyat bir palatali parlament — Milliy Kongressga tegishli. Asosiy siyosiy partiyalari: Gonduras Liberal partiyasi (GAP), Gonduras sotsialistik partiyasi (GSP), Xristian-Demokratik partiya (XDP).

**Iqtisodi, transport kommunikatsiyalari.** Gonduras g'arbiy yarim sharning qashshoq davlatlaridan biridir. Eksportga chiqaradigan mahsulotlari asosan qishloq xo'jalik mahsulotlari hisoblanadi. Asosiy qishloq xo'jalik ekinlari: banan, qahva, shakarqamish, tamaki, sholi. Dehqonchilik qilinadigan yerlarning asosiy qismi yirik yer egalari — latifundistlarga tegishli. Aholining 9% i tog'-kon ishlarida mehnat qiladi. 2006-yil YIM miqdori 20189 mln dollarni (aholi jon boshiga — 2686 doll.) tashkil etgan. Asosiy savdo hamkorlari: AQSH, Germaniya, Yaponiya. Yirik portlari: Puerto-Kortes, Tela, Truxilo, La-Seyba.

**Tarixi.** Gondurasning janubiy sohillari 1502-yilda Kristofor Kolumb tomonidan kashf qilingan. 1523-yilda Alvarado boshchiligidagi ispan konkistadorlari tomonidan istilo qilingan. 1790-yilda Gonduras Gvatemala bilan birlashtirilgan. 1821-yil mustaqillikka erishgach, Markaziy Amerika birlashgan provinsiyalari tarkibiga kirgan. Faqatgina 1839-yil mustaqil davlat shakllantirildi. XX asrda Gonduras bir nechta harbiy diktatura va qonli urushlarni boshidan kechirdi. 1969-yilda Salvadorga qarshi urush harakatlari olib bordi. 1981-yildan fuqaro hukumati hokimiyatni o'z qo'lga oldi.

## GONKONG

*Rasmiy nomi — Syangan alohida ma'muriy hududi. Poytaxti — Gonkong (Syangan). Hududi — 1075 km<sup>2</sup>. Aholisi — 6912965 kishi (2007). Davlat tillari — xitoy va ingliz. Dini — bu yerda dunyodagi deyarli barcha dinlar bor. Pul birligi — gonkong dollari, xitoy yuaniga o'tilmoqda.*

**Geografik joylashuvi va tabiati.** Gonkong Xitoyning maxsus hududi hisoblanadi. Uning hududi asosan Szyulun yarimoroli va atrofidagi orollardan

tashkil topgan. Sohillari Janubiy Xitoy dengiziga tutashgan.

**Davlat tuzilishi, siyosiy partiyalari.** 1997-yildan Buyuk Britaniya nazoratidan Xitoy hududiga o'tdi. 1984-yil Xitoy va Buyuk Britaniya o'rtasida tuzilgan shartnomaga muvofiq Xitoy tarkibidagi maxsus hudud maqomini olgan. Bunga ko'ra Xitoy Gonkongda mavjud ijtimoiy, iqtisodiy tuzumni 50 yilgacha o'zgartirmaslik majburiyatini olgan. Ijroiya hokimiyat gubernator va uning hukumatiga tegishli. Asosiy siyosiy partiyalari: Syangan Leyboristlar partiyasi, O'z-o'zini Boshqarish Demokratik partiyasi.

**Iqtisodi, transport kommunikatsiyalari.** Qazilma boyliklarning deyarli yo'qligiga qaramay, Gonkong iqtisodi yaxshi rivojlangan. Ayniqsa to'qimachilik sanoati va kemasozlik yaxshi rivojlangan. Hududning 8% i dehqonchilik uchun yaroqli yerlar hisoblanadi, shunga qaramasdan ichki bozorda oziq-ovqat mahsulotlari tanqisligi yo'q. Eksportga asosan tayyor kiyimlar, mato, elektr asboblari va soat chiqaradi. 2006-yil YIM miqdori 230680 mln dollarni (aholi jon boshiga — 30476 doll.) tashkil etgan. Asosiy savdo hamkorlari: Xitoy, AQSH, Yaponiya, Tayvan.

**Tarixi.** Gonkong 1842-yilgi Nankin shartnomasiga ko'ra Xitoy tomonidan Buyuk Britaniyaga berilgan. Inglizlar Gonkongni yirik savdo portiga aylantirishdi. Natijada bu yerdagi iqtisodiy ahvol keskin yaxshilandi. 1898—1899-yillarda Britaniya Xitoydan 99 yil muddatga ijaraga olgan hududlarini ham Gonkongga qo'shdi. 1941-yil Gonkong yaponlar tomonidan bosib olindi. Lekin II jahon urushida Yaponiyaning mag'lubiyatidan so'ng u yana Buyuk Britaniya nazoratiga o'tdi. 1997-yil Xitoyning maxsus hududi sifatida Xitoy davlati tarkibiga qo'shildi.

## GRENADA

*Rasmiy nomi — Grenada. Poytaxti — Sent-Jorjes. Hududi — 344 km<sup>2</sup>. Aholisi — 90995 kishi (2007). Davlat tili — ingliz. Dini — katolik va protestantlik. Pul birligi — sharqiy karib dollari.*

**Geografik joylashuvi va tabiati.** Karib dengizi havzasida joylashgan davlat. Mamlakat hududi Grenada oroli, Janubiy Grenadin arxipelagi bir nechta orollari va Kichik Antil orollaridan tashkil topgan. Bu orollarning barchasi vulqonli orollar bo'lganligi uchun kichik-kichik tog'liklardan iborat. Eng baland nuqtasi Sent-Katerin tog'i (840 m).

**Davlat tuzilishi, siyosiy partiyalari.** Davlat tuzumi — konstitutsion monarxiya. Britan hamdo'stligi a'zosi. Grenada 1974-yil 7-fevralda Buyuk Britaniyadan mustaqillikka erishgan. Davlat boshlig'i Britaniya tomonidan tayinlanadigan general-gubernator. Ijroiya hokimiyat bosh ministr boshchiligidagi hukumatga tegishli. Qonun chiqaruvchi hokimiyatni ikki palatali parlament — Senat va Vakillar palatasi amalga oshiradi. Asosiy siyosiy partiyalari: Milliy Demokratik Kongress, Grenada Birlashgan Leyboristlar partiyasi, Milliy partiya.

**Iqtisodi, transport kommunikatsiyalari.** Grenada agrar qishloq xo'jalik davlati. U muskat yong'og'i yetishtirish va uni eksport qilish bo'yicha dunyoda ikkinchi o'rinda turadi. Sanoat yaxshi rivojlanmagan. Turizm asosiy daromad manbayi hisoblanadi. 2006-yil YIM miqdori 823 mln dollarni (aholi jon boshiga — 9044 doll.) tashkil etgan. Asosiy savdo hamkorlari: AQSH, Buyuk Britaniya, Trinidad, Tobago.

**Tarixi.** Grenada oroli ispanlar tomonidan 1498-yil kashf qilingan. 1650-yil Fransiya mustamlakasiga aylantirilgan. 1762-yil Buyuk Britaniya Grenadani o'z mulkiga aylantirdi. 1967-yildan Britan hamdo'stligi a'zosi. 1974-yil 7-fevralda mustaqilligini e'lon qilgan.

## GRENLANDIYA

**Rasmiy nomi — Grenlandiya. Poytaxti — Nuuk (Gotxob). Hududi — 2175600 km<sup>2</sup>. Aholisi — 57287 kishi (2007). Davlat tili — grenland, dat. Dini — katolik. Pul birligi — daniya kronasi.**

**Geografik joylashuvi va tabiati.** Grenlandiya — dunyodagi eng yirik orol — Kanada orollarining

shimoli g'arbida, Shimoliy Muz va Atlantika okeanlari oralig'ida joylashgan. Mamlakatning asosiy qismini muzlik qoplagan. Muzlik hajmi 2,6 mln km<sup>2</sup>.

Iqlimi — qirg'oq bo'ylab subarktik, arktik; orol markazida — kontinental arktik. Mamlakatning asosiy qismini egallagan tundrada mox, lishaynik hamda boshqa arktik o'simliklar o'sadi. Buqa, bo'ri, tulki, oq ayiq, quyon, lemming, gaga, chag'alay, bug'ular uchraydi.

**Davlat tuzilishi, siyosiy partiyalari.** Davlat tuzilishi — o'z-o'zini boshqaradigan Daniya hududi. Davlat rahbari — Daniya qirolichasi nomidan Oliy komissar (rigsombudsman). Grenlandiya 18 ta kommunaga ajralgan 3 inspektoratga bo'linadi. Yirik shahri — Sisimiyut (Xolstenberg). Siyosiy partiyalari: Siumut (Olg'a), Inuit atakvatigiit (Inuit jamoasi), Atassut (Birlik).

**Iqtisodi, transport kommunikatsiyalari.** Grenlandiya iqtisodi asosini baliqchilik va baliqni qayta ishlash korxonalari tashkil etadi. Dengiz hayvonlarini ovlash yo'lga qo'yilgan. Baliq ovlash flotiga ega. Orol qo'rg'oshin, rux, uran, neft, gaz, toriy, xrom, molibden, oltin, kumush, toshko'mir, mis, nikel, temir rudalariga boy. 2006-yil YIM miqdori 1100 mln dollarni (aholi jon boshiga — 20000 doll.) tashkil etgan. Asosiy savdo hamkorlari: Daniya, Shvetsiya, Buyuk Britaniya, Fransiya, Yaponiya.

**Tarixi.** 875-yillarda orol islandiyalik dengizchi Gunborn tomonidan kashf qilingan. 982-yili norvegiyalik Erik Rauda («Malla») orolni o'rganib, Grenlandiya — «yashil yer» deb nom berdi. 983-yilda orolning janubida 1-normann koloniyalariga asos solindi. XI asrda mahalliy aholi — eskimoslar xristianlikni qabul qildilar. 1262-yildan XVIII asr boshlarigacha Grenlandiya Norvegiya mulki bo'lgan. 1721-yildan Daniya orolda istilochilik harakatlarini boshladi. 1814-yildan 1953-yilgacha Daniyaning rasmiy mustamlakasi edi. 1978-yili Daniya folketingi (parlamenti) orolning ichki muxtoriyatini tan oldi va bu holat 1979-yil 1-maydan kuchga kirdi.

## GRETSIYA

*Rasmiy nomi — Gretsiya Respublikasi.*  
*Poytaxti — Afina. Hududi — 131957 km<sup>2</sup>.*  
*Aholisi — 10706290 kishi (2007). Davlat tili — grek. Dini — pravoslav. Pul birligi — yevro.*

**Geografik joylashuvi va tabiati.** Gretsiya (Yunoniston) Yevropaning janubi sharqida, Bolqon yarimorolining janubiy qismi va Egey, Ioniya hamda O'rta Yer dengizi orollarida joylashgan davlat. U shimolda Bolgariya va Makedoniya, shimoli g'arbda Albaniya, shimoli sharqda Turkiya bilan chegaradosh. Janubda O'rta Yer dengizi, Sharqda Egey dengizi, g'arbda Ioniya dengizi suvlari Gretsiya sohillarini yuvib turadi. Krit, Evbeya, Rodos, Lesbos va bir nechta orollar Gretsiya hududining 1/5 qismini tashkil etadi. Hududining 2/3 qismi tog'li hududlar hisoblanadi. Eng baland nuqtasi Olimp tog'i, balandligi 2917 m. Asosiy daryolari: Alyakmon, Axelos, Strimon, Nestos. Asosiy qazilma boyliklari: neft, boksit, nikel. O'rmonlar mamlakat hududining 10—11% ini tashkil etadi. Tog'lar ignabargli daraxtlar bilan qoplangan.

**Davlat tuzilishi, siyosiy partiyalari.** Davlat tuzilishi — respublika. Mamlakat 13 ta yeparxiyadan tashkil topgan. Yeparxiyalar o'z navbatida 52 ta nomlarga bo'lingan. Gretsiya 1830-yil Usmonli turklar istibdodidan ozod bo'lib o'z mustaqilligini e'lon qilgan. Davlat boshlig'i — prezident. Ijroiya hokimiyat prezidenti va Bosh ministrga tegishli. Qonun chiqaruvchi oliy organ — bir palatali parlament. Asosiy siyosiy partiyalari: Yangi Demokratiya, Umumgrek sotsialistik harakati, Gretsiya Kommunistik Partiyasi.

**Iqtisodi, transport kommunikatsiyalari.** Turizm Gretsiya iqtisodining asosiy tarmoqlaridan biri hisoblanadi. Gretsiya xalq xo'jaligida sanoatning oziq-ovqat, kimyo, to'qimachilik va metallurgiya tarmoqlari yaxshi rivojlangan. Qishloq xo'jaligida asosan qand-lavlagi, tamaki, uzum va kartoshka yetishtiriladi. Mamlakat go'sht va sut mahsulotlaridan tashqari barcha oziq-ovqat mahsulotlari bilan o'z-o'zini ta'min-

laydi. 2006-yil YIM miqdori 243130 mln dollarni (aholi jon boshiga — 22709 dol.) tashkil etgan. Asosiy savdo hamkorlari: Germaniya, Italiya, Fransiya va Buyuk Britaniya.

**Tarixi.** Bugungi Gretsiya yerlarida m. a. III ming yillikdayoq yuksak rivojlangan madaniyat va sivilizatsiya vujudga kelgan. M. a. XII asrda Gretsiyaga doriylar bostirib kirgan. Peloponess urushlaridan so'ng (m. a. 431—404-yy.) Bolqon yarimorolida Makedoniyaning roli keskin oshdi. Makedoniya hukmdori Filipp II butun Gretsiya yerlarini o'ziga bo'ysundirdi. Uning o'g'li Aleksandr Makedonskiy (Iskandar Zulqarnayn) Misr va Hindistongacha bo'lgan yerlarni bosib olib, ulkan imperiyani vujudga keltirdi. M. a. II asrda Gretsiya Rim imperiyasi istibdodiga tushib qoldi. Qadimgi Rim imperiyasi inqirozidan so'ng Vizantiya butun Bolqon yarimorolini o'z nazoratida saqlab qoldi. IX asrda Gretsiyani arablar istilo qilishdi, oradan ko'p o'tmay X asrda bolgarlar bosib olishdi. XV asrga kelib Vizantiya inqirozidan so'ng 1460-yilda Gretsiya Usmonli turklar imperiyasining tarkibiy qismiga aylandi. 1830-yili turklar Gretsiya mustaqilligini tan oldi. 1924-yil Gretsiya Respublika deb e'lon qilindi, 1935-yili esa monarxiya qayta tiklandi. 1941-yil Germaniya Gretsiyani bosib oldi. 1945-yil urush tugaganidan so'ng Gretsiyada hukumat qo'shinlari va kommunistlar o'rtasida fuqarolar urushi boshlanib ketdi. Urush 1949-yilgacha davom etdi. 1967-yil 21-aprelda mamlakatda harbiylar davlat to'ntarishini amalga oshirdi. 1973-yil harbiylar monarxiyani bekor qilishdi. 1974-yil harbiylar hokimiyatdan chetlashtirildi. Shu yili o'tkazilgan referendumda Gretsiya xalqi respublika uchun ovoz berdi. 1975-yil yangi respublika konstitutsiyasi qabul qilindi.

## GRUZIYA

*Rasmiy nomi — Gruzziya Respublikasi. Poytaxti — Tbilisi. Hududi — 69700 km<sup>2</sup>. Aholisi — 4686467 kishi (2007). Davlat tili — gruzin. Dini — pravoslav. Pul birligi — lari.*



**Geografik joylashuvi va tabiati.** Gruziya G'arbiy Osiyoda joylashgan davlat. U shimolda Rossiya, janubda Turkiya, Armaniston va Ozarbayjon bilan chegaradosh. G'arbda Qora dengiz bilan tutashgan. Mamlakat maydonining 80% i tog'liklardan iborat. Eng baland nuqtasi Shxara tog'i (5068 m). Qora dengiz sohillarida Kolxida pasttekisligi yastanib yotadi. Asosiy daryolari: Kura va Rioni. Qazilma boyliklari: marganes, mis, ko'mir va neft.

Iqlimi — subtropik.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Davlat boshlig'i — prezident. Qonun chiqaruvchi oliy organi — bir palatali parlament. Mamlakat 66 ta ma'muriy hududlarga bo'lingan. Bundan tashqari 2 ta muxtor respublika — Abxaziya va Ajariya ham Gruziya tarkibiga kiradi. Mamlakat 1991-yil 9-aprelda o'z mustaqilligini qo'lga kiritgan. Asosiy siyosiy partiyalari: Gruziya Demokratik Ittifoqi, Gruziya Xalq Fronti, Respublika partiyasi.

**Iqtisodi, transport kommunikatsiyalari.**

Gruziya agrar-industrial davlat. Sobiq Ittifoqning tarqalishi va uning sobiq a'zolari bilan siyosiy-iqtisodiy aloqalarning yomonlashuvi hamda mamlakatdagi fuqarolar urushi Gruziya iqtisodiga o'z salbiy ta'sirini o'tkazdi. Sanoatning ko'pgina sohalarida haligacha ham inqiroz holati kuzatilmoqda. Mamlakat qishloq xo'jaligida ekiladigan ekinlarning 50% ini boshoqli ekinlar tashkil etadi. Lekin qishloq xo'jaligining eng asosiy ekini choydir. Gruziya eksportining asosiy qismini ham choy tashkil etadi. Bundan tashqari, tog' yonbag'irlarida uzumchilik yaxshi rivojlangan. 2006-yil YIM miqdori 13461 mln dollarni (aholi jon boshiga — 2872 doll.) tashkil etgan. Asosiy savdo hamkorlari: Rossiya, Armaniston, Turkiya va Ozarbayjon.

**Tarixi.** M. a. VI—IV asrlarda bugungi Gruziya hududlarida ikki davlat — Kolxida va Iberiya davlatlari tashkil topgan. Oradan ko'p vaqt o'tmay bu davlatlar forslar tomonidan istilo qilindi. Ulardan keyin m. a. IV asr oxirlarida Aleksandr Makedonskiy bu yerlarni bosib oldi. M. a. I asrga kelib G'arbiy Gruziya Rim imperiyasi, Sharqiy Gruziya esa forslar tomonidan istilo

qilindi. IV asrda Gruziya xristian dinini qabul qildi. VII asr oxirlarida bu yerlarga arablar bostirib kirdi. Bagrat III (974—1014) hukmronligi yillarida sharqiy va g'arbiy hududlar birlashtirildi. Dovud IV (1073—1125) davrida Tiflis arablardan ozod qilindi. Qirolicha Tamara (1184—1213) davrida Gruziya Kaspiygacha bo'lgan yerlarni egalladi. XIV asrning 2-yarmida bu yerlarni sohibqiron Amir Temur ishg'ol qildi. Temur davlatining inqirozidan so'ng Gruziya forslar va turklar o'rtasida uch asr davomida tortishuvli hudud bo'lib qoldi. 1786-yil Gruziya Rossiyaga yordam so'rab murojaat qiladi. 1801-yil Rossiya Gruziyani o'z tarkibiga qo'shib oldi. 1921-yil Gruziya Sovet Respublikasi deb e'lon qilindi. SSSRning inqirozidan so'ng 1991-yil 9-aprelda Gruziya o'z mustaqilligini e'lon qildi. Keyingi yillarda Gruziyada muxolifatchi kuchlarning amaldagi hukumat bilan kelisha olmayotganligi tufayli qator siyosiy inqirozlar sodir bo'lmoqda. 2008-yil 5-yanvarda muddatdan oldin bo'lib o'tgan prezidentlik saylovlarida sal oldin iste'foga chiqqan M.Saakashvili o'z muxolifatchilarini yengib yana hokimiyatni egalladi.

## GUAM

*Rasmiy nomi — Guam. Ma'muriy markazi — Aganya. Hududi — 541 km<sup>2</sup>. Aholisi — 173681 kishi (2007). Davlat tili — ingliz. Dini — katolik. Pul birligi — AQSH dollari.*

**Geografik joylashuvi va tabiati.** Guam xuddi shu nom bilan ataladigan Tinch okeanning g'arbiy qismidagi Marian orollarining eng yirik orolida joylashgan. Orol balandligi 405 metrgacha yetadigan va okeanga yaqinlashgan sari pasayib boradigan marjon qatlamlaridan tashkil topgan yassitog'likdan iborat. Yassitog'liklarning relyefi hamma joyda ham tekislikdan iborat bo'lmay, ba'zi joylarida botiqlar ham bor.

Iqlimi — tropik. Orolning florasini asosan pandanus, non daraxtlari hamda mangr daraxtlari tashkil etadi. Sohil bo'ylarida 20—50 km masofagacha kokos palmalari va turli butalar o'sadi. Guamning hayvonot

dunyosi boy emas. Orolning faunasini sayroqi qushlar tashkil etadi. Sut emizuvchilar yo'q. Sohilbo'yidagi suvlarda turli baliqlar ko'p.

**Davlat tuzilishi, siyosiy partiyalari.** Guam AQSHning «qo'shilmagan hudud»i hisoblanadi. Orolga o'z-o'zini boshqarish huquqi berilgan. Aholisi AQSH fuqarosi hisoblanadi, biroq ularning saylovlarda qatnashish huquqi yo'q. Guam AQSH Kongressi Vakillari palatasida ikki yilga saylanadigan bir delegatga (ovoz berish huquqisiz) ega. Boshqaruv boshlig'i — gubernator. U mahalliy aholi tomonidan 4 yilga saylanadi. Qonun chiqaruvchi organ bir palatali — Qonun chiqaruvchi majlis bo'lib, uning yigirma bir a'zosi mahalliy aholi tomonidan har ikki yilda saylanadi. Siyosiy partiyalari — orolda AQSHning Respublikachilar va Demokratlar partiyalarining mahalliy bo'limlari faoliyat yuritadi.

**Iqtisodi, transport kommunikatsiyalari.** Iqtisodining asosini turizm tashkil etadi. Orol iqtisodidagi muhim o'rinni AQSHning harbiy obyektlaridan keladigan daromadlar egallaydi. Orol aholisi mashg'ul bo'lgan qishloq xo'jaligi aholining ehtiyojlarini qoplamaydi. Sabzavot va mevalar yetishtiriladi. Chorvachilik rivojlanmoqda. Aholi olib kelinadigan xomashyoda ishlaydigan oziq-ovqat va yengil sanoat korxonalari hamda turmush elektronikasini yig'ish korxonalarida band. Elektr energiyasi ishlab chiqariladi. Eksport: kiyim-kechak, ichimliklar va tamaki mahsulotlari, elektronika. Import: oziq-ovqat, yoqilg'i (importning 50% atrofida). 2006-yil YIM miqdori 2500 mln dollarni (aholi jon boshiga — 14394 doll.) tashkil etgan. Asosiy savdo sheriklari: AQSH, Yaponiya, Tayvan.

**Tarixi.** Yevropaliklardan birinchi bo'lib Guamni F. Magellan 1521-yilda o'zining birinchi yer aylana sayohati davrida kashf etadi. 1563-yildan orol Ispaniya mustamlakasi. 1568-yilda Guamda dastlabki missioner iezuitlar o'rnashadi. Yevropaliklar tomonidan olib kelingan kasalliklar hamda qattiq ekspluatatsiya natijasida mahalliy aholi yuz mingdan (1521-yil) 5 mingga (1741-yil) qisqaradi. 1898-yilgi Ispan—Amerika urushida orolni AQSH egallab oladi. II jahon urushi davrida

Guam Yaponiya tomonidan bosib olinadi (1941). 1944-yilning iyul, avgustida o'tkazilgan harbiy operatsiya natijasida orol yana AQSH tasarrufiga o'tadi. AQSH Kongressi tomonidan 1950-yilda qabul qilingan Guam orolining asosiy qonuniga ko'ra orolga o'zini-o'zi boshqarish huquqi beriladi. Uning aholisiga AQSH fuqaroligi berilib, ular milliy saylovlarda qatnasha olishmaydi. Hozirgi kunda Guam AQSHning Tinch okeandagi strategik harbiy bazasidir. Orolida Apra-Xarbor harbiy dengiz va Andersen aviatsiya bazalari joylashgan.

## DANIYA

*Rasmiy nomi Daniya Qirolligi. Poytaxti — Kopengagen. Hududi — 43075 km<sup>2</sup>. Aholisi — 5442996 kishi (2007). Davlat tili — dat. Dini — lyuteranlar (91%), katoliklar (2%). Pul birligi — daniya kronasi.*

**Geografik joylashuvi va tabiati.** Daniya Yevropa qit'asining shimoli g'arbida, Yutlandiya yarim-oroli va uning atrofidagi orollarda joylashgan davlat. Janubda Germaniya bilan chegaradosh. Janubi sharqda Boltiq dengizi, g'arbda Shimoliy dengiz bilan tutashgan. Mamlakat shimolida Skagerrak bo'g'ozini joylashgan, sharqida Kattegat va Erusunn bo'g'ozlari Daniyani Shvetsiyadan ajratib turadi. Bundan tashqari, Grenlandiya va Faryer orollari ham o'z-o'zini boshqarish huquqiga ega bo'lgan Daniya Qirolligi yerlari hisoblanadi. Daniya maydoni asosan tekisliklardan iborat. Asosiy tabiiy boyliklari: neft, tabiiy gaz, tuz va baliq.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat 14 ta amtomlarga bo'lingan. Davlat boshlig'i — Daniya Qirolchasi. Ijroiya hokimiyat Bosh ministr boshchiligidagi hukumatga tegishli. Qonun chiqaruvchi hokimiyat Qirolicha va bir palatali parlament — folketingga tegishli. Asosiy siyosiy partiyalari: Daniya Sotsial-Demokratik partiyasi, Konservativ Xalq partiyasi, Radikal So'l partiya, Xristian Xalq partiyasi.

### ***Iqtisodi, transport kommunikatsiyalari.***

Daniya dunyoning sanoati yaxshi rivojlangan davlatlaridan biridir. Qishloq xo'jaligi ham yuksak rivojlangan texnologiyalar bilan ta'minlangan. Qishloq xo'jaligida band bo'lgan aholi Daniya umumiy aholisining 6% ini tashkil etadi. 2006-yil YIM miqdori 172569 mln dollarni (aholi jon boshiga — 31704 doll.) tashkil etgan. Daniya qishloq xo'jaligi o'zini oziq-ovqat mahsulotlariga bo'lgan ehtiyojini to'la ta'minlaydi. Qishloq xo'jaligining asosiy mahsulotlari: kartoshka, don, qandlavlagi, go'sht va sut mahsulotlari. Daniyada baliqchilik ham juda yaxshi rivojlangan. Asosiy savdo hamkorlari: Shvetsiya, Norvegiya, AQSH va YI davlatlari.

**Tarixi.** Bugungi Daniya hududidagi ilk davlatlar VI asrda tashkil topgan. XI asrda Angliya va Norvegiya ham Daniya nazorati ostiga tushib qoldi. Daniya qirolı Sven II XII asrda xristian dinini qabul qildi. XIV—XV asrlarga kelib Daniyaga Germaniyaning ta'siri kuchaydi. XVII asrda Boltiq dengizida hukmronlik uchun Daniya va Shvetsiya o'rtasida davom etgan kurash Daniyaning mag'lubiyati bilan yakunlandi. 1849-yil Daniya konstitutsiyasi qabul qilindi va konstitutsion monarxiya davlati deb e'lon qilindi. Konstitutsiya qirol hokimiyatini ancha chekladi. 1915-yil Daniya ayollari saylash huquqiga ega bo'lishdi. Daniya o'z betarafligini saqlashga harakat qil-sa-da, 1940-yilning 9-aprelida nemis-fashistlari uni bosib olishdi. 1945-yil 5-mayda Daniya ozod qilindi.

## **DOMINIKA**

*Rasmiy nomi — Dominika Hamdo'stligi. Poytaxti — Rozo. Hududi — 754 km<sup>2</sup>. Aholisi — 70287 kishi (2007). Davlat tili — ingliz. Dini — katoliklar (80%), protestantlar (15%). Pul birligi — sharqiy karib dollari.*

**Geografik joylashuvi va tabiati.** Karib havzasida, Kichik Antil orollarining Dominika orolida joylashgan orol davlat. Maydoni tog'liklardan iborat. Eng baland nuqtasi D'yabloten vulqoni (1447 m).

Iqlimi — tropik. Togʻ yonbagʻirlari tropik oʻrmonlar bilan qoplangan. Hayvonot dunyosi asosan qushlardan iborat.

**Davlat tuzilishi, siyosiy partiyalari.** Davlat tuzilishi — parlament respublikasi. Mamlakat 10 ta paxoddan iborat. Bular: Sent-Ann, Sent-David, Sent-Jorj, Sent-Jon, Sent-Jozef, Sent-Lyuk, Sent-Mark, Sent-Patrik, Sent-Piter, Sent-Pol. Dominika 1978-yil 3-noyabrda Buyuk Britaniyadan mustaqilligini eʻlon qilgan. Ijroiya hokimiyat — prezident va Bosh vazirga tegishli. Qonun chiqaruvchi oliy organi bir palatali parlament — Vakillar Palatasi.

Asosiy siyosiy partiyalari: Dominika Ozodligi partiyasi, Dominika Birlashgan Mehnatkashlari partiyasi, Dominika Leyboristlar partiyasi.

**Iqtisodi, transport kommunikatsiyalari.** Mamlakat xalq xoʻjaligining asosini qishloq xoʻjaligi tashkil etadi. Sanoat asosan mayda korxonalaridan iborat. Qishloq xoʻjaligi banan, mango, kokos yongʻogʻi va sitrus mevalarni yetishtirib beradi. Asosiy savdo hamkorlari: Buyuk Britaniya, AQSH va Karib havzasi davlatlari.

**Tarixi.** Dominika 1493-yil Xristofor Kolumb tomonidan kashf qilingan. Shu vaqtdan u Ispaniya mulkiga aylandi, soʻngra Fransiya mustamlakasi boʻldi. 1763-yili Buyuk Britaniya nazoratiga oʻtdi. 1967-yilda Britan Hamdoʻstligi aʻzosi boʻldi. 1978-yili Dominika oʻz mustaqilligini eʻlon qildi.

## DOMINIKAN RESPUBLIKASI

*Rasmiy nomi — Dominikan Respublikasi. Poytaxti — Santo-Domingo. Hududi — 48442 km<sup>2</sup>. Aholisi — 9419129 kishi (2007). Davlat tili — ispan. Dini — katoliklar (95%). Pul birligi — dominikan pyesosi.*

**Geografik joylashuvi va tabiati.** Karib havzasida Gaiti orolining sharqiy qismida joylashgan davlat. Gʻarbda yagona Gaiti bilan chegaradosh. Janubda Karib dengizi, shimolda Atlantika okeani bilan tutashib

ketgan. Sharqda Mona bo'g'ozi Gaiti orolini Puerto-Riko orolidan ajratib turadi. Mamlakat hududida bir nechta tog' tizmalari mavjud. Ularning eng yirigi Kordilyera Sentral tog' tizmasi bo'lib, eng baland nuqtasi Duarte cho'qqisi (3175 m). Mamlakat janubi g'arbida Enrikilo ko'li joylashgan bo'lib, u dengiz sathidan 46 m pastdir. Asosiy daryolari: Shimoliy Yake, Janubiy Yake, Artibonite.

Iqlimi — dengiz tropik iqlimi. Hayvonot dunyosi unchalik boy emas. Asosan dengiz toshbaqalari, kemiruvchilar va boshqa hasharotlardan iborat.

**Davlat tuzilishi, siyosiy partiyalari.** Davlat tuzilishi — respublika. Davlat boshlig'i — prezident. Qonun chiqaruvchi Oliy Organi — ikki palatali Senat va Deputatlar palatasidan iborat bo'lgan Milliy Kongress. Mamlakat 26 ta provinsiya va 1 ta milliy okrugdan iborat. Asosiy siyosiy partiyalari: Ozodlik Demokratik partiyasi (ODP), Dominikan Inqilobiy partiyasi (DIP).

**Iqtisodi, transport kommunikatsiyalari.** Qishloq xo'jaligi mamlakat iqtisodining asosini tashkil etadi. Eksportga chiqaradigan asosiy mahsulotlari: tamaki, qahva, kakao va shakarqamish. Sanoat faqatgina qishloq xo'jalik mahsulotlarini qayta ishlovchi korxonalaridan iborat. Oxirgi yillarda turizm o'ta yaxshi rivojlanmoqda. 2006-yil YIM miqdori 64918 mln dollarni (aholi jon boshiga — 6892 doll.) tashkil etgan. Asosiy savdo hamkorlari: AQSH, Puerto-Riko.

**Tarixi.** Gaiti oroli 1492-yilda Xristofor Kolumb tomonidan kashf qilingach, Kolumb bu yerlarni Espanola deb atadi. Lotin Amerikasining ispanlar tomonidan bosib olinishi aynan Dominikan Respublikasi hududlarida boshlanadi. 1697-yil Gaiti oroli Fransiya va Ispaniya o'rtasida taqsimlandi. Orolning sharqiy qismi Ispaniya qiroli hokimiyati ostida qoldi. Mamlakat 1822-yil o'z mustaqilligini e'lon qilgan bo'lsa-da, faqatgina 1844-yilga kelib haqiqiy mustaqillikka erishdi. 1978-yil saylovlari natijasida demokratik fuqaro hukumati shakllantirildi.

## JAZOIR

*Rasmiy nomi — Jazoir Xalq Demokratik Respublikasi (JXDR). Poytaxti — Al-Jazoir. Hududi — 2381741 km<sup>2</sup>. Aholisi — 33322179 kishi (2007). Davlat tili — arab. Dini — islom (99%). Pul birligi — jazoir dinori.*

**Geografik joylashuvi va tabiati.** Shimoliy Afrikadagi davlat. Farbda Marokash (chegara uzunligi—1559 km) va Farbiy Saxara (42 km), janubda — Niger (956 km), Mali (1376 km), Mavritaniya (463 km), sharqda Liviya (1982 km) va Tunis (965 km) bilan chegaradosh. Shimolda O'rta Yer dengizi joylashgan. Eng yuqori nuqtasi — Taxat tog'i (2 918 m). Daryolari juda kam. Foydali qazilmalari: neft, tabiiy gaz, fosfatlar, temir rudasi, uran, qo'rg'oshin, rux. Haydaladigan yerlari hududning 3%, o'tloq va yaylovlar — 13%, o'rmon va butazorlar — 2% ini tashkil qiladi.

Iqlimi — subtropik, tropik. Mamlakat hududi asosan cho'llardan iborat bo'lganligi sababli, o'simlik turlari unchalik ko'p emas. Atlas va Axaggar tog'larida po'kak eman o'sadi. Hayvonlardan shoqol, giyena, antilopa, quyonlar uchraydi.

**Davlat tuzilishi, siyosiy partiyalari.** Davlat tuzilishi — prezident respublikasi. Mamlakat 48 ta viloyatlarga bo'lingan. 1830—1962-yillarda Jazoir Fransiya mustamlakasi bo'lgan. 1962-yil 5-iyul kuni fransuzlar bilan o't ochishni to'xtatish to'g'risidagi Evian shartnomasiga asosan qurolli kurash to'xtatildi va Jazoir o'z mustaqilligini e'lon qildi. Qonunchiligi fransuz va islom qonunlariga asoslangan. Milliy bayrami — 1 noyabr — Inqilob kuni (1954). Davlat boshlig'i — prezident, qonun chiqaruvchi hokimiyat — bir palatali parlament — Milliy xalq majlisi. Asosiy siyosiy partiyalari: Xaloskorlik Milliy Fronti (XMF), Sotsialistik kuchlar fronti (SKF).

**Iqtisodi, transport kommunikatsiyalari.** Iqtisodning asosiy tarmoqlari — neft va gaz qazib olish (tabiiy gaz qazib olish bo'yicha jahonda 5-o'rinda). 1973—1974-yillarda neft narxining keskin oshishi iqtiso-



dining yuksalishiga va sanoatlashtirish dasturini moliyalashga imkon yaratdi. Neft va gaz narxining tushishi, iqtisodni markazlashtirilgan boshqaruv tizimining kamchiliklari mamlakatni 1988-yilda ijtimoiy va iqtisodiy inqirozga uchratdi. 1993-yil sentabrida hokimiyat tepasiga kelgan yangi hukumat islohotlarni jadallashtirish va iqtisodni qayta qurishni o'zining asosiy vazifasi deb bildi. 2006-yil YAIM miqdori 210657 mln dollarni (aholi jon boshiga — 6321 doll.) tashkil etgan. Neft va tabiiy gazni qazib olishdan tashqari sanoatning yengil, tog'-kon, neft kimyosi, oziq-ovqat sohalari keng rivojlangan. Mehnatga layoqatli aholining 22% i qishloq xo'jaligida band. Arpa, bug'doy, uzum, sitrus mevalari, sabzavotlar va zaytun yetishtiriladi. Eksportga chiqariladigan asosiy mahsuloti — neft va tabiiy gaz (jami eksport mahsulotlarining 97% ini tashkil qiladi). Asosiy savdo hamkorlari: Fransiya, Italiya, Germaniya va AQSH.

Temir yo'llarining uzunligi — 4733 km; avtomobil yo'llari — 80000 km. Asosiy dengiz portlari:

Jazoir, Annaba, Arzev, Bijaya, Mostaganem, Oran, Skikda.

**Tarixi.** M. a. XII asrda Jazoirning hozirgi hududining O'rtayer dengizi qirg'oqlarida istiqomat qilgan finikiyaliklar keyinchalik Karfagen ta'siri ostiga tushib qoladi. M. a. III asrda barbar qabilasining sardori Masinissa Karfagen va Rim o'rtasidagi urushdan foydalanib dastlabki Jazoir davlati — Numidiya qirolligini tuzadi. M. a. I asrdan milodiy V asrgacha Jazoir Rim imperiyasi tarkibiga kirgan. 429-yilda bu yerni vandallar bosib olgandan so'ng barbarlar bir qator mustaqil mayda davlatlarga asos solishadi. VII asrda Jazoirni arablar bosib olib, barbarlar islomni qabul qilishadi va Shimoliy Afrika xalifalik tarkibiga kiradi. XIII asrda xristian va musulmon barbar qabilalari o'rtasidagi kurash natijasida mamlakat uchga bo'linadi. XVI asrda bir qator Jazoir portlarini ispanlar egallashadi. Jazoirlik xristianlar Ispaniya protektoratiga o'tishgan bo'lsa, musulmonlar Usmoniylar imperiyasiga murojaat etishadi va ispanlarni mamlakatdan quvib chiqarishadi. XVII asr davomida jazoirliklar O'rtayer dengizida qaroqchilik

qilishadi. 1816-yili ingliz-golland, 1824-yil ingliz floti jazoirlik dengiz qaroqchilari bilan jang qilishadi. 1830-yil 5-iyulda Jazoirni fransuzlar bosib olishadi va 1834-yilda turklar ta'siriga butunlay barham berishadi.

1954—1962-yillardagi ozodlik urushlari natijasida 1962-yil 1-iyul kuni Jazoir mustaqil davlatga aylanadi. 1992-yildagi saylovlarda islom fundamentalistlari g'alaba qozonishganda saylov natijalari hukumat tomonidan bekor qilinadi. Bunga javoban Islom qutqarish fronti Jazoir hududida yashovchi chet el fuqarolariga qarshi terrorchilik harakatlarini uyushtirishadi. 1992-yilgi siyosiy inqiroz natijasida davlatni boshqarish uchun kollegial organ — Davlat oliy kengashi tuziladi. 1994-yilda prezident etib saylangan general L. Zerual davlat boshqaruv tizimini tiklab fuqarolar urushi boshlanishini oldini oldi.

## JANUBIY AFRIKA RESPUBLIKASI

*Rasmiy nomi — Janubiy Afrika Respublikasi. Poytaxti — Pretoriya. Hududi — 1223410 km<sup>2</sup>. Aholisi — 44074732 kishi (2007). Davlat tili — ingliz, afrikaans, kosa, zulu va sesoto. Dini — xristianlik. Pul birligi — janubiy afrika randi.*

**Geografik joylashuvi va tabiati.** Afrikaning janubidagi davlat. Shimolda Botsvana (chegara uzunligi 1840 km), Namibiya (855 km), Mozambik (491 km), Svazilend (130 km) va Zimbabve bilan chegaradosh. Mamlakat sharqida Lesoto qirolligi (909 km) joylashgan. G'arbda Atlantika okeani, janub va sharqda Hind okeani bilan tutashgan. Chegarasining umumiy uzunligi — 4750 km, sohil bo'ylab chegara uzunligi — 2798 km. Mamlakat yassitog'likda joylashgan. Sharqida mamlakatning eng baland nuqtasi — Katkin cho'qqisi (3660 m) joylashgan Ajdar tog'lari yotadi. Janubda Kap tog'lari joylashgan. G'arbda Namib sahrosi, shimoli g'arbda Kalaxari sahrosining janubiy qismi joylashgan. Asosiy daryolari: Oranj va Limpopo. Qazilma boyliklari: oltin, uran, olmos, platina, xrom, ko'mir, temir rudasi, tabiiy gaz, marganes, nikel, qalay, fosfatlar. Hayda-

ladigan yerlar hududning 10% ini, yaylov va o'tloqlar 65% ini egallaydi.

Iqlimi — tropik. Palma, baobab, aloy, temir daraxti, qizil daraxt, kap samshiti, xushbo'y daraxt o'sadi. Arslon, qoplon, jirafa, begemot, endemik turdagi qushlar, oq karkidon, muqaddas hayvon zuluxamemon, pitonlar hayvonot olamini tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat 9 ta provinsiyaga bo'lingan. JAR mustaqillikka 1910-yilning 31-mayida erishgan (avval Buyuk Britaniya mustamlakasi bo'lgan). 31 may — Milliy bayram (Respublika e'lon qilingan kun). Davlat va hukumat boshlig'i — prezident. Qonun chiqaruvchi oliy organ — parlament. Parlament oqlar uchun yig'ilish palatasidan, ranglilar uchun Vakillar palatasidan, hindlar uchun Delegatlar palatasidan iborat. Yirik siyosiy partiyalari: Millatchilik partiyasi, Afrika milliy kongressi, Demokratik partiya, Konservativ partiya.

**Iqtisodi, transport kommunikatsiyalari.** JAR Afrika qit'asidagi iqtisodiy jihatdan eng taraqqiy etgan davlatlardan biridir. 2006-yil YIM miqdori — 510102 mln dollarni (aholi jon boshiga — 11573 doll.) tashkil etgan. Iqtisodning asosi — tog'-kon sanoati (platina, oltin, xrom ishlab chiqarish bo'yicha dunyoda yetakchi). Mashinasozlik, metallurgiya, to'qimachilik, oziq-ovqat sanoatlari ham rivojlangan. Umumiy sanoat ishlab chiqarishi YIMning 40% ini tashkil etadi. Qishloq xo'jaligida (YIMning 5% i) chorvachilik rivojlangan. Makkajo'xori, bug'doy, shakarqamish yetishtiriladi. Mamlakat oziq-ovqat mahsulotlariga bo'lgan ehtiyojlarini o'zi qoplaydi. Asosiy savdo sheriklari: Buyuk Britaniya, Italiya, Yaponiya, AQSH, Germaniya.

Temiryo'llarining umumiy uzunligi — 20638 km, avtomobil yo'llari — 188309 km (54013 km ga tosh yotqizilgan). Asosiy portlari: Durban, Keyptaun, Port-Elizabet.

**Tarixi.** Hozirgi JAR hududiga dastlab bushmenlar, keyinchalik gottentotlar o'rnashgan. 1488-yilda portugal dengizchisi Dias Yaxshi Umid burnini kashf etadi.

1652-yilda gollandlar Janubiy Afrika sohillarida o'z mustamlakalariga asos solishadi. Bular 1834—1839-yillarda Transvaal hamda Oranj respublikalariga asos solishadi. Inglizlarning Transvaalga 1877-yilda hujum qilishi birinchi ingliz — bur urushini keltirib chiqaradi va bu urushda Buyuk Britaniya mag'lubiyatga uchraydi. Lekin ikkinchi ingliz — bur urushidan so'ng, 1902-yilda inglizlar bular ustidan o'z hukmronligini o'rnatadi. 1910-yilda Kap, Natal, Transvaal va Oranjdan iborat federatsiya tuziladi va Britaniya dominioni deb e'lon qilinadi. Ikkinchi jahon urushidan so'ng Janubiy Afrika Ittifoqi (1961-yildan JAR)ning hukumati aparteid siyosatini e'lon qiladi. Mamlakatning afrikalik aholisi-ning noroziliklari, jahon hamjamiyatining mamlakat hukumatini iqtisodiy sanksiyalar bilan siquvga olishi 1989-yilda aparteid siyosatining tugatilishiga olib keldi. 1992-yilda dastlabki demokratik saylovlarda Nelson Mandela g'olib chiqadi. 1994-yili hokimiyat bo'linishi hamda aparteiddan voz kechish tamoyillariga asoslangan muvaqqat konstitutsiya qabul qilindi (1996-yilda yangi konstitutsiya qabul qilingan). XXI asr boshlaridan mamlakatda qashshoqlikka barham berish va iqtisodni liberallashtirish masalalariga alohida e'tibor berilmoqda.

## JANUBIY KOREYA

*Rasmiy nomi — Koreya Respublikasi. Poytaxti — Seul. Hududi — 98480 km<sup>2</sup>. Aholisi — 49034812 kishi (2007). Davlat tili — koreys. Dini — xristianlik (48%), buddaviylik (47%). Pul birligi — vona.*

**Geografik joylashuvi va tabiati.** Sharqiy Osiyoda, Koreya yarimorolining janubidagi davlat. Shimolda Koreya Xalq Demokratik Respublikasi bilan chegaradosh (chegaraning uzunligi — 238 km). Janubiy Koreya g'arbda Sariq dengiz, Sharqda Yapon dengizi bilan tutashib ketgan. Janubi sharqda mamlakatni Yaponiyadan Koreys bo'g'ozini ajratib turadi. Sohilining uzunligi — 2413 km. Mamlakat relyefi asosan qir va tog'lardan iborat. Asosiy tog' tizmasi sharqiy sohilga

parallel joylashgan Sharqiy Koreya tog'laridir. Mamlakatning eng baland nuqtasi Chejuda orolida joylashgan Xala-san tog'i hisoblanadi. Janubiy va g'arbiy sohillar tekisliklardan iborat. Asosiy daryolari — Nextongan va Xangan. Asosiy qazilma boyliklari: volfram, temir, marganes, mis, oltin, kumush. Haydaladigan yerlar hududning 21% ini egallaydi.

Iqlimi — mo'tadil musson. Eman, bambuk, archa, qarag'ay, terak, qayrag'och, oqqarag'ay o'sadi. Hayvonot olamida yo'lbars, qoplon, silovsin, ayiqni uchratish mumkin.

**Davlat tuzilishi, siyosiy partiyalari.** Davlat tuzilishi — respublika. Mamlakat 9 provinsiyaga bo'lingan. Seul va Pusan shaharlari alohida ma'muriy maqomga ega. Koreya Respublikasi 1948-yilning 15-avgustida mustaqil deb e'lon qilingan. Milliy bayrami — Mustaqillik kuni. Ijro etuvchi hokimiyat — prezident (davlat boshlig'i) va Bosh vazir rahbarligidagi Davlat Kengashiga tegishli.

Qonun chiqaruvchi hokimiyat bir palatali parlament — Milliy Majlis tomonidan amalga oshiriladi. Yirik siyosiy partiyalari: Demokratik liberal partiya, Demokratik partiya, Birlashgan xalq partiyasi.

**Iqtisodi, transport kommunikatsiyalari.** Janubiy Koreyaning so'nggi o'n yillikdagi iqtisodiy o'sishi jahondagi yuqori o'rinlardan birini egallaydi. 2006-yil YIM miqdori 980694 mln dollarni (aholi jon boshiga — 19999 doll.) tashkil etgan. Sanoati elektrotexnika, to'qimachilik, oziq-ovqat ishlab chiqarishga ixtisoslashgan. Asosiy qishloq xo'jaligi (YIMning 11% ini) mahsulotlari — sholi, arpa, batat, soya. O'rmon xo'jaligi va baliqchilik ham rivojlangan. Asosiy savdo sheriklari: AQSH, Yaponiya.

Temiryo'llarining umumiy uzunligi — 6763 km, avtomobil yo'llari — 63200 km, ichki suv yo'llari — 1609 km. Asosiy portlari: Pusan, Mokpxo.

**Tarixi.** M. a. II—I asrlarda hozirgi Koreya hududi Xitoy mustamlakasi bo'lgan. M. a. 37-yilda Koreya yarimorolining shimoliy qismida Kogur davlati vujudga keladi. Janubiy qismi esa Pekchi va Silla qirolliklariga bo'linadi. X asrning oxirida koreys davlati Koryo sulo-

lasi hokimiyati ostida birlashtiriladi. 1321-yilda Koreyani mo'g'ullar bosib olishadi. Li sulolasi hukmronligi davrida (1392—1910) mamlakatga yaponlar (XVI asr) va manchjurlar (XVIII asr) bostirib kirishadi, XIX asrda esa Koreya Xitoy, Yaponiya, Rossiya o'rtasidagi mojaroli hududga aylanadi. 1910-yilda Yaponiya tomonidan bosib olingan Koreya, yaponlarga qarshi kurashni 1938-yilda boshlaydi va 1943-yilda mustaqillikka erishadi. Lekin 38-parallel bo'ylab mamlakat ikki qismga — sovet va amerika qo'shinlarining okkupatsion hududlariga aylanadi. 1948-yilda Koreya ikki davlatga — shimolda KXDR, janubda Koreya Respublikasiga bo'linadi. 1950—1953-yillarda ikki koreys davlati o'rtasida urush harakatlari sodir bo'ladi. Janubiy Koreya 1965—1972-yillarda Vyetnam bilan bo'lgan harbiy voqealarga aralashadi. 1980-yilda general Chon Du Xvan mamlakatda o'z diktaturasini o'rnatadi. 1988-yilda diktatura tugatilib, birinchi demokratik saylovlarda Ro De U prezidentlikka saylanadi. Prezidentlikdan ketgandan so'ng Ro De U va uning maslakdoshlari korrupsiya va moliyaviy tovlamachilikda ayblanadilar. XXI asr boshlarida Koreya Respublikasida iqtisodiy inqiroz vujudga keldi.

## JIBUTI

*Rasmiy nomi — Jibuti Respublikasi. Poytaxti — Jibuti. Hududi — 23200 km<sup>2</sup>. Aholisi — 496967 kishi (2007). Davlat tillari — fransuz va arab. Dini — islom. Pul birligi — jibuti franki.*

**Geografik joylashuvi va tabiati.** Jibuti shimoli sharqiy Afrikadagi davlat. Janubda va g'arbda Efiopiya, shimolda Eritreya, janubi sharqda Somali bilan chegaradosh. Sharqda Aden ko'rfazi bilan tutashgan. Jibuti hududi yassitog'lar, cho'l va yarimcho'llardan iborat.

Iqlimi — quruq va issiq tropik.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Davlat boshlig'i —

prezident. Qonun chiqaruvchi Oliy organ bir palatali parlament — Milliy Majlis. Qonunchiligi fransuz va islom dini qonunlari asosida amalga oshiriladi. Asosiy siyosiy partiyalari: Taraqqiyot uchun Xalq Birlashmasi, Demokratik Yangilanish partiyasi, Milliy Demokratik partiya.

### ***Iqtisodi, transport kommunikatsiyalari.***

Mamlakat xo'jaligining asosiy tayanchi uning strategik joylashuv o'rnidir. Jibuti Afrikaning erkin savdo hududi deb e'lon qilinganligi uning portlari orqali xalqaro savdoning rivojlanishiga qulay sharoit yaratib bermoqda. 2006-yil YIM miqdori 1506 mln dollarni (aholi jon boshiga — 3030 doll.) tashkil etgan.

**Tarixi.** XIX asrning 2-yarmidan Obok portini egalagan fransuzlar Jibutini o'z mustamlakalariga aylantirish harakatini boshlab yubordilar. 1886-yil mamlakat Somalining Fransuz qirg'og'i nomi bilan Fransiya mustamlakasiga aylantirildi. 1946-yildan Fransiyaning «dengiz ortidagi yerlari» nomini oldi. 1958-yil o'tkazilgan referendumda Jibuti xalqi mustaqillik uchun ovoz berdi. 1967-yil Fransiya bilan siyosiy va iqtisodiy aloqalarni mustahkamlash maqsadida o'zini «Afar va Issalar fransuz hududi» deb e'lon qildi. 1977-yil Jibuti o'z mustaqilligini e'lon qildi. Shu yili Arab davlatlari ligasiga a'zo bo'lib kirdi.

## ZAMBIYA

*Rasmiy nomi — Zambiya Respublikasi. Poytaxti — Lusaka. Hududi — 752614 km<sup>2</sup>. Aholisi — 11542478 kishi (2007). Tili — ingliz. Dini — aholisining yarmidan ko'prog'i xristian, qolganlari islom, induizm dinlariga e'tiqod qiladi. Pul birligi — zambiya kvachasi.*

**Geografik joylashuvi va tabiati.** Afrikaning janubiy qismida joylashgan. Shimolda Tanzaniya (chegara uzunligi — 338 km) va va Kongo Demokratik Respublikasi (1930 km), g'arbda Angola (1110 km), janubda Namibiya (233 km), Zimbabve (797 km), sharqda Malavi (837 km), Janubi sharqda Mozambik (419 km)

bilan chegaradosh. Umumiy chegara uzunligi — 5664 km. Ko'llari — Bangveulu, Mveru, qisman Tanganika va Karib. Asosiy daryolari: Luanva, Zambezi, Kafue. Foydali qazilmalari: mis, kobalt, zumrad, oltin, kumush, uran, rux, ko'mir, marganes, qo'rg'oshin rudalariga boy.

***Davlat tuzilishi va siyosiy partiyalari.***

Davlat tuzilishi — prezident respublikasi. Ma'muriy jihatidan 9 ta provinsiya (viloyat)ga bo'linadi. 1964-yil 24-oktabrda mustaqillikka erishgan. 24-oktabr Mustaqillik kuni — Milliy bayrami hisoblanadi. Davlat boshlig'i — prezident. Qonun chiqaruvchi oliy organ — ikki palatali parlament Milliy Assambleya (yuqori palata) va Vakillar palatasi (quyi palata).

Asosiy siyosiy partiyalari: Ko'ppartiyali demokratiya uchun harakat (KDUH) partiyasi, Milliy mustaqillik birlashgan partiyasi (MMBP).

***Iqtisodi, transport kommunikatsiyalari.***

Mamlakatning iqtisodiy rivojlanish darajasi past. 2006-yil YIM miqdori 9409 mln dollarni (aholi jon boshiga — 840 doll.) tashkil etgan. Mis qazib olish va qayta ishlash ishlab chiqarishda asosiy o'rin tutadi. Iqtisodning asosiy muammolaridan biri davlat tashqi qarzlarining ko'pligi. Asosiy savdo hamkorlari — YI, Yaponiya, Janubiy Afrika, AQSH.

Temiryo'llarinig umumiy uzunligi — 1273 km. Avtomobil yo'llari — 36370 km. Ichki suv yo'llari — 2250 km. Asosiy porti — Mpulungu.

***Tarixi.*** Hozirgi Zambiya hududi ilk davlatlar (Barotse, Lunda) XVII—XIX asrlar paydo bo'ldi. XIX asr oxirlarida Zambiya hududida Britaniya hukmronligi o'rnatildi va Shimoliy Rodeziya deb atala boshlandi. Shimoliy Rodeziya 1953-yil Rodeziya va Nyasalend Federatsiyasiga kiritildi. 1963-yilda Federatsiya bo'linib ketganidan keyin Shimoliy Rodeziya 1964-yil 24-oktabrda mustaqil Zambiya Respublikasiga aylandi.

## ZIMBABVE

*Rasmiy nomi — Zimbabve Respublikasi. Poytaxti — Xarare. Hududi — 390300 km<sup>2</sup>. Aholisi — 12308697 kishi (2007). Davlat tili —*



|| ingliz. Dini -- ruxretizm, xristianlik (25%). Pul birligi -- zimbabve dollari.

**Geografik joylashuvi va tabiati.** Afrika qit'asining janubiy qismida joylashgan davlat. Mozambik bilan shimolda va sharqda (chegara uzunligi — 1231 km), shimolda Zambiya (794 km), janubda JAR (225 km), janubi g'arbda va g'arbda Botsvana bilan chegaradosh. Umumiy chegara uzunligi — 3066 km. Deyarli butun mamlakat hududini Matabele va Moshona yassitog'liklari egallagan. Mamlakatning eng baland nuqtasi — Inyangani tog'i (2595 m). Asosiy daryolari — Limpopo va Zambezi. Foydali qazilmalari: xrom, oltin, nikel, mis, temir rudasi, ko'mir, vanadiy, litiy, qalay, asbest.

**Davlat tuzilishi va siyosiy partiyalari.** Davlat tuzilishi — prezident respublikasi. 1980-yil 18-aprelda mustaqillikka erishgan. 18-aprel — Milliy bayram — Mustaqillikning e'lon qilinishi. Davlat boshlig'i — prezident. Qonun chiqaruvchi oliy organ — bir palatali parlament. Asosiy siyosiy partiyalari: Zimbabve milliy Afrika ittifoqi—Siyosiy front (ZMAI SF), Zimbabve konservativ alyansi (ZKA), Zimbabve birlik harakati (ZBH).

**Iqtisodi, transport kommunikatsiyalari.** Zimbabve Afrika qit'asining iqtisodiy jihatdan birmuncha rivojlangan mamlakatlaridan biridir. 2006-yil YIM miqdori 27085 mln dollarni (aholi jon boshiga — 2200 doll.) tashkil etgan. Iqtisodning asosini tog'-kon va qayta ishlash sanoati tashkil etadi. Qishloq xo'jaligi ham iqtisodning muhim tarmog'idir. Asosiy savdo hamkorlari: Buyuk Britaniya, JAR, Germaniya.

Temiryo'llarining umumiy uzunligi — 2745 km, avtomobil yo'llari — 85237 km. Asosiy porti (daryo porti) — Kariba.

**Tarixi.** XII—XVII asrlarda hozirgi Zimbabve hududida Monotapa davlati bo'lgan. XIX asr oxirlarida mamlakatni Rodeziya deb atagan inglizlar paydo bo'ladi. 1923-yilda Janubiy Rodeziya Britaniya mustamlakasiga aylantiriladi. 1953-yildan 1963-yilgacha Rodeziya va Nyasalend Federatsiyasi tarkibiga kiriti-

ladi. 1979-yil Zimbabve (mamlakatning yangi nomi)da parlamentga saylovlar bo'lib o'tdi va afrikaliklar parlamentda ko'pchilik o'ringa ega bo'ldilar. Lekin mamlakatning to'liq mustaqillikka erishishi uchun partizan urushi 1980-yil 17 aprelgacha davom etdi.

## INDONEZIYA

*Rasmiy nomi – Indoneziya Respublikasi. Poytaxti – Jakarta. Hududi – 1919400 km<sup>2</sup>. Aholisi – 235382136 kishi (2007). Davlat tili – indonez. Dini – musulmonlar (87%), protestantlar (6%), katoliklar (3%), buddistlar (3%). Pul birligi – Indoneziya rupiyasi.*

**Geografik joylashuvi va tabiati.** Indoneziya Respublikasi Janubi sharqiy Osiyodagi davlat. Dunyodagi eng katta Malay arxipelagining 17,5 ming oroli va Yangi Gvineya (G'arbiy Irian) orolining g'arbiy qismida joylashgan. Indoneziya hududining yarmidan ko'prog'i o'rtacha baland va pastqam tog'lardan, Yangi Gvineyada qisman baland tog'lardan (eng baland joyi – 5029 m), qolgan qismi allyuvial tekisliklardan iborat. Orolida 400 dan ortiq vulqon bor, shundan 100 tasi harakatdagi vulqonlardir. Tektonik harakatlar tinmagan. Tez-tez kuchli zilzila bo'lib turadi. Neft, ko'mir, temir, marganes, qalay rudalari, boksit, mis, qo'rg'oshin, rux, alyuminiy, nikel va fosfat konlari bor.

Iqlimi – Indoneziyaning katta qismida ekvatorial, Yava orolining sharqiy va Kichik Zond orollarida subekvatorial iqlim. Eng yirik daryolari – Kapuas, Barito, Xarri, Kompar, Musi, Mamberamo, Digul.

**Davlat tuzilishi, siyosiy partiyalari.** Indoneziya – unitar respublika. Davlat va hukumat boshlig'i – prezident. Qonun chiqaruvchi oliy organ – Xalq Maslahat Kongressi. Amaldagi konstitutsiyasi 1945-yil 18-avgustda qabul qilingan. Ijroiya hokimiyatni prezident o'zi tayinlagan hukumat bilan birga boshqaradi. Asosiy siyosiy partiyalari: Birlik va taraqqiyot partiyasi, IDP Milliy mandat partiyasi.

**Iqtisodi, transport kommunikatsiyalari.**

Indoneziya — agrar-industrial mamlakat. Qishloq xo'jaligi Indoneziya iqtisodining yetakchi tarmog'i hisoblanadi. Mehnatga yaroqli aholining yarmidan ko'prog'i qishloq xo'jaligida band. Tabiiy kauchuk va palma yog'i ishlab chiqarish bo'yicha dunyoda birinchi o'rinda turadi. Tropik daraxt yog'ochidan yasalgan buyumlar, tamaki, choy, qahva, ziravor dorivorlar, shuningdek, baliq va dengiz mahsulotlari yetkazib beruvchi eng katta davlatdir. Asosiy donli ekin — sholi, makkajo'xori. Chorvachiligida qoramol, cho'chqa, echki, qo'y, yilqi, parranda boqiladi. Indoneziya hududining 65% i o'rmon bilan qoplangan bo'lib, qimmatbaho yog'och tayyorlanadi. Konchilik sanoati budjet tushumlarining ancha qismini ta'minlaydi. Yiliga o'rtacha 576 mln barrel neft qazib olinadi. Indoneziya suyultirilgan tabiiy gazni chetga chiqarishda dunyoda birinchi o'rinda, qalay qazib olishda ikkinchi o'rinda, nikel qazib olishda to'rtinchi o'rinda turadi. Mahsulot ishlab chiqarish sanoatining asosini iste'mol mollari: gazlama, charm buyumlar, ro'zg'orbop kimyoviy mahsulotlar, oziq-ovqat tashkil etadi. Sholi oqlash, tamaki, qand-shakar, choy, yog', ip-gazlama, jun, qurilish materiallari, farmatsevtika va poligrafiya, konditer korxonalari, mineral o'g'it va shina zavodlari bor. Yuksak texnologiyaga asoslangan tarmoqlar: kemasozlik, samolyotsozlik, neft kimyosi, avtomobil yig'ish, radioelektronika rivojlanmoqda. Indoneziyada dengiz transporti yetakchi o'rinda. 2006-yil YIM miqdori 779719 mln dollarni (aholi jon boshiga — 3312 doll.) tashkil etgan. Asosiy savdo hamkorlari: Yaponiya, AQSH, Singapur, Germaniya.

Temiryo'llarining umumiy uzunligi — 6964 km. Avtomobil yo'llari — 119500 km. Ichki suv yo'llari — 21579 km. Portlari: Tanjungprien (Jakarta porti), Surabaya, Palembang, Balikpapan, Ujungpan.

**Tarixi.** Indoneziya qadimiy madaniyat markazlaridan biridir. M. a. II asrga oid yodgorliklar saqlangan. Yava, Malayyu orollarida Taruma va Kalinga, Sumatrada Malayyu va Shrivijayya davlatlari tashkil topgan. Ularda hinduilik va buddaviylik tarqala boshladi. VII

asrda bir necha mayda davlatlar birlashib, Shrivijayya imperiyasiga aylandi. VIII asrning birinchi yarmida Yavada Mataram davlati paydo bo'ldi. 1025-yil Shrivijayya inqirozga uchradi. XI asrning 40-yillarida Mataram Kediri (XIII asrdan Singasari) va Jangola davlatlariga bo'linib ketdi. XIII asr oxirida Singasari yemirilib, uning o'rnida Majapaxit imperiyasi tashkil topdi (1293 — taxm. 1520). XIV asrda Hindiston va Malakkadan Indoneziyaga islom dini kirib keldi. XVI asrdan Majapaxit imperiyasi musulmon sultonliklariga bo'linib ketgach, Indoneziya hududiga yevropaliklar (portugallar, gollandlar) kirib kela boshladi. 1602-yil gollandlar Indoneziyada Ost-Indiya kompaniyasiga asos soldi. 1811-yil Indoneziyani inglizlar bosib oldi. 1814-yilgi Angliya-Niderlandiya bitimiga ko'ra Indoneziya Niderlandiya qo'liga o'tdi. 1942—1945-yillarda Indoneziyani Yaponiya bosib oldi. Yaponiya II Jahon urushida mag'lubiyatga uchragach, mamlakat mustaqil Indoneziya Respublikasi deb e'lon qilindi (1945-yil 17-avgust). 1945-yil 6-sentabrda Indoneziyaga ingliz, keyinroq golland qo'shinlari bostirib kirdi. 1949-yil noyabrda Gollandiya Indoneziya mustaqilligini tan olishga majbur bo'ldi. Biroq Indoneziya 16 hududga bo'linib tashlandi: Mamlakat «Indoneziya Qo'shma Shtatlari» nomi bilan yuritila boshlandi. Gollandiya G'arbiy Irianni o'z qo'l ostida saqlab qoldi. 1950-yil 6-avgustda Indoneziya unitar davlat deb e'lon qilindi. 1953-yil 1-mayda G'arbiy Irian Indoneziya Respublikasi tarkibiga qo'shib olindi. Etnik jihatdan indoneziyaliklardan farq qiluvchi Farbiy Irian (Irian-Jaya, Yangi Gvineya oroli) aholisi XX asrning 70—90 yillarida qo'zg'olonlar ko'tardi. 1968 yilda Suxarto prezidentlik lavozimiga saylanganda, Indoneziya dunyoning eng qashshoq mamlakatlaridan biri edi (70 mln odam (aholining 60 %) o'ta qashshoq bo'lgan). Oxirgi 25 yilda yashash tarzi yaxshilanib, urbanizatsiya jarayoni kuchaydi.

## IORDANIYA

*Rasmiy nomi — Iordaniya Hoshimiylar podshohligi. Poytaxti — Ommon. Hududi — 89206 km<sup>2</sup>. Aholisi — 5981533 kishi (2007). Tili — arab. Dini — islom davlat dini hisoblanadi. Pul birligi — iordan dinori.*

**Geografik joylashuvi va tabiati.** Iordaniya Yaqin sharqda Osiyoning g'arbiy qismida joylashgan. Iordaniya sharqda va janubda Saudiya Arabistoni (chegara uzunligi — 728 km), sharqda Iroq (181 km), g'arbda Isroil (238 km) va Falastin (97 km), shimolda Suriya (375 km) bilan chegaradosh. Chegarasining umumiy uzunligi — 1619 km. Iordaniya ma'muriy jihatdan 12 muhofazat (viloyat)ga bo'linadi. Iordaniyaning aksar qismi sharqdan g'arbga tomon balandlashib boradigan yassitog'liklardan iborat. Janubdagi Ram tog'i Iordaniyaning eng baland nuqtasi (1764 m). Mamlakatning g'arbiy qismida meridian chizig'iga parallel holda yo'nalgan chuqur botiq voha — Hor (Al-Hor) va uning davomi Vodiy al-Arab joylashgan. Hor mintaqasida Iordan daryosi vodiysi va O'lik dengiz o'rin olgan. Bu mintaqaning har ikki tomonida Suriya—Falastin tog'lari qad rostlab turadi. Yirik shaharlari: Ommon, Az-Zarqa, Irbid, Al-Xalil.

**Davlat tuzilishi va siyosiy partiyalari.** Iordaniya — Konstitutsion monarxiya. 1952-yil 8-yanvarda qabul qilingan konstitutsiyaga amal qiladi. Davlat boshlig'i — Malik (podshoh) bo'lib, u qonun chiqaruvchi va ijrochi hokimiyat sohasida katta huquqqa ega. Qonun chiqaruvchi hokimiyat podshoh va Millat majlisi (parlament): u Senat va deputatlar palatasidan iborat. Senatni podshoh 4 yilga tayinlaydi. Deputatlar palatasi to'g'ridan to'g'ri va ovoz berish yo'li bilan 4 yilga saylanadi. Ijroiya hokimiyatni podshoh o'zi ta'minlaydigan hukumat — Vazirlar Kengashi orqali amalga oshiradi.

**Iqtisodi va transport kommunikatsiyalari.** Iordaniya iqtisodiyotida xizmat ko'rsatish, sanoat, qishloq xo'jaligi va sayyohlik sohalari rivojlanmoqda. Iordaniya fosfat va ishqor (potash), mis va marganes

dent. Qonun chiqaruvchi oliy organ — Milliy parlament. (Ikki palatali: Vakillar palatasi va senat). Ijroiya hokimiyatni vakillar palatasining taklifiga binoan prezident tomonidan tayinlanadigan hukumat amalga oshiradi. Asosiy siyosiy partiyalari: Fianna foyl («Omad askarlari»), Fine gal (Birlashgan Irlandiya), Irlandiya leyboristlar partiyasi, Irlandiya kommunistik partiyasi, Demokratik soʻl partiya, Taraqqiyparvar demokratik partiya, Irlandiya ishchilari partiyasi.

### ***Iqtisodi, transport kommunikatsiyalari.***

Irlandiya — industrial mamlakat. Konchilik sanoati va qishloq xoʻjaligi xomashyosini qayta ishlash tarmoqlari yetakchi oʻrinda. Metallurgiya, mashinasozlik, elektrotexnika, neft, kimyo soxalari rivojlangan, qurilish ashyolari konlari bor. Torf qazib olish va undan foydalanish sohasida dunyoda oldingi oʻrinda turadi. Chorvachilik mamlakat qishloq xoʻjaligining asosiy tarmogʻi hisoblanadi: bu tarmoq yalpi qishloq xoʻjalik mahsulotining 88% ini beradi. Uning 80% i eksport qilinadi. Dengiz floti rivojlangan. Irlandiya chetga mashina va asbob-uskunalar, qoramol, oziq-ovqat, kimyo, toʻqimachilik mahsulotlari chiqaradi. Chetdan transport vositalari neft va boshqalar keltiriladi. 2006-yil YIM miqdori 160993 mln dollarni (aholi jon boshiga — 39606 doll.) tashkil etgan. Asosiy savdo hamkorlari: Buyuk Britaniya, Germaniya, Fransiya, AQSH va Rossiya.

Temiryoʻllarinig umumiy uzunligi — 1947 km, avtomobil yoʻllari — 92294 km. Dengiz portlari — Dublin, Kork, Uoterford.

***Tarixi.*** Irlandiya hududida inson m. a. VI ming yillikdan buyon yashaydi. M. a. I asrda kelt qabilalari koʻchib kelib mahalliy aholi bilan qoʻshilib ketgan. V asrda xristian dini tarqalgan. 1921-yilda Angliya—Irlandiya bitimiga muvofiq Irlandiyaning janubiy qismi mustaqil deb eʻlon qilindi va Angliya nazoratidagi dominion huquqini oldi. 1937-yilgi yangi konstitutsiya «Eyre mustaqil davlati» deb eʻlon qilindi. 1949-yil Irlandiya mustaqil Respublika deb eʻlon qilingan boʻlsa ham, mamlakatning shimoliy qismi (Olster)da mustamlakachilar hukmronligi saqlanib qoldi.

## IROQ

*Rasmiy nomi — Iroq Respublikasi (Al-Jumhuriya al-Iroqiya). Poytaxti — Bag'dod. Hududi — 434924 km<sup>2</sup>. Aholisi — 27500028 kishi (2007). Rasmiy tili — arab. Dini — islom (95%), xristianlar (3%). Pul birligi — iroq dinori.*

**Geografik joylashuvi va tabiati.** Iroq Osiyoning janubi g'arbiy qismida joylashgan davlat. Shimolda Turkiya, janubda Saudiya Arabiston va Quvayt, g'arbda — Iordaniya va Suriya, sharqda Eron bilan chegaradosh. Mamlakatning janubiy sohillari Fors qo'ltig'i bilan tutashgan. Mamlakatning shimoliy qismi — Al-Jazra Arman tog'liklari va Turkiya bilan chegaradosh hududlarda joylashgan. Bu hududning eng baland nuqtasi — 2135 m. Dajla va Frot daryolari oralig'ida keng vodiy yastanib yotadi. Frotning g'arbiy tarafidan vodiy Suriya cho'llariga tutashib ketgan.

Iqlimi — kontinental. Mamlakatning markaziy qismida xurmo va terak daraxtlari o'sadi. Iroqning katta qismini chalacho'l va cho'llarga o'tib boruvchi tekisliklar egallagan. Tog'li hududlarda ignabargli butalar bor. Iroq hayvonot dunyosi rang-barangdir: mamlakatning o'rmon va cho'llarida ohu, antilopa, gepard, sher, bo'ri, chiyabo'ri, quyon va boshqa hayvonlarni uchratish mumkin.

**Davlat tuzilishi va siyosiy partiyalari.** Davlat tuzilishiga ko'ra prezidentlik respublikasi. Iroq 18 ta viloyatdan iborat. Davlat va hukumat boshlig'i — prezident. Siyosiy partiyalari: Kurdiston demokratik partiyasi, Iroq kommunistik partiyasi, Arab sotsialistik uyg'onish partiyasi, Kurdiston partiyasi.

**Iqtisodi, transport kommunikatsiyalari.** Iroq agrar-industrial davlat. Iqtisodining asosini neft qazib olish tashkil etadi. Neftni qayta ishlash, sement, to'qimachilik, teri-poyabzal, oziq-ovqat sanoati rivojlangan. Kimyo-farmatsevtika, shisha, elektrotexnika, avtomobil yig'uvchi korxonalar, qishloq xo'jaligi mashinasozligi zavodlari ishlab turibdi. Neft xomashyosi, funduq, quruq mevalar asosiy eksport mahsulotlari

hisoblanadi. Og'ir mashinasozlik va mudofaa sanoati mahsulotlari, transport jihozlari, temir, po'lat, asosiy sanoat mahsulotlari, g'alla, oziq-ovqat mahsulotlari importda muhim o'rin tutadi. 2006-yil YIM miqdori 54400 mln dollarni (aholi jon boshiga — 2100 doll.) tashkil etgan. Asosiy savdo hamkorlari: Iordaniya, Turkiya, Braziliya, Yaponiya, Niderlandiya, Ispaniya, Fransiya.

Asosiy porti: Basra.

**Tarixi.** Qadimgi Iroq hududida m. a. IV ming yillikda Shumer davlati tashkil topgan. M. a. III ming yillikdan I ming yillikgacha bu hududda Akkad, Babil va Ossuriya davlatlari mavjud bo'lgan. M. a. 539—331 yilgacha bu hududlar Ahamoniylar imperiyasi tarkibiga, keyin 200 yil davomida Aleksandr Makedonskiy imperiyasi tarkibida bo'lgan. Undan so'ng yana forslar hukmronligi ostiga qaytgan. VII asrda bu hududlarni arablar bosib olgan. XIII asrda esa mo'g'ul bosqinchilari bu yerlarga bostirib kirdi. XVI asrdan XX asrgacha Iroq Usmoniylar imperiyasining tarkibiy qismi bo'lib keldi. 1916-yili Buyuk Britaniya bu hududlarni istilo qildi. 1932-yili Iroq o'z mustaqilligini qo'lga kiritdi, lekin oradan ko'p o'tmay 1941—1945-yillarda Buyuk Britaniya, Eron, Pokiston va Turkiya jamoaviy xavfsizlik to'g'risidagi «Bag'dod pakti»ni imzolashdi. 1958-yil monarxiya ag'darilib, Iroq «Bag'dod pakti»dan chiqdi. 1963-yil AQSHning qo'llab-quvvatlashi bilan Iroqda harbiy davlat to'ntarishi amalga oshirildi. 1980-yil Iroq va Eron o'rtasida urush boshlanib ketdi. 1988-yil urush to'xtatilib, 1990-yil Eron bilan tinchlik shartnomasi imzolandi. Shu yili Iroq Quvayt hududiga bostirib kirdi. BMT Iroq bilan savdo aloqalariga embargo e'lon qildi. 1991-yil AQSH boshchiligidagi NATO harbiy kuchlari «Sahrodagi bo'ron» deb nomlangan Iroqqa qarshi harbiy operatsiyani boshladi. 1994-yil Iroq Quvaytga nisbatan o'z da'vosidan voz kechdi. 1998-yil qurollanishni nazorat qilish bo'yicha BMT maxsus komissiyasi mamlakat hududidan chiqarib yuborildi. Bu Fors ko'rfazida AQSH harbiy kuchlarining to'planishiga asos bo'ldi. 2003-yilning mart oyida AQSH va Buyuk Britaniya Saddam Husaynni hokimiyatdan ag'darish maqsadida Iroqqa qarshi harbiy operatsiyalarni boshla-



di, natijada S. Husayn hokimiyatdan ag'darilib, deyarli butun Iroq hududi AQSH nazorati ostiga o'tdi. Hozirgi kunda mahalliy boshqaruv organlari shakllantirilmogda.

## ISLANDIYA

*Rasmiy nomi — Islandiya Respublikasi. Poytaxti — Reykyavik. Hududi — 103000 km<sup>2</sup>. Aholisi — 300941 kishi (2007). Davlat tili — island. Dini — lyuteranlar (95%), protestantlar (2%), katoliklar (1%). Pul birligi — island kronasi.*

**Geografik joylashuvi va tabiati.** Islandiya Atlantika okeanining shimoliy qismidagi Islandiya orolida joylashgan. Orol yuzasini vulqonli tog'liklar, ko'psonli muz bilan qoplangan tog'li massivlar egallagan. Orolida 200 dan ortiq vulqonlar qayd etilgan, ularning ko'plari — Gekla, Lake, Askya va boshqalar harakatdagi vulqonlardir. Hidroenergiya resurslari va baliq mamlakatning asosiy tabiiy resurslari hisoblanadi.

**Davlat tuzilishi, siyosiy partiyalari.** Davlat tuzilishiga ko'ra parlamentar respublika. Ma'muriy jihatdan 23 okrugga bo'linadi. 1944-yil 17-iyunda Daniyadan ajralib, mustaqillikka erishgan. (Milliy bayrami — Respublika e'lon qilingan kun.) Ijro etuvchi hokimiyatni prezident (davlat boshlig'i) va premyer-ministr boshqaradi. Qonun chiqaruvchi hokimiyat — ikki palatali (yuqori va quyi) parlament (Alting)dan iborat. Asosiy siyosiy partiyalari: Mustaqillik partiyasi (MP), Progressiv partiya (PP), Islandiya sotsial-demokratik partiyasi (ISDP), Xalq ittifoqi (XI).

**Iqtisodi, transport kommunikatsiyalari.** Mamlakat iqtisodi amaliy jihatdan baliqchilik va baliqni qayta ishlash bilan cheklangan. Asosiy qishloq xo'jalik mahsulotlari kartoshka va sholg'om. Qo'ychilik va sut yetishtiradigan chorvachilik ham rivojlangan. 2006-yil YIM miqdori 9596 mln dollarni (aholi jon boshiga — 31886 dol.) tashkil etgan. Asosiy savdo hamkorlari: YI mamlakatlari, Norvegiya, AQSH, Yaponiya.

Avtomobil yo'llarining umumiy uzunligi — 12343 km. Dengiz portlari: Keblavik, Reykyavik, Seydisfordyur.

**Tarixi.** Islandiya yerlari VIII asrda irland monaxlari tomonidan ochilgan, 865-yilda esa bu hududlarga norveglar ko'chib kelgan. 930-yilda mustamlakachilar orolda respublika barpo etdilar. Taxminan 1000-yilda mamlakatda dastlabki xristian missionerlari paydo bo'ldi. 1262-yilda Islandiyada Norvegiya qirolligi hukmronligi o'rnatildi. 1397-yili Daniya hukmronligi ostiga o'tdi. 1944-yili Daniya-Islandiya uniyasi bekor qilindi va Islandiya mustaqil davlat deb e'lon qilindi.

## ISPANIYA

*Rasmiy nomi – Ispaniya Qirolligi. Poytaxti – Madrid. Hududi – 504,7 ming km<sup>2</sup>. Aholisi – 40448191 kishi (2007). Davlat tili – ispan. Dini – ko'pchiligi katoliklar. Pul birligi – yevro.*

**Geografik joylashuvi va tabiati.** Yevropaning Janubi g'arbida Pireney yarimorolida joylashgan O'rta Yer dengizidagi Balear, Atlantika okeanidagi Kanar orollari, Afrikaning shimoliy qirg'og'idagi Seuta va Melilya shaharlari va unga yondosh Velesde-le Gomera, Alu-Semas, Chafarinos orollari ham Ispaniyaga qarashli. G'arbda Portugaliya (chegara uzunligi — 1214 km), shimolda Fransiya (623 km) va Andorra (65 km), janubda Gibraltar (1,2 km) bilan chegaradosh.

Ispaniya subtropik mintaqada joylashgan. Hududining aksar qismi yassitog'lik, o'rtacha balandlikdagi tizmalar, yassitog'liklar va pasttekisliklardan iborat. Syerra-Nevado tizmasidagi Mulasen tog'i (3478 m) Ispaniyadagi eng baland tog'dir. Mamlakatning asosiy daryolari: Tixo, Ebro, Gvadalkvivir, Dyeero, Gvadiana va boshqalar. Ispaniyada uran, mis, simob, qo'rg'oshin, temir, volfram, qalay, oltin, kumush, margimush, marganes konlari bor. Hududning 31% i ekin ekiladigan yerlar. 31% o'rmonlar va butazorlar, 21% o'tloq va yaylovlardan iborat.

**Davlat tuzilishi va siyosiy partiyalari.** Davlat tuzilishi — konstitutsion monarxiya. Ma'muriy jihatdan 17 ta muxtor hududga, ular o'z navbatida ellikta viloyat (provinsiya)ga bo'linadi. Milliy bayrami —

12-oktabr — Ispan millati kuni. 1492-yildan boshlab mustaqil davlat. Davlat boshlig'i — qirol (1975-yil 22-noyabrdan Xuan Karlos I), uning huquqi konstitutsiya bilan chegaralangan. Qonun chiqaruvchi hokimiyatni General Kortesarlar (parlament) amalga oshiradi. Kortesarlar ikki palata — Deputatlar Kongressi va Senatdan iborat. Ijroiya hokimiyatni hukumat amalga oshiradi. Hukumat raisini qirol parlamentning ikkala palatasi raislari bilan maslahatlashib tayinlaydi. Asosiy partiyalari: Ispaniya sotsialistik ishchi partiyasi (ISIP), Xalq partiyasi (XP), Ispaniya kommunistik partiyasi (IKP), Basklarning millatparvar partiyasi (BMP), Kataloniya demokratik konvergentsiyasi (KDK), Valensiya Ittifoqi (VI).

### *Iqtisodi, transport kommunikatsiyalari.*

Ispaniya industrial-agrar mamlakat. YMMda sanoatning ulushi 23%, qishloq xo'jaligining ulushi 35%, xizmat ko'rsatish sohasining ulushi 60% dan ortadi. 2006-yil YIM miqdori 1046249 mln dollarni (aholi jon boshiga — 25886 doll.) tashkil etgan. Sanoatida og'ir sanoat yetakchi o'rinda turadi. Mashinasozlik, avtomobilsozlik, kemasozlik, elektrotexnika, dastgohsozlik, kimyo sanoati rivojlangan. Qishloq xo'jaligining asosiy tarmog'i dehqonchilik.

Temiryo'llarining umumiy uzunligi — 14378 km. Avtomobil yo'llari uzunligi — 324 ming km. Portlari: Kartaxena, Alxesiras, Barselona, Bilbao, Santa-Krus-de-Tenerife, Vigo, Kadis, La-Korunya, Malaga, Santaner, Tarragona, Valensiya, Xixon, Alekante, Almeriya.

Asosiy savdo hamkorlari: YI mamlakatlari, AQSH.

**Tarixi.** M. a. VII asrdan Ispaniyaning janubiy va sharqiy sohilbo'ylari finikiyaliklar va yunonlar tomonidan o'zlashtirila boshlangan. M. a. 7000—5000-yillarda O'rtayer dengizi sohilida iberlar madaniyati paydo bo'ldi. M. a. III asr oxirlarida Ispaniya hududining ko'p qismi Karfagen qo'l ostiga o'tdi. M. a. II asr boshlariga kelib rimliklar karfagenliklarni siqib chiqardilar. Mavrlar 711—718-yillarda Pireney yarimorollarining ko'p qismini bosib oldilar va bu qismlar Damashq xalifaligi qo'l ostiga o'tdi. 756-yil mustaqil davlat — Qurdoba amirligi, 929-yilda esa Qurdoba xalifaligi tuzil-

di. X—XI asrlarda musulmonlar Ispaniyasi bir necha mustaqil davlatlarga bo'linib ketdi. 1212-yilda mavrlarga qarshi hujum (Rekonkista) natijasida Aragoniya, Kastilya va boshqa ispan qirolliklari vujudga keldi. Kastilya va Aragoniya bitta qirollikka birlashib (1469-yil), mamlakatni 1492-yilda mavrlardan ozod qildi. Ispaniya qirolligi XVI asrda gullab-yashnadi, Janubiy va Markaziy Amerikada mustamlakalarini kengaytirdi, 1580-yilda Portugaliyani zabt etdi, lekin XVII asrda ko'p hududlaridan ajraldi. 1640-yil Portugaliya, 1648-yil Niderlandiya, 1649-yilda esa Artua va Rusilon provinsiyalarini Fransiyaga boy berdi. XIX asr boshlarida mamlakat Napoleon qo'shinlaridan ozod qilindi. O'sha paytda ispanlar Janubiy va Markaziy Amerikadagi deyarli barcha mustamlakalaridan ajraldi. XIX asrda Ispaniyada absolyut hokimiyat tarafdorlari va liberallar o'rtasida kurash bo'lib o'tdi. 1923-yilda davlat to'ntarishi natijasida mamlakatda diktatura o'rnatildi. 1931-yilda Ispaniya Respublika deb e'lon qilindi. Qirol Alfons XIII taxtdan voz kechmay mamlakatni tark etdi. 1936-yilda Xalq fronti hokimiyat tepasiga kelgach, fuqarolar urushi avj oldi va 1939-yil mamlakatda Franko fashistik rejimining o'rnatilishi bilan tugallandi. 1975-yilda Franko vafotidan keyin Ispaniyada Konstitutsion monarxiya o'rnatildi. 1976-yilda mamlakatda parlament tizimi joriy etildi, 1978-yilda yangi Konstitutsiya qabul qilindi. 1986-yildan Ispaniya YI a'zosi. 2004-yil mart oyida hokimiyat Sotsialistik partiya qo'liga o'tganidan so'ng ispan qo'shinlari Iroqdan olib chiqildi.

## ISROIL

*Rasmiy nomi — Isroil davlati. Poytaxti — Tel-Aviv. Hududi — 20770 km<sup>2</sup>. Aholisi — 7172474 kishi (2007). Tili — ivrit, shuningdek, arablar yashaydigan yerlarda arab tili. Dini — iudaizm (82%), islom (14%), xristian (2%). Pul birligi — shekel.*

**Geografik joylashuvi va tabiati.** Isroil davlati

Janubi g'arbiy Osiyoda joylashgan. Sharqda Iordaniya, shimolda Livan, shimoli sharqda Suriya, janubi g'arbda Misr, sharqda va janubi g'arbda Falastin bilan chegaradosh. Bu davlatni bir necha qismga shartli ravishda ajratish mumkin. Galiley yassitog'ligi, Meron tog'i (1208 m), Esdraelon vodiysi, Samariya va Yahudiy tepaliklari (yassitog'), Negev cho'li va qirg'oq tekisliklari. Mamlakatning asosiy daryosi — Jordan. Foydali qazilmalaridan mis, fosfor, oltingugurt, marganes, kam miqdordagi neft va gaz zaxirasi ham bor. Ekin ekiladigan yer mamlakat maydonining 17%, yaylov maydoni esa 40% ni tashkil etadi.

***Davlat tuzilishi va siyosiy partiyalari.***

Davlat tuzilishi — parlamentar respublika. Mamlakat 6 ta okrugdan iborat: Markaziy Xayfa, Quddus, Shimoliy, Janubiy, Tel-Aviv. Ijroiya hokimiyat prezidenti (davlat boshlig'i) va premyer-ministr rahbarligidagi hukumatga qarashlidir. Qonun chiqaruvchi oliy organ — Knesset (bir palatali). Asosiy siyosiy partiyalari — Likud, Avoda (mehnat).

***Iqtisodi, transport kommunikatsiyalari.***

Iqtisodni boshqarishda davlat asosiy rol o'ynaydi. Tabiiy resurslarining chegaralanganligiga qaramasdan, keyingi o'n yilliklarda Isroilda qishloq xo'jaligi va sanoat jadal sur'atlar bilan rivojlanmoqda. 2006-yil YIM miqdori 163703 mln dollarni (aholi jon boshiga — 22883 doll.) tashkil etgan. Sanoat tarmoqlaridan olmoslarni qirralash, to'qimachilik, oziq-ovqat, kimyo, harbiy va transport jihozlarini ishlab chiqarish, yuqori texnologiyali elektronika kabilar mavjud. Qishloq xo'jaligi mahsulotlari yetishtirish yalpi ichki mahsulotning 3% ini tashkil etadi. Sitrus mevalar, sabzavotlar, paxta, chorva mahsulotlari yetishtiriladi. Eksportning asosiy qismini olmos tashkil etadi. Shuningdek, qishloq xo'jalik mahsulotlari, yuqori texnologiyali jihozlar eksport qilinadi.

Temiryo'llarining umumiy uzunligi — 600 km. Avtomobil yo'llari — 4750 km. Asosiy portlari — Eylat, Xayfa. Asosiy savdo hamkorlari: AQSH, YI mamlakatlari, Yaponiya.

***Tarixi.*** 1948-yil 18-mayda yahudiylar tomonidan hozirgi Isroil davlati tashkil etildi. Ushbu davlat jahon-

ning ko'pgina davlatlari tomonidan darhol tan olindi, lekin bu davlatning tashkil topishi qo'shni davlatlarda norozilikni keltirib chiqardi. Oqibatda 1947—1948-yillardagi birinchi arab—isroil ziddiyati yuzaga keldi. Urushda Isroil yangi hududlarni qo'lga kiritib, g'olib chiqdi. 1956-yilda Suvaysh kanalining davlat tasarrufiga o'tkazilishi va Misrning arab davlatlari bilan shartnoma tuzishi natijasida Isroil Misrga qarshi urush boshladi va bu urush Isroil qo'shinlarining Sinay yarimorolidan chiqib ketishi bilan yakunlandi. 1967-yilning iyunida Isroil Misr, Suriya va Iordaniyaga qarshi urush boshlab, Sinay yarimoroli, G'azo sektori, Iordan daryosining g'arbiy qirg'og'idagi yerlar, Quddusning arablar yashaydigan qismi, Jo'lan tepaliklarini qo'lga kiritdi. 1973-yil oktabrda Misr va Suriya Isroilga qarshi harbiy harakatlari olib bordi. Isroil Sinay yarimorolidan ajraldi. 1979-yil martda Kemp-Devid bitimi (1978-yil sentabr, AQSH) asosida Misr va Isroil o'rtasida tinchlik shartnomasi tuzildi. 1982-yilning iyunida Isroil Livanga bostirib kirdi va Bayrutni bombardimon qildi. 1982-yil Rabin boshchiligidagi leyboristlar hukumat tepasiga kelgach tinchlikni yo'lga qo'yish jarayoni boshlandi. 1993-yilda Isroil hukumati va Falastin Ozodlik tashkiloti o'rtasida Falastin avtonomiyasini nazarda tutgan tinchlik shartnomasi imzolandi.

## ITALIYA

*Rasmiy nomi — Italiya Respublikasi. Poytaxti — Rim. Hududi — 3011230 km<sup>2</sup>. Aholisi — 57985395 kishi (2007). Tili — italyan. Dini — aholisining asosiy qismi protestantlar, qolganlari musulmonlar, yahudiylar. Pul birligi — yevro.*

**Geografik joylashuvi va tabiati.** Janubiy Yevropada, Apennin yarimorolida joylashgan. Shimolda — Avstriya (chegara uzunligi — 430 km) va Shveysariya (740 km), shimoli g'arbda — Fransiya (488 km), sharqda — Sloveniya (199 km) bilan chegaradosh. Sardiniya, Sitsiliya, Elba orollari va bir qancha kichik orollar ham Italiyaga qarashli. Italiya

hududi janubda va g'arbda O'rta Yer dengizi, sharqda Adriatika dengizi bilan tutash. Chegarasining umumiy uzunligi 1899,2 km. Hududining 80% i tog' va qirlardan iborat. Italiyaning shimolida Alp tog'lari joylashgan. Alp va Apennin tog'lari oralig'ida Po daryosi vodiysi bilan Lombard tekisligi joylashgan. Harakatdagi vulqonlar ko'p. Ular orasida Vezuviy (1277 m) va Etna (3323 m) Sitsiliya orolida joylashgan. Italiyaning asosiy daryolari — Po va Tibr. Mamlakatda ko'llar ko'p, asosiy-lari Garda, Lago-Madjore, Komo. Asosiy foydali qazilmalari: simob, marmar, ishqor, ko'mir, oltingugurt, kam miqdorda tabiiy gaz va neft. Haydaladigan yerlar mamlakat hududining 32%, o'rmon va butazorlar — 22%, yaylov va o'tloqlar 17% ni tashkil etadi.

**Davlat tuzilishi va siyosiy partiyalari.** Davlat tuzilishi — parlamentar respublika. Ma'muriy jihatdan 20 ta viloyatga bo'linadi. Italiya 1961-yil 17-martda mustaqil davlatga aylangan. Milliy bayram — iyunning birinchi yakshanbasi — Respublikaning e'lon qilinishi. Ijroiya hokimiyat prezidenti (davlat boshlig'i) va premyer-ministr rahbarligida hukumatga tegishli. Qonun chiqaruvchi hokimiyat — ikki palatali parlament — Senat va Deputatlar palatasidan iborat. Asosiy siyosiy partiyalari: Italiya xalq partiyasi (IXP), Italiya sotsialistik partiyasi (ISP), So'l kuchlar demokratik partiyasi (SKDP).

**Iqtisodi va transport kommunikatsiyalari.** Hozirgi kunda Italiya Yevropaning yetakchi mamlakatlardan biri hisoblanadi. Sanoatning asosiy tarmoqlari: avtomobilsozlik (dunyoda 5-o'rinda), kimyo sanoati, metallurgiya, po'lat eritish, oziq-ovqat sanoati, to'qimachilik, kiyim-kechak va poyabzal ishlab chiqarish. Qishloq xo'jaligi go'sht va sut mahsulotlaridan tashqari, mamlakatning qishloq xo'jaligi mahsulotlariga bo'lgan ehtiyojini to'liq qondiradi. Italiyada xizmat ko'rsatish va turizm rivojlangan. 2006-yil YIM miqdori 1621372 mln dollarni (aholi jon boshiga — 27961 doll.) tashkil etgan. Asosiy savdo hamkorlari: YI mamlakatlari, AQSH, OPEK mamlakatlari.

Temiryo'llarning umumiy uzunligi — 20011 km, avtomobil yo'llari — 294410 km, ichki suv yo'llari —

2400 km. Dengiz portlari: Ankona, Venetsiya, Genuya, Sardiniya, Spetsiya, Livorno, Neapol, Palermo (Sitsiliya), Taranto, Triyest.

**Tarixi.** Italiya tarixi m. a. X asrda bu yerda yashagan turli qabilalar (ligurlar, etrusklar, lotinlar va boshqalar) greklar va finikiyaliklar madaniyatiga katta ta'sir ko'rsatgan etrusklar madaniyati bilan boshlanadi. Lotinlar tomonidan miloddan avvalgi VIII asrda asos solingan Rimni m. a. VI asrda etrusklar zabt etdilar va ko'plab buyuk me'moriy yodgorliklarini barpo etdilar. Etrusklar Rimdan quvib chiqarilgandan keyin respublika o'rnatildi, asosiy siyosiy kurash esa Rim aristokratiyasi (patritsiylar) va plebeylar o'rtasida kechdi. O'sha paytda Rim o'zining tashqi dushmanlari bilan ham kurash olib borib, m. a. III asrda butun Apennin yarimorolini zabt etdi. M. a. 264—118-yillarda Rim Sitsiliya, Gretsiya, Makedoniyani, Osiyo va Afrikadagi bir qancha hududlarni o'z provinsiylariga aylantirib, o'z mustamlakalarini kengaytirdi. Fuqarolar urushi davridan keyin Oktavian Avgust Respublikani imperiyaga aylantirdi. II asrdan keyin buyuk imperiya inqirozga yuz tuta boshladi. IV asrda xristianlik dini tarqaldi. IV asr oxirlarida qadimgi Rim vestgotlar hujumlariga qarshi turolmadi, 410-yilda shahar talon-taroj qilindi. 476-yilda esa oxirgi Rim imperatori Romul taxtdan ag'darildi. VI—VIII asrlarda mamlakat shimoli langobardlar tomonidan ishg'ol etilgan bo'lsa, janub qismi Vizantiya imperiyasi tarkibiga kiritildi. IX—X asrlarda Italiyaning shimoliy qismi german imperatorlari hukmronligiga o'tdi. Lekin XV asrda Italiya shaharlari rivojlanib, Yevropaning yetakchi moliyaviy va savdo markazlariga aylandi. XVI—XVIII asrlarda qudratli Yevropa davlatlari Italiyadagi tarqoqlikdan foydalanib, mamlakat ichki ishlariga faol ravishda aralashar edilar. Napoleon urushlari davrida Italiya Fransiya tomonidan okkupatsiya qilindi. Italiya ozodlikka erishgandan keyin mamlakatda tarqoqlik davom etdi va Avstriya ta'siriga tushib qoldi.

1851-yilda Sardiniya qiroli Viktor Emmanuil II tomonidan Italiyani bitta davlatga birlashtirish uchun boshlangan harakat 1870-yilda yagona Italiya davlatining tashkil topishi bilan yakunlandi. (Rim — 1870-yil



2-oktabr mamlakat poytaxti deb eʼlon qilindi.) I jahon urushi davrida Italiya Antanta tomonida boʻldi, lekin Avstro—Vengriya imperiyasi tarkibidagi yerlarni qaytarib olishga muvaffaq boʻla olmadi. Millatchilik kayfiyatining oʻsishi, iqtisodiy inqiroz va ishsizlik natijasida hokimiyat tepasiga qirol Viktor Emmanuil III qoʻllab-quvvatlagan Mussolini boshchiligidagi fashistik partiya keldi. 1940-yil 10-iyunda Italiya Germaniya tomonida II jahon urushiga kirdi. Italiyada fashistik rejim 1945-yilgacha, diktator Mussolinining partizanlar tomonidan qatl etilishigacha (28-aprel) davom etdi. 1946-yil 2-iyunda Italiya respublika deb eʼlon qilindi. Italiyaning urushdan keyingi tarixi hukumatning tez-tez almashib turishi (2006-yil 17-mayda Silvio Berlusconi oʻrniga saylangan Romano Prodi 60-hukumatni tashkil etgan), iqtisodiy rivojlanishi, Yevropa tashkilotlariga integratsiyalashuvi, transmilliy korporatsiyalar rolining oshishi bilan ifodalanadi.

## KABO-VERDE

*Rasmiy nomi — Kabo-Verde Respublikasi. Poytaxti — Praya. Hududi — 4033 km<sup>2</sup>. Aholisi — 433462 kishi (2007). Tili — portugal. Dini — katoliklar (98%). Pul birligi — Kabo-Verde esku-dosi.*

**Geografik joylashuvi va tabiati.** Afrikaning gʻarbiy qirgʻogʻida joylashgan davlat. Santyagu, Fogu, Mayu, Santu-Antan, Boavishta va boshqa orollar asosan vulqonlardan hosil boʻlgan. Qirgʻoqlari tik va qoyalı, qulay tabiiy gavanlari kam. Relyefi asosan togʻli. Eng baland choʻqqisi — Fogu vulqoni 2829 m.

Iqlimi — tropik, passatli. Daryolari kam, bot-bot qurgʻoqchilik boʻlib turadi. Oʻsimliklar choʻl va chala-choʻlga xos. Hayvonot turlari oz. Dengiz qushlari koʻp.

**Davlat tuzilishi va siyosiy partiyalari.** Kabo-Verdening amaldagi konstitutsiyasi 1992-yilda qabul qilingan. Davlat boshligʻi — prezident. Ijroiya hokimiyatni prezident va Bosh vazir boshchiligidagi hukumat boshqaradi. Siyosiy partiyalari: Demokratiya uchun

harakat, Kabo-Verde mustaqilligi Afrika partiyasi, Sotsial-demokratik partiyasi.

**Iqtisodi, transport kommunikatsiyalari.** Iqtisodning rivojlanmaganligi mamlakatda tabiiy resurslarning kamligi bilan bog'liq. Savdo dengiz va havo transportiga xizmat ko'rsatish YMMning 67% ini tashkil etadi. Iqtisodning asosiy tarmog'i baliqchilik. 2006-yil YIM miqdori 2751 mln dollarni (aholi jon boshiga — 6346 doll.) tashkil etgan. Asosiy savdo hamkorlari: Portugaliya, Ispaniya, AQSH, Fransiya.

Temiryo'llari yo'q, avtomobil yo'llarining umumiy uzunligi — 2250 km. Asosiy porti — Mindelu.

**Tarixi.** 1456-yilda portugallar tomonidan kashf etilgan Yashil burun orollari 1494-yili Portugaliya mustamlakasiga aylangan. 1585-yilda uni Ispaniya egalab oldi, 1640-yilda esa yana Portugaliya qo'l ostiga o'tdi. 1951-yilda Portugaliyaning dengiz ortidagi viloyati maqomini olgan. Kabo-Verde 1975-yili mustaqillikka erishgan. Milliy bayrami — 5-iyul — Mustaqillik kuni.

## KAYMAN OROLLARI

*Rasmiy nomi — Kayman Orollari. Poytaxti — Jorjtaun. Hududi — 262 km<sup>2</sup>. Aholisi — 44986 kishi (2007). Davlat tili — ingliz. Dini — protestantlik. Pul birligi — kayman orollari dollari.*

**Geografik joylashuvi va tabiati.** Katta Kayman, Kichik Kayman, Kayman-Brok orollari Yamayka orolining shimoli g'arbida Karib dengizida, Markaziy va Janubiy Amerika o'rtasida joylashgan.

Iqlimi — tropik passatli. Qimmatbaho daraxtlardan iborat o'rmonzorlar mavjud. Faunasi asosan dengiz hayvonlaridan iborat (akula, toshbaqa, omar va h k).

**Davlat tuzilishi, siyosiy partiyalari.** Kayman orollari Buyuk Britaniya mulkidir. Mamlakat boshqaruvini qirolicha nomidan gubernator amalga oshiradi. Hudud 8 ta tumanga bo'linadi. Saylovlar davomida 2 norasmiy tashkilot — «G'urur» va «Birlik» harakat qiladi.

**Iqtisodi, transport kommunikatsiyalari.** Iqti-

sodiyot asosini turizm tashkil etadi. Moliya va bank sektorlaridan orollar ma'muriyati 40% daromad oladi. Qurilish materiallari ishlab chiqarish, qishloq xo'jalik mahsulotlarini qayta ishlash kabi korxonalar ham mavjud. Baliqchilik rivojlangan. 2006-yil YIM miqdori 1391 mln dollarni (aholi jon boshiga — 30920 doll.) tashkil etgan. Asosiy savdo hamkorlari: AQSH, Buyuk Britaniya, Kanada, Germaniya, Kosta-Rika. Yirik porti — Jorjtaun. Ikkita xalqaro aeroport — Ouen-Roberte va Jerard-Smit mavjud.

**Tarixi.** 1503-yili X. Kolumb tomonidan kashf qilingan. 1670-yilda Ispaniya orollarni Angliyaga topshirdi. Kayman orollariga Yamaykadan aholi ko'chib kela boshlagan. 1863—1962-yillarda orollar rasman Yamayka tarkibida bo'lgan. Amaldagi konstitutsiya 1972-yilda qabul qilingan.

## KAMBODJA

*Rasmiy nomi — Kambodja Qirolligi. Poytaxti — Pnompen. Hududi — 181035 km<sup>2</sup>. Aholisi — 14132821 kishi (2007). Davlat tili — kxmer. Dini — txerevada (buddaviylik). Pul birligi — riel.*

**Geografik joylashuvi va tabiati.** Janubiy-Sharqiy Osiyodagi davlat. Sharq va janubi sharqda Vyetnam (chegara uzunligi — 1228 km), g'arb va shimoli g'arbda Tailand (803 km), shimoli sharqda Laos (541 km) bilan chegaradosh. Janubi g'arbda Tailand (Siam) qo'ltig'iga tutash. Chegarasining umumiy uzunligi — 2572 km. Mamlakat hududining katta qismi tekislikdan iborat. Mekong daryosining quyi qismida pasttekisliklar bor. Janubi g'arbda Kravan (eng yuqori nuqtasi — 1813 m) tog'lari joylashgan. Asosiy daryosi — Mekong. Eng katta ko'li — Tonlesap. Foydali qazilmalari: qimmatbaho toshlar, marganes, fosforit, temir rudasi (kam miqdorda). Ekin ekiladigan yerlar mamlakat hududining 16% i, o'rmon va butazorlar 76% ini tashkil etadi.

**Davlat tuzilishi, siyosiy partiyalari.** Davlat

tuzilishi — konstitutsion monarxiya. Mamlakat ma'muriy jihatdan 19 ta provinsiya (viloyat) va 2 ta avtonom shaharga bo'lingan. 1949-yil 9-noyabrda mustaqillikka erishgan. Milliy bayram — Mustaqillik kuni, yana bir milliy bayram — 7-yanvar Ozodlik kuni (1979-yil). Davlat boshlig'i — qirol, ijroiya hokimiyatni premyer-ministr amalga oshiradi. Qonun chiqaruvchi oliy organ — bir parlatali parlament — Milliy Kengash. Asosiy siyosiy partiyalari: Kambodja suvereniteti, mustaqilligi, betarafligi, tinchligi va hamkorligi uchun yagona milliy front (KSMBTHUYMF), Kambodja xalq partiyasi (KXP), Buddistlar liberal-demokratik partiyasi (BLDP).

**Iqtisodi, transport kommunikatsiyalari.** Mamlakatda ijtimoiy-siyosiy hayotidagi o'zgarishlar, harbiy va siyosiy to'ntarishlar natijasida deyarli izdan chiqqan iqtisodiyot sekin-asta tiklanib bormoqda. 2006-yil YIM miqdori 31873 mln dollarni (aholi jon boshiga — 2255 doll.) tashkil etgan. Mamlakat iqtisodiyotining asosiy tarmog'i — qishloq xo'jaligi. Ishlab chiqarish qishloq xo'jalik mahsulotlarini hamda baliq va yog'ochni qayta ishlash bilan cheklangan. Asosan kauchuk, sholi, yog'och eksport qilinadi. Asosiy savdo hamkorlari: Vyetnam, MDH mamlakatlari, Sharqiy Yevropa mamlakatlari, Yaponiya, Hindiston.

Temiryo'llarining umumiy uzunligi — 655 km, avtomobil yo'llari — 34100 km. Dengiz portlari: Kampot, Pnompen.

**Tarixi.** Hozirgi Kambodja hududida ilk davlatlar milodning I asrida paydo bo'lgan. Ulardan eng kattasi Funan qirolligi bo'lib, u VI asrda Tonlesap qirolligiga qaram bo'lib qoldi. 802-yil Tonlesapning shimolida butun mamlakat va qo'shni mamlakatlarni o'ziga bo'ysundirgan Kobbujadesh qirolligi tashkil topdi. XV asr boshlarida mamlakat Siam va Vyetnam qo'shinlarining bosqiniga duchor bo'ldi. Fransiya kambodjaliklarning Siam va Vyetnamga qarshi kurashida yordam berdi va 1863-yil Kambodjani o'z protektorati deb e'lon qildi. 1940—1945-yillarda yaponlar bosqini ostida bo'lgan Kamboja 1949-yilda o'z-o'zini boshqarish huquqiga, 1953-yilda esa to'liq mustaqil davlatga aylandi. Mustaqillikdan keyin: 1953—1970-yillarda

Kambodja Qirolligi; 1970—1975-yillarda Lon Nol rejimi oʻrnatilib Kxmer Respublikasi; 1975—1979-yillari Pol Pot boshchiligidagi qizil kxmerlar hokimiyat tepasiga kelib, mamlakat Kampuchiya Demokratik Respublikasi deb ataldi. Pol Pot rejimi davrida oʻz xalqiga nisbatan oʻtkazilgan genotsid siyosati natijasida 2 milliondan ortiq kambodjalik oʻldirildi. 1979—1989-yillarda mamlakat Kampuchiya Xalq Respublikasi deb atalib, Vyetnamga ittifoqdosh rejim oʻrnatildi. 1989—1993-yillarda BMT nazorati ostidagi Kambodja Davlati, 1993-yildan esa Kambodja Qirolligi deb atalib, shahzoda Norodom Sianuk hokimiyatga keldi. 2004-yil oktabrda Norodom Sianuk taxtdan voz kechib oʻrniga yangi qirol — Norodom Siamoni keldi. Biroq amalda hokimiyat premyer-ministr Xun Sen qoʻlida boʻlib, mamlakatning gʻarbiy viloyatlari Pol Potning sobiq safdoshi Yyeng Sari nazorati ostida qolmoqda.

## KAMERUN

*Rasmiy nomi — Kamerun Respublikasi. Poytaxti — Yaunde. Hududi — 475440 km<sup>2</sup>. Aholisi — 18064587 kishi (2007). Tili — ingliz va fransuz. Dini — xristianlik (53%), majusiylik (25%), islom (22%). Pul birligi — afrika franki.*

**Geografik joylashuvi va tabiati.** Gʻarbiy Afrikaning janubida joylashgan davlat. Gʻarbda Nigeriya (chegara uzunligi — 1690 km), sharqda Markaziy Afrika Respublikasi (797 km) va Chad (1094 km), janubda Kongo (523 km), Ekvatorial Gvineya (189 km), Gabon (298 km) bilan chegaradosh. Gʻarbida Biafra koʻrfazi joylashgan, shimolda Chad koʻliga tor chiqish yoʻliga ega. Qirgʻoq boʻylab Kamerun vulqoni qad koʻtargan tekislik joylashgan. Mamlakat markazida shimolga qarab pasayib borgan Adamova togʻligi joylashgan. Kamerunning asosiy daryolari — Sanaga, Benuye. Asosiy tabiiy resurslari: neft, temir rudasi, boksit, yogʻoch, gidroresurslar.

**Davlat tuzilishi, siyosiy partiyalari.** Davlat

tuzilishi — prezident respublikasi. Ma'muriy jihatdan 10 ta provinsiyaga bo'linadi. 1960-yil 1-yanvarda mustaqillikka erishgan. Qonunchilik fransuz umumiy fuqarolik huquqiga asoslangan. Milliy bayrami — 20-may Mustaqillik bayrami (1972-yil 20-mayda Kamerun Respublikasi va Sharqiy Kamerun bir davlatga birlashdi). Davlat boshlig'i — prezident. Qonun chiqaruvchi oliy organ — bir palatali parlament — Milliy Majlis. 70 dan ortiq siyosiy partiyalaridan asosiylari — Kamerun xalqi demokratik birligi (KXDB), Demokratiya va rivojlanish uchun milliy ittifoq (DRUMI), Kamerun xalqlari ittifoqi (KXI), Sotsial demokratik front (SDF), Kamerun demokratik ittifoqi (KDI).

#### *Iqtisodi va transport kommunikatsiyalari.*

Kamerun neft zaxiralariga boyligi sababli ekvatorial Afrikada aholi jon boshiga tushadigan daromadning yuqoriligi bilan ajralib turadi. 2006-yil YIM miqdori 35116 mln dollarni (aholi jon boshiga — 1947 doll.) tashkil etgan. Neftni qayta ishlash sanoatidan tashqari yog'ochga ishlov berish, oziq-ovqat, yengil va to'qimachilik sanoatlari ham rivojlangan. Qishloq xo'jaligida mehnatga yaroqli aholining ko'p qismi band bo'lib, mamlakatning qishloq xo'jaligi mahsulotlariga bo'lgan ehtiyojlarini deyarli to'liq ta'minlaydi. Asosiy savdo hamkorlari: Fransiya va AQSH.

Temiryo'llarining umumiy uzunligi — 1003 km, avtomobil yo'llari — 65000 km. Asosiy porti — Duala.

**Tarixi.** Kamerun portugallar tomonidan XV asr oxirlarida kashf etilgan. XIX asr oxirlarida Germaniya Kamerunni o'zining protektorati deb e'lon qildi. 1916-yilda mamlakat ittifoqchilar tomonidan egallab olingandan keyin mamlakat hududi Fransiya va Buyuk Britaniya tomonidan bo'lib olindi, 1945-yildan boshlab BMT vasiyligida Fransiya va Buyuk Britaniya tomonidan boshqarila boshlandi. Fransiya Kamerunni 1958-yil o'z-o'zini boshqarish huquqini, 1960-yilda Sharqiy Kamerun Fransiyadan mustaqillikni qo'lga kiritdi. Britaniya Kamerunni 1961-yilda referendum natijalariga ko'ra ikki qismga: shimoliy qismi Nigeriyaga, janubiy qismi Sharqiy Kamerunga qo'shildi, natijada Kamerun

Federativ Respublikasi tashkil topdi. 1972-yildan boshlab — Birlashgan Kamerun Respublikasi, 1984-yildan boshlab — Kamerun Respublikasi deb yuritila boshlandi.

## KANADA

*Rasmiy nomi — Kanada. Poytaxti — Ottava. Hududi — 9970610 km<sup>2</sup>. Aholisi — 33004202 kishi (2007). Davlat tili — ingliz va fransuz. Dini — katoliklar (46%), protestantlar (25%), shuningdek, provoslavlar, musulmonlar, induistlar, buddistlar. Pul birligi — kanada dollari.*

**Geografik joylashuvi va tabiati.** Shimoliy Amerikadagi davlat. Janubda va shimoli-g'arbda AQSH bilan chegaradosh. Sharqda Atlantika okeani, g'arbda Tinch okean, shimolda va sharqi shimolda Shimoliy Muz okeani bilan tutash. Chegarasining umumiy uzunligi — 8893 km. Hududning kattaligi bo'yicha dunyoda ikkinchi (Rossiyadan keyingi) o'rinda turadi. Mamlakat hududini shartli ravishda to'rt qismga ajratish mumkin: mamlakat hududining deyarli yarmini egallagan, mamlakatning sharqiy qismida joylashgan, yassi- tog'liklar va tekisliklardan iborat Kanada qalqoni; g'arbda joylashgan Kanada Kordilyerlari; mamlakatni janubi bo'ylab Muqaddas Lavrentiya daryosigacha cho'zilgan tekisliklar; shu daryo vodiysi ortida va mamlakatning sharqida qad ko'targan Appalachi tog' tizmasi. Kanada — ko'llar o'lkasi. Ulardan eng kattalari: Yuqori — dunyodagi eng katta suvi chuchuk ko'l, Katta Ayiq ko'li — dunyoda eng katta 10 ta ko'lning biri, Katta Asir (Bolshoye Nevolnichye) ko'li, Vinnipeg, Guron, Eri, Ontario. Asosiy daryolari: Muqaddas Lavrentiy, Saskachevan, Yukon, Freyzer. Mamlakat yerosti boyliklari quyidagi foydali qazilmalar: nikel, qalay, mis, oltin, kumush, qo'rg'oshin, molibden, ko'mir, neft va tabiiy gaz. Haydalagidan yerlar mamlakat hududining 5% i, o'rmon va butazorlar 35% ni tashkil etadi, shimolda doimiy muzliklar katta qismni egallagan.

**Davlat tuzilishi, siyosiy partiyalari.** Davlat tuzilishi — parlamentar federatsiya, uning tarkibiga

10 ta provinsiya (Alberta, Britan Kolumbiyasi, Kvebek, Manitoba, Yangi Shotlandiya, Nyu-Bransuik, Nyufaundlend, Ontario, Saskachevan, Yukon) va 2 ta hudud (Shimoli-g'arbiy hududlar, Labrador) kiradi. 1867-yil 10-iyulda mustaqillikni qo'lga kiritgan (Buyuk Britaniyadan). 1982-yilgacha Buyuk Britaniya konstitutsiyasi amalda bo'lgan. Hozirgi kunda parlamenti asosiy qonunga o'zgartirishlar kiritish huquqiga ega. Qonunchilik umumiy ingliz huquqiga asoslangan. Kvebek provinsiyasida qonunchilik fransuz qonunchiligiga asoslangan. Milliy bayram 1-iyul — Kanada kuni. Ijro etuvchi hokimiyat premyer-ministr boshchiligidagi hukumatga tegishli. Qonun chiqaruvchi hokimiyat 2 palatali parlament — Senat va Jamoa palatasidan iborat. Asosiy siyosiy partiyalari: Taraqqiyparvar konservativ partiya (TKP), Liberal partiya (LP), Yangi demokratik partiya (YDP).

**Iqtisodi, transport kommunikatsiyalari.** Kanadaning iqtisodi yuqori rivojlangan. Tabiiy va ishchi resurslariga boy, zamonaviy ishlab chiqarish sanoatiga egaligi jihatdan dunyoda birinchi o'nlikda turadi. Sanoatning asosiy tarmoqlari: neft, gaz, selluloza-qog'oz, yog'ochni qayta ishlash, rangli metallurgiya, avtomobilsozlik. Kanada g'alla yetishtirish va eksport qilish bo'yicha yetakchi o'rinda. Baliq va baliq mahsulotlari eksport qilish uning tashqi savdosida muhim o'rin tutadi. 2006-yil YIM miqdori 993079 mln dollarni (aholi jon boshiga — 30089 doll.) tashkil etgan. Asosiy savdo hamkorlari: AQSH, Yaponiya, Buyuk Britaniya, Germaniya.

Temiryo'llarining umumiy uzunligi — 97389 km, avtomobil yo'llari — 884272 km, ichki suv yo'llari — 3000 km. Asosiy portlari: Galifaks, Kvebek, Sent-Djons, Vankuver dengizi portlari, Tander-Bey va Toronto — ko'l portlari.

**Tarixi.** Kanada qirg'oqlariga yevropaliklardan birinchilardan bo'lib IX—X asrlarda vikinglar borgan. Lekin Kanadaning ochilishi venetsiyalik dengizchi Jovanni Kabotta nomi bilan bog'liq. Kabotto ingliz xizmatida bo'lib, 1497-yilda Nyufaundlend oroliga kelib tushadi. Lekin yangi yerlarni faol o'zlashtirishni fran-



suzlar boshlab beradi. Jak Karte 1534—1536-yillarda Muqaddas Lavrentiya daryosi vodiysini tadqiq etadi. 1608-yildan esa Kanadani mustamlakaga aylantirish boshlanadi, bu hudud o'sha paytda yangi Fransiya deb atalgan. 1663-yilda mahalliy hindu qabilalari bilan yaxshi munosabat o'natish maqsadida yangi mustamlakada qirollik boshqaruvi o'rnatildi. XVII asr oxirlarida Buyuk Britaniya Kanada hududlari uchun raqobatlasha boshladi. Bu raqobat XVIII asrning ikkinchi yarmida avj oldi va Fransuz armiyasi mag'lubiyatga uchrab, Yangi Fransiya hududlarida Angliya huquqini tan oldi. 1867-yilda Kanada Britaniya dominioniga aylandi. 1931-yildan Kanada Britaniya Hamdo'stligi tarkibidagi to'liq mustaqil davlatga aylandi. II jahon urushidan so'ng Kanadaga ko'plab immigrantlar ko'chib kelishadi. XX asrning 60—90-yillarida fransuz tilida so'zlashuvchi Kvebek hamda Kanadaning ingliz aholisi o'rtasida qarama-qarshilik yuzaga keladi (Kvebek suverenitet talab etadi). 2008-yil Olimpiadasini o'tkazishga nomzodini qo'ygan Kanada bu bahsni Xitoyga boy beradi.

## KENIYA

*Rasmiy nomi — Keniya Respublikasi. Poytaxti — Nayrobi. Hududi — 582600 km<sup>2</sup>. Aholisi — 36890634 kishi (2007). Davlat tili — ingliz va suaxili. Dini — aholisining deyarli yarmi mahalliy majusiylar, xristianlar (35%), musulmonlar, hinduizm. Pul birligi — keniya funti.*

**Geografik joylashuvi va tabiati.** Keniya Afrika qit'asining sharqiy qismidagi davlat. G'arbda Uganda (chegara uzunligi — 933 km), shimolda Efiopiya (830 km) va Sudan (232 km), sharqda Somali (682 km), janubda Tanzaniya (769 km) bilan chegaradosh. Sharqda Hind okeani bilan tutash. Chegarasining umumiy uzunligi — 3446 km, sohil bo'ylab chegara uzunligi — 536 km. Keniya Sharqiy Afrika yassitog'ligining shimoli sharqiy qismini egallaydi. Markazda eng baland nuqtasi 5199 m bo'lgan Keniya tog'i va tog' tizmalari joylashgan. Asosiy daryolari: Gana (Ozi) va

Galana. Mamlakat hududida Rudolf ko'li va qisman Viktoriya ko'li joylashgan. Asosiy foydali qazilmalari: oltin, baritlar, yoqut, ohaktosh.

Iqlimi — ekvatorning yuqori qismida issiq va quruq; janubiy qismi uch iqlimli zonaga bo'linadi. Sohil bo'yalarida sernam iqlim, tog'li yerlarda mo'tadil iqlim, Viktoriya ko'li havzasida esa issiq, sernam iqlim. Keniyada akatsiya, sutlama, boshhoqli o'simliklar o'sadi. Tropik o'rmonli hududlarda rausoniya, dripetis, kap kashtani, qora archa o'sadi. Keniyaning milliy parklarida antilopalar, ohular, zebraalar podasi saqlangan, shuningdek, fillar, jirafalar, sherlar, qoplonlar, qo'toslar, karkidonlar ham bor. Qushlarning turi ko'p: tuyaqushlar, kotib qush, tualoqlar, marabular, kalxatlar, qizil g'ozlar va h.k.

***Davlat tuzilishi va siyosiy partiyalari.*** Davlat tuzilishi — prezidentlik respublikasi. Ma'muriy jihatdan 7 ta provinsiya va poytaxt okrugiga bo'linadi. Keniya mustaqillikni 1963-yil 12-dekabrda qo'lga kiritgan (12-dekabr — Milliy bayram — Mustaqillik kuni). Ijro etuvchi hokimiyat prezident — davlat va hukumat boshlig'i qo'lida. Qonun chiqaruvchi hokimiyat — bir palatali parlament — Milliy Assambleya. Asosiy siyosiy partiyalari: Keniya Milliy Afrika Ittifoqi (KMAI), Demokratiyani tiklash uchun forum (DTUF), Demokratik partiya (DP).

***Iqtisodi, transport kommunikatsiyalari.*** Keniya iqtisodi barqaror rivojlanib borayotgan kam sonli Afrika davlatlaridan biridir. YIM 2006-yil 34504 mln dollarni (aholi jon boshiga — 935 doll.) tashkil etdi. Iqtisodining yetakchi tarmog'i qishloq xo'jaligi. Asosiy mahsulotlari: qahva, choy, sholi, g'alla, paxta, shakarqamish. Asosiy savdo hamkorlari — YI, Afrika davlatlari, AQSH.

Temiryo'llarining umumiy uzunligi — 2650 km, avtomobil yo'llari — 64590 km. Asosiy portlari — Mombasa, Lamu.

***Tarixi.*** Keniya hududlarini VIII asrda arablar o'z mustamlakalariga aylantirdilar. XI—XV asrlarda bu yerda shahar davlatlari tashkil topdi. XV asr oxirlaridan hozirgi Keniya hududi arablar va portugallar o'rtasidagi kurash maydoniga aylandi. XVII asr boshlarida Keniya

hududlaridagi barcha shahar davlatlarni o'ziga bo'ysundirgan Ummon saltanati 1894-yilda Britaniya protektoratiga aylandi. Mamlakat hududi 1920-yilda Keniya nomi bilan Britaniya mustamlakasi bo'lib qoldi. 1952-yilda mahalliy qabilalarning qo'zg'olonlari avj olishi oqibatida inglizlar 1961-yilda Keniyaning o'z-o'zini idora qilish huquqini tan olishga majbur bo'ldilar. 1963-yildan boshlab Keniya Britaniya Hamdo'stligi tarkibidagi mustaqil davlat hisoblanadi.

## KIPR

*Rasmiy nomi — Kipr Respublikasi. Poytaxti — Nikosiya. Hududi — 9251 km<sup>2</sup>. Aholisi — 788028 kishi (2007). Davlat tili — grek va turk tillari. Dini — pravoslavlar (78%), musulmonlar (18%). Pul birligi — kipr funti va turk lirasi.*

**Geografik joylashuvi va tabiati.** Kipr — O'rtayer dengizining sharqiy qismidagi Kipr orolida joylashgan davlat. Sohil bo'ylab chegara uzunligi — 648 km. 1974-yil Turkiya okkupatsiyasi natijasida orolning shimoliy qismi 2 qismga: greklar zonasi va turklar zonasiga bo'lindi, shuningdek, 2 ta harbiy baza joylashgan Buyuk Britaniyaga tegishli katta bo'lmagan zona ham bor. Orol bo'ylab sharqdan g'arbga tomon ikkita tog' tizmasi cho'zilgan. Ular orasida tepaliklar bilan qoplangan tekislik yotadi. Mamlakatning eng baland tog'i — Olimp (1952 m). Asosiy tabiiy resurslari mis, xrom, tuz, gips, marmar, asbest, yog'och, oxra. Hududining 40% i haydaladigan yerlar, 18% o'rmonlar va butazorlar, 10% i o'tloq va maysazorlardan iborat.

Iqlimi — subtropik. O'rmonlarning vahshiylarcha yo'qotilishi natijasida, o'rmonlar faqatgina Troodos tog'laridagina qolgan. Bu yerda kiparis, alepp qarag'ayi, eman, kedr, kashtan, doimiy yashil buta, makves o'sadi. Orol faunasining boy emasligi o'rmonli massivlarning kamligi bilan bog'liq. Hamma yerda tulki va quyonlarni uchratish mumkin. Kaltakesak va ilonlar, qushlardan moyqurt, to'rg'ay, qaldirg'ochlar ko'p. Kipr suv bilan o'ralgani tufayli baliqqa boy.

***Davlat tuzilish va siyosiy partiyalari.*** Davlat tuzilishiga ko'ra — prezidentlik respublikasi. Kiprlik turklar tomonidan e'lon qilingan Shimoliy Turk Respublikasi jahon hamjamiyati tomonidan tan olinmagan. Ma'muriy-hududiy jihatdan 6 ta shaharga bo'linadi. Limasol, Larnaka, Pafos greklar qismida, Kireniya, Morfu, Famogusta turklar qismida. Kipr 1960-yil 16-avgustda mustaqil respublikaga aylangan. Greklar qismida 1-oktabr — Mustaqillik kuni. Kiprning turklar qismida Milliy bayram — 15-noyabr. Prezident — davlat va hukumat boshlig'i. Kiprning turklar qismida o'z prezidenti, premyer-ministri va Vazirlar Kengashi bor. Qonun chiqaruvchi hokimiyat — bir palatali parlament — Vakillar palatasi. Kiprning turklar qismida o'z parlamenti — Respublika Majlisi faoliyat ko'rsatadi. Asosiy siyosiy partiyalari: Demokratik yig'ilish, Liberallar partiyasi, Kipr mehnatkash xalqining progressiv partiyasi, Demokratik partiya, Markazning yagona demokratik ittifoqi.

***Iqtisodi, transport kommunikatsiyalari.*** Sanoatning birmuncha rivojlangan tarmoqlari: (YIMning 14% i) tog'-konchilik, yengil mashinasozlik, oziq-ovqat, neftni qayta ishlash sanoati, kimyoviy o'g'itlar, qurilish materiallari ishlab chiqarish. Kiprda xizmat ko'rsatish sohasi rivojlangan (YIMning 53% i), turizm jadal suratda rivojlanmoqda.

Qishloq xo'jaligidagi asosiy tarmoqlar: uzum va sitrus mevalarga ishlov berish. 2006-yil YIM miqdori 17761 mln dollarni (aholi jon boshiga — 22538 doll.) tashkil etgan. Asosiy savdo hamkorlari: Buyuk Britaniya, Gretsiya, Germaniya.

Avtomobil yo'llarining umumiy uzunligi — 10780 km. Portlari: Kireniya, Larnoka, Limasol, Pafos, Famagusta.

***Tarixi.*** Kipr m.a. III ming yillik boshlaridayoq suriyaliklar va anatoliyaliklarga ma'lum edi. M.a. XVI asrda orol misrliklar tomonidan bosib olinganidan keyin m.a. 1450-yildan mamlakat tarixida ellinlar davri boshlandi. M.a. IX—VIII asrlarda Kipr mustaqil davlatga aylangan. Lekin m.a. 707-yildan boshlab ossuriyaliklar, misrliklar va forslar tomonidan navbatma-navbat zabt

etilgan. Aleksandr Makedonskiy imperiyasi inqirozga uchragandan keyin Kiprda Ptolemeylar hukmronlik qildi. 58-yildan Kipr Rim provinsiyasiga, 395-yilda Vizantiya imperiyasi qismiga aylandi. Orol arablar tomonidan okkupatsiya qilingandan keyin 632—864-yillar davomida ular hukmronligi ostida bo'ldi. So'ng 1191-yilgacha yana Vizantiya imperiyasi hukmronligiga o'tdi. 1192—1489-yillarda Kipr va Quddus qirolligi, bundan keyin 1571-yilgacha Venetsiya mustamlakasi, 1898-yildan — Britaniya mustamlakasi. 1960-yili Kipr mustaqillikka erishdi, lekin hududiy yaxlitligini saqlab qola olmadi. 1974-yilda turk qo'shinlarining okkupatsiyasi natijasida ikkiga bo'linib ketdi.

## KIRIBATI

*Rasmiy nomi — Kiribati Respublikasi. Poytaxti — Bayriki. Hududi — 811 km<sup>2</sup>. Aholisi — 107892 kishi (2007). Davlat tili — ingliz. Dini — katoliklar (50%), protestantlar (46%). Pul birligi — avstraliya dollari.*

**Geografik joylashuvi va tabiati.** Tinch okeanning g'arbiy qismidagi Gilbert, Feniks Layn va Oshen orollarida joylashgan. Sohil bo'ylab chegara uzunligi — 11,43 km. Orol asosan qoyalar bilan o'ralgan, halqa shakldagi marjonlar oroli ko'rinishiga ega. Asosiy tabiiy boyliklari: fosforitlar, kopra.

Iqlimi — ekvatorial. Janubiy orollarida asosan past bo'yli butazorlar, shimolda baland bo'lmagan daraxtlar o'sadi. Hayvonot dunyosi kambag'al. Kaltakesak ko'proq uchraydi, asosan dengiz qushlari, fregatlar, baklan (qora buzov)lar va boshqalar bor.

**Davlat tuzilishi va siyosiy partiyalari.** Davlat tuzilishiga ko'ra — respublika o'z-o'zini boshqarish huquqiga ega. Britaniya Hamdo'stligi a'zosi. Mamlakat 6 ta okrugga bo'linadi. Mustaqillikka 1979-yil 12-iyulda (Buyuk Britaniyadan) erishgan. 12-iyul — Milliy bayram — Mustaqillik kuni. Rasmiy jihatdan davlat boshlig'i — Buyuk Britaniya qirolichasi. Lekin ijro etuvchi hokimiyat prezident (davlat va hukumat bosh-

lig'i)ga tegishli. Qonun chiqaruvchi hokimiyat — bir palatali parlament — Assambleya palatasi. Asosiy siyosiy partiyalari: Milliy-progressiv partiya, Xristian-demokratik partiyasi, Liberal partiya, Yangi harakat partiyasi.

**Iqtisodi, transport kommunikatsiyalari.** Ishlab chiqarish va eksportdagi asosiy mahsulotlar: kopra va baliq mahsulotlari. Asosiy savdo hamkorlari: Avstraliya, Yaponiya, Yangi Zelandiya.

Avtomobil yo'llarining umumiy uzunligi — 640 km, portlari Banaba, Tarava.

**Tarixi.** Nukunau oroli 1765-yili ingliz dengizchisi J. Bayron, Gilbert va Ellis orollari — Gilbert va Marshallar tomonidan 1988-yilda kashf etilgan. 1892-yilda orollar Britaniya protektoratiga, 1915-yilda Buyuk Britaniya mustamlakasiga aylanadi. Ellis orollari 1975-yilda ajralib chiqib, 1978-yilda mustaqil Tuvalu davlati deb e'lon qilinadi. Gilbert orollari Britaniya Hamdo'stligi tarkibida 1979-yilda mustaqillikni qo'lga kiritadi.

## KOLUMBIYA

*Rasmiy nomi — Kolumbiya Respublikasi. Poytaxti — Bogota. Hududi — 1141748 km<sup>2</sup>. Aholisi — 44258134 kishi (2007). Tili — ispan. Dini — katolik (95%). Pul birligi — kolumbiya pesosi.*

**Geografik joylashuvi va tabiati.** Janubiy Amerikaning shimoli g'arbiy qismida joylashgan. Janubda Peru (chegara uzunligi — 2900 km) va Ekvador (590 km), sharqda Venesuela (250 km) va Braziliya (1643 km), shimolda Panama (225 km) bilan chegaradosh. Kolumbiya g'arbda Tinch okeani (sohil chizig'i uzunligi — 1448 km), shimolda Karib dengizi (1960 km) bilan tutash. Chegarasining umumiy uzunligi — 7418 km, sohil bo'ylab chegara uzunligi — 3208 km. Mamlakat hududini ikki qismga: g'arbiy qism — tog'li va sharqiy qism — tekisliklarga bo'lish mumkin. G'arbiy qismda uchta tog' tizmasi: G'arbiy Kordilyera, Markaziy Kordilyera va Sharqiy Kordilyera joylashgan. Shimolda Serra-Nevada-de-Santa Marta

(eng baland nuqtasi — 5800 m) joylashgan. Asosiy daryolari — Magdana, Kauga, Meta, Guavyare. Kolumbiya foydali qazilma zaxiralariga boy: neft, tabiiy gaz, temir rudasi, ko‘mir, nikel, mis, oltin, zumrad.

Iqlimi — sohil bo‘ylarida va sohilga yaqin hududlarda yillik o‘rtacha harorat 24—27°C. Birmuncha baland rayonlarda iqlim sovuqroq. Yil davomida ikkita yomg‘irli mavsum almashinadi. Sohil bo‘ylarida asosiy o‘simlik mongola. Kolumbiyaning hayvonot dunyosi boy. Bu yerda maymun, otselot, jayron, chumolixo‘r, sudralib yuruvchilar, baliqlar, qushlar va hasharotlarning ko‘plab turlari uchraydi.

**Davlat tuzilishi va siyosiy partiyalari.** Davlat tuzilishi — prezidentlik respublikasi. Mamlakat 32 departamentga bo‘lingan. Kolumbiya 1910-yil 20-iyulda (Milliy bayram — Mustaqillik kuni) Ispaniyadan mustaqillikni qo‘lga kiritgan. Davlat va hukumat boshlig‘i — prezident. Qonun chiqaruvchi hokimiyat ikki palatali parlament — Senat va Vakillar palatasidan iborat Kongress. Asosiy siyosiy partiyalar — Liberal partiya (LP), Konservativ partiya (KP), Yangi demokratik kuch (YDK)

**Iqtisodi va transport kommunikatsiyalari.** Keyingi o‘n yilliklarda iqtisodning rivoji oqsagan, lekin o‘shish sur‘ati boshqa Lotin Amerikasi mamlakatlariga nisbatan yuqori. Kolumbiyaning asosiy eksport mahsuloti — qahva. Birmuncha rivojlangan sanoat tarmoqlari: to‘qimachilik, oziq-ovqat, metallurgiya, kimyo sanoati. 2006-yil YIM miqdori 322582 mln dollarni (aholi jon boshiga — 7288 doll.) tashkil etgan. Qishloq xo‘jaligida (YIMning 15% i) g‘alla mahsulotlari yetishtirish va chorvachilik rivojlangan.

Temiryo‘llarining umumiy uzunligi — 33,86 km. Avtomobil yo‘llari — 107300 km. Ichki suv yo‘llari — 14300 km. Asosiy portlari: Barankilya, Buenaventura, Kartaxena, San-Adres, Santa-Marta, Tumako.

Asosiy savdo hamkorlari: AQSH, YI mamlakatlari, Yaponiya, Braziliya, Venesuela.

**Tarixi.** Hozirgi Kolumbiya hududlari 1502-yil Kolumb tomonidan kashf etilgan. 1510-yilga kelib ispanlar mamlakatni mustamlakaga aylantirdilar. Yangi

Grenada deb atalgan Ispaniya mustamlakasi Venesuela va Ekvador hududlarini ham qo'shib, 1717-yilda vitse-qirollikka aylantirildi. 1810-yildan mustaqillik uchun kurash boshlandi va 1819-yilda mustaqillikka erishdi. 1830-yilda Venesuela va Ekvador, 1903-yili Panama Buyuk Kolumbiyadan ajralib chiqdi. 1948-yilda konservatorlar va liberallar o'rtasidagi turlicha siyosiy qarashlar ikki partiya tarafdorlari o'rtasida qonli to'qnashuvlarga olib keldi. 1953-yilda davlat to'ntarishi natijasida mamlakatda harbiy diktatura o'rnatildi. 1957-yilda hokimiyatni o'z qo'liga olgan fuqarolik hukumati bir qator ichki siyosiy va iqtisodiy muammolarga duch keldi. XX asrning 2-yarmida narkomafiya kuchlarining faollashuvi kuzatiladi. 1993-yili Medelyin kartelining «narkobaron»i 43 yashar Pablo Eskobaraning o'ldirilishi ham vaziyatni o'zgartirmaydi. Harbiy to'ntarishlar tez-tez sodir bo'lib turadigan qo'shni davlatlarga nisbatan Kolumbiyada demokratik an'analar ancha mustahkam.

## KOMOR OROLLARI

*Rasmiy nomi — Komor Orollari Federal Islom Respublikasi. Poytaxti — Moroni. Hududi — 2170 km<sup>2</sup>. Aholisi — 712011 kishi (2007). Davlat tili — arab va fransuz. Dini — musulmonlar (86%), katoliklar (14%). Pul birligi — komor franki.*

**Geografik joylashuvi va tabiati.** Davlat Madagaskar orollari va Afrika qit'asi oralig'idagi orollar (uch asosiy — Grand-Komor, Anjuan, Moxsli va bir qator boshqa orollar)da joylashgan. Qirg'oq bo'ylab chegara uzunligi — 340 km. Mayott oroli Fransiyaga tegishli. Mamlakatning eng baland nuqtasi — Kartala faol vulqoni (1261 m). Haydaladigan yerlari hududining 35%, o'rmon va butazorlar 16%, o'tloq va maysazorlar 7% ni egallaydi.

Iqlimi — tropik.

**Davlat tuzilishi va siyosiy partiyalari.** Davlat tuzilishi — prezidentlik respublikasi. Komor Orollari 1975-yil 6-iyulda Fransiyadan mustaqillikka erishgan (Milliy bayrami — Mustaqillik kuni). Ijro



etuvchi hokimiyat davlat va hukumat boshlig'i — prezidentga tegishli. Asosiy siyosiy partiyalari: Progress uchun Komor ittifoqi, Yangilanish va demokratiya uchun harakat.

**Iqtisodi, transport kommunikatsiyalari.** Iqtisodi sust rivojlangan. Qishloq xo'jaligi iqtisodning yetakchi tarmog'i hisoblanadi. 2006-yil YIM miqdori 1139 mln dollarni (aholi jon boshiga — 1599 doll.) tashkil etgan. Asosiy savdo hamkorlari: AQSH, Fransiya.

Temiryo'llari yo'q. Avtomobil yo'llarining umumiy uzunligi — 750 km. Asosiy portlari: Dzaudzi, Moroni.

**Tarixi.** XI asrda arablar Komor orollarida o'z saltanatiga asos soldilar. XVI asrda orollarda yevropaliklardan birinchi bo'lib portugallar paydo bo'ldilar. 1841-yildan Mayotta oroli, 1886-yildan esa qolgan orollar Fransiya qo'l ostiga o'tdi. Komor orollari 1961-yilda o'z-o'zini boshqarish huquqiga ega bo'ldi va 1974-yilda mustaqillikni qo'lga kiritdi. 1978-yildan Komor Orollari Federal Islom Respublikasi.

## KONGO

*Rasmiy nomi — Kongo Respublikasi. Poytaxti — Brazzavil. Hududi — 342000 km<sup>2</sup>. Aholisi — 3820744 kishi (2004). Davlat tili — fransuz. Dini — xristianlar (50%), majusiylar (48%), musulmonlar (2%). Pul birligi — afrika franki.*

**Geografik joylashuvi va tabiati.** Markaziy Afrikaning g'arbida joylashgan. Sharqda va janubda Kongo Demokratik Respublikasi (chegara uzunligi — 2410 km), janubi g'arbda Angola (201 km), shimolda Kamerun (523 km) va Markaziy Afrika Respublikasi (467 km), g'arbda Gabon (1903 km) bilan chegaradosh. Chegarasining umumiy uzunligi — 5504 km, sohil bo'ylab chegara uzunligi — 169 km. Asosiy daryosi — Kongo. Asosiy foydali qazilmalari: neft, tabiiy gaz, qo'rg'oshin, rux, uran, mis.

Iqlimi — issiq va sernam. Qizil daraxtning har xil turlari, palma, ayus, chitola va boshqalar o'sadi. Fillar, begemotlar, gepardlar, ko'p turdagi maymunlar, o'rmon

qushlari yashaydi. Turli sudralib yuruvchilar, ilonlar ko'p.

**Davlat tuzilishi va siyosiy partiyalari.** Davlat tuzilishi — respublika. Mamlakat tarkibida 9 ta provinsiya bor. Kongo 1960-yil 15-avgust (Milliy bayram — Mustaqillik kuni)da Fransiyadan mustaqillikni qo'lga kiritgan. Qonunchilik fransuz fuqaro huquqiga asoslangan. Ijro etuvchi hokimiyat prezident (davlat boshlig'i) va premyer-ministriga tegishli. Qonun chiqaruvchi hokimiyatni prezident va ikki palatali (Senat va Milliy Majlis) parlament amalga oshiradi. Siyosiy partiyalari: Sotsial demokratiya uchun Panafrika ittifoqi, Kongo mehnat partiyasi.

**Iqtisodi, transport kommunikatsiyalari.** Kongo asosan agrar davlatligicha qolmoqda. Sanoatda industrial sektor rivojlangan. Sanoatning rivojlanayotgan boshqa tarmoqlari: yog'ochni qayta ishlash, palma yog'i ishlab chiqarish. 2006-yil YIM miqdori 3820 mln dollarni (aholi jon boshiga — 1000 doll.) tashkil etgan. Asosiy savdo hamkorlari: AQSH, Fransiya, Italiya.

Temiryo'llarining umumiy uzunligi — 797 km; avtomobil yo'llari — 11960 km, ichki suv yo'llari — 1120 km. Asosiy portlari: Puent-Nuar (okean porti), Brazzavil (daryo porti).

**Tarixi.** XV—XVI asrlarda hozirgi Kongo hududlarida Teke, Laongo davlatlari bo'lgan. 1875-yilda fransuzlar mustamlakaga aylantira boshladi. 1891-yilda Fransuz Kongosi tashkil topdi. 1910-yilda Fransuz Ekvatorial Afrikasi tuzilgan vaqtda mustamlaka hududi ikkiga bo'lindi. Gabon (g'arbiy qism) va Kongo (sharqiy qism). Kongo 1960-yilda mustaqillikka erishdi. 1970-yildan Kongo Xalq Respublikasi, 1990-yilda yangi Konstitutsiya qabul qilindi va mamlakat Kongo Respublikasi deb nomlandi.

## KONGO DEMOKRATIK RESPUBLIKASI

*Rasmiy nomi — Kongo Demokratik Respublikasi. Poytaxti — Kinshasa. Hududi—2345410 km<sup>2</sup>. Aholisi — 64453708 kishi (2007). Davlat tili — fransuz. Dini — katoliklar (50%), protestantlar*

|| (20%), kibangistlar (12%), musulmonlar (10%).  
Pul birligi — zoir.

**Geografik joylashuvi va tabiati.** Kongo Markaziy Afrikadagi davlat. Janubda Zambiya (chegara uzunligi — 1930 km), janubi g'arbda Angola (2511 km), g'arbda Kongo (2410 km), sharqda Uganda (765 km), Burundi (233 km) va Ruanda (217 km), shimolda Markaziy Afrika Respublikasi (1577 km) va Sudan bilan chegaradosh. Mamlakat chegarasining umumiy uzunligi — 10271 km. Mamlakat hududining markaziy va g'arbiy qismlarini yassitog'liklar va tog' tizmalari bilan o'ralgan Kongo daryo vodiysi egallaydi. Kivu ko'lidan shimolda vulqonli tog'lar joylashgan. Janubi sharqda Katanga, janubi g'arbda Angola yassitog'liklari joylashgan. KDRda ko'llar ko'p: Tanganika, Kivu, Mobute-Sese-Seko, Mveru. Foydali qazilmalari: mis, boksit, temir rudasi, ko'mir, olmos, oltin, kumush, neft, rux, marganes, uran, qalay, kobalt, kadmiy.

**Davlat tuzilishi va siyosiy patriyalari.** Davlat tuzilishi — prezidentlik respublikasi. Ma'muriy jihatdan 10 ta viloyatga bo'linadi. Mustaqillikka 1960-yil 30-iyunda erishgan. Davlat boshlig'i — prezident, qonun chiqaruvchi oliy organ — bir palatali parlament. Asosiy partiyalari: Inqilobiy xalq harakati (IXH), Federalistlar va respublikachilar ittifoqi (FRI), KDR Demokratik sotsial-xristian partiyasi (KDSXP)

**Iqtisodi, transport kommunikatsiyalari.** Boy foydali qazilmalarga ega bo'lishiga qaramasdan KDR Afrikaning qoloq davlatlaridan biri bo'lib qolmoqda. Qishloq xo'jaligi iqtisodning asosini tashkil etadi. Sanoatning ko'zga ko'ringan tarmoqlari tog'-konchilik, olmos qazib olish va uni qayta ishlash. 2006-yil YIM miqdori 38493 mln dollarni (aholi jon boshiga — 9623 doll.) tashkil etgan. Asosiy savdo hamkorlari: AQSH, Belgiya, Fransiya, JAR.

Temiryo'llarining umumiy uzunligi — 5138 km, avtomobil yo'llari — 146500 km, ichki suv yo'llari — 15000 km. Portlari: Boma, Banana, Matadi.

**Tarixi.** Hozirgi KDR hududi XV asr oxirlarida Bokongo qirolligi hukmronligi davrida yevropaliklardan birinchi bo'lib portugallar tomonidan ochilgan. Lekin

1875-yil Belgiya qiroli Leopold G. M. Stenli boshchiligidagi Kongo ekspeditsiyasini jo'natadi va 1882-yil Xalqaro Kongo assotsiatsiyasini tashkil etib, mamlakatni mustamlakaga aylantiradi. 1908-yil hozirgi KDR hududida Belgiya Kongosi nomi bilan Belgiya mustamlakasi tashkil etildi. 1960-yil Belgiya Kongosi mustaqil davlat deb e'lon qilinadi. 1965-yil hokimiyatni qo'lga kiritgan general Mobutu 1971-yil mamlakat nomini Zoir Respublikasi deb e'lon qiladi. 1997-yildan boshlab Kongo Demokratik Respublikasi nomini oldi.

## KOSTA-RIKA

*Rasmiy nomi — Kosta-Rika Respublikasi. Poytaxti — San-Xose. Hududi — 51100 km<sup>2</sup>. Aholisi — 4137943 kishi (2007). Davlat tili — ispan. Dini — katolik (95%). Pul birligi — Kosta-Rika koloni.*

**Geografik joylashuvi va tabiati.** Markaziy Amerikadagi davlat. Janubi sharqda Panama (chegara uzunligi — 330 km), shimolda Nikaragua (309 km) bilan chegaradosh. G'arbda va janubi g'arbda Tinch okeani, sharqda Karib dengizi bilan tutash. Chegasining umumiy uzunligi — 639 km, sohil bo'ylab chegara uzunligi — 1290 km. Hududining katta qismi tog'li. Shimoli g'arbdan janubi sharqqa tomon Kosta-Rikani uchta tog' tizmasi kesib o'tgan: Guanakaste, Markaziy va Galamanka. Eng baland tog'i — Chirippo (3820 m). Kosta-Rikada vulqonlar ko'p. Haydaladigan yerlari — 6%, o'rmon va changalzorlar — 34%, o'tloq va maysazorlar — 45% hududini egallaydi.

Iqlimi — Karib dengizi sohillarida issiq, yomg'irli havo.

**Davlat tuzilishi va siyosiy partiyalari.** Davlat tuzilishi — prezidentlik respublikasi. Mamlakat 7 ta provinsiyaga bo'lingan. Kosta-Rika 1821-yil 12-sentabrda mustaqillikka (avval Ispaniya mustamlakasi bo'lgan) erishgan. 15-sentabr — Milliy bayram — Mustaqillik kuni. Qonunchilik ispan fuqarolik huquqiga asoslangan. Prezident — davlat va hukumat boshlig'i. Qonun chiqaruvchi hokimiyat — bir palatali parla-

ment — Qonunchilik Assambleyasi. Birmuncha ko'zga ko'ringan siyosiy partiyasi Milliy Liberal partiya (MLP).

**Iqtisodi, transport kommunikatsiyalari.** Qishloq xo'jaligi iqtisodining asosiy sektori hisoblanadi. Eksport qilinadigan mahsulotlarning 70%i qishloq xo'jaligi mahsulotlariga to'g'ri keladi. Eksporti qahva, shakarqamish, oziq-ovqat, to'qimachilik va tikuvchilik mahsulotlari bilan cheklangan. 2006-yil YIM miqdori 39823 mln dollarni (aholi jon boshiga — 9623 doll.) tashkil etgan. Asosiy savdo hamkorlari: AQSH Germaniya, Gvatemala, Yaponiya.

Temiryo'llarining umumiy uzunligi — 950 km, avtomobil yo'llari — 15400 km, ichki suv yo'llari — 730 km. Portlari: Golfito, Koldero, Moin, Puerto-Limon, Puntarenas.

**Tarixi.** 1502-yil Kolumb tomonidan kashf etilgan. Hozirgi Kosta-Rika 1520-yilda Gvatemala tarkibidagi ispan mustamlakasiga aylandi. 1821-yil 15-sentabrda Kosta-Rika o'z mustaqilligini e'lon qilsada, 1838-yilgacha Gvatemala, Gonduras, Nikaragua va Salvador bilan federatsiyaga birlashadi. 1839-yilda esa to'liq mustaqil bo'ladi. 1871-yilda qabul qilingan konstitutsiyaga o'lim jazosini bekor qiladi, chet el investitsiyalarini kiritishga ruxsat beradi. Shu vaqtdan AQSHning «Yunayted frut» kompaniyasining ekspansiya boshlangan edi. 1941-yili fashist Germaniyasi va uning ittifoqchilariga qarshi urush e'lon qiladi. XX asrning chora-gida kofe narxining tushishi va neftning qimmatlashishi mamlakatda iqtisodiy barqarorsizlikni yuzaga keltirdi.

## KOT-d' IVUAR

*Rasmiy nomi — Kot-d'Ivuar Respublikasi. Poytaxti — Yamusukro — rasmiy, amalda — Abidjan. Hududi — 322463 km<sup>2</sup>. Aholisi — 18033284 kishi (2007). Davlat tili — fransuz. Dini — aholisining ko'pchiligi mahalliy majusiylar, musulmonlar (24%), xristianlar (12%). Pul birligi — afrika franki.*

**Geografik joylashuvi va tabiati.** G'arbiy

Afrikadagi davlat. G'arbda Liberiya (chegara uzunligi — 716 km) va Gvineya (610 km), sharqda Gana (668 km), shimolda Burkina-Faso (584 km) va Mali (532 km) bilan chegaradosh. Janubda Gvineya qo'ltig'i bilan tutash. Chegarasining umumiy uzunligi — 3110 km, sohil chizig'i uzunligi — 515 km. Asosiy daryolari: Sosandra, Bandama, Komae. Yerosti boyliklari: olmos, temir rudasi, marganes, kobalt, mis, boksitlar.

Iqlimi — mamlakat janubida issiq va sernam, shimolda ko'proq quruq iqlim. O'simlik dunyosi — janubiy rayonlar tropik o'rmonlar bilan qoplangan. Bu yerda daraxtlarning taxminan 600 turi mavjud. Hayvonot dunyosi boy: fil, begemot, o'rmon antilopalari, leopard, gepardlar yashaydi. Ilonlar, qushlar ko'p.

#### ***Davlat tuzilishi va siyosiy partiyalari.***

Davlat tuzilishi — prezidentlik respublikasi. Mamlakat 26 departamentga bo'lingan. 1960-yil 7-avgustda mustaqillikka erishgan (avval — fransuz mustamlakasi). Qonunchilik fransuz fuqarolik huquqiga asoslangan. Ijro etuvchi hokimiyat prezident (davlat boshlig'i) va premyer-ministr boshchiligidagi hukumatga tegishli. Qonun chiqaruvchi hokimiyat bir palatali parlament — Milliy Majlis. Asosiy siyosiy partiyalari: Kot-d' Ivuar demokratik partiyasi (KIDP), Ivuar xalq fronti, Sotsial demokratlar ittifoqi.

***Iqtisodi, transport kommunatsiyalari.*** Kot-d' Ivuar — agrar mamlakat. YIMning 35%, eksportning 70% dan ortiqrog'i qishloq xo'jaligiga to'g'ri keladi. Kakao yetishtirish bo'yicha dunyoda birinchi o'rinda turadi. Palma yog'i, kauchuk eksporti bo'yicha Afrikada birinchi o'rinda turadi. Sanoatning birmuncha rivojlangan tarmoqlari: to'qimachilik, kimyo, qurilish sanoati. 2006-yil YIM miqdori — 25183 mln dollarni (aholi jon boshiga — 1500 doll.) tashkil etgan. Asosiy savdo hamkorlari: Fransiya, Germaniya, Niderlandiya, Nigeriya, Yaponiya.

Temiryo'llarining umumiy uzunligi — 660 km, avtomobil yo'llari — 46600 km, ichki suv yo'llari — 980 km, asosiy portlari — Abidjan, Gran-Basam.

***Tarixi.*** XVI asrda Kot-d'Ivuvar hududlari yevropa-

liklardan birinchi bo'lib portugallar tomonidan kashf etilgan. 1893-yilda fransuzlar Fil Suyagi Qirg'og'i (mamlakatning avvalgi nomi)ni o'zlarining mustamlakasi deb e'lon qildi. 1899-yil Fransuz G'arbiy Afrikasi tarkibiga kirdi. Ufue-Buani rahbarligidagi xalq ozodlik harakati natijasida 1958-yilda Fransuz Hamdo'stligi tarkibidagi avtonomiyaga, 1960-yilda to'liq mustaqillikka erishdi. 1990-yil mamlakatdagi bir partiyalikdan ko'p partiyali tizimga o'tildi.

## KUBA

*Rasmiy nomi Kuba Respublikasi. Poytaxti — Gavana. Hududi — 110860 km<sup>2</sup>. Aholisi —11461842 kishi (2007). Davlat tili — ispan. Dini — katolik. Pul birligi — kuba pesosi.*

**Geografik joylashuvi va tabiati.** Kuba Karib havzasi, Kuba oroli va unga yaqin orollarda joylashgan davlat. AQSH tomonidan ijaraga olingan Guantanamo harbiy bazasi (Kuba hududi hisoblanadi) bilan chegara uzunligi — 29,1 km. Kuba janubda Karib dengizi, shimolda Kubani Florida shtatidan (AQSH) ajratib turgan Florida qo'ltig'i, janubi g'arbda Yukatan qo'ltig'i, sharqda suv orqali Gaiti bilan tutash. Sohil bo'ylab chegara uzunligi — 3735 km<sup>2</sup>. Mamlakat hududi asosan tekisliklar va tepaliklardan iborat. Tog'lar hududning to'rtidan bir qismini egallaydi. Asosiy daryosi — Kauto. Asosiy tabiiy resurslari: nikel, kobalt, mis, marganes, xrom, yog'och. Haydaladigan yerlari hududining 23%, o'tloq va maysazorlar 23% ini egallaydi.

Iqlimi — tropik. Palmaning har xil turlari, sitrus o'simliklari keng tarqalgan. Hayvonot dunyosi kambag'al. Yirtqich hayvonlar va zaharli ilonlar yo'q. Qushlar, mollyuskalar ko'p.

**Davlat tuzilishi va siyosiy partiyalari.** Davlat tuzilishi respublika, amalda mamlakatda kommunistik avtoritar rejim o'rnatilgan. Mamlakat tarkibi 14 ta provinsiya va Xuventud munitsipiyasidan iborat. Kuba 1898-yili Ispaniyadan mustaqillikni qo'lga

kiritdi, lekin 1902-yil 20-maygacha AQSH boshqaruvi-da bo'ldi. Milliy bayramlari: 26-iyul — Xalq qo'zg'oloni kuni (1953-yil) va 1-yanvar — Ozodlik kuni (1959-yil). Ijro etuvchi hokimiyat Davlat Kengashi raisi (davlat boshlig'i) va Vazirlar Kengashi raisi (hukumat boshlig'i)ga tegishli. Qonun chiqaruvchi hokimiyat — bir palatali parlament — Milliy Assambleya. Yagona siyosiy partiyasi: Kuba Kommunistik partiyasi.

### ***Iqtisodi va transport kommunikatsiyalari.***

Mamlakat iqtisodi inqirozni boshdan kechirmoqda. Keyingi yillarda hukumat tashqi iqtisodiy aloqalarini kengaytirishga, turizm va sanoat korxonalarini uchun chet el investitsiyalarini jalb etishga faol harakat qilmoqda. 2006-yil YIM miqdori 33920 mln dollarni (aholi jon boshiga — 3000 doll.) tashkil etgan. Asosiy savdo hamkorlari: MDH mamlakatlari, Ispaniya, Xitoy, Argentina.

Temiryo'llarining umumiy uzunligi — 12947 km, avtomobil yo'llari — 26477 km, ichki suv yo'llari — 240 km. Portlari — Gavana, Kartinas, Mansanilyo, Mantansas, Santyago de-Kuba.

**Tarixi.** Kuba 1492-yil Kolumb tomonidan kashf etilgan. Ispan mustamlakachilari oroldagi mahalliy aholini deyarli yo'qotib, Kubaga plantatsiyalarda ishlatish uchun Afrikadan qullarni olib keldilar. AQSH tomonidan qo'llab-quvvatlangan mustaqillik uchun urush 1868-yilda boshlanib, muvaffaqiyatsizlik bilan tugadi. 1898-yil AQSH Ispaniyaga urush e'lon qilib, o'z qo'shinlarini Kubaga yubordi va Kuba 1902-yilda mustaqil Respublika deb e'lon qilindi. Kuba AQSHga iqtisodiy qaram bo'lgan holda, bir nechta diktatorlik rejimlarni boshidan o'tkazdi. 1959-yilda Fidel Kastro boshchiligidagi kubaliklar Batista diktaturasini ag'darib tashlab, mamlakatni sotsialistik yo'ldan rivojlanuvchi davlat deb e'lon qildi. 2007-yilning dekabrda F.Kastro kasalligi tufayli hukumatni boshqarishni ukasi R.Kastroga topshirdi.



## LAOS

*Rasmiy nomi — Laos Xalq Demokratik Respublikasi (LXDR). Poytaxti — Vyentyan. Hududi — 236800 km<sup>2</sup>. Aholisi — 6519034 kishi (2007). Davlat tili — laos. Dini — buddizm. Pul birligi — kip.*

**Geografik joylashuvi va tabiati.** Janubi sharqiy Osiyoda joylashgan. Janubda Kambodja (chegara uzunligi — 541 km), g'arbda Tailand (1754 km), sharqda va shimolda Vyetnam (2130 km), shimolda Xitoy (423 km), shimoli g'arbda Myanma (235 km) davlatlari bilan chegaradosh. Umumiy chegara uzunligi — 5083 km.

Hududining katta qismi tog'li; shimolida va sharqida Annamita va Chiongshon tog'lari, janubi va g'arbida Mekong daryosi vodiysi bilan pasttekisliklar joylashgan. Tabiiy foydali qazilma boyliklardan — mis, temir, qo'rg'oshin, qimmatbaho toshlar, oltin ko'proq uchraydi.

Iqlimi — mussonli subekvatorial.

**Davlat tuzilishi, siyosiy partiyalari.** Davlat tuzumi — respublika. Mamlakat 16 ta kveng (provin-siya)dan tashkil topgan. Laos 1953-yil oktabrda mustaqillikka erishgan (ilgari Fransiya mustamlakasi bo'lgan). LXDR e'lon qilingan kun — 2-dekabr milliy bayram sifatida bishonlanadi. Ijroiya hokimiyat prezident (davlat boshlig'i) va premyer-ministr boshchiligidagi hukumatga tegishli. Yagona siyosiy partiyasi: Laos xalq inqilobiy partiyasi.

**Iqtisodi, transport kommunikatsiyalari.** Laos hukumati markazlashgan rejali iqtisodiyot davridan so'ng oxirgi yillarda xususiy sektorni rivojlantirish siyosatini rag'batlantirmoqda. Biroq Laos hali ham dunyoning qoloq davlatlaridan biri bo'lib qolmoqda. 2006-yil YIM miqdori 11280 mln dollarni (aholi jon boshiga — 1719 doll.) tashkil etgan. Ishlab chiqarish asosan sanoatning yengil, oziq-ovqat, yog'ochni qayta ishlash sohalari bilan cheklangan. Qo'rg'oshin qazib olish yo'lga qo'yilmoqda. Agrar sohada (YIM 60%) mehnatga layoqatli aholining katta qismi band. Qishloq xo'jaligida yetishtiriladigan asosiy ekin — sholi (ekin

maydonlarining 90%i), shuningdek, makkajo'xori, paxta, tamaki, qahva va soya yetishtiriladi.

Asosiy savdo hamkorlari: Tailand, Malayziya, Vietnam, Yaponiya, Fransiya, AQSH.

Temiryo'llari mavjud emas, avtomobil yo'llarining umumiy uzunligi 14130 km ni (60 km qattiq qoplamali), ichki suv yo'llari 4500 km ni tashkil etadi.

**Tarixi.** 1353-yili hozirgi Laos hududida Lansang qirolligiga asos solingan bo'lib, u XVI asrga kelib o'z hududini sezilarli darajada kengaytirgan edi. XVI asr oxirlariga kelib Birmaning vassaliga aylangan Lansang tez orada ikki qirollik — Vyentyan va Luangprabangga bo'linib ketdi. 1893-yili Fransiya Laosning ichki ishlari-ga aralashib, uni o'zining protektorati deb e'lon qildi. Laos yapon bosqinchilaridan ozod qilinganidan so'ng (1942—1945) mamlakatda fransuzlarga qarshi Lao Issor (Ozod Laos) harakati boshlanib ketdi. Bu qo'zg'olon 1946-yili mamlakatga jo'natilgan ekspeditsion korpus tomonidan bostirildi. 1949-yili o'z-o'zini boshqarish huquqini qo'lga kiritgan Laos 1955-yili mustaqil davlat bo'ldi. 1959-yildan boshlab mamlakatda turli siyosiy guruhlar o'rtasida jiddiy mojarolar boshlandi. Bu mojarolar 1973-yili Laosda monarxiyaning ag'darilishi va Laos Xalq Demokratik Respublikasining e'lon qilinishi bilan yakunlandi. 80-yillar oxiridan boshlab mamlakat iqtisodiyotini va siyosiy hayotini liberal-lashtirish boshlandi. 1991-yilda esa Laosning birinchi konstitutsiyasi qabul qilindi.

## LATVIYA

*Rasmiy nomi — Latviya Respublikasi. Poytaxti — Riga. Hududi — 63700 km<sup>2</sup>. Aholisi — 2266822 kishi (2007). Davlat tili — latish. Dini — lyuteranlik, katolik, pravoslav. Pul birligi — lat.*

**Geografik joylashuvi va tabiati.** Boltiq dengizi qirg'og'ida joylashgan. Janubda Litva (chegara uzunligi — 453 km) va Belarus (141 km), sharqda Rossiya (217 km), shimolda Estoniya (267 km) bilan

chegaradosh. G'arbiy chegaralari Baltika dengizi bilan tutashib ketgan. Chegarasining umumiy uzunligi — 1078 km. Hududining katta qismi pasttekisliklardan iborat. G'arbida va sharqida tepaliklar mavjud. Asosiy daryosi — Daugava (G'arbiy Dvina), ko'p sonli ko'llar mavjud. Tabiiy resurslardan kam miqdorda torf, ohak, yog'och zaxiralari mavjud. Hududi 27% ekin ekiladigan maydonlardan, 39% o'rmon va changalzorlardan iborat.

**Davlat tuzilishi, siyosiy partiyalari.** Mamlakat tarixiy 4 ta tumanga: Kurzele, Zemgale, Vidzeme va Lotgalega bo'lingan. 1991-yil 21-avgustda mustaqillikka erishgan. Latviya respublikasi e'lon qilingan kun — 18-noyabr — Milliy bayram hisoblanadi. Ijroiya hokimiyat prezidentga (davlat boshlig'iga) va premyer-ministr boshchiligidagi hukumatga tegishli. Qonun chiqaruvchi hokimiyat bir palatali parlament — Seymga tegishli. Asosiy partiyalari: Latviya ittifoqi, «Latviya yo'li», «Latviya mustaqilligi uchun harakat», Latviya fermerlari ittifoqi, Latviya xristian-demokratlar ittifoqi, Latviya xalq fronti, Latviya sotsial-demokratik ishchi partiyasi, Latviya mehnat demokratik partiyasi.

**Iqtisodi, transport kommunikatsiyalari.** Oxirgi yillarda Latviya rejali iqtisodiyotdan bozor munosabatlariga asta-sekin o'tmoqda. Iqtisodiyotni shakllantirishdan tashqari, hukumat kam miqdordagi tabiiy resurslarni va ishchi kuchlarini maksimal darajada safarbar qilgan holda chet el kapitalini ko'plab jalb qilish chora-tadbirlarini ko'rmoqda. Sanoatning mashinasozlik, kimyo, baliq mahsulotlari, yengil, farmatsevtika, qog'oz-sellyuloza ishlab chiqarish tarmoqlari yaxshi taraqqiy etgan. Qishloq xo'jaligi ham mamlakat iqtisodiyotida muhim o'rin tutadi (YIM — 21,5%). 2006-yil YIM miqdori 6 mln dollarni (aholi jon boshiga — 11500 doll.) tashkil etgan. Asosiy savdo hamkorlari — Rossiya, Germaniya, Shvetsiya, Belarus.

Temiryo'llarining umumiy uzunligi — 2400 km, avtomobil yo'llarining uzunligi — 59500 km (33000 km — qattiq qoplamali), ichki suv yo'llari — 300 km. Mamlakatning asosiy portlari: Riga, Liyepaya, Ventspils.

**Tarixi.** X asrda mev qabilalari (latishlarning ajdod-

lari) Kiyev Rusidan o'rnak olib pravoslav dinini qabul qilishdi, biroq XII asrdan boshlab katolik diniga o'tish boshlandi. Tevton ordeni 1242-yili Chud ko'lida mag'lubiyatga uchraganligiga qaramasdan, XIII asrning oxirlariga kelib hozirgi Latviya hududlarini egallashga muvaffaq bo'ldi. XIII asr o'rtalarida Latviyada protestantlik tarqaldi. Tevton ordeni tarqalganidan so'ng Livaniya hududi Polsha va Shvetsiya tomonidan bo'lib olindi. XVIII asrda Latviya Rossiya tomonidan anneksiya qilindi.

Birinchi jahon urushi davrida mamlakatning ancha-gina qismi Germaniya tomonidan okkupatsiya qilindi. 1917-yili Latviyada sovet hokimiyati e'lon qilindi, biroq Brest-Litovsk shartnomasiga ko'ra Sovet Rossiyasi Latviya hududlarini Germaniyaga berdi. 1918-yil 19-noyabrda Milliy Kengash Latviyani mustaqil Respublika deb e'lon qildi. 1934-yili Ulmanis tomonidan sodir etilgan davlat to'ntarishi natijasida mamlakatdagi parlament tartibi diktatura bilan almashtirildi. 1940-yilning avgustida Latviya Sovet Ittifoqi tomonidan, 1941-yilda esa Germaniya tomonidan okkupatsiya qilindi. 1944-yili mamlakat yana SSSR tarkibiga kirdi. 1991-yilning avgustida Latviya Respublikasining mustaqilligi qayta tiklandi.

## LESOTO

*Rasmiy nomi — Lesoto Qirolligi. Poytaxti — Maseru. Hududi — 30355 km<sup>2</sup>. Aholisi — 2014554 kishi (2007). Davlat tili — ingliz va sesuto. Dini — xristianlik (katoliklar va protestantlar). Pul birligi — lotin.*

**Geografik joylashuvi va tabiati.** Lesoto Afrika qit'asining janubida joylashgan bo'lib, har tomondan Janubiy Afrika Respublikasining chegaralari bilan o'ralgan. Davlat chegarasining uzunligi 909 km. Mamlakat hududining katta qismi Basuto yassitogligining chegaralarida joylashgan. Ushbu hududlar sharq va janubdan Ajdar tog'lari bilan o'ralgan. Uning eng yuqori nuqtasi — Tabana Ntlenyan (3842 m).

Asosiy daryosi — To'qsariq. Lesoto hududida olmos, kvarts, ko'mir, uran konlari mavjud. Ishlov beriladigan yerlar umumiy yerining 10% ini, o'tloq va yaylovlar 66% ni egallaydi. Iqlimi — okean yaqin bo'lishiga qaramasdan kontinental.

**Davlat tuzilishi, siyosiy partiyalari.** Davlat tuzilishi — konstitutsion monarxiya. 4-oktabr (1966) Lesoto qirolligi e'lon qilingan kun (oldin Buyuk Britaniya mustamlakasi bo'lgan) Milliy bayram hisoblanadi. Davlat boshlig'i — qirol (qirol Moshin II 1995-yil fevraldan buyon davlatni boshqarib kelmoqda). Ijroiya hokimiyati Harbiy Kengashga va premyer-ministr boshchiligidagi hukumatga tegishli. Qonun chiqaruvchi hokimiyat Harbiy Kengash va bir palatali parlament — Milliy Konstitutsion Assambleya tomonidan amalga oshiriladi. Asosiy partiyalari — Basuto milliy partiyasi, Birlashgan demokratik partiyasi, Basuto kongressi partiyasi, Marematlu ozodlik partiyasi.

**Iqtisodi, transport kommunikatsiyalari.** Mamlakat iqtisodiyoti asosan qishloq xo'jaligiga, yengil sanoatga va shartnoma asosida JARga borib ishlab kelayotgan ishchilardan olinadigan pul o'tkazmalaridan tushadigan mablag'larga asoslangan. Uncha katta bo'lmagan fermer xo'jaliklari (qishloq xo'jaligi YIMning 20% ini tashkil etgan) makkajo'xori, bug'doy, arpa va sorgo yetishtiradi. Ishlab chiqarish asosan qishloq xo'jalik mahsulotlarini qayta ishlash va olmos qazib olish bilan bog'liq. Turizm rivojlanmoqda. 2006-yil YIM miqdori 6 mln dollarni (aholi jon boshiga — 2331 doll.) tashkil etgan. Asosiy savdo hamkorlari: JAR, YI.

Temiryo'llar (umumiy uzunligi 2,6 km) JARga tegishli. Avtomobil yo'llarining umumiy uzunligi — 7215 km.

**Tarixi.** Hozirgi Lesoto hududiga kelib joylashgan qabilalar XIX asrning birinchi yarmida Moshin I hukmronligi ostiga birlashtirilgan. Baustolend (mamlakatning sobiq nomi) 1871-yili Keyptaun protektoratiga, 1884-yili esa Buyuk Britaniya protektoratiga aylandi. 1966-yili mamlakat mustaqillikka erishdi va Lesoto qirolligi deb atala boshladi. 1970-yilgi davlat to'ntarishi natijasida hokimiyat tepasiga harbiylar kelishdi va ular davlatni 1993-yilga qadar idora qilishdi.

## LIBERIYA

*Rasmiy nomi — Liberiya Respublikasi. Poytaxti — Monroviya. Hududi — 111370 km<sup>2</sup>. Aholisi — 3029149 kishi (2007). Davlat tili — ingliz. Dini — majusiylilik (70%), islom (16%). Pul birligi — liberiya dollari.*

**Geografik joylashuvi va tabiati.** G'arbiy Afrikada joylashgan davlat. Sharqda Kot-d' Ivuar bilan (chegara uzunligi — 716 km), shimolda Gvineya (chegara uzunligi — 563 km) va Syerra-Leone (306 km) bilan chegaradosh. Mamlakatning janubiy va g'arbiy qismlari Atlantika okeani bilan tutashib ketgan. Chegaralarining umumiy uzunligi 1585 km, sohil bo'ylab chegara uzunligi esa 579 km. Mamlakat hududining katta qismini pasttekisliklar tashkil etadi. Shimolida mamlakatning eng yuqori nuqtasi — Nimba tog'i (1752 m) joylashgan Leono-Liber tepaliklari mavjud. Asosiy daryolari — Mono, Loffa, Sent-Pol, Sent-Jon. Tabiiy boyliklari — temir rudasi, olmos, oltin, yog'och. Mamlakat hududining 1/3 qismini daraxtlarning qimmatbaho turlari ko'p bo'lgan doimiy yashil tropik o'rmonlar tashkil qiladi.

Iqlimi — subekvatorial, issiq va nam.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibida 13 ta graflik bor. Liberiya o'z mustaqilligiga 1847-yil 26-iyulda erishgan (milliy bayrami — Mustaqillik kuni). Mamlakatda qonunchilikning ikkilik tizimi amal qiladi: Amerika umumiy huquqiga asoslangan va qabilalar qonunlariga asoslanib qabul qilingan huquqiy tizim. Butun ijroiya va qonun chiqaruvchi hokimiyat rais boshchiligidagi Davlat Kengashiga tegishli. Asosiy partiyalari — Liberiya milliy vatanparvarlar fronti, Liberiya demokratiya uchun birlashgan ozodlik harakati.

**Iqtisodi, transport kommunikatsiyalari.** 1990-yilda fuqarolar urushi boshlangunga qadar mamlakat iqtisodiyoti asosan kauchuk ishlab chiqarish va yog'ochni qayta ishlash (asosan eksport uchun) bilan bog'liq bo'lib, qishloq xo'jaligi esa qulay iqlim sharoiti

tufayli muvaffaqiyatli rivojlanib kelgan. Etnik qarama-qarshiliklar natijasida ko'pchilik aholi mamlakatni tark etishdi, ular bilan birga kapital mablag'larning chiqib ketishi kuzatildi. 2006-yil YIM miqdori 2903 mln dollarni (aholi jon boshiga — 900 doll.) tashkil etgan. Asosiy savdo hamkorlari — Niderlandiya, YI.

Temiryo'llarining umumiy uzunligi — 490 km, avtomobil yo'llarning uzunligi — 10087 km. Mamlakatning asosiy portlari: Byukenen, Krinvill, Monroviya, Xarper.

**Tarixi.** Portugallar tomonidan XV asrda kashf etilgan Liberiya tez orada qul savdosi markazlaridan biriga aylandi. XIX asrning 20-yillarida Afrikaga qaytib kelgan qullar 1847-yili mustaqil Liberiya respublikasini tuzdilar. Bu respublika konstitutsiyasi amalda AQSH konstitutsiyasidan ko'chirib olingan edi. 1985-yilgi harbiy davlat to'ntarishi mamlakatni hukmron tartib tarafdorlari va Liberiya vatanparvarlar milliy frontiga bo'lib yubordi. Bu holat 1990-yili mamlakatda fuqarolar urushining boshlanishiga olib keldi. 1998-yilda rasmiy hukumat va muxolifatdagi partiyalar o'rtasidagi raqobat kuchaya bordi. Bosh vazir Pakalitxa Mosisili JAR dan harbiy yordam so'radi va 1998-yil oxirida isyonchilar mag'lub bo'lishdi. 2002—2003-yillardagi qattiq qurg'oqchilik aholining 1/3 qismini ocharchilikka muhtalo etdi. Xalqaro hamjamiyat 600 ming odam uchun 57 ming tonna oziq-ovqat yetkazib berdi. Hozirgi kunda ichki siyosatining asosiy yo'nalishlari — chet el investitsiyalarni kiritish va ishsizlik muammosini hal etish (aholining 45 % ishsiz).

## LIVAN

*Rasmiy nomi — Livan Respublikasi. Poytaxti — Bayrut. Hududi — 10400 km<sup>2</sup>. Aholisi — 3926683 kishi (2007). Davlat tili — arab. Dini — islom (75%), boshqa dinlar (25%). Pul birligi — livan funti.*

**Geografik joylashuvi va tabiati.** Janubi-g'arbiy Osiyoda joylashgan. Sharq va shimolda Suriya bilan (chegara uzunligi — 375 km), janub va janubi-sharqda

Isroil bilan (79 km) chegaradosh. Livanning g'arbiy chegaralari O'rtayer dengizi bilan tutashib ketgan. Chegarasining umumiy uzunligi — 454 km, sohil bo'ylab chegara uzunligi esa — 225 km. Isroil bilan janubiy rayonlar masalasida hududiy qarama-qarshiliklar mavjud. Landshafti asosan tog'li: g'arbida dengiz-oldi pasttekisliklari mamlakatning Livan cho'qqisi (3088 m) mavjud bo'lgan baland tog'i As-Sauda bilan tutashgan. Sharqida Antilivan tog' tizmasi joylashgan. Ushbu tog' tizmalari o'rtasida Bekaa chuqurligi joylashgan. Asosiy daryosi — Al-Litoni. Asosiy foydali qazilmalari: temir rudasi va ohaktosh. Ishlov beriladigan yerlar mamlakat hududining 21% ini tashkil etadi.

Iqlimi — subtropik, issiq.

**Davlat tuzilishi, siyosiy partiyalari.** Davlat tuzilishi — respublika. Mamlakat 6 ta gubernatorlik (muhafazot)dan tashkil topgan. Livan mustaqil davlat sifatida 1943-yil 22-noyabrda (milliy bayram — Mustaqillik kuni) e'lon qilingan, biroq fransuz qo'shinlari 1946-yil oxiriga qadar Livan hududida ushlab turildi. Ijroiya hokimiyat prezident (davlat boshlig'i) va Vazirlar Kabineti boshlig'i hisoblangan premyer-ministr qo'lida. Mamlakat konstitutsiyasiga ko'ra faqat xristianmaronit — prezident, musulmon-sunniy — premyer ministr bo'lishi mumkin. Qonun chiqaruvchi hokimiyat bir palatali parlament — Deputatlar palatasi tomonidan amalga oshiriladi. Mamlakat siyosiy hayotida an'anaviy ravishda ikki siyosiy blok — xristianlar va musulmonlar bloki shakllangan. Asosiy siyosiy partiyalari: Sotsialistik taraqqiyot partiyasi, Livan kommunistik partiyasi, Xalq nosiriylar tashkiloti, Kataib partiyasi, Amal shialar harakati.

**Iqtisodi, transport kommunikatsiyalari.** Beqaror ichki siyosiy holat, Isroil tomonidan Livan janubining bir necha marotaba okkupatsiya qilinishi mamlakatda iqtisodiy ahvolning og'irlashuviga, tadbirkorlikning keskin pasayishiga, tashqi savdoning kamayishiga olib keldi. Sanoatning nisbatan yaxshiroq taraqqiy etgan sohalari: neftni qayta ishlash, oziq-ovqat, to'qimachilik. Bayrut hozirgi kunda Yaqin Sharqning moliya markazlaridan biri hisoblanadi (mamlakatning oltin-



valuta zaxirasi 4300 mln dollar). Qishloq xo'jaligida (YIMning 30%) sitrus mevalar, zaytun, kartoshka, olma, tamaki, uzum yetishtiriladi. 2006-yil YIM miqdori 24226 mln dollarni (aholi jon boshiga — 6169 doll.) tashkil etgan. Asosiy savdo hamkorlari: Saudiya Arabistoni, Shveysariya, Italiya, Iordaniya, Fransiya.

Temiryo'llarining umumiy uzunligi — 222 km, avtomobil yo'llari — 7300 km (shundan 6200 km — qattiq qoplamali). Mamlakat portlari: Bayrut, Tripoli, Sayda.

**Tarixi.** M. a. IV ming yillikda hozirgi Livan hududida finikiyaliklarning shahar-davlatlari shakllana boshladi. M. a. VIII asrdan I asrga qadar Livan Sharqning turli davlatlari tarkibida bo'lib keldi. M. a. I asrda Livan Rim imperiyasi tarkibiga kirdi. 637-yili arablar tomonidan bosib olingan bo'lsa, 1098-yildan 1289-yilga qadar Yaqin Sharqda salibchi-ritsarlar tomonidan tashkil etilgan xristianlar davlati tarkibida bo'ldi. Keyin mamlakat Misr mamluklari qo'lga o'tdi, XVI asrdan esa Usmoniylar imperiyasi tarkibiga kirdi. Biroq mamlakatdagi hokimiyat amalda XVI—XVII asrlarda Maonlar sulolasi amirlariga, XVII asr oxirlaridan esa Shaxobiyalar sulolasi amirlari qo'lida bo'lib keldi. 1840-yili Bashir Shaxob taxtdan ag'darib tashlandi va Livan yana turklar qo'l ostiga o'tdi. 1860-yili Fransiya imperatori Napoleon III Livanga ekspeditsion korpus jo'natdi, natijada xalqaro komissiya turk hukumatini Livan muxtoriyatini tan olishga majbur qildi. Birinchi jahon urushi boshlarida Turkiya bu kelishuvni bekor qildi. Lekin Turkiyaning urushdagi mag'lubiyatidan so'ng bu hudud Fransiya mandati ostiga o'tdi (1920). 1926-yili Livan respublika deb e'lon qildi. 1943-yilda Livan mustaqillikni qo'lga kiritganidan so'ng mamlakat ichki ziddiyatlarni bartaraf qilishga muvaffaq bo'ldi, faqat 1975-yili mamlakatda arablar va xristianlar o'rtasida fuqarolar urushi boshlandi. Unga Suriya va Isroil aralashdi. 1992-yili 1972-yildan beri birinchi marta parlamentga saylovlar bo'lib o'tdi.

## LIVIYA

*Rasmiy nomi — Liviya Arab Sotsialistik Xalq Jamahiriyasi. Poytaxti — Tripoli. Hududi — 1759540 km<sup>2</sup>. Aholisi — 6046124 kishi (2007). Davlat tili — arab. Dini — islom. Pul birligi — liviya dinori.*

**Geografik joylashuvi va tabiati.** Shimoliy Afrikada joylashgan. Sharqda Misr bilan (chegara uzunligi — 1150 km), janubda Chad respublikasi (1055 km) va Niger bilan (354 km), janubi-sharqda Sudan bilan (383 km), g'arbda Jazoir bilan (982 km), shimoli g'arbda Tunis bilan (459 km) chegaradosh. Shimoli O'rta Yer dengizi bilan tutashib ketgan. Chegarasining umumiy uzunligi — 4383 km, sohil bo'ylab chegara uzunligi esa — 1770 km. Mamlakat hududining katta qismini yassitog'lik, shimolini esa O'rta Yer dengizi bilan tutashgan qirg'oqoldi tekisliklari egallaydi. Sharqida esa Siva, Fayyum, Jalo, Kufra vohalari bilan bo'linib turadigan Liviya cho'llari joylashgan. Asosiy tabiiy boyliklari neft va tabiiy gaz.

Iqlimi — subtropik.

**Davlat tuzilishi, siyosiy partiyalari.** Davlat tuzilishi — jumhuriyat (xalq davlatchiligi). Liviya 1951-yil 24-oktabrda Italiyadan mustaqillik oldi. Qonunchilik italyan fuqarolik huquqiga va islom qonunchiligiga asoslangan. Milliy bayrami — 1-sentabr — inqilob kuni (1969). Davlat va hukumat boshlig'i — Liviya Inqilobi yo'l boshchisi Muammar Kaddafi (1969-yil sentabrdan beri hokimiyat tepasida). Qonun chiqaruvchi hokimiyat Umumiy Xalq Kongressi tomonidan amalga oshiriladi. Siyosiy partiyalar 1977-yili tarqatib yuborilgan.

**Iqtisodi, transport kommunikatsiyalari.** Iqtisodiyotining asosini neft qazib olish sanoati tashkil qiladi. 2006-yil YIM miqdori 65790 mln dollarni (aholi jon boshiga — 10881 doll.) tashkil etgan. Mamlakatning asosiy portlari: Tobruk, Tripoli, Beng'oz, Morea-al-Breyka va boshqalar.

**Tarixi.** M. a. VIII asrda hozirgi Liviya hududida

Finikiya shahar-davlatlari shakllana boshladi, m. a. VII asrdan esa bu hudud grek koloniyalariga aylantirildi. M. a. I asrdan boshlab Rim provinsiyasi, V asrda esa vandallar tomonidan bosib olindi. 533-yili Vizantiya imperiyasining bir qismiga aylandi. 643-yili mamlakatni arablar egallashdi, ular bu yerda o'z tillarini va islom dinini joriy qilishdi. XVI asrda Liviya turk korsarlari ta'siriga tushib, Usmoniyalar imperiyasining tarkibiy qismiga aylandi. Italiyaliklar bu yerga XIX asrning oxirlarida kirib kelishdi, 1911-yili esa Turkiyaga qarshi urush e'lon qilib, Liviyaning ayrim hududlarini egalladilar. 1916-yili mamlakat yana turklar tomonidan bosib olindi, lekin birinchi jahon urushidan so'ng Italiya bu yerda o'z hukmronligini qayta tikladi.

1934-yili hozirgi Liviya hududlari Italiya mustamlakasi deb e'lon qilindi, lekin 1943-yili nemis va italyan qo'shinlarining mag'lubiyatidan so'ng Fransiya va Buyuk Britaniya boshqaruvi ostiga o'tdi. 1951-yili BMT rezolyutsiyasiga ko'ra Liviya mustaqil davlat deb e'lon qilindi. Liviya qiroli Idris I mamlakatni 1969-yilga qadar idora qildi. 1969-yili qiroli Idris I rasmiy tashrif bilan Turkiyaga jo'nab ketganida bir guruh ofitserlar hokimiyatni egallab olishdi va mamlakatni Liviya Arab Respublikasi deb e'lon qilishdi. 1977-yil 3-martdan boshlab mamlakat Liviya Arab Sotsialistik Xalq Jamahiriyasi deb atalib kelmoqda.

## LITVA

*Rasmiy nomi — Litva Respublikasi. Poytaxti — Vilnyus. Hududi — 65200 km<sup>2</sup>. Aholisi — 3582437 kishi (2007). Davlat tili — litva. Dini — katolik. Pul birligi — lit.*

**Geografik joylashuvi va tabiati.** Yevropaning Boltiq dengizi qirg'og'ida joylashgan davlatlaridan biri. Janubi va sharqi Belarus bilan (chegara uzunligi — 502 km), janubi-g'arbi Rossiya (chegara uzunligi — 227 km) va Polsha (91 km) bilan, shimoli Latviya (453 km) bilan chegaradosh. Chegarasining umumiy uzunligi—1273 km, sohil bo'ylab chegara uzunligi esa—

108 km. Mamlakatning katta qismi tekisliklardan iborat. G'arbi va sharqida tepaliklar bor. Asosiy daryosi — Nyamunas (Neman), juda ko'p ko'llar bor. Yoqut mamlakatning muhim tabiiy resurslaridan biri hisoblanadi. Shuningdek, torf va qurilish materiallarining zaxiralari bor. Umumiy yerlarining deyarli teng yarmi ishlov beriladigan yerlar hisoblanadi. 22% yerlar o'tloq va yaylovlardan iborat.

Iqlimi — o'zgaruvchan, kontinental.

**Davlat tuzilishi, siyosiy partiyalari.** Davlat tuzumi — respublika. Mamlakat 44 ta rayon va markazga bo'ysunuvchi 11 ta shaharga bo'lingan. Litva 1991-yil 6-sentabrda o'z mustaqilligini e'lon qilgan (oldingi nomi Litva SSR). Milliy bayrami — 16-fevral — Litva davlati tiklangan kun (1918). Ijroiya hokimiyati — prezidentga (davlat boshlig'i) va premyer-ministr boshchiligidagi hukumatga tegishli. Qonun chiqaruvchi hokimiyat bir palatali parlament — Seym tomonidan amalga oshiriladi. Yirik partiyalari: Litva demokratik ishchilar partiyasi, Litva demokratik partiyasi, Litva sotsial-demokratlar partiyasi, Litva mustaqilligi partiyasi, Litva xristian-demokratlar partiyasi.

**Iqtisodi, transport kommunikatsiyalari.** Litvaning industrial-agrar iqtisodiyoti hozirgi vaqtda markazlashtirilgan boshqaruv tizimidan bozor munosabatlariga o'tish davrini o'z boshidan kechirmoqda. Sanoatning nisbatan taraqqiy etgan sohalari: mashinasozlik, metallga ishlov berish, kimyo, yog'ochni qayta ishlash, to'qimachilik, oziq-ovqat, qurilish materiallarini ishlab chiqarish. Qishloq xo'jaligida (YIM — 23%) aholining uchdan bir qismi band. Qishloq xo'jaligining muhim tarmoqlaridan biri go'sht-sut ishlab chiqarish sohasidir. Kartoshka, qand lavlagi, sabzavotlar yetishtiriladi. 2006-yil YIM miqdori 44779 mln dollarni (aholi jon boshiga — 12500 doll.) tashkil etgan. Asosiy savdo hamkorlari: Rossiya, Germaniya, Polsha, Belarus va Shimoliy Yevropa mamlakatlari.

Temiryo'llarining umumiy uzunligi — 2010 km, avtomobil yo'llari 44200 km (35500 km — qattiq qoplamali). Ichki suv yo'llari — 600 km. Asosiy dengiz porti Klaypeda.

**Tarixi.** Hozirgi Litva hududida shakllangan dastlabki davlati — Buyuk Litva knyazligi edi. XIII asrning o'rtalarida paydo bo'lgan bu knyazlik knyaz Gediminas davrida Litva va Belarus yerlarini, shuningdek, hozirgi Ukrainaning bir qismini qo'shib oladi. Litva knyazlarining Tevton ordeniga qarshi olib borgan kurashi 1410-yil Gryunvald jangida mag'lubiyat bilan yakunlandi. 1569-yili Litva Buyuk knyazligi Lyublin shartnomasiga ko'ra Rech Pospolita tarkibiga kirdi. 1795-yili Litva Rossiya tomonidan anneksiya qilindi va 1918-yilga qadar Rossiya imperiyasi tarkibida bo'lib keldi. 1918-yil dekabrda mamlakatda sovet tartibi o'rnatildi, biroq 1919-yil kuzida u bekor qilindi. 1926-yilgi davlat to'ntarishi natijasida hokimiyatga diktator Voldemoras keldi. 1940-yil iyul oyida mamlakatga sovet qo'shinlari kiritildi, Litva SSSR tarkibidagi respublikaga aylandi. 1941-yili Litva nemis qo'shinlari tomonidan bosib olindi. 1944-yili mamlakat ozod qilingandan so'ng sovet hokimiyati qayta tiklandi. 1990-yili Sovet ittifoqi respublikalari ichida birinchi bo'lib Litva o'z mustaqilligini e'lon qildi. Sovet hukumati tomonidan u 1991-yili tan olingan. Shu yil sentabrda Litva BMT tarkibiga kirdi, 2004-yili esa — YI va NATO a'zosi bo'ldi.

## LIXTENSHTEYN

*Rasmiy nomi — Lixtenshteyn Knyazligi. Poytaxti — Vadus. Hududi — 157 km<sup>2</sup>. Aholisi — 33922 kishi (2007). Davlat tili — nemis. Dini — katoliklar (87%), protestantlar (7%). Pul birligi — shveysariya franki.*

**Geografik joylashuvi va tabiati.** Markaziy Yevropada joylashgan. Shimolda, g'arbda va janubda Shveysariya bilan (chegara uzunligi — 41 km), sharqda Avstriya bilan (37 km) chegaradosh. Umumiy chegara uzunligi — 78 km. Mamlakat Alp tog'larida joylashgan bo'lib, uning eng baland nuqtasi — 2599 m (Forder-Grausshpits tog'i). G'arbda Reyn daryosi havzasida tog'lar pasaya boradi. Shveysariya bilan chegara Reyn daryosi orqali o'tgan. Lixtenshteynning asosiy tabiiy resursi uning gidroenergetik potensialidir.

**Davlat tuzilishi, siyosiy partiyalari.** Davlat tuzilishi — konstitusion monarxiya. Lixtenshteyn tarixiy ikki qismdan Oberland (yuqori Lixtenshteyn markazi Vaduts shahri) va Unterland (quyi Lixtenshteyn markazi Shellenberg shahri) iborat. Lixtenshteyn 1866-yildan buyon mustaqil davlat. Milliy bayrami — 14-fevral — hokimiyatdagi knyaz Gans-Adam II fon Lixtenshteynning tug‘ilgan kuni. Davlat boshlig‘i — knyaz (knyaz Gans-Adam II fon Lixtenshteyn 1990-yili taxtga o‘tirgan, amalda 1984-yildan buyon davlatni boshqarib kelmoqda), ijroiya hokimiyat premyer-ministr boshchiligidagi hukumat boshlig‘iga tegishli qonun chiqaruvchi hokimiyat knyaz va parlament — Landtag tomonidan amalga oshiriladi. Mamlakatda quyidagi siyosiy partiyalar faoliyat yuritmoqda: Vatan ittifoqi, Byurgerlar taraqqiyot partiyasi, Xristian ijtimoiy partiyasi.

**Iqtisodi, transport kommunikatsiyalari.** Mamlakat iqtisodiyoti asosan yengil sanoatning kichik korxonalari va fermer xo‘jaliklariga tayanib taraqqiy etadi. Sanoat tarmoqlari orasida uskunaso‘zlik, metallga ishlov berish, vakuum texnikasi ishlab chiqarish, elektron sistemalar va makroprotsektorlar ishlab chiqarish sohalari yaxshi rivojlangan. Shuningdek, an’anaviy sanoat tarmoqlari, to‘qimachilik, farmatsevtika, keramik buyumlar ishlab chiqarish taraqqiy etgan. Turizmdan tashqari kolleksionerlar uchun pochta markalari ishlab chiqarish ham davlat xazinasiga sezilarli mablag‘lar keltiradi. Tadbirkorlik faoliyatiga past soliqlarning joriy qilinishi va kompaniyalarni ro‘yxatdan o‘tkazishning osonligi sababli Lixtenshteynda juda ko‘plab kompaniyalarning idoralari paydo bo‘ldi (bunday kompaniyalar umumiy davlat daromadining 30% ini beradi). Mamlakat iqtisodiyoti Shveysariya iqtisodiyoti bilan uzviy bog‘liq, shuning uchun yashovchilarning yashash darajasi Shveysariyanikidan deyarli farq qilmaydi. 2006-yil YIM miqdori 870 mln dollarni (aholi jon boshiga — 24320 doll.) tashkil etgan. Asosiy savdo hamkorlari: YI mamlakatlari, Shveysariya.

Temiryo‘llarining umumiy uzunligi — 18,5 km (Avstriyaning federal mulki), avtomobil yo‘llari — 32293 km (hammasi qattiq qoplamali).

**Tarixi.** XVII asrda Shellenberg va Vadutsni sotib olgan avstriyalik Lixtenshteynlar oilasi 1719-yil 15-avgustda knyazlik maqomini olishgan. Lixtenshteyn knyazligi 1808—1815-yillarda Reyn Ittifoqiga, 1815—1866-yillarda Germaniya ittifoqiga kirdi. 1866-yildan buyon mustaqil davlat hisoblanadi. 1919-yilga qadar Avstriya bilan bo'xona ittifoqida bo'lgan bo'lsa, 1924-yildan Shveysariya bilan umumiy valyuta va bo'xona ittifoqida bo'lib kelmoqda.

## LYUKSEMBURG

*Rasmiy nomi — Lyuksemburg Buyuk Gersogligi. Poytaxti — Lyuksemburg. Hududi — 2,6 ming km<sup>2</sup>. Aholisi — 472364 kishi (2007). Davlat tili — nemis va fransuz. Dini — katolik dini (97%), boshqa dinlar (3%). Pul birligi — yevro.*

**Geografik joylashuvi va tabiati.** G'arbiy Yevropada joylashgan (Gollandiya va Belgiya bilan birga Benilyuks guruhiga kiradi). G'arbi va shimoli Belgiya bilan (chegara uzunligi — 148 km). Janubi Fransiya bilan (73 km), sharqi Germaniya bilan (138 km) chegaradosh. Chegarasining umumiy uzunligi 359 km. Shimolida Ardenn tog' tizmasi joylashgan bo'lib, uning yuqori nuqtasi Burgplats tog'idagi Lyuksemburg cho'qqisi (balandligi 559 m)dir. Qolgan hududlar tepalikli tekisliklardan (Gutland) iborat. Asosiy daryosi — Mozel va uning irmog'i — Zauer. Mamlakat boy temir rudasi konlariga ega.

Iqlimi — mo'tadil, kontinental.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Gersoglikning hozirgi chegaralari o'rnatilgan 1839-yili Lyuksemburg mustaqil davlat bo'ldi. 1867-yilgi London konferensiyasi Lyuksemburni suveren, betaraf davlat deb e'lon qildi. Milliy bayrami — 23-iyun — Lyuksemburg buyuk knyazi Jonning tug'ilgan kuni rasmiy bayram qilinadi. Davlat boshlig'i — Buyuk Lyuksemburg gersogi (Buyuk Lyuksemburg gersogi Jon 1964-yil 12-noyabrdan beri hokimiyat tepasida). Qonun chiqaruvchi hokimiyat Buyuk gersog Lyuk-

semburgskiy va parlament — Deputatlar palatasi tomonidan amalga oshiriladi. Siyosiy partiyalari: Xristian-ijtimoiy xalq partiyasi, Lyuksemburg sotsialistik ishchi partiyasi, Demokratik partiya, Yashillar partiyasi.

**Iqtisodi, transport kommunikatsiyalari.** Mamlakat iqtisodiyoti inflyatsiyaning pastligi va ishsizlikning amalda yo'qligi bilan xarakterlanadi. Sanoatning nisbatan taraqqiy etgan sohalari: metallurgiya, kimyo, oziq-ovqat, oyna va aluminiy ishlab chiqarish. Oxirgi o'n yillikda bank sektori faol rivojlanmoqda. Qishloq xo'jaligi oilaviy fermerlar ishlab chiqarishiga asoslangan bo'lib, ular yuqori darajada mexanizatsiyalashgan. Lyuksemburg savdo va moliya masalalarida iqtisodiy ittifoq tuzgan, shuningdek, Niderlandiya bilan iqtisodiy aloqalarda uzviy bog'langan. 2006-yil YIM miqdori 30923 mln dollarni (aholi jon boshiga — 65464 doll.) tashkil etgan. Asosiy savdo hamkorlari: YI mamlakatlari, AQSH.

Temiryo'llarining umumiy uzunligi — 271 km (243 km elektrlashtirilgan, avtomobil yo'llari — 5108 km (5000 km — qattiq qoplamali). Daryo porti — Mertert.

**Tarixi.** M. a. I asrda hozirgi Lyuksemburg hududiga keltilarning trever qabilasi kelib joylashgan bo'lib, Lotaringiyadagi Buyuk Karl imperiyasining Belgiya provinsiyasi tarkibiga kirgan edi. Lyuksemburg gersogligiga 1354-yili asos solingan. Gersoglik dastlab Burgundlar, keyin Gabsburglar mulki bo'ldi, keyinroq Niderlandiya, Fransiyaning tarkibiga kirdi. 1815-yil Vena kongressining qaroriga ko'ra Germaniyaga berilgan Lyuksemburg Buyuk gersoglikka aylandi va Gollandiya qiroli Giyon I ga sovg'a qilindi. 1839-yili gersoglikning hozirgi chegaralari o'rnatildi, 1867-yilda esa London konferensiyasi Lyuksemburgning suverenitetini belgiladi va betaraf davlat deb e'lon qilindi. Shunga qaramasdan Lyuksemburg hududi nemis qo'shinlari tomonidan Birinchi va Ikkinchi jahon urushlarida okkupatsiya qilindi. 1946-yili Lyuksemburg Buyuk gersogligi Gollandiya va Belgiya bilan bojxona ittifoqiga kirdi (Benilyuks).



## MAVRIKIY

*Rasmiy nomi — Mavrikiy Respublikasi. Poytaxti — Port-Lui. Hududi — 2040 km<sup>2</sup>. Aholisi — 1253427 kishi (2007). Davlat tili — ingliz. Dini — induizm (50%), xristianlik (32,2%), islom (16,1%). Pul birligi — mavrikiy rupiyasi.*

**Geografik joylashuvi va tabiati.** Mavrikiy Hind okeanining g'arbiy qismidagi orollarda joylashgan. Sohil bo'ylab chegara uzunligi — 177 km. Vulqonlar otilishi natijasida vujudga kelgan tepaliklar bu orollarda ko'p bo'lib, dengiz sathidan 826 m balandlikda joylashgan. Yuqori nuqtasi — Pitondela-Ptit-Rivere-Nuar. Qirg'oqlari korall riflari bilan qoplangan. Tabiiy resurslari deyarli yo'q. Ishlov beriladigan yerlar — 54%, o'rmon va changalzorlar 31% ni tashkil qiladi.

**Davlat tuzilishi, siyosiy partiyalari.** Davlat tuzilishi — respublika. Mamlakat 10 ta rayonga bo'lingan. Mavrikiy 1968-yili 12-martda Buyuk Britaniya hamdo'stligidan mustaqillik oldi. 1992-yil 12-martgacha davlat boshlig'i Buyuk Britaniya qirolichasi bo'lib keldi. Uning hokimiyatini general-gubernator amalga oshirar edi. 1992-yil 12-martda Mavrikiyda rasmiy ravishda respublika boshqaruvi shakli joriy qilindi. 12-martda ikkita milliy bayram — Mustaqillik kuni va Respublika kuni nishonlanadi. Ijroiya hokimiyat prezident (davlat boshlig'i) va premyer-ministr (hukumat boshlig'i) tomonidan, qonun chiqaruvchi hokimiyat esa bir palatali parlament — Xalq Yig'ini tomonidan amalga oshiriladi. Yirik siyosiy partiyalari: Jangovar sotsialistik harakat, Mavrikiy jangovar harakati, Leyboristlar partiyasi, Mavrikiy ijtimoiy-demokratik partiyasi.

**Iqtisodi, transport kommunikatsiyalari.** Iqtisodiyotining nisbatan muhim tarmoqlari — shakar ishlab chiqarish, to'qimachilik va turizm hisoblanadi. Keyingi yillarda qishloq xo'jaligining boshqa sohalari (tamaki, makkajo'xori, kartoshka, sholi, maniok, banan yetishtirish) rivojlanganligiga qaramasdan shakarqamish asosiy ekin hisoblanadi va eksportdan keladigan foyda-

ning 40% ini tashkil qiladi. 2006-yil YIM miqdor 14741 mln dollarni (aholi jon boshiga — 11760 doll.) tashkil etgan. Asosiy savdo hamkorlari — YI mamlakatlari, AQSH va JAR.

Temiryo'llari yo'q, avtomobil yo'llari — 1800 km. Asosiy porti — Port-Lui.

**Tarixi.** Mavrikiy 1505-yili portugallar tomonidan ochilgan edi, biroq XVII asrdan gollandlar boshqaruvi ostiga o'tdi. 1715-yili bu orol fransuz mustamlakasiga aylandi va Il-de-Frans deb ataldi. 1810-yilda esa Buyuk Britaniya tomonidan bosib olindi. 1868-yilda mustaqillik olgan Mavrikiy 1992-yili Respublika deb e'lon qilindi.

## MAVRITANIYA

*Rasmiy nomi — Mavritaniya Islom Respublikasi. Poytaxti — Nuakshot. Hududi — 1030700 km<sup>2</sup>. Aholisi — 3268219 kishi (2007). Davlat tili — arab. Dini — islom (davlat dini). Pul birligi — ugiya.*

**Geografik joylashuvi va tabiati.** Afrika qit'asining shimoli-g'arbida joylashgan. Sharqda Mali (chegara uzunligi — 2237 km), janubda Mali va Senegal (chegara uzunligi — 813 km), shimolda Jazoir (chegara uzunligi — 463 km) va G'arbiy Sahroyi Kabir bilan (chegara uzunligi — 1561 km) chegaradosh. Chegarasining umumiy uzunligi — 5074 km, sohil bo'ylab chegara uzunligi — 754 km. Mamlakat hududi asosan pasttekisliklar va uncha baland bo'lmagan yassitog'likdan iborat, shuningdek, Sahroyi Kabirning qumli va toshli cho'llari bilan tutashib ketgan. Asosiy tabiiy resurslari: temir rudasi, mis, fosforitlar, gips.

Iqlimi — tropik, cho'lli.

**Davlat tuzilishi, siyosiy partiyalari.** Davlat tuzilishi — islom respublikasi. Mamlakat gubernatorlar boshchiligidagi 12 ta ma'muriy hudud va alohida poytaxt hududidan iborat. Mavritaniya 1960-yil 28-noyabrda to'liq mustaqillik olgan (oldin — fransuz protektorati). Ushbu sana — Mustaqillik kuni — milliy

bayram hisoblanadi. Qonunchilik islom qonunchiligi — shariatga asoslangan. Davlat boshlig'i va hukumat boshlig'i — prezident. Parlament ikki palatadan — Senat (yuqori palata) va Milliy yig'in (quyi palata)dan iborat. Yirik siyosiy partiyalari: Respublika ijtimoiy-demokratik partiyasi va Demokratik kuchlar ittifoqi.

### ***Iqtisodi, transport kommunikatsiyalari.***

Mavritaniya temir rudasining katta zaxiralariga ega. Bu mamlakat eksportining yarmini tashkil qiladi. Tog'-kon sanoatidan tashqari neftni qayta ishlash va to'qimachilik tarmoqlari ham yaxshi rivojlangan. 2006-yil YIM miqdori 6513 mln dollarni (aholi jon boshiga — 1992 doll.) tashkil etgan. Asosiy qishloq xo'jaligi ekinlari — xurmo, sorgo, yeryong'oq, makkajo'xori, tamaki, shuningdek, chorvachilik yaxshi taraqqiy etgan. Baliq mamlakatning muhim eksport mahsulotlaridan biri hisoblanadi, biroq boshqa davlatlar tomonidan Mavritaniya qirg'oqlarida baliq zaxiralarining doimiy o'zlashtirilishi mamlakatning bu daromad manbayiga putur yetkazmoqda. Muhim savdo hamkorlari: YI mamlakatlari, Yaponiya, Jazoir, Xitoy, AQSH.

Temiryo'llarining umumiy uzunligi — 670 km, avtomobil yo'llarining umumiy uzunligi — 7525 km (1685 km — asfaltlangan).

Portlari: Nuakshot, Nuadibu.

**Tarixi.** VIII—XI asrlarda Mavritaniyaning janubiy qismi G'arbiy Afrikadagi Gana, Tekkur va boshqa davlatlari tarkibida bo'lgan, mamlakat shimoli esa barbar qabilalari nazoratida edi. XI—XII asrlarda Mavritaniya Almoravidlar davlati tarkibiga kirdi, XIV—XV asrlarda esa arablar hukmronligi ostiga o'tdi. 1855-yili mamlakat Fransiya tomonidan okkupatsiya qilindi. 1904-yili Fransiya Mavritaniyani o'z protektorati deb, 1920-yili esa o'z mustamlakasi deb e'lon qildi. 1960-yili mustaqillikka erishganidan so'ng mamlakat bir qator davlat to'ntarishlarini (1917, 1980, 1984) va 1989-yil Mavritaniya va Senegal jamoalari o'rtasidagi etnik qarama-qarshiliklarni o'z boshidan kechirdi.

## MADAGASKAR

*Rasmiy nomi — Madagaskar Respublikasi. Poytaxti — Antananarivu. Hududi — 587041 km<sup>2</sup>. Aholisi — 19423978 kishi (2007). Davlat tili — malagasi va fransuz. Dini — majusiylik (50%), xristianlik (37%), islom (5%), Pul birligi — malagasi franki.*

**Geografik joylashuvi va tabiati.** Hind okeani-ning janubi-g'arbiy qismidagi Madagaskar orolida joylashgan davlat. Madagaskar oroli Afrikaning sharqiy qirg'oqlaridan Mozambik bo'g'ozini bilan ajralgan bo'lib, kattaligi jihatidan dunyoda 4-o'rinda turadigan oroldir. Sohil bo'ylab chegara uzunligi — 4828 km. Orolning butun sharqiy qismida shimoldan janubga qarab vulqon yasitog'ligi cho'zilib ketgan bo'lib, uning eng yuqori qismi shimolda joylashgan Saratona massividir. Unda mamlakatning yuqori nuqtasi Moromonotro tog'i (2876 m) bor. Sharqiy sohil bo'ylab ingichka qirg'oqbo'yi tekisligi o'tgan. Orolning g'arbida katta quyi pasttekisliklar mavjud. Mamlakatning asosiy daryolari — Manguki, Bemorivu, Betsibuka. Eng katta ko'li — Alaotra. Orolida nikel, kobalt, grafit konlari bor. Boshqa tabiiy resurslardan baliq va dengiz mahsulotlari ko'p olinadi. Ishlov beriladigan yerlar umumiy yerlarning 4% ini, o'tloq va yaylovlar — 58% ini, o'rmon va changalzorlar 26% ini tashkil qiladi.

Iqlimi — tropik.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibida 6 ta faritani (provinsiya) bor. Madagaskarning mustaqilligi 1960-yil 26-iyunda e'lon qilingan (ilgari Fransiya mustamlakasi bo'lgan). Bu sana milliy bayram sifatida nishonlanadi. Qonunchilik Fransiya fuqarolik huquqiga asoslangan. Ijroiya hokimiyat prezidentga (davlat boshlig'i) va premyer-ministrga (Ministrlar Kengashi raisi) tegishli. Qonun chiqaruvchi hokimiyat ikki palatali parlament — Senat (yuqori palata) va Milliy yig'in (quyi palata) tomonidan amalga oshiriladi. Asosiy siyosiy partiyalari: Taraqqiyot va demokratiya uchun milliy ittifoq,

Madagaskar mustaqilligi kongressi partiyasi, Madagaskar yangilanish avangardi partiyasi, Fixaonan partiyasi.

***Iqtisodi, transport kommunikatsiyalari.***

Madagaskar — dunyoning kambag'al davlatlaridan biri bo'lib, iqtisodiyotida asosiy sektor — agrar (baliqchilik va o'rmonchilik qo'shilganda) sektor hisoblanadi. Bu tarmoq YIMning 40% ini va eksportdan tushadigan valyuta tushumining 70% ini beradi. Asosiy eksport qilinadigan mahsulotlari qahva va shirinliklar. Sanoat (YIMning 20% i) qishloq xo'jalik mahsulotlarini qayta ishlash va to'qimachilik bilan cheklangan. Sanoatni rivojlantirish davlat tomonidan ta'minlanadi. Chet el investitsiyasi bilan ishlayotgan korxonalar, chetdan keltiriladigan asbob-uskunalar, ularning ehtiyot qismlariga qattiq nazorat o'rnatilgan. 2006-yil YIM miqdori 14746 mln dollarni (aholi jon boshiga — 759 doll.) tashkil etgan.

Asosiy savdo hamkorlari: Fransiya, Yaponiya, Rossiya, Germaniya, AQSH.

Temiryo'llarining umumiy uzunligi — 1020 km, avtomobil yo'llarning uzunligi — 40000 km (4694 km — qattiq qoplamali yo'llar).

Asosiy portlari: Anseranana, Maxadzonga, Tuamasina, Tuliara.

***Tarixi.*** XII asrda kelib chiqishi indoneziyalik va afrikalik bo'lgan xalqlar kelib joylashishdi va arablarning dastlabki shahar koloniyalari paydo bo'ldi. XIV—XV asrlarda esa orolning markaziy qismida Imerin davlati vujudga keldi. Orolni yevropaliklardan birinchi bo'lib 1500-yili portugal sayyohi Diyego Dias ochdi. XVII asrda orol hududi ko'plab mayda knyazliklarga bo'linib ketgan edi. XVIII asrda ular yagona Merina qirolligiga birlashishdi. Madagaskar 1885-yili Fransiya protektorati, 1896-yili esa mustamlakasiga aylandi. 1958-yili o'z-o'zini boshqarish huquqini qo'lga kiritgan Madagaskar 1960-yili mustaqil davlat bo'ldi. 1972-yili mamlakatda harbiy to'ntarish o'tkazildi, 1975-yili esa prezident Ritsiroka mamlakatni Madagaskar Demokratik Respublikasi deb e'lon qildi. 1991-yili mamlakatda hukmron avtoritar tartiblarga qarshi chiqishlar bo'ldi, biroq ular

shafqatsiz bostirildi. 1993-yili prezident saylovlarida muxolifatchi kuchlar lideri Zofi g'alaba qozondi.

## MAYOTTA

*Rasmiy nomi — Mayotta dengizorti hududi. Poytaxti — Mamotsu. Hududi — 374 km<sup>2</sup>. Aholisi — 206960 kishi (2007). Tili — fransuz. Dini — islom (97%). Pul birligi — fransuz franki.*

**Geografik joylashuvi va tabiati.** Janubiy Afrikadagi Madagaskar va Mozambik o'rtasidagi Mozambik bo'g'ozida joylashgan. Mayotta — Komor arxipelagidagi to'rt oroldan eng janubda joylashgan orol. Mayotta 2 ta asosiy orol va taxminan 30 ta mayda orollardan iborat. Orollar yuzasining asosiy qismi chuqur daralar va vulqonli tog' cho'qqilaridan iborat. Eng yuqori nuqtasi — Bexari (660 m).

Iqlimi — tropik dengiz iqlimi.

**Davlat tuzilishi va siyosiy partiyalari.** Mayotta Fransiyaning dengizorti hududi hisoblanadi. Davlat boshlig'i — Fransiya prezidenti. Hukumat boshlig'i — Yuqori Kengash prezidenti (kengash a'zolari 6 yil muddatga saylanadi).

**Iqtisodi, transport kommunikatsiyalari.** Mayotta iqtisodida asosan qishloq xo'jaligi muhim o'rin tutadi. Davlat o'z-o'zini qishloq xo'jaligi mahsulotlari bilan to'la ta'minlay olmaydi. Mayotta Fransiyaning moliyaviy yordamiga tayanadi. Chetga vanil, ilang-ilang, dolchin, kokos yong'og'ining mag'zini eksport qiladi. Chetdan kimyo sanoati mahsulotlari, mashina va jihozlar keltiriladi. 2006-yil YIM miqdori 4668 mln dollarni (aholi jon boshiga — 22555 doll.) tashkil etgan. Asosiy savdo hamkorlari — Fransiya, Komor orollari, Afrika va Janubiy Osiyo mamlakatlari.

**Tarixi.** 1841-yilda Mayotta sultoni orolni Fransiya boy berdi va shu paytdan boshlab Mayotta Fransuz imperiyasi tarkibiga kiritildi. 1946-yilda Komor orollari dengizorti hududi maqomini oldi. 1974-yilda o'tkazilgan referendumda arxipelagning 3 ta oroli

mustaqillik uchun ovoz berdilar, ammo Mayotta Fransiya tarkibida qolishga qaror qildi. 1998-yildan boshlab Mayottada uning maqomini o'zgartirish harakati (departament maqomini olish) davom etmoqda.

## MAKEDONIYA

*Rasmiy nomi — Makedoniya Respublikasi. Poytaxti — Skope. Hududi — 25713 km<sup>2</sup>. Aholisi — 2057419 kishi (2007). Davlat tili — makedon. Dini — pravoslav (59%), islom (26%), katolik (4%), protestant (1%). Pul birligi — makedoniya dinori.*

**Geografik joylashuvi va tabiati.** Bolqon yarimorolida joylashgan davlat (Yevropaning janubi-sharqi), janubda Gretsiya (chegara uzunligi — 228 km), sharqda Bolgariya (148 km), shimolda Serbiya hamda Chernogoriya davlatlari (221 km), g'arbda Albaniya bilan (151 km) chegaradosh. Chegarasining umumiy uzunligi 748 km. Hududi tog'li, tog' massivlari chuqurliklar bilan almashadi. Suvi ko'p, shuningdek, kichik, lekin tezoqar daryolari ko'p. Asosiy daryosi — Vardar. Eng katta ko'llari bir qismi mamlakat hududiga kiradigan — Oxrida va Prespa ko'llaridir. Asosiy tabiiy resurslari — qo'rg'oshin, rux, mis, temir rudasi.

Iqlimi — mo'tadil-kontinental. O'simlik dunyosi juda boy. Makedoniya tog'lari buk, eman, qarag'ay o'rmonlari bilan qoplangan.

**Davlat tuzilishi, siyosiy partiyalari.** Davlat tuzilishi — respublika. 1991-yil 20-noyabrda Makedoniya Yugoslaviyadan mustaqillik oldi. Ijroiya hokimiyat prezidentga (davlat boshlig'i) va premyer-ministr boshchiligidagi Ministrlar Kengashiga tegishli. Qonun chiqaruvchi hokimiyat bir palatali parlament — Assambleya tomonidan amalga oshiriladi. Siyosiy partiyalari: Umummakedoniya inqilobiy tashkiloti, Makedoniya milliy birligi demokratik partiyasi, ijtimoiy-demokratik ittifoq, Demokratik taraqqiyot partiyasi, Milliy demokratik partiya, Islohotchi kuchlar ittifoqi, Sotsialistik partiya.

### ***Iqtisodi, transport kommunikatsiyalari.***

Respublika iqtisodiyoti chetdan keltiriladigan neft va gazga, shuningdek, zamonaviy mashina uskunalari va ehtiyot qismlarga to'liq bog'liq. Sanoatda ko'proq qazib olish va qayta ishlash (ko'mir, qo'rg'oshin, rux, temir va nikel rudalarini qazib olish va qayta ishlash) sohalari rivojlangan. Qishloq xo'jaligining rivojlanish darajasi (YIM — 12%) mamlakatning oziq-ovqatga bo'lgan talabini qondirish imkonini beradi. Asosiy qishloq xo'jalik ekinlari — bug'doy, makkajo'xori, mevalar, sabzavotlar va tamaki. 2006-yil YIM miqdori 13533 mln dollarni (aholi jon boshiga — 6577 doll.) tashkil etgan. Asosiy savdo hamkorlari: sobiq Yugoslaviya mamlakatlari, Germaniya, Gretsiya, Albaniya.

Avtomobil yo'llarining umumiy uzunligi — 10591 km.

**Tarixi.** M. a. VIII asrda Perdikka I hozirgi Makedoniya hududida birinchi makedon qirolligini tashkil etdi. Bu davlat m. a. 513-yili fors podshosi Doro I tomonidan bosib olingan. M. a. 479-yili Aleksandr I forslarni jangda yanchib mamlakat mustaqilligini qaytarib oldi. Mamlakatda m. a. 359-yili absolyut monarxiya o'rnatilgan Filipp II davrida esa butun Gretsiya bosib olindi. Buyuk Aleksandr m. a. 334—323-yillarda Makedoniya hududlarini forslar davlati va boshqa davlatlar hisobiga kengaytirib katta imperiya tuzdi. Aleksandr Makedonskiy imperiyasi qulaganidan so'ng mamlakatni m. a. 148-yilga qadar antigonidlar sulolasi boshqardi. M. a. 148-yili esa Makedoniya Rim provinsiyalaridan biriga aylandi. 345-yili Vizantiya imperiyasining bir qismiga aylangan Makedoniyaga varvarlar tez-tez bostirib kirishardi. VI asrdan boshlab hozirgi Makedoniya hududiga slavyan qabilalarining kirib kelishi, shuningdek, IX—X asrlarda Bolgariyaga qaramlik Makedoniya etnik tarkibini sezilarli darajada o'zgarishiga olib keldi. 1371-yili Makedoniya Serbiya va Gretsiya ta'sir doiralari bo'lingan, turklar tomonidan bosib olindi va 1913-yilga qadar turklar hukmronligi ostida qolib ketdi. Ikkinchi Bolqon urushidan so'ng Buxarest shartnomasiga ko'ra Makedoniya Bolgariya, Gretsiya va Serbiya o'rtasida bo'lib olindi. Serbiya qirolligi tarkibiga kirgan Vardar Makedoniyasi (1929-yildan boshlab Yugoslaviya) ikkinchi ja-



hon urushi paytida Bolgariya tomonidan anneksiya qilindi, lekin ozod qilinganidan so'ng xalq respublikasi sifatida Yugoslaviya tarkibiga kirdi. 1963-yildan YSFR tarkibidagi sotsialistik respublika bo'lgan Makedoniya 1991-yili o'z mustaqilligini e'lon qildi. Shundan so'ng Gretsiya bilan mamlakat nomi masalasida bahs kelib chiqdi.

## MALAVI

*Rasmiy nomi — Malavi Respublikasi. Poytaxti — Lilongve. Hududi — 118484 km<sup>2</sup>. Aholisi — 13605333 kishi (2007). Davlat tili — ingliz va chicheva. Dini — xristianlik (40%), islom (15%), qolganlari majusiylar. Pul birligi — malavi kvachasi.*

**Geografik joylashuvi va tabiati.** Afrika qit'asining janubi-sharqida joylashgan davlat. Janubda va janubi-sharqda Mozambik (chegara uzunligi — 1569 km), g'arbda Zambiya (837 km), shimolda Tanzaniya bilan (475 km) chegaradosh. Chegarasining umumiy uzunligi 2881 km. Sharqda Tanzaniya va Mozambik bilan chegara Nyasa ko'li orqali o'tgan. Mamlakatning katta qismi o'rtacha balandligi 1000—1500 m bo'lgan yassitog'lar bilan band. Mamlakatning eng yuqori nuqtasi Mulone (3002 m) tog'i Malavining janubiy qismidagi baland tog'liklarda joylashgan. Mamlakatning bosh daryosi — Shire. Eng yirik ko'li — Nyasa (Malavi)ning bir qismi mamlakat hududiga kirgan va sharqiy chegaralarning katta qismini shakllantirgan. Foydali qazilmalardan temir rudasi, marmar, ko'mir, boksitlar ko'proq uchraydi.

Iqlimi — ekvatorial mussonli.

**Davlat tuzilishi, siyosiy partiyalari.** Davlat tuzilishi — prezident respublikasi. Mamlakat o'z navbatida okruglarga bo'linadigan uchta provinsiyalarga (Shimoliy, Markaziy va Janubiy) bo'lingan. 1964-yili Malavi (oldingi nomi — Nyasalend, Buyuk Britaniya mustamlakasi) o'z mustaqilligini e'lon qildi. 1966-yili esa Malavi Respublikasi e'lon qilindi. 6 iyul — mamlakatning milliy bayrami (Mustaqillik kuni) hisoblanadi. Davlat va hukumat boshlig'i — prezident.

Qonun chiqaruvchi hokimiyat bir palatali parlament — Milliy Assambleya tomonidan amalga oshiriladi. Yirik siyosiy partiyalari: Birlashgan demokratik front, Malavi kongressi partiyasi, Malavi Sotsialistik Ligasi, Ikkinchi respublika uchun kongress, Malavi ozodligi uchun harakat, Malavi xalq partiyasi.

**Iqtisodi, transport kommunikatsiyalari.** Malavi dunyoning iqtisodiyoti nisbatan kam rivojlangan davlatlaridan biri bo'lib, asosan agrar sektorga (qishloq xo'jaligi YIMning 40% ini va eksport daromadining 90% ini ta'minlaydi) asoslangan. Asosiy qishloq xo'jaligi ekinlari — tamaki, shakarqamish, paxta, choy, mayiz, yong'oq, sholi (tamaki, choy va shakar qishloq xo'jaligi mahsulotlarining 82% ini tashkil etadi) hisoblanadi. 2006-yil YIM miqdori 7065 mln dollarni (aholi jon boshiga — 600 doll.) tashkil etgan. Chorvachilikning asosiy sohasi — qo'ychilik. Hamkorlari: JAR, AQSH, Buyuk Britaniya, Yaponiya.

Temiryo'llarining umumiy uzunligi — 789 km, avtomobil yo'llari — 13135 km (2364 km — asfaltlangan), ichki suv yo'llari — 150 km.

**Tarixi.** XV asr oxirlarida hozirgi Malavi hududida Nyasa ko'li atrofida Malavi qirolligi tashkil topdi. XVII asrda mamlakatga dastlab yevropaliklar (portugallar) kirib kela boshladi, lekin mamlakatni mustamlakaga aylantirish faqat XIX asrda bu yerga 1859-yili ingliz sayohatchisi Livingston kelganidan keyin boshlandi. 1891-yili mamlakat Nyasalend nomi bilan Buyuk Britaniya protektorati deb e'lon qilindi. 1953-yili Nyasalend Rodeziya va Nyasalend Federatsiyasi tarkibiga kirdi, biroq mamlakatda mustaqillik uchun 1959-yilda boshlangan harakat 1963-yili mamlakatni federatsiya tarkibidan chiqishga olib keldi. Shu yilning o'zida Nyasalend o'z-o'zini boshqarish huquqini oldi, 1964-yil 6-iyulda esa Malavi nomi bilan Buyuk Britaniya Hamdo'stligi tarkibidagi mustaqil davlat deb e'lon qilindi. 1966-yildan — Malavi Respublikasi. Mamlakatni umrbod prezident qilib saylangan Kamuzu Bonda boshqarmoqda. Uni hukmron Malavi kongressi partiyasi (yagona) qo'llab-quvvatlaydi. XX asrning 90-yillarida muxolifatchi kuchlar K.Bondaning diktatorlik

rejimiga qarshi kurash boshlab 1994-yili hokimiyat tepasiga Bakili Muluzi keladi. 1997-yili Bonda 99 yoshida vafot etadi.

## MALAYZIYA

*Rasmiy nomi — Malayziya. Poytaxti — Kuala-Lumpur. Hududi — 332,8 km<sup>2</sup>. Aholisi — 24825707 kishi (2007). Davlat tili — malayya. Dini — islom (50%), buddizm, konfutsiylik, hinduizm, taoizm, xristianlik. Pul birligi — ringit.*

**Geografik joylashuvi va tabiati.** Janubi-Sharqiy Osiyo davlati bo'lib, Malakka yarimorolining janubida (G'arbiy Malayziya) va Kalimantan orolining shimoliy qismida (Sharqiy Malayziya) joylashgan. Sharqiy Malayziya g'arbda va janubda Indoneziya bilan (chegara uzunligi 1782 km), shimolda Bruney bilan (381 km) chegaradosh, G'arbiy Malayziya esa shimolda Tailand (506 km) bilan chegaradosh. Shimoliy hududlari janubiy Xitoy dengizi, shimoli-sharqi Sulu dengizi, sharqi Sulavesi dengizi bilan tutashib ketgan. Chegarasining umumiy uzunligi — 2669 km. Mamlakatning Malakka yarimorolida joylashgan qismida bir necha parallel ravishda joylashgan tog' tizmalari va ko'p sonli vodiylari bor. Klimantan orolida ham uncha baland bo'lmagan tepaliklar va tog'lar ko'p. Bu yerda mamlakatning eng baland nuqtasi Kikabalu (4101 m) tog'i joylashgan. Qirg'oq bo'ylab tekisliklar joylashgan. Mamlakatda ko'p sonli uncha uzun bo'lmagan, lekin suvi ko'p daryolari bor. Yirik daryolari — Paxang, Radjang, Kinabantang. Malayziyada qo'rg'oshin va volframning yirik konlari bor. Boshqa tabiiy resurslardan mamlakatda neft, mis va temir rudasi, tabiiy gaz, yog'och, kauchuk, yog' daraxtlari ko'p.

Iqlimi — ekvatorial.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat tarkibiga 13 ta shtat va 2 ta federal hudud (Kuala-Lumpur va Lubuan oroli). Malayziya mustaqilligi 1957-yil 31-

avgustda e'lon qilingan (milliy bayram — Malayziya-ning mustaqillik kuni). Qonunchilik ingliz umumiy huquqiga asoslangan. Ijroiya hokimiyat premyer-ministr boshchiligidagi Ministrlar Kabinetiga tegishli. Qirol asosan davlatning vakillik funksiyalarini bajaradi. Jafar ibn Abdul Rahmon (qirol) 1994-yil 26-apreldan buyon taxtni egallab turibdi. Qonun chiqaruvchi hokimiyat ikki palatali parlament — Senat va quyi palata — Vakillar palatasi tomonidan amalga oshiriladi. Yirik siyosiy partiyalari: Milliy front, Birlashgan Malayya milliy tashkiloti, Malayziya—Xitoy assotsiatsiyasi, Malayziya hindular Kongressi, Umummalay Islom partiyasi, Demokratik harakat partiyasi.

**Iqtisodi, transport kommunikatsiyalari.** Chet el investitsiyalarining ko'plab kiritilishi, ayniqsa yapon va Tayvan firmalarining sa'y-harakatlari bilan Malayziya iqtisodiyoti yuqori sur'atlar bilan (mamlakat yarim o'tkazgichli uskunalar ishlab chiqarish bo'yicha jahonda uchinchi o'ringa chiqib oldi) rivojlanmoqda. Neftni qayta ishlash, kimyo, to'qimachilik, yog'ochni qayta ishlash, metallurgiya kabi sanoat sohalari (mamlakat dunyodagi yirik qo'rg'oshin ishlab chiqaruvchi hisoblanadi), shuningdek, mashinasozlik, eksportning katta qismini neft va neft mahsulotlari tashkil qiladi. Gaz, temir rudasi, mis konsentrati, qo'rg'oshin qazib olinadi. Qishloq xo'jaligida kauchuk va palma yog'i (muhim eksport mahsulotlaridan biri), kakao, kokos yong'og'i, shakarqamish, ananas, qalampir yetishtiriladi, biroq mamlakat o'zini o'zi oziq-ovqat bilan ta'minlay olmaydi va qishloq aholisining ko'pchiligi qashshoq hisoblanadi. 2006-yil YIM miqdori 246036 mln dollarni (aholi jon boshiga — 9910 doll.) tashkil etgan. Asosiy savdo hamkorlari: Singapur, Yaponiya, AQSH.

Temiryo'llarining umumiy uzunligi — 1800 km, avtomobil yo'llari — 39100 km. Mamlakat portlari: Jorjtaun, Kelang, Kuanton, Kota-Kikabalu, Kuching, Miri, Sondakon, Sibiu.

**Tarixi.** M. a. III ming yillikda Malayziya hududiga mongol qabilalari bostirib kirishdi. VII asrda mamlakat hududida hindular davlati tuzilgan bo'lib, bu davlat XIV asrgacha Shrividja imperiyasi tarkibida bo'lib keldi.

1403-yili butun Malayziya yerlarini birlashtirgan Malokka qirolligi vujudga keldi. 1511-yili Malayziya yo'lboshchi Alfonso de Albukerk boshchiligidagi portugallar tomonidan ishg'ol qilindi. XVI—XVIII asrlar davomida yevropalik mustamlakachilar (1641-yili portugallar o'rnini gollandlar egallashdi, 1824-yil esa bu yerni inglizlar egallab olishdi) qo'shni Joxar va Aga davlatlariga qarshi muvaffaqiyatli kurash olib borishdi. 1914-yili barcha Malayya davlatlari Buyuk Britaniya homiyligi ostiga tushdi. 1941—1945-yillarda Malayziya yapon qo'shinlari tomonidan okkupatsiya qilindi, lekin urushdan so'ng yana Britaniya protektoratiga aylandi. 1948-yili tuzilgan Malayziya federatsiyasi 1956-yili muxtoriyatga erishdi, 1957-yil 31-avgustda esa Britaniya Hamdo'stligi tarkibida mustaqillik oldi. 1963-yili Malayziya federatsiyasi tuzilgan bo'lib, unga Malayya, Singapur, Sarvak, Sabax va Shimoliy Borneo kirgan edi. 1965-yili iqtisodiy va siyosiy qarama-qarshiliklar kelib chiqishi munosabati bilan Singapur federatsiya tarkibidan chiqib ketdi.

## MALI

*Rasmiy nomi — Mali Respublikasi. Poytaxti — Bomako. Hududi — 1240142 km<sup>2</sup>. Aholisi — 12139095 kishi (2007). Davlat tili — fransuz. Dini — islom (70%), xristianlik (5%) va majusiylik. Pul birligi — mali franki.*

**Geografik joylashuvi va tabiati.** G'arbiy Afrikada joylashgan davlat. G'arbda Mavritaniya (chegara uzunligi — 2237 km) va Senegal bilan (419 km), shimoli-sharqda Jazoir bilan (1376 km), sharqda Niger bilan (821 km), janubda Burkina-Faso (1000 km), Gvineya (858 km) va Kot-d' Ivuvar bilan (532 km) chegaradosh. Chegarasining umumiy uzunligi — 7243 km. Mamlakatning katta qismini dengiz sathidan o'rtacha 500—600 m balandlikda bo'lgan tekisliklar egallagan. Shimoliy qismida toshli cho'l Saxara joylashgan. Janubi-g'arbida, janubi va sharqida Bambua, Monding, shuningdek, eng yuqori balandligi 1155 m bo'lgan Xambori tog'liklari

joylashgan. Asosiy daryosi — Niger. Mamlakat foydali qazilmalardan oltin, fosfatlar, uran, temir rudasi, boksitlar, marganets, litiy va qo'rg'oshinga juda boy.

Iqlimi — tropik kontinental, issiq va quruq, chekka janubi esa subekvatorial.

**Davlat tuzilishi, siyosiy partiyalari.** Davlat tuzilishi — respublika. Mamlakat 1960-yil 22-sentabrda Fransiyadan mustaqillik olgan (oldingi nomi — Fransuz Sudani). Mustaqillik kuni — Milliy bayram sifatida nishonlanadi. Qonunchilik fransuz fuqarolik huquqiga asoslangan. Ijroiya hokimiyat prezidentga (davlat boshlig'i) va premyer-ministr boshchiligidagi hukumatga tegishli. Qonun chiqaruvchi hokimiyat esa bir palatali parlament — Milliy Yig'in tomonidan amalga oshiriladi. Yirik siyosiy partiyasi — Birdamlik va Adolat Afrika partiyasi, Afrika demokratik birlashuvi — Sudan ittifoqi.

**Iqtisodi, transport kommunikatsiyalari.** Mali dunyoning qashshoq davlatlaridan biri. Ishlab chiqarish qishloq xo'jalik mahsulotlarini qayta ishlash va qazib olish korxonalari bilan (oltin, fosforitlar) cheklangan. Qishloq xo'jaligi YIMning 50% ini beradi. 2006-yil YIM miqdori 12291 mln dollarni (aholi jon boshiga — 1012 doll.) tashkil etgan. Asosiy ekinlari — proso, sorgo, makkajo'xori, sholi, maniok, ananaslar, mango, papaya, sitrus ekinlari, shakarqamish, tamaki, yong'oq, paxta. Fermer xo'jaliklari asosan Niger daryosi bo'ylarida joylashgan. Mali — G'arbiy Afrikaning eng yirik chorvador mamlakatlaridan biri hisoblanadi.

**Tarixi.** XI asrda vujudga kelgan Mali qirolligini XIII asrda 1 ming yillik boshlarida paydo bo'lgan va imperator Muso (1312—1337) davrida o'zining gullab-yashnagan davrini boshidan kechirgan, Gana qirolligi tushkunlikka uchratdi va Songai imperiyasi ta'siriga tushib qoldi. 1591-yili mamlakat Marokash bosqini natijasida bir necha mayda bo'laklarga bo'linib ketdi. XIX asr oxirida hozirgi Mali hududlari Fransiya mustamlakasiga aylantirildi va 1920-yili fransuz Sudani tarkibiga kirdi. 1958-yili Sudan Respublikasi tuzildi va unga 1959-yili Senegal bilan Mali Federatsiyasi birlashdi. 1960-yili ularning mustaqilligi e'lon qilindi.

Federatsiya tarqalganidan so'ng 1960-yil sentabrda sobiq Fransuz Sudani mustaqil Mali davlati bo'ldi. 1968-yili davlat to'ntarishi oqibatida hokimiyat tepasiga harbiylar kelishdi, 1969-yili Traore prezidentlikni egaladi, u 1991-yil o'z vazifasidan olib tashlandi. 1992-yil mamlakatda erkin prezident saylovlari bo'lib o'tdi va unda Konari davlat boshlig'i etib saylandi.

## MALDIV

*Rasmiy nomi — Maldiv Respublikasi. Poytaxti — Male. Hududi — 298 km<sup>2</sup>. Aholisi — 368893 kishi (2007). Davlat tili — maldiv (diveli). Dini — islom (davlat dini). Pul birligi — maldiv rupiyasi.*

**Geografik joylashuvi va tabiati.** Osiyoning janubida Hind okeanining shimoliy qismidagi 2000 ta marjon orollarda joylashgan davlat (bu orollardan 112 tasi o'zlashtirilgan). Sohil bo'ylab chegara uzunligi — 644 km. Asosiy tabiiy resursi — baliq.

Iqlimi — janubi ekvatorial mussonli, shimoli esa subekvatorial mussonli. O'simlik dunyosida kokos palmalari va bananlar bor.

**Davlat tuzilishi, siyosiy partiyalari.** Davlat tuzilishi — prezident respublikasi. 1965-yil 26-iyulda Maldiv mustaqilligi e'lon qilingan (ilgari — Buyuk Britaniya protektorati bo'lgan), 1968-yili esa referendum o'tkazish yo'li bilan Maldiv respublika deb e'lon qilingan. 26-iyul — Milliy bayram (mustaqillik kuni) hisoblanadi. Davlat va hukumat boshlig'i — prezident. Qonun chiqaruvchi hokimiyat bir palatali parlament — Majlis tomonidan amalga oshiriladi.

**Iqtisodi, transport kommunikatsiyalari.** Iqtisodiyotining asosi baliqchilik (bu sohada ishga yaroqli aholining 80% i band, baliqchilik umumiy eksportning 60% ini tashkil qiladi) va turizm. Keyingi paytlarda turizm sohasi iqtisodiyotning muhim va tez rivojlanayotgan sektori bo'lib qoldi. Qishloq xo'jaligi mamlakatning oziq-ovqatga bo'lgan ehtiyojining 10% ini ta'minlaydi. 2006-yil YIM miqdori 2380 mln

dollarni (aholi jon boshiga — 6452 doll.) tashkil etgan. Asosiy savdo hamkorlari: Tailand, Shri-Lanka, G'arbiy Yevropa mamlakatlari, Yaponiya.

Temiryo'llari yo'q, mamlakat poytaxti Male shahrida 9,6 km asfaltlangan avtomobil yo'llari bor. Mamlakatning asosiy porti: Male.

**Tarixi.** 1834-yili ochilgan Maldiv orollarida musulmon sultonligi tashkil topdi, uning ustidan esa 1887-yili Buyuk Britaniya protektorati o'rnatildi. 1965-yili mustaqillik olgan Maldiv orollari 1968-yili respublika deb e'lon qilindi.

## MALTA

*Rasmiy nomi — Malta Respublikasi. Poytaxti — Valletta. Hududi — 316 km<sup>2</sup>. Aholisi — 400147 kishi (2007). Davlat tili — malta. Dini — katolik dini (davlat dini). Pul birligi — Malta lirasi.*

**Geografik joylashuvi va tabiati.** Yevropaning janubida O'rta Yer dengizidagi Sitsiliya orolining janubidagi orollar (Malta, Gotso, Kominotto, Komino, Filfla)da joylashgan davlat. Sohil bo'ylab chegara uzunligi — 140 km. Mamlakatning katta qismida ohaktosh yassitog'ligi joylashgan. Qirg'oqlarida past qoyalar, ko'p sonli sohilbo'yi qiyaliklari mavjud. Mamlakat ko'p sonli ko'rfazlar va juda qulay bo'g'ozlarga ega. Tabiiy resurslarga boy emas (ohaktosh, osh tuzi). Ishlov beriladigan yerlar mamlakatning 38% hududini egallaydi.

Iqlimi — O'rtayer dengizi iqlimi — qishda namgarchilik, yozda issiq va quruq.

**Davlat tuzilishi, siyosiy partiyalari.** Davlat tuzilishi — respublika. 1964-yil 21-sentabrda Malta Angliyadan mustaqil bo'ldi, biroq 1979-yilga qadar ingliz qo'shinlari mamlakatda saqlab turildi. Qonunchilik umumiy ingliz huquqiga asoslangan. Milliy bayramlari: 21-sentabr — Mustaqillik kuni, 13-dekabr — Respublika kuni, 8-sentabr — G'alaba kuni, 31-mart — Ozodlik kuni, 7-iyun — Din yo'lida zahmat



chekkanlar kuni. Ijroiya hokimiyat prezidentga (davlat boshlig'i) va premyer-ministr boshchiligidagi hukumatga tegishli.

Asosiy siyosiy partiyalari: Milliy partiya, Leyboristlar partiyasi, Sotsial-demokratik partiya.

**Iqtisodi, transport kommunikatsiyalari.** Tabiiy resurslarning yetishmasligi Maltaning qulay geografik joylashuvi va oliy kvalifikatsiyali ishchi kuchlarining mavjudligi bilan kompensatsiya qilinadi. Xo'jalikning asosiy tarmoqlari — tranzit-transport operatsiyalari, chet el turizmi. Sanoatning yaxshi rivojlangan tarmoqlari (ishlab chiqarish YIMning 20% ini tashkil etadi) kemasozlik, kema ta'mirlash, to'qimachilik, tikuvchilik, poyabzal ishlab chiqarish, elektrotexnika, oziq-ovqat ishlab chiqarish, shuningdek, mamlakat iqtisodiyotida ohaktosh qazib olish muhim o'rin tutadi. Qishloq xo'jaligida (YIM — 4,1%) mayda dehqon xo'jaliklari ko'p, ularning asosiy yo'nalishlari — yerga ishlov berish (donli ekinlar va sabzavotlar yetishtiriladi), uzumchilik, mevachilik, gulchilik. Chorvachilikda asosan sut ishlab chiqarishga katta e'tibor beriladi. Oziq-ovqat mahsulotlarining ko'pchiligi chetdan keltiriladi. Maltaning o'zida ishlab chiqarilayotgan oziq-ovqat mahsulotlari ehtiyojining 20% ini tashkil qiladi. Malta daromadining muhim manbalaridan biri chet el turizmi hisoblanadi. 2006-yil YIM miqdori 7601 mln dollarni (aholi jon boshiga — 18995 doll.) tashkil etgan.

Asosiy savdo hamkorlari: Germaniya, Buyuk Britaniya, Italiya.

Temiryo'llari yo'q, avtomobil yo'llarining umumiy uzunligi — 1291 km (1180 km — asfaltlangan). Mamlakatning asosiy porti — Valetta.

**Tarixi.** Malta antik davridayoq muhim strategik hududda joylashganligi uchun m. a. IX asrda finikiyaliklarga, m. a. VIII asrda esa greklarga tegishli bo'l-gan. Malta Karfagenga m. a. VI asrdan qaram bo'lgan bo'lsa, m. a. 218-yili Puni urushlari vaqtida rimliklar tomonidan bosib olindi. Rim imperiyasi qulaganidan so'ng Malta vandallar tomonidan, keyin ostgotlar tomonidan bosib olindi, 533-yili esa Vizantiya imperiyasi tarkibiga kirdi. 869-yili orol arablar tomonidan okkupatsiya qilindi, XI

asrda esa Maltani Sitsiliyaga qo'shib yuborgan normandlar qo'liga o'tdi. XVI asrda Maltani Ionitlar ordeni ritsarlariga berishdi. 1680-yildan boshlab orolda fransuzlar ta'siri oshdi, XVIII asrda esa Malta Fransiyaning O'rta-yer dengizidagi muhim moliyaviy markaziga aylandi. 1798-yil Napoleon Bonapart orolni bosib oldi, biroq 1800-yili Malta inglizlar qo'liga o'tdi. Buyuk Britaniya mustamlakasi bo'lgan Maltani Ikkinchi Jahon urushida nemis va italyan harbiy havo kuchlari tomonidan qattiq bombardimon qilindi, biroq taslim bo'lmadi va 1943-yili ittifoqchilarning qo'shinlarini Sitsiliyaga tushirishda platsdarm vazifasini o'tadi. 1964-yili mustaqillikka erishgan Malta 1974-yili respublika deb e'lon qilindi, lekin ingliz qo'shinlari bu yerda 1979-yilga qadar ushlab turildi.

## MARKAZIY AFRIKA RESPUBLIKASI

*Rasmiy nomi — Markaziy Afrika Respublikasi. Poytaxti — Bangi. Hududi — 199436 km<sup>2</sup>. Aholisi — 4366683 kishi (2007). Davlat tili — fransuz. Dini — katoliklar (25%), protestantlar (25%), majusiylar (24%), musulmonlar (15%). Pul birligi — Afrika franki.*

**Geografik joylashuvi va tabiati.** Afrikaning markaziy qismida joylashgan davlat. Janubda Kongo Demokratik respublikasi (chegara uzunligi — 1577 km) va Kongo (467 km), shimolda — Chad (1197 km), sharqda — Sudan (1165 km), g'arbda — Kamerun (797 km) davlatlari bilan chegaradosh. Chegarasining umumiy uzunligi 5203 km. Mamlakat hududining katta qismini Aburaseyn yassitog'ligi va keng vodiylar egallagan. Eng baland nuqtasi — Ngaya tog'i (1388 m). Shimolida botqoqli tekisliklar mavjud. Asosiy daryolari — Ubangi, Sanga. MARda olmos, oltin, uran, neft konlari bor. Haydaladigan yerlar mamlakat hududining 3%, o'rmon va butazorlar 64% ini tashkil etadi.

Iqlimi — subekvatorial, mussonli. Savannalarida pishloq daraxti, tamarint, karite, barassa palmasi kabi daraxtlar va turli o'simliklar o'sadi. O'rmonlarida qimmatbaho qora va qizil daraxtlar o'sadi. Fil, yovvoyi

ho'kiz, antilopa, gepard, qoplon, arslon, jirafa, oq va qora karkidon, tuyaqush, flamingo, maymunlar, shoqollar, timsoh, qarqaralar hayvonot olamini tashkil etadi.

**Davlat tuzilishi, siyosiy partiyalari.** Davlat tuzilishi — prezident respublikasi. Mamlakat 16 prefekturaga bo'lingan. MAR mustaqillikka Fransiyadan 1960-yil 13-avgustda erishdi (avvalgi nomi Markaziy Afrika Imperiyasi), qonunlari fransuz huquqiga asoslangan. Davlat boshlig'i — prezident. Prezident Bosh vazir rahbarligidagi hukumatni tayinlaydi. Qonun chiqaruvchi oliy organi — Milliy Majlis (bir palatali parlament). Yirik siyosiy partiyalari: Markaziy Afrika xalqi ozodligi uchun harakat, Markaziy Afrika demokratik birlashmasi, Qora Afrikaning ijtimoiy evolyutsiyasi uchun harakat, Taraqqiyot uchun vatanparvarlar harakati.

**Iqtisodi, transport kommunikatsiyalari.** Markaziy Afrika Respublikasi Afrikaning eng kambag'al davlatlaridan biri. Sanoatining eng muhim tarmoqlari tog'-kon sanoati (olmos umumiy eksport miqdorining yarmidan ko'pini tashkil etadi) va yog'ochni qayta ishlash (eksportining chorak qismi) sanoatidir. 66% mehnatga layoqatli bo'lgan aholi mashg'ul bo'lgan qishloq xo'jaligi YIMning 40% ini ta'minlaydi. Eksport qilinadigan muhim qishloq xo'jalik mahsulotlari — paxta, qahva, tamaki. MARning iqtisodiy taraqqiyotini yomon infrastruktura, malakali ishchilarning yetishmasligi va hukumatning yaxshi o'ylanmagan iqtisodiy siyosati to'xtatib turibdi. 2006-yil YIM miqdori 4443 mln dollarni (aholi jon boshiga — 1017 doll.) tashkil etgan. Asosiy savdo hamkorlari: Fransiya, Belgiya, Italiya, Yaponiya, AQSH, Jazoir.

Temiryo'llari yo'q, avtomobil yo'llarining umumiy uzunligi — 2200 km, ichki suv yo'llari — 800 km.

**Tarixi.** Hozirgi MAR hududi 1895-yilda Ubangi-Shari nomli Fransiya mustamlakasi deb e'lon qilinadi. 1958-yilda Fransuz Hamdo'stligi doirasida muxtoriyatga ega bo'lgan MAR 1960-yilda mustaqillikka erishadi. 1966-yilda davlat to'ntarishi natijasida hokimiyatga general Bokassa keladi. U 1976-yilda MARni imperiya deb e'lon qiladi. Hukmron rejimga qarshi muxolifatning kuchayishi 1979-yilda Bokassa diktaturasining qulashiga

va respublika o'rnatilishiga olib keladi. 1981-yilda yana davlat to'ntarishi bo'lib, hokimiyatga general Kolingba boshliq harbiy qo'mita keladi. 1992-yilda harbiylar partiyalar faoliyatini cheklash to'g'risidagi qarorni bekor qilishdi. 1998-yilning fevral — mart oylarida Bangi shahrida o'tkazilgan millatlararo kelishuvga bag'ishlangan konferensiyada o'zaro totuvlik hujjatlari imzolandi.

## MAROKASH

*Rasmiy nomi — Marokash Qirolligi. Poytaxti — Rabot. Hududi — 446550 km<sup>2</sup>. Aholisi — 33785853 kishi (2007). Davlat tili — arab. Dini — islom (98,7%). Pul birligi — Marokash dirhami.*

**Geografik joylashuvi va tabiati.** Shimoli-g'arbiy Afrikada joylashgan davlat. Janubi-sharqda va sharqda Jazoir bilan (chegara uzunligi — 1559 km), janubda G'arbiy Sahroyi Kabir bilan (443 km) chegaradosh. Mamlakat g'arbda Atlantika okeani bilan, shimolda O'rtayer dengizi bilan tutashib ketgan. Chegarasining umumiy uzunligi — 2002 km, sohil bo'ylab chegara uzunligi esa 1835 km. Qirg'oqbo'yi tekisliklarining eni 1600 km gacha boradi. Janubi-g'arbdan janubi-sharqqa qarab butun mamlakat orqali tog' tizmasi cho'zilib ketgan bo'lib, ularga Ar-Rif, O'rta Atlas, mamlakatning eng yuqori tog'i Tubkal (4165 m) joylashgan Yuqori Atlas va Antiatlas kiradi. Janubida va janubi-sharqida qumli va toshli cho'l — Sahroi Kabir joylashgan. Daryolari — Muluya va Sebu davriy ravishda kuchli yomg'irlar natijasida to'lib oqadi. Asosiy tabiiy resurslari: fosforitlar, temir rudasi, qalay, rux, kobalt, mis, ko'mir, neft, marganets, baliq, tuz. Shudgor qilinadigan yerlar umumiy yerlarning 18% ini, o'tloq va yaylovlar esa 28% ini tashkil qiladi.

Iqlimi — subtropik.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat uchta provinsiya (viloyat)ga bo'lingan. Ular o'z navbatida perfektura, okrug va kommunalarga bo'linadi. Maro-

kash 1956-yili 2-martda (ilgari Fransiya mustamlakasi bo'lgan) mustaqillikka erishgan. Qonunchilik islom huquqiga, fransuz va ispan fuqarolik qonunlariga asoslangan. Davlat boshlig'i — qirol — Hasan II 1961-yil 3-martdan buyon hokimiyatni egallab turibdi (bu kun Marokashning milliy bayram kuni hisoblanadi). Qonun chiqaruvchi hokimiyat bir palatali parlament — Vakillar palatasi tomonidan amalga oshiriladi. Yirik siyosiy partiyalari: Mustaqillar milliy birlashmasi, Milliy-demokratik partiya, Konstitutsion ittifoq, Xalq harakati, Milliy Xalq harakati, Istiqloq, Xalq kuchlarining sotsialistik harakati, Xalq kuchlarining milliy ittifoqi, Xalq-demokratik harakati tashkiloti.

### ***Iqtisodi, transport kommunikatsiyalari.***

Mamlakat iqtisodiyoti 90-yillarning boshida YI mamlakatlarga to'qimachilik mahsulotlarini sotishning yangilanishi, chetdan keltirilayotgan oziq-ovqat mahsulotlariga narxlarning tushirilishi natijasida barqarorlasha boshladi. Sanoatning nisbatan taraqqiy etgan sohalari: fosforitlarni qazib olish va qayta ishlash (fosforitlarni ishlab chiqarish bo'yicha dunyoda ikkinchi o'rinda turadi), oziq-ovqat, to'qimachilik, teriga ishlov berish. Turizm ham faol rivojlanmoqda. Marokash oldida chet mamlakatlardan olingan katta miqdordagi tashqi qarzlardan tashqari, yuqori darajada ishsizlik, mamlakatning tashqi iqtisodiy faktorlarga qaramligi kabi muhim muammolar turibdi. 2006-yili YIM miqdori 127228 dollarni (aholi jon boshiga — 3765 doll.) tashkil etgan. Asosiy savdo hamkorlari: YI mamlakatlari, Hindiston, Saudiya Arabistoni.

Asosiy portlari: Kasablanka, Tanjer.

**Tarixi.** M. a. XII asrdayoq hozirgi Marokash hududida dastlabki Finikiya koloniyalari paydo bo'lgan edi. M. a. V asrda mamlakatning sohilbo'yi qismlari Karfagen ta'siriga tushib qoldi. M. a. I asrdan V asrgacha Marokash hududi Qadimgi Rim hukmronligi ostida bo'ldi. 429-yili mamlakat vandallar tomonidan bosib olindi, VI asrdan esa Vizantiya imperiyasining bir qismiga aylandi. Arablar Marokash hududiga VII asrda kirib kelishdi, 868-yili esa arablarning idrisiylar sulolasi mahalliy barbar qabilalarini o'z hukmronligi ostiga

birlashtirishdi. XI—XV asrlarda hokimiyatni barbarlarning almoraviylar sulolalari egallab turishdi. XV—XVI asrlarda Marokashning bir qismi Portugaliya va Ispaniya tomonidan bosib olindi. Saodatiylar sulolasi yevropaliklarga qarshi sulolaning yorqin vakillaridan biri Ahmad al-Mansur podsholigi davri (1578—1603)da ayniqsa, muvaffaqiyatli kurash olib borishdi. XVII asrda hokimiyatga alaudiylar sulolasi kelgan bo'lib, hozirgi kungacha taxtni egallab turishibdi. Alaudiylar sulolasining taniqli vakillaridan biri Ismoil mamlakatni birlashtirishga, mamlakat ichkarisidagi fitnalarga barham berishga va turklar hujumini qaytarishga muvaffaq bo'ldi. XIX asrda Marokash hududini egallab olish uchun Ispaniya, Fransiya va Buyuk Britaniya davlatlari raqobat qilishdi, 1912-yili esa mamlakatning katta qismi Fransiya protektoratiga aylandi, ozgina hudud Ispaniya boshqaruvi ostiga o'tdi. XX asrning 20-yillarida mamlakatda boshlangan Ikkinchi Jahon urushi yillarida kuchaygan milliy ozodlik harakatlari 1956-yil 3-martda Marokashning mustaqil bo'lishiga olib keldi. Marokashning Ispaniyaga tegishli qismi 1956-yil 7-aprelda mustaqillik oldi, biroq ispanlar qirg'oq bo'yidagi bir nechta shaharlar ustidan o'z nazoratini saqlab qoldi. Mustaqillikka erishganidan so'ng Marokashda turli ichki qarama-qarshiliklar va davlat to'ntarishiga urinishlar bo'ldi. 1975-yili Marokash G'arbiy Saxarani bosib oldi. Biroq hozirgi kunga qadar Marokash qo'shinlari G'arbiy Saxaradagi Polisario Fronti qo'zg'olonchilariga qarshi to'xtovsiz kurash olib bormoqda.

## MARTINIKA

*Rasmiy nomi — Martinika (Fransiyaning dengizorti departamenti va regioni). Poytaxti — Fort-de-Frans. Hududi — 1100 km<sup>2</sup>. Aholisi — 439911 kishi (2007). Davlat tili — fransuz. Dini — katolik (95 %). Pul birligi — fransuz franki.*

**Geografik joylashuvi va tabiati.** Martinika Karib dengizidagi Kichik Antil orollari arxipelagida, Shimoliy va Janubiy Amerika oralig'ida joylashgan.

Pasttekisliklardan iborat vodiya vulqonlar ko'p. Harakatdagi Montan-Pele vulqoni 1851, 1902, 1930-yillari otilib chiqqan.

Iqlimi — tropik, passatli. Tez-tez dovullar bo'lib tura-di. Palma, qizil daraxt, mango, paparotniklar o'sadi. Turli-tuman qushlar (to'tiqush, kolibri), hasharotlar ko'p.

***Davlat tuzilishi, siyosiy partiyalari.*** Fransiya-ning dengizorti departamenti. Davlat boshlig'i — Fransiya prezidenti nomidan — prefekt. Hukumat boshlig'i — Bosh Kengash prezidenti. Martinika 2 ta okrugga bo'linadi. Siyosiy partiyalari: Fransiya partiyalarining mahalliy bo'linmalari — Respublikani qo'llab-quvvatlash birlashmasi, Fransiya sotsialistik partiyasi, Martinika Sotsialistik federatsiyasi, Martinika kommunistik partiyasi, Martinika kuchi, Martinika progressiv partiyasi va boshqalar.

***Iqtisodi, transport kommunikatsiyalari.*** Iqtisodiyoti negizini qishloq xo'jaligi va turizm tashkil etadi. Rom, shakar, poligrafiya, to'qimachilik, sement, neftni qayta ishlash korxonalari mavjud. Shakarqamish, ananas, banan yetishtiriladi. Chorvachilik va baliqchilik rivojlangan. 2006-yil YIM miqdori 6117 mln dollarni (aholi jon boshiga — 14400 doll.) tashkil etgan. Asosiy savdo hamkorlari: Fransiya, Germaniya, Italiya, Buyuk Britaniya, Gvadelupa, Yaponiya. Martinikada Lamanten xalqaro aeroporti mavjud.

***Tarixi.*** 1493-yili X. Kolumb kariblar yashayotgan bu orolni kashf qildi. Karib qabilalari qirib tashlanib, 1635-yildan fransuzlar bosqini boshlandi. 1762- va 1794—1815-yillar — ingliz mustamlakachiligi davri. 1848-yili qullik bekor qilingan. 1946-yili Martinika Fransiyaning dengizorti departamenti maqomini oldi.

## MARSHALL OROLLARI

*Rasmiy nomi — Marshall orollari Respublikasi. Poytaxti — Majuro. Hududi — 181,3 km<sup>2</sup> (hammasi bo'lib 34 ta orol). Aholisi — 62538 kishi (2007). Davlat tili — ingliz. Dini — protestantlik. Pul birligi — AQSH dollari.*

**Geografik joylashuvi va tabiati.** Marokash orollari arxipelagidagi orollarda joylashgan davlat (Tinch okeanining shimoliy qismi). Sohil bo'ylab chegara uzunligi — 370,4 km. Orollarning relyefi Marjon qoyalardan paydo bo'lgan bo'lib, asosan pasttekisliklardan iborat. Asosiy tabiiy resurslari: fosforitlar, dengiz mahsulotlari.

Iqlimi — tropik, passat-mussonli. Asosiy o'simliklari — kokos palmalari, yong'oqlar. Mamlakatning hayvonot dunyosi butun Mikroneziyadagi kabi juda kambag'al va asosan dengiz faunasidir.

**Davlat tuzilishi, siyosiy partiyalari.** Davlat tuzilishi — respublika. Marshall orollari 1991-yil 21-oktabrda mustaqillikka erishgan (ilgari ular Tinch okean tarkibiga kirgan orollar bo'lib, AQSH boshqaruvidagi BMT tasarrufidagi hududlar bo'lgan). Marshall orollari respublika deb e'lon qilingan kun — 1-may kuni Milliy bayram kuni hisoblanadi. Davlat va hukumat boshlig'i — prezident. Qonun chiqaruvchi hokimiyat ikki palatali parlament (yuqori palata — Nitijeta va quyi palata — Iroiya kengashi) tomonidan amalga oshiriladi.

**Iqtisodi, transport kommunikatsiyalari.** Iqtisodiyotning asosiy tarmoqlari — qishloq xo'jaligi (kokos, tomat, non daraxti mevalari, qovun yetishtirish) va turizm (chet el valyutasi kirimining asosiy manbayi). Bu sohada ishga yaroqli aholining 10% i band. Sanoat baliq va kopra (kokosdan yog' olish)ni qayta ishlash bilan chegaralangan. 2006-yil YIM miqdori 115 mln dollarni (aholi jon boshiga — 1839 doll.) tashkil etgan. Asosiy savdo hamkorlari: AQSH va Yaponiya.

Mamlakatning asosiy porti — Majuro.

**Tarixi.** Marshall orollari 1526-yili ispanlar tomonidan ochilgan. 1788-yili kapitan Marshall tadqiq qilgan, 1803- va 1823-yillari esa rus dengizchilari Kruzenshtern va Kotsebular ham tadqiq qilishgan. 1885—1886-yillari orollar Germaniya tomonidan anneksiya qilingan. 1914-yildan orollar yapon qo'shinlari tomonidan okkupatsiya qilindi, 1920-yildan esa BMT mandati asosida Yaponiya boshqargan. Ikkinchi Jahon urushi yillarida orollar urush maydoniga aylandi, 1947-yildan esa BMT homiyligida AQSH boshqarib keldi.



Atoll Bikini AQSHning yadro qurollarini sinab ko'radi-gan poligonlaridan biri bo'lgan. 1979-yilda o'z-o'zini boshqarish huquqini olgan Marshall orollari 1991-yili mustaqil davlat deb e'lon qilindi.

## MEKSIKA

*Rasmiy nomi — Meksika Qo'shma Shtatlari. Poytaxti — Mexiko. Hududi — 1958201 km<sup>2</sup>. Aholisi — 107642364 kishi (2007). Davlat tili — ispan. Dini — katolik. Pul birligi — yangi pyeso.*

**Geografik joylashuvi va tabiati.** Shimoliy Amerikada joylashgan davlat. Shimolda va sharqda AQSH (chegara uzunligi — 3326 km), janubda Gvatemala (962 km) va Beliz (250 km) bilan chegaradosh. G'arbda Tinch okeani, sharqda Karib dengizi va Meksika ko'rfazi bilan tutashib ketgan. Chegarasining umumiy uzunligi 4538 km, sohil bo'ylab chegara uzunligi esa 9330 km. Mamlakatning katta qismini vulqonlar otilishi natijasida vujudga kelgan o'rtacha 1000 m dan 2400 m gacha bo'lgan balandlikdagi Sharqiy Serra-Madra, G'arbiy Serra-Madra va Janubiy Serra-Madra tog'liklari egallagan. Bu yerda Sitlaltepel (5699 m), Popokatepetl (5452 m), Orisaba (5747 m) kabi vulqon tepaliklari ham bor. Ushbu region seysmik faol hudud hisoblanadi. Mamlakat sharqida Yukatan yarimorolida ulkan qirg'oqbo'yi tekisliklari mavjud. Meksikaning g'arbiy hududlari Quyi Kaliforniya yarimorolida joylashgan bo'lib, ular qirg'oqbo'yi tekisliklari va sharqida tog' tizmalari bor. Asosiy daryosi — Rio-Bravo-del-Norte. Meksikada neft, tabiiy gaz, kumush, toshko'mir, oltin, mis, qo'rg'oshin, rux konlari bor. Shudgor qilinadigan yerlar mamlakat hududining 12% ini, o'tloq va yaylovlar 39% ini, o'rmon va changalzorlar 24% ini tashkil etadi.

Iqlimi — shimoliy qismi subtropik kontinental, qolgan hududlari tropik mintaqada joylashgan.

**Davlat tuzilishi, siyosiy partiyalari.** Davlat tuzilishi — federativ respublika. Mamlakat tarkibiga 31 shtat va poytaxt federal okrugi kiradi. Meksika 1810-yil 16-sentabrda Ispaniyadan mustaqillikka erishdi.

Davlat va hukumat boshlig'i — prezident. Qonun chiqaruvchi hokimiyat ikki palatali parlament — Milliy Kongress tomonidan amalga oshiriladi. Yirik partiyalari: Institutsion-inqilobiy partiya, Demokratik inqilob partiyasi, Milliy harakat partiyasi, Sotsialistik xalq partiyasi.

### ***Iqtisodi, transport kommunikatsiyalari.***

Meksika Lotin Amerikasining nisbatan rivojlangan davlati hisoblanadi. Mamlakat keyingi yillarda hukumat tomonidan o'tkazilgan struktura o'zgarishlari, shuningdek, iqtisodiyotni xususiylashtirish va chet el investitsiyalari uchun qulay sharoitlarning yaratilishi natijasida sezilarli muvaffaqiyatlarga erishdi. Sanoatning nisbatan rivojlangan sohalari orasida — neft, neft kimyosi (neft va neft mahsulotlari mamlakat eksportining asosini tashkil qiladi), mashinasozlik (jumladan, avtomobilsozlik), tog'-kon, metallurgiya, kimyo, to'qimachilik, oziq-ovqat ishlab chiqarish tarmoqlari bor. Qishloq xo'jaligida (YIMning 9%i) bug'doy va sholi, qahva, paxta yetishtirish, chorvachilik va baliqchilik yaxshi taraqqiy etgan. 2006-yil YIM miqdori 1014514 mln dollarni (aholi jon boshiga — 9424 doll.) tashkil etgan.

Asosiy savdo hamkori: AQSH.

Temiryo'llarining umumiy uzunligi — 2680 km, avtomobil yo'llari — 210000 km, ichki suv yo'llari — 2900 km. Eng muhim portlari: Monsonilo, Syudad-Madero, Sameno-Krus, Tuspon.

**Tarixi.** Hozirgi Meksika hududida m. a. II ming yillikdayoq arxaik sivilizatsiya mavjud bo'lgan. M. a. 1400-yildan m. a. 200-yilga qadar «o'rta sivilizatsiya» davri davom etdi. Bu davrda (m. a. I asrda) olmeklarning birinchi davlati shakllandi. IV asrda mamlakat hududida VII—VIII asrlarda o'zining gullab-yashnagan davrini boshidan kechirgan mayyalar imperiyasi paydo bo'ldi. IX asrda tolteklar sivilizatsiyasi paydo bo'ldi, bu esa X asrda mayalar madaniyatining shakllanishiga o'z ta'sirini ko'rsatdi. Natijada tolteklar va mayyalarining aralash madaniyati vujudga keldi. XIII asrda shimoldan kelgan chichimeka qabilalari tolteklarni siqib chiqara

boshladi, biroq XIV asrda ularni o'z navbatida atstek qabilalari siqib chiqarishdi. Atsteklar mahalliy qabilalar o'rtasidagi kelishmovchiliklardan foydalanib ushbu regionda kuchli siyosiy mavqega erishdilar va ulkan imperiyani vujudga keltirishdi. Bu imperiya XV asrning o'rtalaridan 1521-yilga qadar gullab-yashnadi. 1521-yili atsteklar davlati Kortes boshchiligidagi ispan mustamlakachilari tomonidan bosib olindi. 1535-yili Meksika Yangi Ispaniyaning vitse-qirolligiga aylandi. Shunday bo'lsa-da, mamlakatni mustamlakalashtirish hindularni qirib tashlash, zo'rlik bilan xristianlashtirish yo'li orqali XVII asrning oxiriga qadar davom etdi. XIX asrning boshlarida mamlakatni mustamlakachilardan ozod qilish uchun harakat boshlandi va 1821-yili Meksika mustaqillikka erishdi, 1824-yili esa respublika deb e'lon qilindi. 1836-yili Meksikada Texas va Kaliforniya ajralib chiqib, o'zlarini mustaqil respublika deb e'lon qilishdi, AQSH bilan urush natijasida esa mamlakat Rio-Granda daryosidan shimoldagi yerlarni boy berdi. 1861-yili Xuares hukumati tomonidan tashqi qarzlarni to'lashning to'xtatilishi natijasida mamlakatga Buyuk Britaniya, Ispaniya va Fransiya qo'shinlari kiritildi. 1862-yil fevralida Angliya va Ispaniya Xuares bilan kelishuv imzolashdi, biroq Fransiya Meksikadagi harbiy operatsiyalarni davom ettirdi, natijada 1867-yili fransuz qo'shinlari mag'lubiyatga uchradi. Ijtimoiy adolatsizlik va hindu dehqonlarining shafqatsiz ekspluatatsiya qilinishi xalq ommasining inqilobiy ko'tarilishiga olib keldi. 1877-yili mamlakatda inqilobiy vaziyat vujudga kelgan edi. Meksika inqilobidagi qonli voqealardan so'ng qabul qilingan yangi konstitutsiya 1920—1924-yillarda siyosiy o'zgarishlar va agrar islohotlar o'tkazish imkonini berdi. 1928-yildan boshlab mamlakat hokimiyati tepasida konstitutsion inqilobiy partiya turibdi. 1994-yili Meksika hukumati Chyapas shtatida siyosiy islohotlar o'tkazish talabi bilan chiqqan Zapatistlar ozodlik armiyasiga qarshi kurash olib borishiga to'g'ri keldi.

## MIKRONEZIYA

*Rasmiy nomi — Mikroneziya Federal Shtatlari. Poytaxti — Palikir. Hududi — 702 km<sup>2</sup>. Aholisi — 112481 kishi (2007). Davlat tili — ingliz. Dini — protestantlik va katolik dini. Pul birligi — AQSH dollari.*

**Geografik joylashuvi va tabiati.** Tinch okeani-ning g'arbiy qismida Karolin orollarida joylashgan davlat. Sohil bo'ylab chegara uzunligi — 6112 km. Orollar geologik kelib chiqishiga ko'ra bir xil emas: baland tog'li orollardan to marjon atollargacha bor. Orollarning ayrim-larida vulqonlar faoliyati davom etmoqda. Asosiy tabiiy resurslari: dengiz mahsulotlari, yog'och, fosforitlar.

Iqlimi — arxipelagning g'arbiy qismi ekvatorial va subekvatorial, sharqida tropik passat-mussonli.

Vulqonli va marjon orollar faunasi bir-biridan farq qiladi. Vulqonli orollarning qirg'oqlarida mangro buta-zorlari, kokos palmalari, bambuk o'sadi. Marjon orol-larida esa kokos palmalari ko'p.

**Davlat tuzilishi, siyosiy partiyalari.** Davlat tuzilishi — federativ respublika. Mamlakat tarkibiga 4 ta shtat: Chuuk, Kosraye, Ponpey, Yaplar kiradi. Mikroneziya 1991-yil 17-sentabrda mustaqil bo'lgan (ilgari — BMT tasarrufida, AQSH boshqaruvida bo'lgan Tinch okean orollarining bir qismi bo'lgan). Davlat va hukumat boshlig'i — prezident. Qonun chiqaruvchi hokimiyat bir palatali parlament — Milliy Kongress tomonidan amalga oshiriladi.

**Iqtisodi, transport kommunikatsiyalari.** Iqtisodiyotining asosiy sektorlaridan biri — baliqchilik. Bundan tashqari, Mikroneziya qirg'oqbo'yi ekva-toriyasida baliq ovlash huquqini beruvchi litsenziyalar sotishdan sezilarli daromad oladi. Turizmning rivojla-nishi orollarning bir-biridan uzoqda joylashganligi va zaruriy infrastrukturaning yo'qligidan orqada qolmoqda. 2006-yil YIM miqdori 277 mln dollarni (aholi jon boshiga — 2462 doll.) tashkil etgan.

Asosiy savdo hamkorlari: AQSH, Yaponiya, Avstraliya, Janubiy Koreya.

Temir yo'llari yo'q, asosiy orollarda 39 km asfaltlangan yo'llar bor. Mamlakat portlari: Kolonia, Okak, Truk, Teketik.

**Tarixi.** XVII asrda ispanlar tomonidan ochilgan Karolin orollari 1899-yili Germaniyaga sotilgan edi. 1919-yildan 1945-yilga qadar orollar mandat asosida Yaponiya tomonidan idora qilindi. 1947-yildan hozirgi Mikroneziya BMT tasarrufida bo'lgan AQSH boshqaruvdagi Tinch okean orollari tarkibiga kirdi. 1986-yili AQSHdan ozod assotsiatsiya maqomini olgan Mikro-neziya 1991-yili o'z mustaqilligini e'lon qildi.

## MISR

*Rasmiy nomi – Misr Arab Respublikasi (MAR). Poytaxti – Qohira. Hududi – 1001450 km<sup>2</sup>. Aholisi – 77329784 kishi (2007). Davlat tili – arab. Dini – islom (94% i sunniylar). Pul birligi – misr funti.*

**Geografik joylashuvi va tabiati.** Misr ikki qit'ada: Afrikaning shimoli sharqi va Osiyoning janubi g'arbida joylashgan davlat. Janubda Sudan, g'arbda Liviya, sharqda Isroil va Falastin bilan chegaradosh. Bundan tashqari shimolda O'rta Yer dengizi, sharqda Qizil dengiz suvlari Misr sohillarini yuvib turadi. Misrning strategik jihatdan qulay joylashuvi butun Sinay yarimorolini nazorat qilish imkonini beradi. Bundan tashqari dunyoning eng muhim suv yo'llaridan biri bo'lgan Suvaysh kanali ham Misr nazorati ostida. Mamlakat maydonining 96% i cho'llardan iborat. G'arbda Liviya cho'li, sharqda Arabiston cho'li, janubda Nubiya cho'li yastanib yotadi. Misrning eng baland nuqtasi Sinay yarimorolidagi Jebel-Katrina tog'i, balandligi 2637 m.

Mamlakatning eng yirik daryosi Nil daryosi bo'lib, u mamlakat xalq xo'jaligida juda katta ahamiyatga ega. Misr janubida Nil daryosiga Osuan to'g'oni qurilgan bo'lib, u mamlakatning elektr energetika manbayi hisoblanadi.

Misr kontinental tropik iqlim hududida joylashgan.

Mamlakat hududining asosiy qismi cho'llardan iborat bo'lganligi sababli hayvonot va o'simlik dunyosi unchalik boy emas.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Davlat boshlig'i — prezident. Ijroiya hokimiyat prezident va Bosh ministr boshchiligidagi hukumatga tegishli. Mamlakat 26 ta muhofazatlarga bo'lingan. Ular o'z navbatida markazlarga, markazlar esa nohiyalarga bo'lingan. Asosiy siyosiy partiyalari: Milliy Demokratik Partiya, Mehnat Sotsialistik Partiyasi, Milliy Taraqqiyot Partiyasi, Al-Umma.

**Iqtisodi, transport kommunikatsiyalari.** Misr xalq xo'jaligining asosiy sohalarining barchasi davlat tasarrufida. Sanoatning oziq-ovqat, kimyo, to'qimachilik, neftni qayta ishlash, metallurgiya kabi sohalari yaxshi rivojlangan. Misr jahon turizmi markazlaridan biri hisoblanadi. Mamlakat byudjetiga tushadigan xorijiy valyutaning asosiy qismi turizm orqali keladi. Qishloq xo'jaligida sholi, arpa, turli mevalar va sabzavotlar yetishtiriladi. Baliqchilik yaxshi rivojlangan. 2006-yil YIM miqdori 282026 mln dollarni (aholi jon boshiga — 3647 doll.) tashkil etgan. Asosiy savdo hamkorlari: AQSH, Yaponiya va Sharqiy Yevropa davlatlari.

**Tarixi.** Misr insoniyat sivilizatsiyasining eng qadimgi o'choqlaridan biridir. Misr 6000 yillik tarixga ega. M. a. IV ming yillik oxirlarida bugungi Misr hududlarida 2 ta davlat — janubda Neksan va shimolda Buto davlatlari mavjud bo'lgan. M. a. IV asrning 2-yarmida, ya'ni m. a. 341-yili Misr forslar tomonidan istilo qilingan. M. a. 332-yilda Aleksandr Makedonskiy forslarni bu yerlardan quvib chiqarib, o'z hukmronligini o'rnatdi va m. a. 331-yilda Aleksandriya shahriga asos soldi. Ellin davri Misr tarixida Ptolemey va uning avlodlari hukmronligi yillarida m. a. 31-yilgacha davom etdi. Shundan so'ng Misr qadimgi Rim imperiyasining istibdodiga tushib qoldi. 395—639-yillarda Misr Vizantiya imperiyasi tarkibida bo'ldi. VII—VIII asrlarda mamlakatni musulmon arablar bosib oldi. Fotimiylar sulolasi hukmronligi yillarida (969—1171) Misrning siyosiy-iqtisodiy mavqeyi oshdi. Shu davrda Qohira shahri mamlakat poytaxtiga aylandi. Ayubiylar

(1171—1250) sulolasidan so'ng Mamluk sultonlari davrida Misr qudratli davlatga aylandi. 1517-yildan Usmonli Turklar imperiyasi tarkibiga kirdi. 1798—1801-yillarda Napoleon Bonapart bu yerda harbiy harakatlarni amalga oshirdi. Misr 1914-yilgacha Usmonlilar imperiyasining tarkibiy qismi bo'lib qolgan bo'lsa-da, amalda 1805-yildan mustaqil edi. 1882-yilda inglizlar Misrni bosib olishdi. Shu davrdan boshlab mamlakatni ingliz konsuli boshqaradi. 1914-yili I jahon urushining boshlanishidan foydalangan Angliya Misrda o'z hukmronligini o'rnatdi. 1922-yil Misr o'zini mustaqil davlat deb e'lon qilgan bo'lsa-da, harbiy va siyosiy sohalarda ingliz nazorati saqlanib qoldi. Jamol Abdul Nosir boshchiligidagi «Ozod ofitserlar» maxfiy tashkiloti 1952-yil 22—24-iyul kunlari davlat to'ntarishini amalga oshirdi. Natijada qirol Farrux ag'darildi. 1953-yil Misr respublika deb e'lon qilindi. Shu yili ingliz qo'shinlari Misrdan chiqib ketdi. 1956-yil Suvaysh kanali davlat tasarrufiga o'tkazildi. 1967-yil Misr va Isroil o'rtasidagi urush harakatlari Misrning mag'lubiyati bilan yakunlandi. Ikki davlat o'rtasidagi nizoga barham berish maqsadida 1979-yil AQSHning Kemp-Devid shaharchasida Misr prezidenti Anvar Sadat AQSH va Isroil bilan Kemp-Devid shartnomasini imzoladi. Bu shartnoma arab davlatlarida norozilik harakatlariga sabab bo'ldi. 1981-yil Anvar Sadat suiqasd natijasida otib o'ldirildi. Uning o'rniga prezidentlik lavozimini Husni Muborak egalladi.

## MOZAMBIK

*Rasmiy nomi — Mozambik Respublikasi. Poytaxti — Maputu. Hududi — 802000 km<sup>2</sup>. Aholisi — 20888299 kishi (2007). Davlat tili — portugal. Dini — majusiylik (60%), xristianlik (30%), islom (10%). Pul birligi — metikal.*

**Geografik joylashuvi va tabiati.** Afrika qit'asining janubi sharqida joylashgan davlat. G'arbda Malavi (chegara uzunligi — 1569 km), Zimbabve (1231 km) va Zambiya (419 km), janubda JAR (491 km) va Svazilend (105 km), shimolda Tanzaniya (756 km) bi-

lan chegaradosh. Sharqda mamlakat hududi Mozambik ko'rfaziga tutashib ketgan. Chegarasining umumiy uzunligi — 4571 km, sohil bo'ylab chegara uzunligi esa — 2470 km. Mamlakat shimolida balandligi 2419 m gacha bo'lgan sharqiy Afrika yassitog'ligi joylashgan. G'arbda mamlakatning yuqori nuqtasi (2436 m) bo'lgan Metebele tog'i bor. Sharqda qirg'oq- bo'yi quyi pasttekisliklari joylashgan. Mamlakatning markaziy qismini tepaliklar egallagan. Asosiy daryo- lari — Zambezi va Limpopo. Mamlakatning eng yirik Nyasa ko'lining bir qismi Malavi hududida joylashgan. Asosiy foydali qazilmalari: ko'mir, titan, temir rudasi, boksitlar, mis.

Iqlimi — shimolda subekvatorial mussonli, janubda tropik passatli.

**Davlat tuzilishi, siyosiy partiyalari.** Davlat tuzilishi — respublika. Mamlakat 11 ta provinsiyadan iborat, jumladan, poytaxti — Maputu shahri ham provinsiya maqomiga ega. 1975-yil 25-iyunda Mozambik Portugaliyadan mustaqillik oldi. Mustaqillik kuni milliy bayram sifatida nishonlanadi. Qonunchilik portugal fuqarolik huquqiga asoslangan. Davlat va hukumat boshlig'i — prezident. Premyer-ministr esa Ministrlar Kengashini boshqarishda prezidentga yordam beradi. Qonun chiqaruvchi hokimiyat bir palatali parlament — Respublika Assambleyasi tomonidan amalga oshiriladi. Yirik siyosiy partiyalari: FRELIMO partiyasi, Mozambik milliy ittifoqi (UNAMO), Mozambik liberal-demokratik partiyasi (PALMO), Mozambik milliy harakati (MONAMO).

**Iqtisodi, transport kommunikatsiyalari.** Mozambik qishloq xo'jaligida va gidroenergetikada iqtisodiy potensialga ega bo'lishiga qaramasdan Afrikaning eng qashshoq davlatlaridan biri bo'lib qolmoqda. Sanoatning nisbatan taraqqiy etgan sohalari — neftni qayta ishlash, kimyo, to'qimachilik, tamaki, oziq-ovqat ishlab chiqarish. Qishloq xo'jaligi YIMning 50% ini, eksportning 90% ini ta'minlaydi. Asosiy ekinlari: paxta, shakarqamish, choy, maniok, makkajo'xori, sholidan iborat, keilyu yong'oqlari va krevetkalar eksportining asosini tashkil qiladi. Keyingi yillarda hukumat tomonidan chet el investitsiyalari kirib kelishining qo'llab-



quvvatlanishi, iqtisodiy o'sish sur'atlarining oshishiga sabab bo'lmoqda. 2006-yil YIM miqdori 23583 mln dollarni (aholi jon boshiga — 1129 doll.) tashkil etgan.

Asosiy savdo hamkorlari: Ispaniya, JAR, Fransiya, Yaponiya, Buyuk Britaniya, Portugaliya.

Temiryo'llarining umumiy uzunligi — 3288 km, avtomobil yo'llari — 26498 km, ichki suv yo'llari — 3750 km. Mamlakatning asosiy portlari: Beyra, Maputu, Nakala.

**Tarixi.** O'rta asrlarda hozirgi Mozambik qirg'oqlarida arab savdogarlari o'z koloniyalariga asos solganlar. 1498-yili Mozambik qirg'oqlariga Vasko da Gama boshchiligidagi ekspeditsiya keldi va portugallar mahalliy qabila boshliqlari bilan Portugaliya mamlakatning faqat sohilbo'yi hududlarini nazorat qilishi haqida kelishib olishdi. Mozambikning markaziy qismining portugallar tomonidan tadqiq qilinishi Serpa Pintu yo'l boshchiligida XIX asrning oxirida boshlandi, 1951-yili esa Mozambik Portugaliyaning dengizorti provinsiyasiga aylandi. 1962-yilda tashkil topgan FRELIMO (Mozambikni ozod qilish fronti) qurolli tashkiloti portugallarga qarshi kurash olib bordi. 1975-yil 25-iyunda Portugaliya Mozambik mustaqilligini tan oldi.

Mamlakatda 16 yil davom etgan fuqarolar urushi 1992-yili hukumat va Mozambik Milliy qarshilik harakati o'rtasida tinchlik shartnomasining imzolanishi bilan yakunlandi.

## MOLDOVA

*Rasmiy nomi — Moldova Respublikasi. Poytaxti — Kishinyov. Hududi — 33700 km<sup>2</sup>. Aholisi — 4323231 kishi (2007). Davlat tili — moldovan. Dini — pravoslav. Pul birligi — ley.*

**Geografik joylashuvi va tabiati.** Sharqiy Yevropa tekisligining janubi g'arbida joylashgan davlat. Janubda, sharqda va shimolda Ukraina (chegara uzunligi — 939 km), g'arbda Ruminiya bilan (450 km) chegaradosh. Chegarasining umumiy uzunligi — 1389 km. Mamlakat hududini tepalikli tekisliklar, daryo vodiylari

va jarliklar egallaydi. Eng baland qismi (429 m) mamlakat markazida joylashgan Kodri tepalaridir. Asosiy daryolari — Dnestr, Prut. Asosiy foydali qazilmalari — fosforitlar, soz tuproq, ohaktosh. Mamlakat hududining yarmi haydaladigan yerlar hisoblanadi.

Iqlimi — yumshoq, mo'tadil, kontinental.

Hududining 10% qismi o'rmonlar bilan qoplangan. Mamlakat faunasi 400 turdan oshiq umurtqali, 4500 turdan oshiq umurtqasiz hayvonlardan iborat.

**Davlat tuzilishi, siyosiy partiyalari.** Davlat tuzilishi — respublika. 1990-yili Moldova Respublikasi tarkibidagi ikki rayon — Gagauz Respublikasi va Pridnestrovye o'zlarini mustaqil davlat deb e'lon qilishdi, biroq ular jahon jamoatchiligi tomonidan tan olinmadi. Moldova mustaqilligi 1991-yil 27-avgustda e'lon qilingan (oldingi nomi — Moldaviya Sovet Sotsialistik Respublikasi). Mustaqillik kuni milliy bayram sifatida nishonlanadi. Ijroiya hokimiyat prezidentga (davlat boshlig'i) va premyer-ministr boshchiligidagi Ministrlar Kabinetiga tegishli. Oliy qonun chiqaruvchi organ — bir palatali parlament (Oliy Kengash).

Yirik siyosiy partiyalari: Agrar-demokratik partiyasi, Xristian-demokratik xalq fronti, Demokratik partiya.

**Iqtisodi, transport kommunikatsiyalari.** Sanoatning peshqadam tarmog'i — oziq-ovqat ishlab chiqarish, shuningdek, og'ir va yengil sanoat ham rivojlangan. Ko'p tarmoqli qishloq xo'jaligi YIMning 40% (vino va tamaki eng muhim eksport mahsulotlari hisoblanadi)ini tashkil qiladi. 2006-yil YIM miqdori 7349 mln dollarni (aholi jon boshiga — 1699 doll.) tashkil etgan. Asosiy savdo hamkorlari: Rossiya, Ukraina, O'zbekiston, Ruminiya, Germaniya.

Temiryo'llarining umumiy uzunligi — 1150 km, avtomobil yo'llari — 20000 km (13900 km — qattiq qoplamali yo'llar).

**Tarixi.** XII asrdan XIV asrgacha Moldova — skif, gott, gunn va slavyan davlatlarining tarkibida bo'lib keldi. XIV asrga kelib voloxlar va sharqiy slavyanlar bilan aloqalar natijasida Moldova xalqi shakllandi, 1359-yili esa Bogdan I mustaqil Moldaviya knyazligini tuzdi. Bu knyazlik shu davrda ham madaniy, ham iqtis-

sodiy jihatdan yuksaldi. XV asrda Stefan Buyukning qahramonlarcha ko'rsatgan qarshiligiga qaramasdan Moldova knyazligi turklar tomonidan bo'ysundirildi va Usmoniylar imperiyasining bir qismiga aylandi. 1774-yili Moldova Avstriya hukmronligi ostiga, 1806-yili esa Rossiya imperiyasi tarkibiga qo'shildi. 1859-yili Moldova Valaxiya bilan birlashdi va Rumin knyazligini tashkil etdi. Bu knyazlikni moldavan knyazi Aleksandru Kuza idora qilgan. 1924-yil tuzilgan Moldova muxtor respublikasi va 1940-yil Ruminiyaning anneksiya qilingan Bessarabiya hududlarida 1940-yil 2-avgustda Moldaviya Sovet Sotsialistik Respublikasi tuzildi. Moldaviya 1941-yili rumin va nemis qo'shinlari tomonidan bosib olindi, ozod qilinganidan so'ng 1944-yili Sovet Ittifoqi tarkibiga qaytdi. 1947-yilgi Parij shartnomasiga ko'ra Ruminiya Moldaviya hududlariga bo'lgan da'vosidan tamomila voz kechdi. Moldaviya 1991-yil mustaqillikka erishdi, biroq mamlakatning sharqiy qismi, jahon jamoatchiligi tomonidan tan olinmagan Pridnestrovye Respublikasi mamlakatning yangi hukumatini tan olishdan bosh tortib kelmoqda.

## MONAKO

*Rasmiy nomi — Monako Knyazligi. Poytaxti — Monako. Hududi — 1,9 km<sup>2</sup>. Aholisi — 32146 kishi (2007). Davlat tili — fransuz. Dini — katolik (95%). Pul birligi — yevro.*

**Geografik joylashuvi va tabiati.** Yevropaning janubida, O'rtayer dengizi qirg'oqlarida joylashgan davlat. G'arbda, shimolda va sharqda Fransiya bilan chegaradosh. Chegarasining uzunligi — 4,4 km, sohil bo'ylab chegara uzunligi esa 4,1 km. Monako hududi bo'yicha dunyoning eng kichik davlatlaridan biri hisoblanadi. Mamlakat landshafti tepaliklardan iborat.

Iqlimi — qishda yumshoq va zax, yozda issiq va quruq.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat Monako, Monte-Karlo, La-Kandamin, Fontevey

ma'muriy hududlariga bo'lingan. Monako 1419-yildan buyon mustaqil davlat hisoblanadi. Qonunchilik fransuz qonunlariga asoslangan. 19-noyabr — Milliy bayram kuni. Davlat boshlig'i — knyaz (knyaz Rene III Grimaldi mamlakatni 1949-yil noyabrdan 2005-yilga qadar idora qilgan). Hozirgi kunda knyaz Albert I (1958-yil 14-martda tug'ilgan) mamlakatni idora qilmoqda. Ijroiya hokimiyat, shuningdek, hukumat kengashining boshlig'i davlat ministriga ham tegishli. Qonun chiqaruvchi hokimiyat Milliy Kengash tomonidan amalga oshiriladi. Yirik siyosiy partiyalari: Milliy-demokratik ittifoq, Demokratik ittifoq harakati, Monegas sotsialistik partiyasi.

***Iqtisodi, transport kommunikatsiyalari.***

Davlat xazinasiga daromad asosan chet ellik turistlar (Monako Yevropaning eng yaxshi kurortlaridan biri hisoblanadi) va kazinolarga tashrif buyuruvchilardan keladi. Davlat o'z fuqarolaridan daromad solig'i olmaydi. Davlat xarajatlari bu yerda doimiy istiqomat qiladigan tadbirkorlardan, shuningdek, Monako bilan imtiyozli soliqlar asosida hamkorlik qilayotgan chet el kompaniyalaridan olinadigan soliqlar hisobidan qoplanadi. Monako daromadining qariyb yarmini korxonalar, banklar va mehmonxonalardan olinadigan qo'shimcha qiymat solig'i tashkil qiladi. 2006-yil YIM miqdori 870 mln dollarni (aholi jon boshiga — 27064 doll.) tashkil etgan. Monakoda yashovchilarning yashash darajasi G'arbiy Yevropa davlatlaridagi yashash darajasi bilan tenglasha oladi. Fransiya bilan tuzilgan bojxona ittifoqi orqali Monako YI davlatlari bilan hamkorlik qiladi.

Temiryo'llarining umumiy uzunligi — 1,7 km, avtomobil yo'llari yo'q, faqat shahar ko'chalarida bor. Asosiy porti: Monako.

***Tarixi.*** Hozirgi Monako hududidagi birinchi davlat tuzilmasi finikiyaliklarning shahar-davlati bo'lib, u keyinchalik greklarning mustamlakasiga aylantirilgan. 1070-yili Monako genuyalik Grimaldilar oilasining mulkiga aylandi. 1524-yildan 1641-yilgacha Monako Ispaniya tomonidan anneksiya qilingan, 1873-yili esa Fransiya boshqaruvi ostiga o'tdi. Monako 1861-yili mustaqil knyazlik bo'ldi, biroq tez orada Fransiya

protektoratiga aylandi. 1949-yildan beri Grimaldilarning gerbi va nomini saqlab qolgan Polinyaklar oilasi Monakoga egalik qilib kelmoqda.

## MONGOLIYA

*Rasmiy nomi — Mongoliya Respublikasi. Poytaxti — Ulan-Bator. Hududi — 1566000 km<sup>2</sup>. Aholisi — 2875747 kishi (2007). Davlat tili — mongol. Dini — lamaizm (Tibet buddizmi). Pul birligi — tugrik.*

**Geografik joylashuvi va tabiati.** Markaziy Osiyoda joylashgan davlat. G'arbda, janubda va sharqda Xitoy (chegara uzunligi — 4673 km), shimolda Rossiya bilan (3441 km) chegaradosh. Chegarasining umumiy uzunligi — 8114 km. G'arbida va janubi g'arbida Mongoliya Oltoyi (balandligi — 438 m), Gobi Oltoyi va Xongay tog'lari, mamlakatning markaziy qismida Xongay tog'lari joylashgan. Janubi va janubi sharqida Gobi sahrosi mavjud. Asosiy daryolari — Selenga, Kerulen, Kobdo. Nisbatan yirik ko'llari — Ubsu-nur, Xubsu-gul. Mamlakat hududida neft, ko'mir, mis, temir rudasi, volfram, molibden, fosforitlar, qo'rg'oshin, nikel, oltin konlari bor. Mamlakat hududining katta qismini o'tloq va yaylovlar (79%) egallaydi.

Iqlimi — keskin kontinental.

**Davlat tuzilishi, siyosiy partiyalari.** Davlat tuzilishi — respublika. Mamlakat 18 ta rayon (aymoqlar)ga va 3 ta munitsipalitet (Ulan-Bator, Darxan, Erdenet)ga bo'linadi. Mongoliya 1924-yil noyabr oyida mustaqillikka erishgan (ilgari Xitoy tarkibidagi tashqi Mongoliya provinsiyasi bo'lgan). Milliy bayram — 11-iyul — Xalq inqilobi kuni. Ijroiya hokimiyat prezidentga (davlat boshlig'i) va premyer-ministr boshchiligidagi hukumatga tegishli. Oliy qonun chiqaruvchi organ — Buyuk Xalq Xurali (bir palatali parlament). Yirik siyosiy partiyalari: Mongoliya Xalq-inqilobiy partiyasi, Mongoliya Milliy-demokratik partiyasi, Mongoliya Sotsial-demokratik partiyasi.

### ***Iqtisodi, transport kommunikatsiyalari.***

Iqtisodiy faoliyat an'anaviy ravishda qishloq xo'jaligiga asoslangan (Mongoliya dunyoda jon boshiga eng ko'p sigir to'g'ri keladigan mamlakat hisoblanadi). Tog'-kon sanoati (ko'mir, temir rudalari, mis, molibden, volfram, qo'rg'oshin, oltin qazib olish) asosiy tarmoq hisoblanadi. Iqtisodiyotining boshqa muhim tarmoqlari — o'rmon xo'jaligi va baliqchilik. Hozirgi vaqtda mamlakat iqtisodiyoti markaziy rejalashtirishdan bozor munosabatlariga o'tish davrini boshidan kechirmoqda. 2006-yil YIM miqdori 5127 mln dollarni (aholi jon boshiga — 1782 doll.) tashkil etgan. Asosiy savdo hamkorlari: Rossiya, Xitoy, Yaponiya, Qozog'iston.

Temiryo'llarining umumiy uzunligi — 1750 km. Avtomobil yo'llari — 46700 km (1000 km qattiq qoplamali yo'llar), ichki suv yo'llari — 397 km.

***Tarixi.*** VI asrdan XII asrgacha hozirgi Mongoliya hududi turk, uyg'ur, qirg'iz xonliklarining va Laoo davlatlarining tarkibida bo'lib keldi. XIII asrda Chingizxon mo'g'ul qabilalarini birlashtirib juda ko'p mamlakatlarni bosib oldi va Ulkan Mo'g'ul imperiyasini vujudga keltirdi. XVI asrga kelib mo'g'ullar oldingi qudratini yo'qotdi va budda dinini qabul qilishdi, 1635—1691-yillarda esa mo'g'ul qabilalari Manchjur hukmdorlari ta'siri ostiga tushib qoldilar. 1911-yili tashqi (shimoliy) Mongoliya Xitoy protektoratiga aylandi. Rossiyada inqilob amalga oshganidan keyin 1918-yili xitoyliklar Mongoliyaning butun hududlarini bosib olishga harakat qilishdi, biroq 1921-yili mamlakatga sovet qo'shinlari kiritildi. 1924-yili esa Mongoliya Xalq Respublikasi deb e'lon qilindi. 1939-yili Xalxin-Gol daryosi rayonida Qizil Armiya yapon qo'shinlarining hujumlarini qaytardi. 1946-yili Mongoliya mustaqilligi Xitoy tomonidan tan olindi. 1991-yili hokimiyat tepasidagi kommunistik partiya marksizm-leninizm tamoyillarini rad etib, mamlakatda siyosiy va iqtisodiy islohotlar o'tkaza boshladi. Shu davrdan boshlab Mongoliya Respublikasi deb ataladi.

## MONTSERRAT

*Rasmiy nomi*—Montserrat (*Buyuk Britaniya mulki*). *Poytaxti* — Plimut. *Hududi* — 102 km<sup>2</sup>. *Aholisi* — 9548 kishi (2007). *Davlat tili* — ingliz. *Dini* — xristianlik. *Pul birligi* — sharqiy karib dollari.

**Geografik joylashuvi va tabiati.** Montserrat — Karib dengizining sharqiy qismida joylashgan Vest-Indiyadagi orol. Shimoliy va Janubiy Amerika orasidagi Kichik Antil orollari arxipelagidagi Shamolli orollar guruhiga kiradi. Harakatdagi vulqon — Chances Pik. Montserrat — harakatdagi vulqon joylashgan tog' tizimidan iborat tekislikdagi orol.

*Iqlimi* — tropik, issiq. O'simlik dunyosi doim yashil o'rmonlar va boshqa tropik o'simliklarga juda boy. Hayvonot dunyosi qushlar, sudralib yuruvchilar va hasharotlar, sohilbo'yi suvlarida dengiz jonivorlarini ko'plab uchratish mumkin.

**Davlat tuzilishi va siyosiy partiyalari.** 1960-yil konstitutsiyasiga ko'ra Buyuk Britaniya qirolichasi tomonidan tayinlanadigan gubernator boshqaruvidagi orol. Gubernator ijro etuvchi Kengash raisi hisoblanadi. Siyosiy partiyalari: Milliy progressiv partiya, Ozodlik Xalq Harakati, Progressiv demokratik partiya, Milliy rivojlanish partiyasi.

**Iqtisodi, transport kommunikatsiyalari.** Elektron asboblari yig'ish hamda qishloq xo'jalik mahsulotlarini qayta ishlashga ixtisoslashgan korxonalar mavjud. Paxta, meva va sabzavotlar yetishtiriladi. Chorvachilik, yog'och tayyorlash va uni qayta ishlash rivojlangan. Uncha katta bo'lmagan dengiz hayvonlarini ovlash xo'jaligiga ega. 2006-yil YIM miqdori 29 mln dollarni (aholi jon boshiga — 3037 doll.) tashkil etgan. Asosiy savdo hamkorlari: AQSH, Buyuk Britaniya, Kanada, Antigua va Barbuda.

**Tarixi.** Orol X. Kolumb tomonidan 1493-yilda kashf qilingan. 1632-yilda surgun qilingan katoliklar tomonidan birinchi ingliz manzilgohiga asos solindi. XVII—XVIII asrlarda Angliya va Fransiya orolga egalik

qilish uchun o'zaro kurash olib borgan. 1871-yildan 1958-yilga qadar Montserrat Shamolli orollar, 1958-yildan to 1962-yilgacha esa Vest-Indiya federatsiyasi tarkibida bo'lgan. Montserrat — Sharqiy Karib davlatlari tashkiloti Mintaqaviy xavfsizlik tizimi uyushmasining a'zosi.

## MUQADDAS YELENA OROLI

*Rasmiy nomi — Muqaddas Yelena Orol (Buyuk Britaniya mulki). Poytaxti — Jeymstaun. Hududi — 410 km<sup>2</sup>. Aholisi 7550 kishi (2007). Tili — ingliz. Dini — xristianlik (protestantlar). Pul birligi — Muqaddas Yelena orollari funt sterlingi.*

**Geografik joylashuvi va tabiati.** Muqaddas Yelena oroli, shuningdek, Vozneseniye, Tristan-da-Kunya orollari va odam yashamaydigan 5 ta orol Atlantika okeanining janubiy qismida joylashgan. Muqaddas Yelena oroli vulqonlar natijasida paydo bo'lgan. Uning janubiy qismida balandligi 858 metr-gacha bo'lgan so'ngan vulqon krateri bor.

Iqlimi — passatli va tropik. Muqaddas Yelena orolining katta qismini maysazor va changalzorlar egalagan. Oq qarag'ay, evkalipt va sarv daraxtlari o'sadi. Vozneseniye oroli o'tsimon o'simliklar bilan qoplangan.

**Davlat tuzilishi va siyosiy partiyalari.** Davlat tuzilishi — respublika. Davlat boshqaruvini Qonunchilik va Ijroiya Kengashi faoliyatini bevosita boshqaradigan ingliz gubernatori amalga oshiradi. Ma'muriy jihatdan mustamlaka bitta ma'muriy hudud (Muqaddas Yelena oroli) va 2 ta tobe hududlar (Vozneseniye va Tristan-da-Kunya orollari)ga bo'linadi.

**Iqtisodi, transport kommunikatsiyalari.** Kartoshka, sabzavotlar, olma, olxo'ri, g'alla mahsulotlari, zig'ir yetishtiriladi. Baliqchilik va dengiz ovchiligi, chorvachilik rivojlangan. Eksporti: zig'ir, importi: sanoat mahsulotlari, yoqilg'i. 2006-yil YIM miqdori 18 mln dollarni (aholi jon boshiga — 2384 doll.) tashkil etgan. Asosiy savdo hamkorlari: Buyuk Britaniya, JAR.

Asosiy porti — Jeymstaun.



**Tarixi.** Orol 1502-yil 21-mayda portugallar tomonidan Muqaddas Yelena kuni kashf etilgan. Tristan-da-Kunya oroli 1506-yil portugaliyalik dengizchi Tristan-da-Kunya tomonidan kashf etilgan. Orol-larga egalik huquqini qo'lga kiritish uchun bo'lgan qizg'in kurashlarda Angliya Gollandiya ustidan g'alaba qozondi va 1659-yilda Muqaddas Yelena oroliga harbiy bazasini joylashtirdi. 1815-yil Muqaddas Yelena oroli Napoleon Bonapartning (1821-yil shu orolda vafot etgan) surgun joyiga aylandi. Suvaysh kanalining ochilishi orollarning strategik ahamiyatini pasaytirdi. 1942-yil Vozneseniye oroliga AQSHning harbiy-havo bazasi joylashtirildi. Bu yerda 1954-yilda AQSHning Florida yarimorolidan uchiriladigan fazoviy raketa texnikalari uchun kuzatuv stansiyasi joylashtirildi. 1966-yilda Vozneseniye orolida ingliz radiostansiyasi faoliyat ko'rsata boshladi. Folklend mojarosi davrida 1982-yil Vozneseniye oroli Argentinaga qarshi urushda ingliz qurolli kuchlarining asosiy bazasi bo'ldi.

## MYANMA (BIRMA)

*Rasmiy nomi — Myanma Ittifoqi. Poytaxti — Yangon. Hududi — 676577 km<sup>2</sup>. Aholisi — 47350511 kishi (2007). Davlat tili — birman. Dini — buddaviylik (85%), xristian, induizm, islom. Pul birligi — chja (kyat).*

**Geografik joylashuvi va tabiati.** Osiyoning janubiy sharqida joylashgan davlat. Myanma — shimol va sharqda Xitoy (chegara uzunligi — 2185 km), sharqda Tailand (1800 km) va Laos (235 km), g'arbda esa Hindiston (1463 km) va Bangladesh (193 km) bilan chegaradosh. Mamlakat g'arbda Bengal ko'rfaziga, janubda Andaman dengiziga tutashib ketgan. Chegaraning uzunligi 5876 km, sohil bo'ylab chegara uzunligi esa 1930 km, hududining katta qismida tog'lar va yassitog'liklar joylashgan: g'arbida Rakxayn va Pakxayn tog'liklari, sharqida Bialukton tog'liklari joylashgan. Mamlakatning va Janubi Sharqiy Osiyoning eng yuqori nuqtasi — Kxakoborazu (5881m) tog'idir. Mamlakat-

ning markaziy va janubiy qismida Myanmaning asosiy daryosi Irvadi havzasida keng vodiy tekisligi joylashgan. Mamlakat foydali qazilmalaridan — neft, qo'rg'oshin, volfram, sink, mis, ko'mir, tabiiy gaz, qimmatbaho toshlarga juda boy. Haydaladigan yerlar hududining 15%ini, o'rmon va to'qayzorlar 49%ini tashkil etadi.

Iqlimi — asosan tropik mussonli, janubida esa subekvatorial.

Myanmaning o'simlik dunyosi juda qadimiy. Bu yerda rododendronlarning 700 dan (yer yuzida ularning mingdan oshiq turi mavjud), orxideyalarning 700 dan, kalilyalarning 80 dan, palmalarning 70 dan, bambuklarning 70 dan, paporotniklarning 700 dan oshiq turi uchraydi.

Myanmada yer yuzida istiqomat qiladigan jonivorlarning nisbatan qadimiylari — malayya tapiri, hind-malay tipratikanlari, langarqanotlilar saqlanib qolgan.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga 7 ta ma'muriy va 7 ta milliy viloyatlar kiradi. 1948-yil 4-yanvarda Buyuk Britaniyadan mustaqillikka erishgan (Milliy bayrami — Mustaqillik kuni). Davlat boshlig'i — qonunchilik va tartibni qayta tiklash davlat kengashining raisi va premyer-ministr general Tan Shve hisoblanadi. Hukumat tomonidan cheklangan holda faoliyat yuritish uchun bir necha siyosiy partiyalarga ruxsat berilgan. Ulardan eng yiriklari: demokratiya uchun Milliy liga, Demokratik partiya, Xalq demokratik partiyasi va Milliy birlik partiyasi. Mamlakatda maxfiy ravishda partiyalar va tashkilotlar, qo'zg'olonchi guruhlari hukumatga qarshi qurolli kurashni davom ettirishmoqda.

**Iqtisodi, transport kommunikatsiyalari.** Myanma iqtisodiyoti asosan qishloq xo'jaligi bilan bog'liq bo'lib, keyingi 10 yillikda inqirozni boshdan kechirmoqda. Hukumat keyingi 40 yil ichida joriy qilingan qat'iy davlat boshqaruvidan so'ng tadbirkorlarni qo'llash va chet el investitsiyalarini kiritish yo'li bilan iqtisodiyotni jonlantirishga harakat qilmoqda. Sanoatning asosiy tarmoqlari: tog'-kon, neft qazib olish va o'rmonchilik (YIMning 40%i, baliqchilik va o'rmonchi-

likni qo'shib hisoblaganda). Qishloq xo'jaligida asosiy tarmoq — sholichilik, bundan tashqari bug'doy, shakar-qamish, makkajo'xori, kauchuk va jut ham yetishtiriladi. 2006-yil YIM miqdori 78740 mln dollarni (aholi jon boshiga — 1662 doll.) tashkil etgan. Asosiy savdo hamkorlari: YI mamlakatlari Hindiston, Yaponiya, Xitoy.

Temiryo'llarning umumiy uzunligi 3991 km, avtomobil yo'llari — 27000 km (320 km betonlashtirilgan yo'llar), ichki suv yo'llari 12800 km. Asosiy porti — Yangon.

**Tarixi.** Hozirgi Myanma hududida dastlabki davlat birlashmalari eramizning boshlarida vujudga kelgan (Mon, Piu). XI asr boshlarida Pagan qirolligi o'z atrofiga mamlakat markazidagi mayda qirolliklarni birlashtirdi. XIII asr oxirlarida Birma birlashgan qirolligiga mo'g'ullar bosqini boshlandi. 1824-yili Buyuk Britaniya Janubi Sharqiy Osiyoda Fransiya ekspansiyasini to'xtatib qolish maqsadida Quyi Birmani bosib oldi, 1855-yili esa butun mamlakatni anneksiya qildi. II jahon urushi davrida 1942-yildan 1945-yilga qadar mamlakat yapon bosqinchilari qo'l ostida bo'ldi. Mamlakat ozod qilganidan so'ng Birma hududida istiqomat qilayotgan bir qator mayda millatlar muxtoriyat talab qilishdi. Natijada 1948-yilning 4-yanvarida mustaqil davlat deb e'lon qilingan Birma davlatlari federatsiyasi tuzildi. 1962-yil davlat to'ntarishi natijasida mamlakatda hokimiyat tepasiga harbiylar kelishdi. Ular ushbu tartibdan norozi bo'lgan bir-maliklarning qo'zg'olonlarini shafqatsizlik bilan bostirdilar. 1989-yili mamlakat Myanma Ittifoqi degan yangi nom oldi. 1990-yili mamlakatda dastlabki erkin saylovlar o'tkazildi. Bu saylovlarda bosh muxolifatchi partiya g'alaba qozondi, biroq hokimiyatni boshqarayotgan harbiy tartib tarafdorlari davlat boshqaruvini fuqarolik hukumatiga topshirishdan bosh tortdi. Myanma 1992-yil Qo'shilmaslik harakatiga a'zo bo'ldi. 1992-yili yadro, 1993-yili kimyoviy qurolni tarqatmaslik va taqiqlash Shartnomalarini imzoladi. 1997-yildan ASEAN a'zosi. XXI asr boshida ham harbiy hukumat va muxolifatdagi kuchlar o'rtasidagi muammo — «Myanma masalasi» o'z yechimini topgani yo'q.

## NAMIBIYA

*Rasmiy nomi — Namibiya Respublikasi. Poytaxti — Vindxuk. Hududi — 824269 km<sup>2</sup>. Aholisi — 2059778 kishi (2007). Davlat tili — ingliz, nemis, afrikaans, bantu. Dini — xristianlik. Pul birligi — Janubiy Afrika rendi.*

**Geografik joylashuvi va tabiati.** Afrikaning janubi g'arbida joylashgan davlat. Namibiya janubda va sharqda Janubiy Afrika Respublikasi (chegara uzunligi 855 km), sharqda Botsvana (1360 km), shimolda Angola (1376 km) va Zambiya (233 km) bilan chegara-dosh. Mamlakatning g'arbiy chegaralari Atlantik okeani bilan tutashib ketgan. Chegarasining umumiy uzunligi 3824 km, sohil bo'ylab chegara uzunligi 1572 km. Mamlakat hududining katta qismini balandligi 2000 m dan oshmaydigan yassitog'lar egallagan bo'lib, g'arbiy qirg'oqlarda joylashgan Namib cho'liga tutashib ketgan. Namib cho'li yer yuzining eng qurg'oq joylaridan biri hisoblanadi. Sharqida boshqa bir cho'l — Kalaxari ham mavjud. Asosiy daryolari — Oranj va Kunenya. Namibiyada turli foydali qazilmalar — olmos, mis, uran, oltin, qo'rg'oshin va boshqalar bor.

Iqlimi — tropik, quruq.

**Davlat tuzilishi, siyosiy partiyalari.** Davlat tuzilishi — respublika. Mamlakat 13 ta ma'muriy hududga bo'lingan. Namibiya 1990-yil 21-mart kuni mustaqillikka erishgan (ilgari mamlakat Janubiy Afrika Respublikasi boshqaruvi ostida bo'lgan). Ushbu sana mustaqillik kuni — Milliy bayram sifatida nishonlanadi. Ijroiya hokimiyat prezidentga (davlat boshlig'i) va premyer-ministr boshchiligidagi hukumatga tegishli. Qonun chiqaruvchi hokimiyat Milliy Assambleya va Milliy Yig'indan iborat 2 palatali parlament tomonidan amalga oshiriladi. Yirik siyosiy partiyalari: Janubi g'arbiy Afrika xalqlari tashkiloti (SVAPO), Turnxalxe demokratik alyansi (DAT), Demokratlar Kongressi, Birlashgan demokratik front.

**Iqtisodi, transport kommunikatsiyalari.** Mamlakat iqtisodiyotining asosi tog'-kon sanoatidir

(Namibiya yoqilg'i bo'lmagan foydali qazilmalar eksporti bo'yicha 4-o'rinda va uran ishlab chiqarish bo'yicha dunyoda 5-o'rinda turadi). Namibiya boy olmos konlariga ega bo'lganligi sababli zargarlik buyumlari uchun olmos yetkazib beruvchi asosiy davlatlardan biri hisoblanadi. Qishloq xo'jaligida asosiy tarmoq chorvachilik hisoblanadi. 2006-yil YIM miqdori 13139 mln dollarni (aholi jon boshiga — 6378 doll.) tashkil etgan. Asosiy savdo hamkorlari — Shveysariya, JAR, Germaniya, Yaponiya.

Temiryo'llarning umumiy uzunligi 2341 km, avtomobil yo'llari 54500 km. Mamlakatning asosiy porti — Lyuderis.

**Tarixi.** Hozirgi Namibiya hududlari 1883—1884-yillarda Germaniya tomonidan mustamlakalashtirildi. German janubi g'arbiy Afrikasi nomi bilan protektoratga aylantirildi. Mamlakat 1915-yili JAR tomonidan bosib olindi. 1920-yili esa JAR Millatlar Ligasidan janubi g'arbiy Afrikani boshqarish mandatini oldi. 1949-yili JAR janubi g'arbiy Afrikani BMT ruxsatisiz o'ziga qo'shib oldi. 1968-yili mamlakat BMT qarori bilan Namibiya deb nomlandi. 1966-yili tuzilgan SVAPO qurolli tashkiloti ozodlik urushlarini olib bordi. Bu kurash 1990-yilda Namibiya Respublikasini e'lon qilish bilan tugadi.

## NAURU

*Rasmiy nomi — Nauru Respublikasi. Poytaxti — Yangor (Yaren). Hududi — 21 km<sup>2</sup>. Aholisi — 13523 kishi (2007). Davlat tili — nauru, ingliz. Dini — xristianlik. Pul birligi — Avstraliya dollari.*

**Geografik joylashuvi va tabiati.** Tinch okeanning janubi g'arbiy qismidagi Nauru orolida joylashgan Okeaniya davlati hisoblanadi. Sohil bo'ylab chegara uzunligi 30 km. Marjon orol oval shaklida bo'lib, qumlik qirg'oqlari bor. Orolning yuza qismi balandligi 65 m gacha bo'lgan fosforitli ohaktosh yassitog'liklardan iborat.

Asosiy tabiiy resurslari — fosforitlar.

Iqlimi — ekvatorial mussonli.

**Davlat tuzilishi, siyosiy partiyalari.** Davlat tuzilishi — respublika. Nauru Buyuk Britaniya hamdo'stligi davlatlari tarkibiga kiradi. Nauru 1968-yil 31-yanvarda mustaqillikka erishgan (oldingi nomi — Yoqimli orol — Buyuk Britaniya, Avstraliya, Yangi Zelandiya birgalikda boshqargan). Davlat va hukumat boshlig'i — prezident. Siyosiy partiyalari: Nauru partiyasi, Nauru demokratik partiyasi.

**Iqtisodi, transport kommunikatsiyalari.** Mamlakat iqtisodiyotining asosini fosfatlar qazib olish va uni eksport qilish tashkil etadi. Bu mahsulotni chetga eksport qilish katta daromad keltirganligi bois aholining yashash darajasi yetarlicha yuqori. Qishloq xo'jaligi taraqqiy etmagan. Mamlakat hamma oziq-ovqat mahsulotlarini, jumladan chuchuk suvni ham chetdan keltiradi. 2006-yil YIM miqdori 60 mln dollarni (aholi jon boshiga — 4436 doll.) tashkil etgan.

Asosiy savdo hamkorlari — Avstraliya, Yangi Zelandiya, Buyuk Britaniya.

Temiryo'llari yo'q. Avtomobil yo'llari — 27 km. Porti—Nauru.

**Tarixi.** Orol 1798-yili inglizlar tomonidan kashf etilgan bo'lib, 1888-yili Germaniya tomonidan bosib olingan. 1914-yili Nauruni Avstraliya bosib oldi. 1920-yili esa Buyuk Britaniya orolni boshqarish huquqini beruvchi mandatni qo'lga kiritdi. 1947-yili Nauru Avstraliya, Yangi Zelandiya va Buyuk Britaniya davlatlari tomonidan boshqariladigan BMT homiyligidagi hududga aylandi. 1968-yili mamlakat Buyuk Britaniya hamdo'stligi tarkibida mustaqillikni qo'lga kiritdi.

## NEPAL

*Rasmiy nomi — Nepal Qirolligi. Poytaxti — Katmandu. Hududi — 147181 km<sup>2</sup>. Aholisi — 28909469 kishi (2007). Davlat tili — nepali. Dini — induizm (rasmiy dini 90%). Pul birligi — Nepal rupiyasi.*

**Geografik joylashuvi va tabiati.** Osiyo qit'asi-ning janubiy qismida joylashgan davlat. G'arbda, janubda va sharqda Hindiston (chegara uzunligi 1690 km), shimolda Xitoy bilan (1236 km) chegaradosh. Chegarasining umumiy uzunligi 2926 km. Mamlakat janubida keng Hind-Gang tekisligi joylashgan. Markaziy qismida balandligi 2500 m bo'lgan Mahabxorat va Churiya tepalik va tog'liklari joylashgan. Shimolida Himolay tog'lari joylashgan. Nepalda dunyoning 7 ta eng baland cho'qqilari to'liq yoki qisman joylashgan. Jumladan, yer yuzining eng baland cho'qqisi — Jomolungma (Everest — 8848 m) ham Nepalda joylashgan. Nepalning asosiy daryolari — Karnali, Kali-Gandak, Aruklar Gang havzasiga kiruvchi daryolar hisoblanadi. Mamlakat yuqori gidroenergetik potensialga ega bo'lish bilan birga bir qator tabiiy resurslar — yog'och, mis, kobalt, lignit va temir rudasi konlariga ham egalik qiladi. Ishlov beradigan yerlar mamlakat hududining 17% ini, o'rmon va to'qay-zoylar 33% ini tashkil etadi.

Iqlimi — tropik iqlim zonasidan arktik iqlim zonasigacha davom etadi. Shunga ko'ra o'simlik dunyosi ham xilma-xildir.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat tarkibiga 14 ta zona (viloyat) kiradi. Ular o'z navbatida 75 ta distrintga (tuman) bo'linadi. Nepal 1768-yildan buyon mustaqil davlat hisoblanadi. Qonunchilik hind qonunlariga va ingliz umumiy huquqiga asoslanadi. Davlat boshlig'i monarx (qirol Birendra Bir Bikram Shax Dev 1985-yil 24-fevralda taxtga o'tirgan). Hozirgi qirolning tug'ilgan kuni 28-dekabr — Milliy bayram hisoblanadi. Qonun chiqaruvchi hokimiyat monarx va 2 palatali parlament tomonidan amalga oshiriladi. Parlament Milliy Kengash (yuqori palata) va Deputatlar palatasi (quyi palatasi)dan iborat. Yirik siyosiy partiyalari — Nepal Kongressi, Milliy Demokratik partiya, Nepal kommunistik partiyasi.

**Iqtisodi, transport kommunikatsiyalari.** Nepal jahonning kam rivojlangan davlatlaridan biri hisoblanadi. Iqtisodiyotining asosini qishloq xo'jaligi (YIMning 60% i) tashkil qiladi. Asosiy qishloq xo'jalik ekinlari — sholi, bug'doy va boshqa donli ekinlar —

shakarqamish, jut, shuningdek, go'sht va sut yetishtirish yaxshi taraqqiy etgan. Shunday bo'lsa-da mamlakat o'zining oziq-ovqatga bo'lgan ehtiyojini qondira olmaydi. Sanoat ishlab chiqarishi qishloq xo'jaligi mahsulotlarini qayta ishlash bilan chegaralangan. To'qimachilik mahsulotlari va gilam eksport qilishdan ham sezilarli darajada foyda olinadi. Keyingi yillarda mamlakat budjetiga daromad tushirishning muhim manbalaridan biri — turizm ham yaxshi rivojlanmoqda. 2006-yil YIM miqdori 37415 mln dollarni (aholi jon boshiga — 1500 doll.) tashkil etgan.

Asosiy savdo hamkorlari — AQSH, Hindiston, Germaniya, Buyuk Britaniya, Singapur, Yaponiya.

Temiryo'llarning umumiy uzunligi 101 km, avtomobil yo'llari esa 71400 km.

**Tarixi.** VII asrda Nepal hududida txakur sulolasiga asos solingan bo'lib, ular XVIII asrga qadar hukmronlik qilgan. XIV asrdan boshlab Nepal hududida musulmonlar hukmronligidan saqlanish maqsadida hind shahzodalari o'z knyazliklarini tuzishdi. XVI asrda Nepal hududida Nashput kastasiga mansub bo'lgan roja o'z sulolasiga asos soldi va u 1768-yilga kelib butun Nepal knyazliklarini bo'ysundirishga muvaffaq bo'ldi. 1814—1816-yillarda inglizlar bilan olib borilgan urushlarda Nepal o'z hududining bir qismini boy berdi. 1847-yili hokimiyatga Ran sulolasi keldi va ular Nepalni 1947-yilga qadar idora qilishdi. 1960-yili Nepalda siyosiy partiyalarning faoliyat yuritishi taqiqlangan edi, biroq 1990-yili bu taqiq yangi konstitutsiya qabul qilinishi bilan qirol tomonidan bekor qilindi. 1991-yili esa demokratik hukumat shakllantirildi.

## NIGER

*Rasmiy nomi — Niger Respublikasi. Poytaxti — Niamey. Hududi — 1267000 km<sup>2</sup>. Aholisi — 12901589 kishi (2007). Davlat tili — fransuz. Dini — musulmon sunniylari (80%), majusiylilik (14%), xristianlik(1%). Pul birligi — afrika franki.*



**Geografik joylashuvi va tabiati.** Afrikaning g'arbida joylashgan davlat. Janubda Nigeriya (chegara uzunligi 1497 km) va Benin (266 km), sharqda Chad (1175 km), shimolda Jazoir (956 km) va Liviya (354 km), g'arbda Mali (821 km) va Burkina-Faso (628 km) bilan chegaradosh. Chegarasining umumiy uzunligi 5697 km. Nigerning katta qismi dunyodagi eng yirik cho'l — Sahroi Kabir hududida joylashgan. Relyefi 200—500 m gacha bo'lgan yassitog'likdan iborat. Mamlakatning markaziy qismida tog'li massivlari bo'lgan Air yassitog'ligi joylashgan. Bu yerda Nigerning eng yuqori nuqtasi Indukaln-Tages (222 m) joylashgan. Mamlakatning sharqiy qismini qumli cho'l — Tenera egallagan. Asosiy daryosi — Niger. Mamlakat hududida uran, temir rudasi, qo'rg'oshin va fosfat konlari mavjud.

Iqlimi — tropik. Nigerning o'simlik dunyosi va hayvonot dunyosi juda kambag'al.

**Davlat tuzilishi, siyosiy partiyalari.** Davlat tuzilishi — respublika. Mamlakat 7 ta departamentga bo'lingan. Mamlakat 1960-yil 3-avgustda mustaqillik olgan (ilgari Fransiyaning dengizorti hududi bo'lgan). Qonunchilik fransuz umumiy huquqiga asoslangan. Mamlakat respublika deb e'lon qilingan kun — 18-dekabr (1958-yil) Milliy bayram sifatida nishonlanadi. Ijroiya hokimiyat prezidentga (davlat boshlig'i) va premyer-ministr boshchiligidagi hukumatga tegishli. Oliy qonun chiqaruvchi organ — Milliy yig'in. 30 dan ortiq siyosiy partiyalardan eng yiriklari — Raxama ijtimoiy va demokratik konventi, Nasara jamiyat taraqqiyoti milliy harakati, Demokratiya va sotsializm uchun Taraya Niger partiyasi, Vatanparvarlar demokratik va taraqqiyot partiyasi.

**Iqtisodi, transport kommunikatsiyalari.** Iqtisodiyotining asosiy tarmog'i qishloq xo'jaligi bo'lib, u YIMning 40% ini ta'minlaydi. Aholining 90% i qishloq xo'jaligida band. Muhim qishloq xo'jaligi ekinlari paxta, sorgo, mil, nebe, sholi, yong'oq hisoblanadi. Sanoatning asosiy sohasi tog'-kon sanoatidir (uran qazib olish). 2006-yil YIM miqdori 10128 mln dollarni (aholi jon boshiga — 785 doll.) tashkil etgan. Muhim savdo hamkorlari — Fransiya, Nigeriya, Italiya,

Germaniya. Avtomobil yo'llarining uzunligi 39970 km (shundan 371 km qattiq qoplamali yo'llar), ichki suv yo'llari — 300 km.

**Tarixi.** Hozirgi Nigerning sharqiy qismi X asrdan XIX asrgacha Bornu qirolligining markazi bo'lgan. Janubida esa X asrdan boshlab Xaus imperiyasi o'z hududlarini kengaytirgan. Yevropaliklardan birinchi bo'lib mamlakatga 1795-yili shotlandlar kelishdi. XIX asr oxirida Niger Fransiya tomonidan bosib olindi va 1922-yili fransuz g'arbiy Afrikasi tarkibiga qo'shildi. 1946-yili unga Fransiyaning dengizorti hududi maqomi berildi. Niger 1963-yili 3-avgustda mustaqil respublika deb e'lon qilindi.

## NIGERIYA

*Rasmiy nomi — Nigeriya Federativ Respublikasi. Poytaxti — Abuja. Hududi — 923768 km<sup>2</sup>. Aholisi — 140003542 kishi (2007). Davlat tili — ingliz. Dini — islom (50%), xristianlik (40%), majusiylik (10%). Pul birligi — nayra.*

**Geografik joylashuvi va tabiati.** Afrika qit'asining markaziy qismida joylashgan. Sharqda Kamerun (chegara uzunligi 1690 km) va Chad (87 km), shimolda Niger (1497 km), g'arbda Benin (773 km) bilan chegaradosh (chegara uzunligi 4047 km). Janubda Nigeriya Gvineya ko'rfazi bilan tutashib ketgan. Sohil bo'ylab chegara uzunligi 853 km, janubda qirg'oqbo'yi tekisligi joylashgan bo'lib, uning kengligi Niger daryosi deltasida 100 km gacha boradi. Mamlakat markazida yuza qism ko'tarilib boradi va balandligi 1735 m bo'lgan Jos yassitog'ligiga o'tadi. Yassitog'likdan shimolga qarab yuza pasayib boradi. Shimoli g'arbda Sokota tekisligi, shimoli sharqda esa Bornu tekisligi joylashgan. Sharqda Nigeriyaning eng yuqori nuqtasi Fogel cho'qqisi (2420 m) joylashgan Adamov tog'lari bor. Nigeriya hududida Chad ko'lining bir qismi joylashgan. Mamlakatning asosiy daryosi — Niger. Mamlakat foydali qazilmalarga juda boy. Ular orasida neft, tabiiy gaz, temir rudasi, ko'mir, qo'rg'oshin, rux

ko'plab uchraydi. Ishlov beriladigan yerlar mamlakat hududining 31%ini, o'tloq va yaylovlar 23%ini tashkil qiladi.

Iqlimi — ekvatorial mussonli.

**Davlat tuzilishi, siyosiy partiyalari.** Davlat tuzilishi — respublika, mamlakat tarkibiga 36 ta shtat va Abuja federal poytaxt okrugi kiradi. Nigeriya 1960-yil 1-oktabrda mustaqillikka erishgan (ilgari Buyuk Britaniya protektorati bo'lgan). Mustaqillik kuni milliy bayram hisoblanadi. Butun hokimiyat boshqaruv kengashining boshlig'i — prezidentga tegishli. Siyosiy partiyalari — Umumxalq partiyasi, Xalq demokratik partiyasi, Demokratiya uchun ittifoq.

**Iqtisodi, transport kommunikatsiyalari.** Siyosiy barqarorlik tufayli mamlakat iqtisodiyoti turg'unlikni o'z boshidan kechirmoqda. Sanoatining nisbatan taraqqiy etgan sohalari: neftni qayta ishlash (neft muhim eksport tovarlaridan biri hisoblanadi), metallurgiya, kimyo, oziq-ovqat ishlab chiqarish. Neftdan tashqari kakao, palma mahsulotlari va kauchuk ham eksport qilinadi. Boshqa qishloq xo'jaligi ekinlari: yong'oq, paxta, shakarqamish. 2006-yil, YIM miqdori 155571 mln dollarni (aholi jon boshiga — 1111 doll.) tashkil etgan.

Asosiy savdo hamkorlari — YI davlatlari, AQSH, Yaponiya.

Temiryo'llarning umumiy uzunligi 3567 km, avtomobil yo'llari 107990 km (shundan 30019 km asfaltlangan), ichki suv yo'llari 8575 km. Mamlakatning asosiy portlari Lagos, Port-Xarkort.

**Tarixi.** XVII asrda hozirgi Nigeriya hududiga dastlabki yevropaliklar kelganida mamlakatda 2 ta sivilizatsiya — shimolda Xausa Bornu, Sonoto kabi musulmon davlatlari hamda janubda Ioruba va Benin qirolliklari bor edi. XVIII asrda mamlakatni inglizlar tomonidan mustamlakalashtirish boshlangandan so'ng Nigeriya hududida 2 ta Britan protektorati — Janubiy va Shimoliy Nigeriya paydo bo'ldi. Ular 1919-yil birlashtirildi. 1954-yili protektorat 4 davlat federatsiyasiga aylantirildi, 1960-yili esa Nigeriya mustaqil respublika deb e'lon qilindi. 1967-yili mamlakat sharqida Biafra respublikasi

e'lon qilindi. Biroq 1973-yili u hukumat qo'shinlaridan mag'lub bo'ldi. Mamlakatda 1966-yili o'rnatilgan harbiy tartib 1979-yili fuqarolik hukumati bilan almashtirildi. Biroq 1983-yili mamlakatda navbatdagi davlat to'ntarishi o'tkazildi. 1999-yili 29-mayda Nigeriya fuqarolik hukumati boshqaruviga o'tdi.

## NIDERLANDIYA

*Rasmiy nomi — Niderlandlar Qirolligi. Poytaxti — Amsterdam. Hududi — 41548 km<sup>2</sup>. Aholisi — 16473420 kishi (2007). Davlat tili — golland. Dini — katoliklar (34%) protestantlar (25%), islom (3%). Pul birligi — yevro.*

**Geografik joylashuvi va tabiati.** Yevropaning shimoli g'arbida joylashgan davlat. Janubda Belgiya bilan (chegara uzunligi — 450 km), sharqda Germaniya bilan (chegara uzunligi — 577 km) chegaradosh. Shimolda va g'arbda Niderlandiya (boshqa nomi — Gollandiya). Shimoliy dengizga tutashib ketgan. Chegarasining umumiy uzunligi — 1027 km, sohil bo'ylab chegara uzunligi esa — 451 km. Mamlakat asosan qirg'oqbo'yi pasttekisliklarida va quritilgan yer (poldera) uchastkalarida joylashgan. Mamlakat hududining 2/5 qismi dengiz sathidan pastda (ayrim joylari dengiz sathidan 5 m pastda) joylashgan. Janubi sharqqa qarab bu sath yuqorilab boradi. Mamlakatning eng yuqori nuqtasi Vaalserberg (321 m).

Asosiy daryolari — Reyn irmoqlari bilan, Maas, Shelda. Eng yirik ko'li — Eysselmer. Mamlakat hududida tabiiy gaz va neft konlari bor. Ishlov beriladigan yerlar umumiy hududining 26%ini (serhosil, unumdor yerlar mamlakatning eng muhim tabiiy resurslaridan biri hisoblanadi), o'tloq va yaylovlar esa 32% ni tashkil qiladi.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat tarkibida 12 ta provinsiya bor. Mamlakat poytaxti Amsterdam bo'lishiga qaramasdan hukumat Gaagada joylashgan. Gollandiya 1579-yili Ispaniyadan mustaqillik olgan.

Milliy bayrami — 30-aprel Qirolicha kuni. Davlat boshlig'i — monarx (Qirolicha Beatriks Vilgelmina Armgard fon Oratshen-Nassau 1980-yil 30-apreldan buyon hokimiyat tepasida). Ijroiya hokimiyat Ministrlar Kabinetining boshlig'i premyer-ministriga tegishli. Qonun chiqaruvchi hokimiyat monarx va parlament (General Shtatlar) tomonidan amalga oshiriladi. Parlament 2 palata — Birinchi va Ikkinchi palatadan iborat. Siyosiy partiyalari: Kristian demokratik chaqiriq, Mehnat partiyasi, Ozodlik va demokratiya uchun xalq partiyasi, So'l yashillar.

### ***Iqtisodi, transport kommunikatsiyalari.***

Mamlakatning yuqori taraqqiy etgan iqtisodiyotida savdo va moliyaviy xizmatlar sektori YIMning yarmidan ko'prog'ini ta'minlaydi. Sanoatda esa (YIM 1/4 qismi) tabiiy gaz, neft qazib olish va neftni qayta ishlash, oziq-ovqat mahsulotlari ishlab chiqarish, shuningdek, metallga ishlov berish va mashinasozlik (elektrotexnika va radiotexnika sanoati, kemasozlik) sohalari peshqadam hisoblanadi. Yuksak mexanizatsiyalashtirilgan qishloq xo'jaligida mehnatga layoqatli aholining 5%i band bo'lsa-da, bu soha nafaqat mamlakatni oziq-ovqat mahsulotlari bilan ta'minlaydi, balki yetishtirilgan mahsulotning katta qismini (sut mahsulotlari, gullar, gul qalamchalari, sabzavotlar) chetga eksport qilish imkonini beradi. 2006-yil YIM miqdori 520918 mln dollarni (aholi jon boshiga — 31621 doll.) tashkil etgan. Asosiy savdo hamkorlari — YI mamlakatlari, Markaziy va Sharqiy Yevropa mamlakatlari.

Temiryo'llarining umumiy uzunligi — 2757 km (shundan 1991 km elektrlashtirilgan). Gollandiya keng tarmoqli avtomobil yo'llariga ega bo'lib, ularning umumiy uzunligi 104 831 km (shundan 9251 km qattiq qoplamali yo'llar). Ichki suv yo'llarining umumiy uzunligi — 6340 km.

Asosiy portlari — Amsterdam, Rotterdam.

**Tarixi.** Kelt qabilalari kelib o'rtnashgan hozirgi Niderlandiya hududlari m. a. I asrda rimliklar tomonidan bosib olingan. IV—V asrlarda varvarlar bosqinidan so'ng etnik guruhlar quyidagicha joylashdilar: sakslar — sharqda, frizlar — qirg'oq bo'yida va franklar —

mamlakat janubida. Xristianlik mamlakatga Buyuk Karl boshqaruvi davrida kirib keldi. Imperiya qulaganidan so'ng Gollandiya 1843-yili Latoringiya tarkibiga kirdi. XIV asrda golland yerlari Burgundiya gersogi Filipp Dovyurak Flandriya grafinyasi Margaritaga uylanganidan so'ng Burgundiya qo'shildi. XV asr oxirlarida Gollandiya gabsburglar qo'l ostiga, keyinroq fransuzlar qo'l ostiga o'tdi. Fransuz qiroli Filipp Chiroyli ispan taxti vorisiga uylanganligi sababli Gollandiya Ispaniya hukmronligi ostiga o'tib qoldi. Ispaniya qiroli Karl V 1555-yili Filipp II foydasiga taxtdan voz kechdi. 1579-yili protestantlik cherkovi tarafdorlari 7 respublikadan iborat federatsiya — Utrext ittifoqini tuzdilar. 1581-yili bu ittifoq o'z mustaqilligini e'lon qildi. 1648-yili Ispaniya Shimoliy Brabant va Flandriyani Niderlandiyaga berdi. XVII asrda Niderlandiya kuchli dengiz davlatiga aylandi va tez orada uning manfaatlari Britan imperiyasi manfaatlari bilan to'qnashdi. 1794-yili Niderlandiyani Fransiya bosib oldi va uning hududida Bataviya respublikasini tuzdi, 1806-yilda esa Gollandiya qirolligini tuzdi va uni Napoleon Bonapartning akasi Lyudovik idora qildi. 1814-yili Vena kongressi qaroriga ko'ra Niderlandiya qirolligi tuzilib, unga birlashgan provinsiyalardan tashqari Belgiya va Lyuksemburg ham kirdi. 1830-yilgi inqilob natijasida katoliklar Belgiyasi qirollikdan ajralib chiqdi va o'z mustaqilligini e'lon qildi. 2 ta jahon urushlari oralig'ida Niderlandiya iqtisodiy ko'tarilishlar davrini o'z boshidan kechirdi. 1940-yili Germaniya tomonidan bosib olingan Gollandiya 1945-yilda ozod qilindi. 1949-yili Niderlandiya Belgiya va Lyuksemburg bilan bojxona shartnomasini imzoladi (Benilyuks), NATO va YI a'zosi.

## NIKARAGUA

*Rasmiy nomi — Nikaragua Respublikasi. Poytaxti — Managua. Hududi — 129494 km<sup>2</sup>. Aholisi — 5697313 kishi (2007). Davlat tili — ispan. Dini — katoliklar (95%), protestantlar (5%). Pul birligi — oltin kardoba.*

**Geografik joylashuvi va tabiati.** Markaziy Amerikada joylashgan davlat. Shimolda Gonduras (chegara uzunligi 922 km), janubda Kosta-Rika (309 km) bilan chegaradosh. Mamlakat g'arbda Tinch okeaniga, sharqda Karib dengiziga tutashib ketgan. Chegarasining umumiy uzunligi — 1231 km. Sohil bo'ylab chegara uzunligi esa — 910 km. Nikaragua qirg'oqlari bo'ylab tekisliklar joylashgan. Mamlakat ichkarisidagi hududlarning katta qismini balandligi 2438 m gacha bo'lgan tog'lar va tog'oldi hududlari egallagan. Tog'li hududlardan g'arbdagi tektonik chuqurliklarda yirik ko'llari Nikaragua (80029 m<sup>3</sup>) va Managua joylashgan. Mamlakat g'arbida so'ngan va harakatdagi vulqonlar zanjiri cho'zilib ketgan. Asosiy tabiiy resurslari: oltin, kumush, mis, qo'rg'oshin, sink, volfram, yog'och, baliq. Mamlakat hududining deyarli yarmini o'tloq va yaylovlar, 35%ini esa o'rmon va to'qayzorlar egallagan.

Iqlimi — shimoli sharqida tropik passat, janubi g'arbida esa subekvatorial issiq.

Nikaraguaning sharqiy qismi, qirg'oq bo'ylari qalin tropik doimiy yashil o'rmonlar bilan qoplangan. Ular orasida daraxtlarning qimmatbaho turlari — qizil daraxtlar (maxagonlar), chirimaydigan nispero, sapodil va boshqalar bor. Tog'larning yuqori qismida sosna va dub o'rmonlari bor. Mamlakat g'arbida savannalar va kserofit to'qayzorlari bor. Nikaraguada juda boy hayvonot dunyosi saqlanib qolgan: bu yerda maymun, kiyik, yovvoyi cho'chqa, tapir, qora ayiq, yaguar, katta iguanalar bor. Juda ko'plab to'tilar, tukan va fazanlar bor. Nikaragua daryolarida ko'plab baliqlar, toshbaqa, timsohlar bor, limontin uchraydi.

**Davlat tuzilishi, siyosiy partiyalari.** Davlat tuzilishi — respublika. Mamlakat 16 ta ma'muriy rayonlarga bo'lingan. Nikaragua 1821-yil 15-sentabrdan mustaqil bo'lgan (ilgari Ispaniya mustamlakasi bo'lgan). Bu kun milliy bayram hisoblanadi. Davlat va hukumat boshlig'i — prezident. Oliy qonun chiqaruvchi organi — Milliy Assambleya.

Yirik siyosiy partiyalari: Sandinochilar milliy ozodlik fronti, Sandinochilar yangilanish harakati, Milliy ittifoq, Konservativ-demokratik partiya, Erkin liberal partiya.

**Iqtisodi, transport kommunikatsiyalari.** Iqtisodiyotining militarlashuvi, Amerika savdo-iqtisodiy embargosi, shuningdek, ijtimoiy-iqtisodiy siyosatda sandinistlar tomonidan yo'l qo'yilgan xatolar qishloq xo'jaligida va sanoatda ishlab chiqarishning qisqarishiga olib kelgan. Bu esa aholi turmush darajasining pasayishiga, shuningdek, tashqi qarzlarning o'sishiga sabab bo'ldi. Ishlab chiqarish sanoatning qishloq xo'jaligi xomashyolarini qayta ishlash, kimyo va to'qimachilik kabi tarmoqlari bilan cheklangan. Qishloq xo'jaligi qahva, shakarqamish, paxta (asosan eksport uchun) yetishtirishga ixtisoslashtirilmoqda. Keyingi yillar davomida hukumat giperinflyatsiyaga qarshi choralar ko'rmoqda, milliy valuta qadrini ko'tarishga harakat qilyapti, shuningdek, mamlakat strukturasi qayta qurish, ishlab chiqarishni modernizatsiyalash amalga oshirilmoqda, xususiy-moliyaviy sektor shakllantirilmoqda. 2006-yil YIM miqdori 18902 mln dollarni (aholi jon boshiga — 3317 doll.) tashkil etgan. Asosiy savdo hamkorlari — YI mamlakatlari va Lotin Amerikasi.

Temiryo'llarining umumiy uzunligi — 376 km. Avtomobil yo'llarining uzunligi — 15286 km (1598 km qattiq qoplamali yo'llar), ichki suv yo'llari esa 2220 km.

Mamlakatning asosiy portlari — Korinto, Blufilds.

**Tarixi.** Kolumb tomonidan 1502-yili kashf qilingan hozirgi Nikaragua hududlari Ispaniya mustamlakasiga aylantirildi va 1560-yili Gvatemala superintendantligi tarkibiga kiritildi. 1821-yili mustaqillikni qo'lga kiritganidan so'ng Nikaragua Markaziy Amerika qo'shma provinsiyalari tarkibiga kirdi. 1838-yili to'liq mustaqil bo'lgunga qadar Nikaragua bir qator ichki mojarolarni, shuningdek, chet mamlakatlarning — Buyuk Britaniyaning 1848-yili va AQSHning 1912—1933-yillarda intervensiyasini boshidan kechirdi. 1936-yildan boshlab mamlakatni Saomosa oilasi boshqardi. 1979-yili u Sandinistlar milliy ozodlik fronti tomonidan ag'darib tashlandi. Sandinistlar hukumatining iqtisodiy sohadagi muvaffaqiyatsizliklari 1990-yilgi prezident saylovlarida muxolifatchilarning g'alaba qozonishlariga va Violetta Chamorroning hokimiyat tepasiga kelishiga sabab bo'ldi.



## NORVEGIYA

*Rasmiy nomi — Norvegiya Qirolligi. Poytaxti — Oslo. Hududi — 387000 km<sup>2</sup>. Aholisi — 4620892 kishi (2007). Davlat tili — norveg. Dini — Evangeliya Lyuteranlik cherkovi (87,8%) davlat dini hisoblanadi. Pul birligi — norveg kronasi.*

**Geografik joylashuvi va tabiati.** Skandinaviya yarimorolining shimoliy va g'arbiy qismida hamda Shpitsbergen arxipelagida joylashgan Shimoliy Yevropa davlati hisoblanadi. Sharqda Shvetsiya (chegara uzunligi — 1619 km), shimoli sharqda Finlandiya (729 km) va Rossiya bilan (167 km) chegaradosh. Norvegiya g'arbda Atlantika okeani, shimolda Barents dengizi, janubda Shimoliy dengiz va Skagerrok bo'g'ozini bilan tutashib ketgan. Chegarasining umumiy uzunligi 2515 km, sohil bo'ylab chegara uzunligi esa 21925 km (yirik va ko'p sonli mayda orollar bilan qo'shib hisoblaganda). Norvegiya hududining katta qismini Skandinav tog'lari egallagan. Eng yuqori nuqtasi — Galxyopiggen tog'i (2469 m). Baland yassitog'lar (fyeldlar) va tik tog'lardan keyin hosildor daryo vodiylari boshlanadi. Sohil chizig'i fordlar bilan bo'lingan. Mamlakat shimolida arktik tundra zonasida joylashgan. Asosiy daryolari — Logen, Begna, Glomma. Mamlakatda juda ko'plab ko'llar bor. Norvegiya neft, tabiiy gaz, temir rudasi, mis, nikel kabi foydali qazilma konlariga va muhim tabiiy resurslardan baliq, yog'och, gidroenergetik potensialga ega.

Iqlimi — mo'tadil okean iqlimi, chekka shimolida esa subarktik iqlim. Norvegiyaning o'simlik dunyosida asosan tog'li hududlardagi ninabargli o'rmonlar ustunlik qiladi. O'rmonlar Norvegiya hududining 23% ini egallagan bo'lib, asosan archa, qarag'ay, oq qayin daraxtlari ko'proq uchraydi. Chekka janubiy hududlarida esa uncha katta bo'lmagan buk va dub o'rmonlari uchraydi. Skandinaviya tog'larida ninabargli o'rmonlar janubda 1100 m dan, shimolda 300 m gacha balandlikda joylashgan. Norvegiya jonivorlari orasida o'rmon va tundra

turlari ko'pchilikni tashkil qiladi. O'rmonlarda bug'u, kiyik, bo'rsiq, suvsar, laska, qunduz, silovsin, olmaxonni uchratish mumkin. Tundrada esa shimol bug'usi, oq va ko'k tundra tulkisi, quyon, shuningdek, Norvegiya sichqoni deb ataluvchi lemminglar keng tarqalgan.

**Davlat tuzilishi, siyosiy partiyalari.** Davlat tuzilishi — konstitutsion monarxiya. 19 ta provinsiyadan tashqari Norvegiya tarkibida Buve, Yan-Mayen, Shpitsbergen orollari kabi qaram hududlar ham bor. Norvegiya 1905-yil 26-oktabrda Shvetsiyadan mustaqillik olgan. Milliy bayrami — 17-may — Konstitutsiya kuni (1814). Davlat boshlig'i — Monarx (qirol Xorold V mamlakatni 1991-yil 17-yanvardan buyon idora qilib kelmoqda, taxt vorisi — shahzoda Xaakon Magnus 1973-yil 20-iyulda tug'ilgan). Ijroiya hokimiyat Davlat Kengashi (kabinet)ning boshlig'i bo'lgan premyer-ministriga tegishli. Oliy qonun chiqaruvchi organ — ikki palatali parlament (storting). Yirik siyosiy partiyalari: Norveg ishchi partiyasi, Taraqqiyot partiyasi, Markaz partiyasi, Venstre partiyasi, Xristian xalq partiyasi.

**Iqtisodi, transport kommunikatsiyalari.** Har xil tabiiy resurslarga boy bo'lgan Norvegiya iqtisodiyoti erkin tadbirkorlik va hukumat nazorati ostida rivojlanadi. Sanoatining muhim tarmoqlari: neft va gaz, bundan tashqari, oziq-ovqat ishlab chiqarish, sellyuloza-qog'oz, metallurgiya, kimyo, yog'ochni qayta ishlash, kemasozlik ham yaxshi rivojlangan. Norvegiya dunyoning juda ko'plab mamlakatlariga baliq va baliq mahsulotlarini eksport qiluvchi yirik davlatlar qatoriga kiradi. Qishloq xo'jaligida (YIM 3%) bosh sektor chorvachilik hisoblanadi. Oziq-ovqat mahsulotlarining yarmidan ko'prog'i chetdan keltiriladi. 2006-yil YIM miqdori 175435 mln dollarni (aholi jon boshiga — 37965 doll.) tashkil etgan.

Temiryo'llarining umumiy uzunligi — 4026 km, avtomobil yo'llari — 88922 km (61356 km qattiq qoplamali yo'llar), ichki suv yo'llari — 1577 km. Mamlakatning asosiy portlari: Bergen, Kristiansunn, Oslo, Tronxeym.

**Tarixi.** Qadimda Norvegiya hududida german qabilalari joylashishgan. V asrda bu hududda gotlarning

dastlabki davlati vujudga keldi. VIII asr oxiri — XI asr oʻrtalarigacha norveglar vikinglarning harbiy yurishlarida qatnashishdi. IX asr oxiri — X asr boshlarida konung Xarald I Xarfager hukmronligi ostida mamlakatning siyosiy birlashuvi jarayoni boshlanib, shu vaqtning oʻzida xristianlik qabul qilindi. 1262—1264-yillarda Islandiya Norvegiya mulkiga aylandi. 1397-yildan boshlab Kalmar uniyasiga koʻra Norvegiya Daniya hukmronligi ostiga tushib qoldi. 1814-yili Kil shartnomasiga muvofiq Norvegiya Shvetsiya boshqaruvi ostiga oʻtdi, biroq norveg xalqining milliy oʻzligini anglash jarayonining oʻsishi Shvetsiya bilan ittifoqning buzilishiga va 1905-yili mustaqil Norvegiya qirolligining tuzilishiga olib keldi. I jahon urushi yillarida Norvegiya oʻz neytralitetini saqlab qolishga muvaffaq boʻldi, biroq 1940-yili mamlakat nemis qoʻshinlari tomonidan bosib olindi. Hukumat Londonga qochdi. 1945-yil 8-may kuni Norvegiya fashistlardan ozod qilindi. 1949-yili uning NATO va 1952-yili Shimoliy Kengashga kirishi Norvegiya hayotidagi muhim voqealardan boʻldi. 1994-yilda mamlakat aholisi umumxalq referendumini natijalariga koʻra Yevropa Ittifoqiga kirishga qarshi ovoz berdi.

## OZARBAYJON

*Rasmiy nomi — Ozarbayjon Respublikasi. Poytaxti — Boku. Hududi — 86600 km<sup>2</sup>. Aholisi — 8162035 kishi (2007). Davlat tili — ozarbayjon. Dini — musulmonlar (88%), pravoslavlar (12%). Pul birligi — Ozarbayjon manati.*

**Geografik joylashuvi va tabiati.** Ozarbayjon Janubi gʻarbiy Osiyoda, Kavkazortida, Kaspiy dengizi sohillarida joylashgan. Shimolda Rossiya, shimoli gʻarbda Gruziya, janub va janubi gʻarbda Armaniston bilan chegaradosh. Sharqda Ozarbayjon Kaspiy dengizi bilan tutashgan. Mamlakat hududining 50% i togʻlardan iborat. Shimolda Katta Kavkaz, janubda — Kichik Kavkaz, ular oraligʻida Kura vodiysi joylashgan. Janubi sharqda Tolish togʻlari, janubda Oʻrta Araks choʻkmasi

va uning shimoliy chekkasi Daralagez va Zangezur tizmalari yastanib yotadi. Mamlakat hududi joylashgan Tolish tog'larining balandligi 2477 m ga yetadi. Sheki-Shemaxa hududlari hamda Araks vodiysi seysmik faol hududlar hisoblanadi.

Iqlimi — subtropik. Mamlakatda 1250 ga yaqin daryo bor. Ulardan yirigi — Kura. Ozarbayjonda 250 ga yaqin ko'l mavjud bo'lib, ulardan eng yiriklari Berkshor va Xojiqabul ko'llari. Asosiy qazilma boyliklari — neft, tabiiy gaz, temir, aluminiy, mis, qimmatbaho metallar. Ozarbayjon o'simlik dunyosi o'ta rang-barang. Tog'li hududlari butazor va o'rmonzorlar bilan qoplangan.

***Davlat tuzilishi va siyosiy partiyalari.*** Davlat tuzilishi — respublika. Mamlakat 67 ta ma'muriy hudud va Naxichevan Muxtor Respublikasidan tashkil topgan. Davlat boshlig'i — prezident. Qonun chiqaruvchi oliy organi bir palatali parlament — Milliy Majlis. Asosiy siyosiy partiyalari: Ozarbayjon Xalq Fronti (OXF), Yangi Ozarbayjon, Ozarbayjon Kommunistik Partiyasi (OKP), Musulmon Demokratik Partiya (MDP), Islom ittifoqi.

***Iqtisodi, transport kommunikatsiyalari.*** Sanoatining asosiy sohalari: neft qazib olish va uni qayta ishlash. Bundan tashqari, kimyo, mashinasozlik va qora metallurgiya ham yaxshi rivojlangan. Qishloq xo'jaligining asosiy ekinlari: bug'doy, sholi, paxta va tamaki. Bog'dorchilik va uzumchilik yaxshi rivojlangan. Anor, xurmo, anjir va sitrus mevalar yetishtirish yaxshi yo'lga qo'yilgan. Chorvachilik asosan qoramol va qo'ylarni boqishga ixtisoslashgan. Ipakchilik qadimiy sohalardan hisoblanadi. Eksport mahsulotlari: neft va neft mahsulotlari, rangli metall, paxta. Import mahsulotlari: mashina va ehtiyot qismlar, oziq-ovqat, sanoat xomashyosi. 2006-yil YIM miqdori 34564 mln dollarni (aholi jon boshiga — 4234 doli.) tashkil etgan. Asosiy savdo hamkorlari — Rossiya va MDH davlatlari, Eron, Turkiya.

***Tarixi.*** M. a. VI—II asrlarda Ozarbayjonning asosiy qismida Kavkaz Albaniyasi davlati mavjud bo'lgan. III—IX asrlarda bu hududlar forslar va Arab xalifaligi hukumronligi ostida bo'lgan. Bugungi Ozarbayjon xalqi XI—XIII asrlarda shakllangan. XIII—XIV asrlarda

mo'g'ullar tomonidan bosib olingan. Keyinchalik Amir Temur davlati tarkibiga kirgan. XVIII asrga kelib Eronga tobe bo'lgan 15 ta davlatchaga bo'linib ketgan. 1922-yildan 1991-yilgacha Ozarbayjon Sovet davlati tarkibida bo'ldi. 1991-yil o'z mustaqilligini e'lon qildi.

## PALAU

*Rasmiy nomi — Palau Respublikasi. Poytaxti — Koror. Hududi — 508 km<sup>2</sup>. Aholisi — 20755 kishi (2007). Davlat tili — ingliz, (bundan tashqari mahalliy tillardan — chamorro, belau, karolina). Dini — xristian (katoliklar — 40%, protestantlar — 20%). Pul birligi — AQSH dollari.*

**Geografik joylashuvi va tabiati.** Karolin orollari guruhidagi Palau arxipelagida joylashgan Okeaniya davlati. Mamlakat hududi o'z ichiga 200 ga yaqin orolni qamrab oladi, ular orasida marjon va vulqonlar natijasida vujudga kelgan tog'li orollar ham mavjud. Sohil bo'ylab chegara uzunligi — 1519 km. Orollarda fosforitlar, oltin kabi qazilma boyliklar bilan bir qatorda yog'och va dengiz mahsulotlari kabi tabiiy resurslar ham mavjud.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Mamlakat tarkibiga 16 ta shtat kiradi. Mamlakat mustaqillikni 1994-yil 1-oktabrda qo'lga kiritgan (ilgari — BMT homiyligidagi hudud, AQSH boshqaruvi ostida). Milliy bayrami 9-iyul — Konstitutsiya kuni. Davlat va hukumat boshlig'i — prezident. Oliy qonun chiqaruvchi organi — ikki palatali parlament: Milliy Kongress (Senat) va Deputatlar palatasi.

**Iqtisodi, transport kommunikatsiyalari.** Iqtisodi asosan qishloq xo'jaligi mahsulotlarini yetishtirish hamda baliqchilikka asoslangan. Turizmning rivojlanmaganligining asosiy sababi, mamlakatning yiroqda joylashganligi va uning taraqqiy etishi uchun zarur bo'lgan infrastrukturaning yo'qligidadir. 2006-yil YIM miqdori 1174 mln dollarni (aholi jon boshiga — 8383 doll.) tashkil etgan.

Asosiy savdo hamkorlari: AQSH, Yaponiya.

Avtomobil yo'llari uzunligi — 223 km. Port shahri — Koror.

**Tarixi.** Karolin orollari XVII asrda ispanlar tomonidan ochilgan. 1899-yilda ispanlar mustamlakasi Germaniyaga sotib yuborilgan. 1919-yildan to 1945-yilning oxirlarigacha orollar Yaponiya boshqaruvi ostida bo'lgan. 1947-yilda zamonaviy Palau boshqa Karolin orollari bilan bir qatorda BMT homiyligidagi Tinch okean orollari tarkibiga qo'shilib, umumiy boshqaruv esa AQSH tomonidan amalga oshirilgan. Mustaqil Palau davlati 1994-yilda tashkil topdi.

## PANAMA

*Rasmiy nomi — Panama Respublikasi. Poytaxti — Panama. Hududi — 77100 km<sup>2</sup>. Aholisi — 3248056 kishi (2007). Davlat tili — ispan (ingliz tili ham keng tarqalgan). Dini — katoliklar 90%, protestantlar — 6% ga yaqin. Pul birligi — balboa.*

**Geografik joylashuvi va tabiati.** Markaziy Amerikadagi davlat. G'arbda Kosta-Rika (chegara uzunligi — 330 km), sharqda — Kolumbiya (225 km) davlatlari bilan chegaradosh. Mamlakatning janubiy qirg'oqlari Tinch okean, shimoliy qirg'oqlari esa Karib dengizi bilan tutashgan. Quruqlikdagi chegara chizig'ining umumiy uzunligi — 555 km, qirg'oq bo'ylab chegara uzunligi esa 2490 km. Mamlakat hududining teng yarmini tog'liklar egallagan. Faol Baru vulqoni (3475 m) Panamaning eng yuqori nuqtasi hisoblanadi. Qirg'oq hududlari asosan pasttekislik va tepaliklardan iborat. Mamlakat seysmik beqaror hududda joylashgan, vulqon portlashlari va zilzilalar tez-tez bo'lib turadi. Eng katta ko'li — Bayano. Asosiy tabiiy boyliklari — mis, qizil daraxt, krivetkalar.

Iqlimi — tropik. O'simlik dunyosida banaut daraxti, tropik o'rmon daraxtlari hamda Panama ko'rki hisoblangan orxideyalar keng tarqalgan. Hayvonot olami rang-barang kapalaklar (turlari soni 1100 ga yaqin), gigant kapalaklarining besh turi (qanot uzunligi

15 sm ga yetadi), bundan tashqari o'rmonlarida yaguar, puma kabi yirtqich hayvonlar mavjud. Qushlarning 850 turi, ilon, chayon, o'rgimchaklar va turli hasharotlar keng tarqalgan. Tog'li o'rmon hududlarida kiyiklar ham mavjud.

**Davlat tuzilishi, siyosiy partiyalari.** Davlat tuzilishi — Prezident Respublikasi. Mamlakat 9 ta provinsiyadan iborat. Panama 1903-yil 3-noyabrda o'z mustaqilligini e'lon qilgan (ilgari Kolumbiya tarkibida edi), shu sana uning milliy Mustaqillik kuni bayramiga aylandi. Davlat va hukumat boshlig'i — prezident. Qonun chiqaruvchi hokimiyat bir palatali — Qonunchilik Assambleyasidan iborat. Yirik siyosiy partiyalari — Demokratik muxolifatchilar Assambleyasi bloki, Arnulfist partiyasi, Leyboristlar partiyasi, Liberal-respublikachilar partiyasi, Panama xalq partiyasi.

**Iqtisodi, transport kommunikatsiyalari.** Sanoatda va qishloq xo'jaligida o'sish deyarli sezilmayotgan bir vaqtda mamlakat iqtisodida bank sektorining faol rivojlanishi sezilmoqda. Sanoat asosan qishloq xo'jalik mahsulotlariga ishlov berish va qayta ishlash bilan bog'liq, boshqa sohalardan — neft tozalash va qurilish ancha taraqqiy etgan. Qishloq xo'jaligi mahsulotlari YIMning 12% ini ta'minlaydi. Qishloq xo'jaligida sholi, banan, donli o'simliklar, qahva, shakarqamish yetishtiriladi. 2006-yil YIM miqdori 22235 mln dollarni (aholi jon boshiga 6845 doll.) tashkil etgan. Asosiy savdo hamkorlari — AQSH, Markaziy Amerika davlatlari, Yaponiya, YI mamlakatlari.

Temiryo'llarining umumiy uzunligi — 238 km, avtomobil yo'llari — 8530 km, ichki suv yo'llari uzunligi — 800 km (shundan 82 km Panama kanaliga tegishli, ushbu kanal Tinch okeanni Atlantika okeani bilan bog'lab turadi). Asosiy portlari — Kolon, Kristobal, Panama.

**Tarixi.** 1502-yilda ispanlar tomonidan ochilgan Panama 1510-yilda Ispaniya mustamlakasiga aylandi. 1513-yilda Panama bo'ynini kesib o'tib, Tinch okean qirg'oqlariga birinchi bo'lib yevropalik Balbao yetib bordi. Hozirgi Panama Peru vitse-qirolligi, Yangi Grenada, 1821-yilda ispan hukmronligidan ozod

bo'lganidan so'ng Buyuk Kolumbiya tarkibiga kiradi. 1903-yilda Panama o'z mustaqilligini e'lon qildi. 1904-yilda Panama va AQSH o'rtasida Panama kanalining katta qismini AQSHga topshirish to'g'risida shartnoma imzolandi. 1965-yilda yangi shartnoma imzolanib, unga ko'ra AQSH Panamaning Panama kanali ustidan suveren nazoratini tan oldi. 1968-yilda general O. Torri-xos tomonidan o'rnatilgan harbiy tuzum 16 yildan so'ng, 1984-yilda fuqarolik hukumati qo'liga o'tdi. 1988-yildan buyon AQSH hukumati tomonidan narko-tik moddalar savdo-sotig'ida ayblanayotgan general Noryega davlat to'ntarishini amalga oshirdi. Biroq Panamaga AQSH qo'shinlari kiritildi va 1990-yilning yanvarida Noryega ularga taslim bo'ldi.

## PAPUA — YANGI GVINEYA

*Rasmiy nomi — Papua — Yangi Gvineya mustaqil davlati. Poytaxti — Port-Morsbi. Hududi — 462840 km<sup>2</sup>. Aholisi — 5803163 kishi (2007). Davlat tili — ingliz, shuningdek, papuas va melaneziya tili oilasiga kiradigan 700 dan ortiq mahalliy tillar mavjud. Dini — protestantlik, aholining 22% i katoliklar. Pul birligi — kina.*

**Geografik joylashuvi va tabiati.** Tinch okeanining janubi g'arbida Yangi Gvineya orolining sharqiy qismini, shu bilan birga Bugenvil va Buka (Solomon) orollari hamda Puiziada va Bismark arxipelagi orollaridagi davlat. Yangi Gvineya orolining g'arbiy qismini egallagan. Indoneziya bilan chegaradosh. Papuya — Yangi Gvineya qirg'oqlarini sharqdan Solomon dengizi, janubdan — Korall dengizi, Torres bo'g'ozini va Papuya ko'rfazi, shimolda — Bismark dengizi suvlari yuvib turadi. Chegara chizig'ining umumiy uzunligi 820 km, qirg'oq chizig'i uzunligi 5152 km. Mamlakat hududida asosan qirg'oqoldi tekisliklari va tog'lar bilan birga tog'oldi pasttekisliklaridan iborat. Mamlakat yerosti boyliklariga boy, bular: oltin, kumush, mis, tabiiy gaz, boshqa tabiiy resurslardan — yog'och (hududning 71%i o'rmonlardan iborat).



Iqlimi — nam subekvatorial. O‘simlik dunyosi juda boy, bu yerda o‘simliklarning 6872 turi mavjud. Hayvonot dunyosi xaltali hayvonlardan iborat.

**Davlat tuzilishi, siyosiy partiyalari.** Davlat tuzilishi — konstitutsion monarxiya, Britan hamdo‘stligi a‘zosi. Mamlakat 19 provinsiya va 1 poytaxt okrugidan iborat. Papua — Yangi Gvineya 1975-yil 16-sentabrda davlat mustaqilligini qo‘lga kiritgan bo‘lib (ilgari BMT homiyligidagi Avstraliya umumiy boshqaruvi ostida bo‘lgan), shu kun uning milliy bayrami sifatida nishonlanadi. Qonunchilik ingliz umumiy huquqiga asoslangan. Davlat boshlig‘i ingliz monarxlari (qirolicha Yelizaveta) tomonidan tayinlanadigan general-gubernator tomonidan hisoblanadi. Ijro etuvchi hokimiyat hukumat boshlig‘i bo‘lgan premyer-ministriga tegishli. Oliy qonun chiqaruvchi organ Milliy parlament. 20 ta siyosiy partiyalari ichida eng yiriklari: Milliy demokratik harakat, Xalq partiyasi, Milliy progressiv partiya, Langu pati, Birlashgan partiya.

**Iqtisodi, transport kommunikatsiyalari.** Mamlakat tabiiy resurslarga boy, biroq ulardan foydalanish hududining murakkab relyefga egaligi va zarur infrastrukturaning shakllanmaganligi sababli deyarli taraqqiy etmagan. Sanoat asosan oltin, kumush va mis qazib olish va palma yog‘ini qayta ishlashga ixtisoslashgan. Unumdor yerlar va qulay iqlim qishloq xo‘jaligining rivojlanishi uchun yaxshi omil hisoblanadi. Papua — Yangi Gvineya qahva, kakao, palma yog‘i, kokos yong‘oqlari, kauchuk, choy kabi qishloq xo‘jalik mahsulotlarini eksport qiladi. 2006-yil YIM miqdori 14425 mln dollarni (aholi jon boshiga — 2485 doll.) tashkil etgan. Asosiy savdo hamkorlari: Yaponiya, Yangi Zelandiya, Avstraliya, Buyuk Britaniya.

Avtomobil yo‘llarining umumiy uzunligi — 19200 km, ichki suv yo‘llari — 10940 km. Portlari: Laye, Port-Morsbi.

**Tarixi.** Yangi Gvineya oroli 1526-yilda portugaliyaliklar tomonidan ochilgan bo‘lib, o‘z nomini mahalliy aholi afrikaliklar bilan o‘xshash bo‘lganligi uchun olgan. 1828-yilda Gollandiya orolning g‘arbiy qismini (1962-yilda Indoneziyaga o‘tib ketgan) o‘z

mulki deb e'lon qildi. Orolning sharqiy qismi Papua (hozirgi Papua — Gvineya hududi), 1885-yilda ikkiga bo'lingan bo'lib, shimoli sharqiy qismi nemis protektorati, janubi sharqiy qismi esa Avstraliya tomonidan qo'shib olingan hududlardan iborat edi.

Ikkinchi Jahon urushi boshlarida Avstraliya nemis protektoratini bosib oldi va 1921-yili Millatlar Ligasi tomonidan unga sharqiy Yangi Gvineyani boshqarish uchun mandat berildi. 1973-yilda o'z-o'zini boshqarish huquqini qo'lga kiritgan mamlakat Britaniya hamdo'stligida a'zolikini saqlagan holda 16-sentabr 1975-yilda mustaqil Papua — Yangi Gvineya davlatiga aylandi.

## PARAGVAY

*Rasmiy nomi — Paragvay Respublikasi. Poytaxti — Asunson. Hududi — 406752 km. Aholisi — 6656398 kishi (2007). Davlat tili — ispan. Dini — katoliklar (90%), protestantlar (5%). Pul birligi — guarani.*

**Geografik joylashuvi va tabiati.** Janubiy Amerikaning markaziy qismidagi davlat. Janubda va janubi g'arbda Argentina (chegara uzunligi 1880 km), shimolda va shimoli g'arbda Boliviya (1290 km) davlatlari bilan chegaradosh. Chegaralarining umumiy uzunligi — 3920 km. Mamlakat hududi asosan tekisliklardan iborat. Asosiy daryosi Paragvay mamlakatni ikki qismga ajratib turadi. Sharqiy hududlari o'rmonzor tepaliklardan iborat. Brazildan tekis tog'liklari turkumiga kiradi. Gran-Chano viloyati asosan past botqoq daryo tekisliklaridan iborat. Asosiy tabiiy boyliklari: temir rudasi, marganes, ohaktosh, yog'och. Ishlov beriladigan yerlar mamlakat hududining 20% ini, yaylov va o'tloqlar — 39% ini, o'rmonlar va dashtzorlar — 35% ini tashkil etadi.

Iqlimi — tropik. Paragvayning doimiy yashil o'rmonlari va dashtzorlarida daraukariya, yerbya kabi daraxtlar o'sadi. G'arbda palma o'rmonzorlari keng tarqalgan. Yovvoyi apelsin daraxtlari ham ko'plab uchraydi, hayvonot dunyosi juda boy, bu yerda puma, yaguar, bo'ri, botqoq bug'usi, chumolixo'r va hokazolalar bor.

### ***Davlat tuzilishi va siyosiy partiyalari.***

Davlat tuzilishi — prezidentlik respublikasi. 19 departamentdan tashkil topgan. Paragvay 1811-yil 14-mayda mustaqillikka erishgan (ilgari Ispaniyaga qarashli hududlar bo'lgan). Davlat va hukumat boshlig'i prezident. Qonun chiqaruvchi hokimiyatni ikki palatali (Senat va Deputatlar palatasi) Bosh Assambleya amalga oshiradi. Eng yirik siyosiy partiyalari: Milliy respublika Assambleyasi, Kolorado partiyasi, haqiqiy liberal-radikal partiya, Inqilobiy leyboristik partiya.

### ***Iqtisodi, transport kommunikatsiyalari.***

Ishga yaroqli aholining yarmi band bo'lgan qishloq xo'jaligi va o'rmonchilik mamlakat eksportining katta qismini ta'minlaydi. Asosiy eksport mahsulotlari — paxta, qahva, shakarqamish, chorvachilik ham rivojlangan. Sanoat asosan qishloq xo'jalik mahsulotlarini va yog'ochni qayta ishlashga asoslangan. Paragvay yirik gidroenergetik salohiyatga ega. XX asrning 90-yillari boshlarida Paragvayning Argentina, Braziliya va Urugvaylarni o'z ichiga olgan Umumiy bozorning janubiy bo'limiga qo'shilishi regiondagi iqtisodiy faollikning oshishiga ijobiy ta'sir ko'rsatdi. 2006-yil YIM miqdori 28143 mln dollarni (aholi jon boshiga — 4227 doll.) tashkil etgan. Asosiy savdo hamkorlari: Braziliya, YI, AQSH, Argentina.

Temiryo'llarining umumiy uzunligi — 1300 km, avtomobil yo'llari 11300 km, ichki suv yo'llari — 3100 km. Asosiy port — Asunson.

***Tarixi.*** Guarani hindu qabilalari yashovchi Paragvay hududi 1515-yilda Dias de Soli tomonidan kashf qilingan edi. 1525-yili Diyego Garsia tomonidan mamlakat o'rganilgandan so'ng Paragvay, Peru vitse-qirolligi tarkibiga kirgan ispan mustamlakasiga aylandi. 1610-yilda Ispaniyadan kelgan iyezuitlar 1767-yilga qadar mavjud bo'lgan o'ziga xos davlat ichidagi davlatni tashkil qilishdi. 1811-yilda Paragvay ispan mustamlakachilariga qarshi kurashda g'alaba qozonib, mustaqillikka erishdi. Mamlakat prezidenti Salono Lopes 1865-yilda Paragvayni Argentina, Braziliya va Urugvayga qarshi qonli urushga tortdi. Buning oqibatida Urugvay o'z hududlarining katta qismidan mahrum bo'ldi. 1928-

yilda Chano provinsiyasida neft konlarining ochilishi Boliviya davlati bilan 1950-yilgacha davom etgan harbiy to'qnashuvga sabab bo'ldi. 1954-yilda Paragvayda general Stressnerning harbiy diktaturasi o'rnatildi. 1989-yildagi davlat to'ntarishi oqibatida general Stressner general Bodrij tomonidan ag'darilib, hokimiyat fuqarolik hukumati qo'liga topshirildi.

## PERU

*Rasmiy nomi — Peru Respublikasi. Poytaxti — Lima. Hududi — 1285215 km<sup>2</sup>. Aholisi — 28909469 kishi (2007). Davlat tili — ispan, kechua va aymara. Dini — katolik. Pul birligi — nuevo sol.*

**Geografik joylashuvi va tabiati.** Janubiy Amerika kontinentining g'arbiy qismida joylashgan davlat. Shimolda Kolumbiya (chegara uzunligi — 2900 km) va Ekvador (1420 km), sharqda Braziliya (1506 km) va Boliviya (900 km), janubda Chili (160 km) davlatlari bilan chegaradosh. G'arbda mamlakat qirg'oqlari Tinch okeani bilan tutashgan. Chegaralarining umumiy uzunligi 6940 km, qirg'oq bo'ylab chegara uzunligi — 2414 km. Mamlakat hududi ravshan aks ettirilgan uch topografik hududdan tashkil topgan. Sharqiy qismi yaxshi o'rganilmagan. Amazonka havzasida pastlik o'rmonzorlari yastanib yotibdi. Peru markazida baland tog' tizmalaridan iborat And tog'lari joylashgan bo'lib, uning asosiy tog' zanjirlari: G'arbiy Kordilyera, Markaziy Kordilyera va Sharqiy Kordilyeradir. Mamlakat va And tog'larining eng yuqori nuqtasi — Oq Kordilyerada joylashgan Uaskaran (6768 km) tog'i. Peru Andlarining janubida vulqonlar ham mavjud. Ularning eng balandi — Misti (5822 km) vulqonidir. Eng yirik ko'li qisman Peruga qarashli bo'lgan Titikakadir. Mamlakatning asosiy daryosi Amazonka va uning Maranon, Putumaylo, Upayali irmoqlari. Peru boy yerosti qazilmalariga ega, ulardan: mis, tilla, kumush, neft, temir rudasi qazib olinadi; boshqa tabiiy resurslardan yog'och, baliq ishlab chiqariladi va ovlanadi.

Iqlimi — o'ziga xos uch topografik hududga bo'linadi (Kosta, Syerra, Selva). Kosta hududlari iqlimi nisbatan issiq va quruq. Syerra, And tog' tizmalaridan tashkil topganligi sababli bu yerda doimiy past harorat hukm suradi. Selva nam va yil davomida issiqlikning teng taqsimlanganligi bilan tavsiflanadi. Faunasi: Syerrada lamalar, Selva o'rmonlarida maymunlar, yirtqichlardan yaguar va atselotlar mavjud. Bundan tashqari, ko'pgina zaharli va bo'g'ma ilonlar mavjud bo'lib, ular ichida dunyodagi eng yirik ilon — anakonda ham bor.

### ***Davlat tuzilishi va siyosiy partiyalari.***

Davlat tuzilishi — respublika. Mamlakat 24 ta departamentga bo'lingan bo'lib, bundan tashqari uning tarkibiga bitta konstitutsiyaviy provinsiya kiradi. Peru 1821-yil 28-iyulda mustaqillikka erishdi. Ilgari Ispaniya mustamlakasi bo'lgan. Milliy bayrami — mustaqillik kuni. Konstitutsiyaning amal qilishi 1992-yil 5-aprelda to'xtatildi. Ijro etuvchi hokimiyat prezident (davlat boshlig'i) va Ministrlar Kengashi boshlig'i premyer-ministr qo'lida jamlangan. Oliy Qonunchilik organi — Kongress (ikki palatali parlament) 1992-yil 5-aprelda tarqatib yuborilgan. Yirik siyosiy partiyalari: «Yangi ko'pchilik» — O'zgarish-90, Xristian demokratik partiya, Xalq harakati.

### ***Iqtisodi, transport kommunikatsiyalari.***

Bank ishi, energetika va tog'-kon sanoatida davlat ulushi yirik, biroq mamlakat iqtisodi ko'proq bozor munosabatlariga moslashtirilib bormoqda. 2006-yil YIM miqdori 155388 mln dollarni (aholi jon boshiga — 5400 doll.) tashkil etgan. Asosiy sanoat tarmoqlari neft va neft mahsulotlari qazib olish qo'rg'oshin, rux, tozalangan kumush (Peru kumush qazib olish bo'yicha dunyoda uchinchi o'rinda turadi), mis (asosiy eksport mahsulotlari) qazib olish, bundan tashqari avtomobilsozlik va kemasozlik sanoatlari rivojlangan. Asosiy savdo hamkorlari: AQSH, Yaponiya, Kolumbiya, Argentina.

Temiryo'llarining umumiy uzunligi — 1801 km, avtomobil yo'llari uzunligi — 69942 km, ichki suv yo'llari 8800 km ga yaqin. Mamlakatning asosiy portlari — Kalyao, Talara, San-Nikolas, Chimbote.

**Tarixi.** Zamonaviy Peru hududi 1531—1536-yillarda Pizarro boshchiligidagi ispan konkistadorlari tomonidan bosib olingan inklar imperiyasi markazi edi. 1543-yilda Janubiy Amerikadagi barcha ispan mustamlakalarini o'z ichiga olgan Peru vitse-qirolligi tashkil etildi. 1821-yilgi milliy-ozodlik harakatlari mustaqillik e'lon qilinishiga olib kelgan, biroq 1825-yilda mustaqil Boliviya davlati nomini olgan mamlakatning yuqori qismi ajralib chiqdi. Tinch okean urushlari (1879—1883) oqibatida Boliviya va Chiliga qarshi urushgan Peru o'z hududining selitra konlari joylashgan qismini boy berdi. 1990-yilda Peru prezidenti etib saylangan, yapon oilasidan chiqqan A. Fukimori mamlakatga qat'iy iqtisod tizimini kiritib, 1992-yilda parlamentni tarqatib yubordi va Konstitutsiyaning amal qilishini to'xtatdi. 1998-yilda Ekvador bilan chegara muammolari hal etildi.

## POKISTON

*Rasmiy nomi — Pokiston Islom Respublikasi. Poytaxti — Islomobod. Hududi — 796095 km<sup>2</sup>. Aholisi — 159652399 kishi (2007). Davlat tili — urdu va ingliz. Dini — islom. Pul birligi — Pokiston rupiyasi.*

**Geografik joylashuvi va tabiati.** Janubiy Osiyodagi davlat. Sharqda, shimoli sharqda va janubi sharqda Hindiston (chegara uzunligi 2912 km), shimolda Afg'oniston (2430 km), g'arbda Eron (909 km) davlatlari bilan chegaradosh. Mamlakatning janubiy qismi Arabiston dengizi bilan tutashib ketgan. Quruqlikdagi chegaralarining umumiy uzunligi — 6251 km, qirg'oq chizig'i uzunligi — 1046 km. Pokiston Hindistonning Jammu va Kashmir viloyatlari xususida qo'shni davlat Hindiston bilan kurash olib bormoqda. Sharqda va janubi sharqda Hind daryosi havzasining tekisliklari joylashgan. Shimolda va shimoli g'arbda Himolay tog'i tik qoyalari hamda balandligi 7690 m bo'lgan Hindiqush tog' tizmasi yastanib yotibdi.

Mamlakatning g'arbiy qismini Sulaymon, Tabakakar, Makron, Kirtxor tog' tizmalari bilan Belujiston yassi-tog'ligi egallagan. Asosiy daryosi Hind va uning irmoqlari. Pokiston tabiiy gazning salmoqli zaxiralari ega bo'lib, foydali qazilmalardan mis, neft, ko'mir, temir rudasi ham qazib olinadi.

Iqlimi — musson, mamlakat hududining katta qismida tropik-kontinental. O'simliklar dunyosi bir-muncha boy hisoblanadi. Hayvonot dunyosida yirik sut emizuvchi hayvonlar ko'p emas. Tabiatiga yovvoyi tog' echkilari, to'ng'izlar va yovvoyi qo'ylar hamda tekisliklarda yovvoyi eshaklar xos. Maymunlar ko'p, sirtlonlar ham uchrab turadi, bundan tashqari belujiston tulkisi, qashqirlar va shoqollar keng tarqalgan. Qushlardan — burgut, tustovuq, to'tilar ham ko'p.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Mamlakat tarkibiga 4 ta provinsiya (Belujiston, Shimoli g'arbiy Chegara, Panjob, Sindx), qabilalar hududi va poytaxt Federal hududi kiradi. Pokiston boshqaruvidagi Jammu va Kashmir nizoli hududlari o'z ichiga Ozod Kashmir hamda Shimoliy maydonlarini qamrab oladi. 1947-yil 14-avgustda Pokiston davlat mustaqilligini qo'lga kiritdi (ilgari ingliz mustamlakasi — G'arbiy Pokiston). Milliy bayramlari: 14-avgust — Mustaqillik kuni va 23-mart — Pokiston kuni. Ijro etuvchi hokimiyat prezidentga (davlat boshlig'i) va premyer-ministr boshchiligidagi hukumatga tegishlidir. Qonun chiqaruvchi hokimiyat — prezident, ikki palatali parlament (Senat va Milliy Assambleya) tomonidan amalga oshiriladi. Siyosiy partiyalari: Pokiston musulmon ligasi, Jamoat-ul-Islomiya, Pokiston xalq partiyasi, Milliy xalq partiyalari, Pokiston sotsialistik partiyasi.

**Iqtisodi, transport kommunikatsiyalari.** Pokiston so'nggi yillarda iqtisodni liberallashtirish, bir qator davlat korxonalarini davlat tasarrufidan chiqarishni o'z ichiga kiritgan dasturni amalga oshirib kelmoqda. Hukumatning sa'y-harakatlari chet el hamda ichki investitsiyalar salmog'ini oshirishga qaratilgan. Ishlab chiqarish tarmog'ida asosan to'qimachilik va oziq-ovqat

mahsulotlarini ishlab chiqarish sanoatlari yaxshi rivojlangan. Qishloq xo'jaligining asosiy mahsulotlari paxta, sholi (asosiy eksport mahsulotlari), bug'doy, qandlavlagi, meva va poliz ekinlari mahsulotlari. Chorvachilik ham rivojlangan. 2006-yil YIM miqdori 336050 mln dollarni (aholi jon boshiga — 2104 doll.) tashkil etgan. Asosiy savdo hamkorlari: AQSH, Yaponiya, Gonkong, Germaniya, Buyuk Britaniya.

Temiryo'llarining umumiy uzunligi — 8773 km, avtomobil yo'llari — 101315 km, port shaharlari — Gvadar, Karachi.

**Tarixi.** Zamonaviy Pokiston hududida m. a. 3—2-ming yilliklarda dunyodagi eng qadimgilardan biri hisoblangan Xarappa sivilizatsiyasi mavjud bo'lgan. M. a. 1500-yilda Hind sivilizatsiyasini tashkil qilgan oriy qabilalari, mamlakatning forslar tomonidan bosib olinguniga qadar bo'lgan Pokiston tarixi hamda m. a. VI asrgacha bo'lgan Hindiston tarixi bilan chambarchas bog'liqdir. M. a. IV asrda Pokiston Buyuk Aleksandr (Iskandar Zulqarnayn) imperiyasi tarkibiga kirgan. Zamonaviy Pokiston hududida islom dini VIII asrda tarqala boshladi. Temuriylar, Bobur Mirzo va uning avlodlari (1526—1857-yy.) davrida esa Shimoliy Hindistonning musulmon hukmdorlari boshqaruvi hind knyazliklarining katta qismiga tarqaldi. XIX asrda zamonaviy Hindiston hududi ingliz qo'shinlari tomonidan bosib olinib, Britan Hindistoni mustamlakasi tarkibiga kirdi. 1885-yilda hindlar tomonidan Hindiston Milliy Kongressini tashkil etish jarayoniga qo'yilmagan musulmonlar 1940-yilda avtonom musulmon davlatini tashkil etish talabi bilan chiqqan va o'zlarining Hind musulmonlari ligasini tashkil qilishgan. 1947-yilda Hindiston mustaqillikka erishgandan so'ng Pokiston davlati shu yili tashkil etilib, 1956-yilda esa yangi qabul qilingan konstitutsiyasiga asosan Pokiston Islom Respublikasi deb e'lon qilindi. Pokiston va Hindiston o'rtasida qurolli to'qnashuvlar boshlandi. 1965- va 1971-yillarda hind qurolli kuchlari Pokistonning sharqiy qismini ishg'ol qilganidan so'ng, 1974-yilda shu hududda mustaqil Bangladesh davlati tashkil



etildi. Shu bilan birga Pokiston Hindiston bilan Jammu va Kashmir shtatlari xususida ham bahs olib bormoqda. 1977-yilda harbiy to'ntarish oqibatida mamlakatda hokimiyat tepasiga general Ziyo ul-haq keldi. Ziyo ul-haq vafotidan so'ng 1988-yilda Pokistonda erkin parlament saylovlari o'tkazilib, ularda Benazir Bxutto boshchiligidagi Xalq Partiyasi g'alaba qozondi. 1990-yilda mamlakat prezidenti Is'hoq Xon muddatidan ilgari parlament saylovlarini belgilab, unda Islom demokratik alyansi g'alaba qozondi. 2007-yil dekabrda Benazir Bxutto terroristik harakat natijasida fojiali halok bo'ldi.

## POLSHA

*Rasmiy nomi – Polsha Respublikasi. Poytaxti – Varshava. Hududi – 312683 km<sup>2</sup>. Aholisi – 38518241 kishi (2007). Davlat tili – polyak. Dini – katolik. Pul birligi – zlotiy.*

**Geografik joylashuvi va tabiati.** Markaziy Yevropa davlati. Janubda Chexiya (chegara uzunligi — 790 km) va Slovakiya (539 km), sharqda Ukraina (529 km), Belarus (416 km) va Litva (103 km), g'arbda Germaniya (416 km), shimolda Rossiya (Kaliningrad viloyati 210 km) davlatlari bilan chegaradosh. Shimolda mamlakat Boltiq dengizi bilan tutashgan. Chegarasining umumiy uzunligi — 3582 km, sohil bo'ylab chegara uzunligi — 788 km. Mamlakat hududi asosan tekislikda joylashgan, mamlakatning 2/3 qismiga yaqini Polsha pasttekisligida yastanib yotibdi. Polsha shimolida Boltiq tizmasi joylashgan. Janubda va janubi sharqda Kichik-polyak va Lyublin tepaliklari yastanib yotadi. Janubiy chegara bo'ylab Karpat va Sudet tog'lari cho'zilib ketgan. Mamlakatning eng yuqori nuqtasi Risiy tog'i (2499 m). Asosiy daryolari — Visla va Oder. Mamlakat shimolida ko'llar ko'p. Polshada ko'mir, tabiiy gaz, mis, kumush va qo'rg'oshin konlari mavjud. Haydaladigan yerlar hududning 46% ini egallagan, o'rmon va dashtzorlar — 28%, o'tloq va yaylovlar — 13%.

Iqlimi — kontinental. O'simlik dunyosi — mamlakat

hududining chorak qismi o'rmonlardan iborat. Polsha hududining 58000 gektarini egallagan Belovejsk Pushchasi o'rmoni yovvoyi o'rmonlar florasini yaxshi saqlab qolgan o'ziga xos milliy qo'riqxonaga hisoblanadi. Hayvonot dunyosida yovvoyi to'ng'iz, bug'u, sirtlon, yovvoyi mushuk, kiyik va tog'li hududlarda qo'ng'ir ayiq, bo'ri kabi jonivorlarni uchratish mumkin. Belovejsk Pushchasida hayvonot dunyosining noyob namunasi bo'lgan zubrlar, ya'ni Yevropa bizoni saqlanib qolgan.

**Davlat tuzilishi, siyosiy partiyalari.** Davlat tuzilishi — respublika. 1998-yilda Polshada ma'muriy boshqaruv qayta tuzilib, ilgari 49 ta voyevodalik o'rniga 1999-yil 1-yanvardan boshlab mamlakat tarkibiga 16 ta voyevodalik kiritildi. Polsha mustaqil respublika sifatida 1918-yili 11-noyabrda e'lon qilindi. Milliy bayram — 3-may — Konstitutsiya kuni (1997). Ijro etuvchi hokimiyat prezidentga (davlat boshlig'i) va Ministrlar Kengashi rahbari premyer-ministriga tegishli. Oliy qonun chiqaruvchi organ — ikki palatali parlament (Milliy yig'in): yuqori palata (senat) va quyi palata (seym)dan tashkil topgan. Siyosiy partiyalari: Demokratik uniya, Xristian milliy birligi, Kelishuv markaz, Mustaqil Polsha konfederatsiyasi, Liberal demokratik kongress, Polsha dehqon partiyasi, Polsha respublikasi sotsial-demokratiyasi.

**Iqtisodi, transport kommunikatsiyalari.** XX asrning 90-yillarida iqtisodiy islohotlarning o'tkazilishi bozorni barqarorlashtirish, milliy valutani mustahkamlash va davlat budjeti defitsitini kamaytirish hamda tashqi qarzning o'sishini to'xtatish imkonini berdi. 2006-yil YIM miqdori 499549 mln dollarni (aholi jon boshiga — 12969 doll.) tashkil etgan. Sanoat va qurilishda ishlab chiqarishning yuqori samaradorligiga erishildi. Sanoatning rivojlangan sohalari: mashinasozlik, kemasozlik, metallurgiya, kimyo, oziq-ovqat, to'qimachilik. Ishlab chiqarish tizimining o'zgartirilishi, modernizatsiya qilinishi va hukumat tomonidan ekologik dasturlarining bajarilishi, so'nggi yillarda atrof-muhit ahvolidan sezilarli yaxshilanishiga olib keldi. Qishloq xo'jaligida xususiy sektor ustundir. Polsha javdar, bug'doy, kar-

toshka, raps mahsulotlarining yirik yetishtiruvchilaridan biri. Chorvachilik ancha rivojlangan. Iqtisodiy jonlanish bandlik bozorida ahvolni birmuncha yaxshiladi, ammo ishsizlar soni hali ham yuqori hisoblanadi. Iqtisodiy hamkorlari: Germaniya, Gollandiya, Italiya, Rossiya.

Temiryo'llarining umumiy uzunligi — 24313 km (11613 km elektrlashtirilgan). Avtomobil yo'llari — 352802 km, ichki suv yo'llari — 3997 km. Asosiy port shaharlari: Gdansk, Gdinya, Shchetsin.

**Tarixi.** V asrda zamonaviy Polsha hududiga g'arbiy slavyan qabilalari (polyaklar, vislanlar, mozovshan, pomeranlar) kirib kelib, o'troq hayot tarziga o'tishdi. IX asrda Pyastlar dinastiyasi atrofida Polsha knyazlarining birlashuvi boshlandi. X asrda xristian dinini qabul qilgan va tarqatgan qirol Meshko I tomonidan polyak yerlari hududi kengaytirildi. Uning o'g'li Boleslav I Bogemiya, Moraviyani hamda Sloveniya va Kiyev knyazligi yerlarining bir qismini bosib olgan, biroq uning hukmdorlik davridan so'ng Polsha qirolligi inqirozga yuz tutib, bu tushkunlik XIV asr boshlarigacha, Kazimir III Buyuk Polsha qirolligi qudratini tiklagunga qadar davom etdi.

1384-yildagi Polsha qirolichasi Yadviga va Litva buyuk knyazi Vladislav II Yagaylo o'rtasida tuzilgan nikoh Polsha qirollarining yangi Yagaylolar sulolasiga asos soldi. 1410-yilda Gryunvald yonidagi jangda Tevton ritsarlarini tor-mor qilgan Polsha va Litva Buyuk knyazligi birlashgan qo'shinlariga boshchilik qildi. 1569-yilda Polsha va Litva Buyuk knyazligini yagona davlat — Rech Pospolitaga birlashtirgan Litva uniyasini imzoladi. Iqtisodiy va ma'naviy o'sish davridan so'ng Polsha XVI—XVII asrlarda bir necha urushlarni (Rossiya, Shvetsiya, Turkiya bilan) boshdan kechirish bilan bir qatorda ichki ixtiloflarni ham bartaraf qilishga to'g'ri keldi va oqibatda davlat zaiflashib 1772-yilda Rossiya, Prussiya va Avstriya o'rtasida bo'lib olingdi. Ikkinchi (1793-yil) va uchinchi (1795-yil) bo'linishdan so'ng Polsha davlat sifatida barham topdi. 1807—1814-yil Napoleon Bonapart mamlakat hududining bir qismida Polshaning to'rtinchi bo'linishidan so'ng (1815)

Rossiya imperiyasi tarkibiga qoʻshilgan Varshava Buyuk Knyazligini tashkil etgan, nisbiy muxtoriyatdan foydalanagan Krakov respublikasi esa Avstro-Vengriya imperiyasining bir qismiga aylandi. XIX asrda polyaklar bir necha marotaba qoʻzgʻolonga koʻtarildilar (1830—1831, 1846, 1848, 1863, 1864), ammo ularning barchasi chor tuzumi tomonidan shafqatsizlik bilan bostirilgan. Birinchi jahon urushi davrida Pilsudskiy tomonidan tashkil etilgan Polsha hududi Avstro-Vengriya tarafida Rossiya qoʻshinlariga qarshi janglarda ishtirok etgan. 1916-yilda Germaniya va Avstriya bosib olingan zonalarning birlashgandan hamda Polshaning boʻlinishida ishtirok etgan barcha davlatlarning magʻlubiyatga uchragandan soʻng 1918-yilda Polsha mustaqilligi eʼlon qilindi. 1919-yilning yanvarida esa Pilsudskiy boshchiligida mustaqil hukumat tashkil etildi. 1939-yil 1-sentabrda Polshaning gʻarbiy qismi nemis qoʻshinlari tomonidan bosib olinsa-da, sharqiy qismi Sovet ittifoqi tomonidan 1939-yil 17-sentabrda qoʻshib olingan. 1945-yil mamlakat ozod qilingandan soʻng hokimiyat tepasiga ishchi partiyalarining «Demokratik blok»i keldi. 1947-yilda ular yagona ishchi partiyasiga birlashib, 40 yildan ziyod davr mobaynida Polshada hukmronlik qildi. 1990-yilda ilk erkin saylovlar oʻtkazildi. Unda Lex Valensa gʻolib chiqib mamlakat prezidenti boʻldi. U «Solidarnost» kasaba uyushmasi yetakchisi boʻlib, 1980-yildan boshlab hukmron sinfga qarshi chiqq boshlagan. 1995-yilda soʻl qanot partiyalari vakili Polshada demokratik islohotlar oʻtkazilishi taklifi bilan chiqdi. S. Kvasnevskiy davlat boshligʻi etib saylandi. 2005-yilgi prezidentlik saylovlarida L. Kachinskiy gʻolib chiqdi.

## PORTUGALIYA

*Rasmiy nomi — Portugaliya Respublikasi. Poytaxti — Lissabon. Hududi — 91985 km<sup>2</sup>. Aholisi — 10587388 kishi (2007). Davlat tili — portugal. Dini — katoliklar (97%), protestantlar. Pul birligi — yevro.*

**Geografik joylashuvi va tabiati.** Pireney yarimorolida joylashgan janubi g'arbiy Yevropadagi davlat. Atlantika okeanidagi Azor va Madera orollari ham Portugaliyaga tegishli hisoblanadi. Sharqda va shimolda Ispaniya bilan chegaradosh. G'arbda va janubda Atlantika okeani suvlari uning qirg'oqlarini yuvib turadi. Chegaralarining umumiy uzunligi — 1214 km, sohil bo'ylab chegara uzunligi — 793 km. Portugaliyaning shimoliy va shimoli sharqiy qismi tog'lar bilan tugallangan. Asosiy tog' tizmasi Syerra-de-Eshtrala. Mamlakatning eng yuqori nuqtasi — Eshtrala (1551 m) tog'idir. Portugaliyaning markazi va janubida pasttog'liklar va tepaliklardan iborat Portugal pasttekisligi yastanib yotadi. Asosiy daryolari: Doru (Duxro), Teju (Taxo), Gvadiana. Qazilma boyliklardan temir rudasi, uran rudasi, volfram, bulardan tashqari tabiiy boyliklardan marmar, yog'och mavjud. Haydaladigan yerlar mamlakat hududining 32%, o'rmonlar va dashtlar 40% ini egallagan.

Iqlimiga Atlantika okeanining ta'siri kuchli. O'simlik dunyosi daraxtlarga boy, asosan yirik bargli va ignabargli daraxtlardan iborat. Hayvonlardan bo'ri, tulki va boshqalar uchraydi.

**Davlat tuzilishi va siyosiy partiyalari.** Davlat tuzilishi — respublika. Mamlakat 22 okrugga bo'lingan. Portugaliya 1143-yilda mustaqillikka erishib, 1910-yili 5-oktabrda respublika deb e'lon qilindi. Milliy bayrami 10-iyun — Portugaliya kuni. Ijro etuvchi hokimiyat prezidentga (davlat boshlig'i) va premyer-ministriga tegishli. Qonun chiqaruvchi hokimiyat bir palatali Respublika Yig'ini tomonidan amalga oshiriladi. Mamlakatda 18 ta siyosiy partiya ro'yxatga olingan, ularning eng yiriklari: Portugaliya sotsial-demokratik partiyasi, Sotsialistik partiya, Portugaliya kommunistik partiyasi.

**Iqtisodi, transport kommunikatsiyalari.** Portugaliya Yevropa hamdo'stligiga a'zo bo'lib kirganidan buyon, so'nggi o'n yillikda kuchli iqtisodiy o'zgarishni boshdan kechirdi, biroq Yevropa hamdo'stligi a'zolari ichida aholisining yashash darajasi hali ham past bo'lib

qolmoqda. Sanoatning eng rivojlangan sohalari: metallga ishlov berish, kimyo, neftni qayta ishlash, to'qimachilik, baliqni konservalash, vinochilik. Turizmdan tushadigan mablag' davlat budjetining katta qismini tashkil qiladi. Qishloq xo'jaligida mehnatga yaroqli aholining 20% i band bo'lib, asosiy yetishtiriladigan mahsulotlar: donli ekinlar, kartoshka, uzum; chorvachilik ham rivojlangan. 2006-yil YIM miqdori 205450 mln dollarni (aholi jon boshiga — 19405 doll.) tashkil etgan. Savdo hamkorlari — YI mamlakatlari, AQSH.

Temiryo'llarining umumiy uzunligi — 3613 km, avtomobil yo'llarining umumiy uzunligi — 73661 km, ichki suv yo'llarining uzunligi — 820 km. Mamlakatning yirik portlari: Lissabon, Portu, Setubal.

**Tarixi.** Iberiyalik luzitan qabilalari yashagan zamonaviy Portugaliya hududlari m. a. I asrda Rim imperiyasi tarkibiga kirgan. V—VII asrlarda qadimgi Rim imperiyasidan so'ng Luzitaniya, Provensiya vandallar va vestgotlar bosqiniga duchor bo'ldi. 713—718-yillarda mamlakat arablar tomonidan bosib olindi. 1095-yilda tashkil topgan Portugaliya grafliги asta-sekinlik bilan mavrlar (arablar) bosib olgan hududlarni qayta ishg'ol qildi. 1493-yilda Alfonso I boshchiligida mustaqil Portugaliya qirolligi tashkil topdi va arablarga qarshi kurash davom etdi. V asrda mamlakatda hokimiyat tepasiga Avishlar sulolasi kelgan davrda Portugaliya yirik dengiz flotiga ega bo'lgan davlatga aylandi. XV asr oxirlari va XVI asr boshlarida portugaliyalik dengizchilar (Diash, Vasko da-Gama, Kabral va boshqalar) bir qator geografik kashfiyotlar qilishgan, ammo Portugaliya tom ma'nodagi Ispaniya va Buyuk Britaniya kabi imperiyaga aylana olmadi. XVI asrning ikkinchi yarmida Portugaliya monarxiyasi zaiflashib, 1580-yilda ispan hukmronligi ostiga tushib qoldi. 1840-yilgacha, ya'ni Remels tashabbusi bilan mamlakatdan ispanlar quvilib, qirol taxtiga Brogansa sulolasi asoschisi Juan VI o'tirguniga qadar, 1668-yilda Portugaliya yangidan mustaqil davlat deb e'lon qilindi. Biroq, 1703-yilgi Angliya bilan tuzilgan shartnoma idora qilish itti-foq munosabatlarini o'rnatishni nazarda tutib, Por-

tugaliya uning ta'sirida XX asrgacha yashadi. Napoleon urushlari davrida qirol sulolasi Portugaliyaning Braziliyadagi koloniyalarining biriga qochib o'tib, u yerda Portugaliya fransuz qo'shinlaridan ozod qilinguniga qadar istiqomat qildilar. 1822-yilda monarx taxtga qaytganidan so'ng mamlakatning siyosiy hayoti beqaror bo'lib, qirol hokimiyati tarafdorlari va sentabriyetlar (respublikachilar) o'rtasidagi doimiy kurash bilan tavsiflanadi. 1910-yilda Portugaliya Respublika deb e'lon qilindi, biroq 1932-yilda qat'iy avtoritar boshqaruviga asoslangan Estado Nabo (Yangi davlat) tuzumini e'lon qilgan Salazar diktaturasi o'rnatildi. 1968-yilda Salazar o'rniga kelgan M. Kayetanu ungacha mavjud bo'lgan siyosatini davom ettirdi, biroq 1974-yil 25-aprelda general Spinola boshchiligidagi bir guruh ofitserlar tomonidan ag'darildi. Shundan keyin mamlakatda muhim ijtimoiy va siyosiy o'zgarishlar roy berdi.

## PUERTO-RIKO

*Rasmiy nomi – Puerto-Riko Hamdo'stligi. Poytaxti – San-Xuan. Hududi – 9100 km<sup>2</sup>. Aholisi – 3951595 kishi (2007). Davlat tili – ispan, ingliz. Dini – katoliklar (85%), protestantlar (10%), vudu. Pul birligi – AQSH dollari.*

**Geografik joylashuvi va tabiati.** Hamdo'stlik Puerto-Riko, Vyekas, Kulebra, Mona va boshqa Katta Antil orollari arxipelagida, Shimoliy va Janubiy Amerika o'rtasida joylashgan. Shimolda Atlantika okeani, janubda Karib dengizi bilan tutashgan. Orollar tog'li hududlardan (eng baland cho'qqisi – 1338 m) iborat, zilzilalar bo'lib turadi.

Iqlimi – tropik, passatli. Orol shimolida aralash o'rmonzorlar, janubda – changalzorlar mavjud. Hayvonot olami ko'rshapalak, sudralib yuruvchilar, molluskalardangina iborat.

**Davlat tuzilishi, siyosiy partiyalari.** Davlat tuzilishi – AQSHning ma'muriy-hududiy birligi. Davlat boshlig'i – AQSH prezidenti. Ma'muriy jihatdan Puerto-

Riko 8 okrugga bo'linadi. Siyosiy partiyalari: Xalq demokratik partiyasi, Davlat respublika partiyasi, Yangi progressiv partiya, Puerto-Riko mustaqilligi partiyasi.

**Iqtisodi, transport kommunikatsiyalari.** Iqtisodiyoti asosini qayta ishlash sanoati tashkil etadi. Yengil, oziq-ovqat, neftni qayta ishlash korxonalari mavjud. Mashinasozlik, qishloq xo'jaligi, chorvachilik, turizm rivojlangan. Kema qatnoviga yaroqsiz tezoqar daryolari mavjud. Marganes va temir rudasi zaxiralariga ega. Yirik shaharlari: Bayamon, Ponse. 16 ta AQSH harbiy bazalari joylashgan. 2006-yil YIM miqdori 68950 mln dollarni (aholi jon boshiga — 17448 doll.) tashkil etgan. Asosiy savdo hamkorlari: AQSH (70% dan ortiq eksporti va 50% importi), Yaponiya, Venesuela, Dominikan Respublikasi.

**Tarixi.** 1493-yil 19-noabrda X. Kolumb tomonidan kashf qilingan va Ispaniya mulki deb e'lon qilingan. 1508-yili Kolumb tomonidan orol gubernatori etib tayinlangan Xuan Pons de Leyn birinchi shaharga asos soldi. 1898-yili Ispaniya — AQSH urushi natijasida Puerto-Riko Qo'shma Shtatlar mulkiga aylandi. 1917-yili orol aholisi AQSH fuqaroligiga ega bo'ldi. 1952-yildan Puerto-Riko o'z-o'zini boshqarish huquqiga ega «erkin qo'shilgan» davlat.

## REYUNION (Reyunon)

*Rasmiy nomi — Reyunion (Reyunon) (Fransiyaning dengizorti departamenti). Poytaxti — Sen-Deni. Hududi — 2502 km<sup>2</sup>. Aholisi — 798968 kishi (2007). Tili — fransuz. Dini — islom, xristianlik (katoliklar), buddaviylik, hinduiylik. Pul birligi — fransuz franki.*

**Geografik joylashuvi va tabiati.** Reyunion — Madagaskardan sharqda joylashgan Hind okeanidagi vulqonli orol.

Iqlimi — tropik. Orolning janubi g'arbiy qismi cho'l-biyobonlardan iborat. Shimoli sharqiy tomonida hind xurmosi, temir va zaytun daraxlari, daraxtsimon paporotniklar va palmalar o'sadi.



**Davlat tuzilishi va siyosiy partiyalari.** Davlat tuzilishi — Fransiyaning dengizorti departamenti. Orolni Fransiya tomonidan tayinlanadigan prefekt boshqaradi. O'z-o'zini boshqarish organlari — Bosh va Mintaqaviy Kengashlar. Hududiy jihatdan ikki okrugga bo'linadi. Siyosiy partiyalari: Kommunistik partiya, Demokratik tashkilotlar.

**Iqtisodi, transport kommunikatsiyalari.** Qurilish mahsulotlari, shakar ishlab chiqarish zavodlari, konserva korxonalari faoliyat ko'rsatadi. Baliqchilik va ovchilik rivojlangan. Shakarqamish, vanil va boshqa ekinlar yetishtiriladi. Mamlakat iqtisodiyotida turizm ham alohida ahamiyat kasb etadi. Importi: iste'mol va sanoat mahsulotlari. Eksporti: shakar, vanil, yorongul yog'i va boshqalar. 2006-yil YIM miqdori 4790 mln dollarni (aholi jon boshiga — 5995 doll.) tashkil etgan. Asosiy savdo hamkorlari: Fransiya va YI mamlakatlari.

Asosiy porti — Le-Por.

**Tarixi.** Orol 1513-yil portugallar tomonidan ochilgan va bungacha bu yer kimsasiz bo'lgan. Reyunionning geografik jihatdan qulay (Yevropa va Afrika o'rtasidagi dengiz savdo yo'lida) joylashganligi rivojlanishini ta'minladi. 1869-yil Suvaysh kanalining ishga tushirishiga qadar orol strategik jihatdan ahamiyati yuqori edi. 1642-yili fransuz dengizchilarining orolga tushishi natijasida orol Fransiya qo'shib olindi va Burbon deb nomlandi. XVII asr oxirida qahva plantatsiyalarida ishlatish uchun Madagaskardan qullar olib kelindi. Fransiyaning respublika deb e'lon qilinishi bilan orol nomi Reyunion deb o'zgartirildi. 1946-yil martida Reyunion «dengizorti departamenti» maqomini oldi.

## ROSSIYA

*Rasmiy nomi — Rossiya Federatsiyasi. Poytaxti — Moskva. Hududi — 17075000 km<sup>2</sup>. Aholisi — 141331073 kishi (2007). Davlat tili — rus. Dini — pravoslav (bundan tashqari islom, katolik, iudaizm, buddizm dinlariga e'tiqod qiluvchilar ham mavjud). Pul birligi — rubl.*

**Geografik joylashuvi va tabiati.** Yevropa va Osiyo qit'alarida joylashgan davlat. Janubda va janubi g'arbda Xitoy (chegara uzunligi 3673 km), Mongoliya (3441 km), Gruziya (723 km) va Ozarbayjon (284 km) Qozog'iston (6846), janubi g'arbda Ukraina (1567 km), g'arbda Finlyandiya (1313 km), Belarus (959 km), Estoniya (290 km), Latviya (217 km) va Norvegiya (167 km) davlatlari bilan chegaradosh. Rossiyaning Kaliningrad viloyati Boltiqbo'yidagi Polsha (432 km) va Litva (227 km) bilan chegaradosh. Shu bilan bir qatorda Rossiya Yangi yer orollari, Shimoliy yer, Voygach, Frans-Iosif yerlari arxipelagi, Yangi Sibir orollari, Shimoliy Muz okeanidagi Vrangel oroli, Kurill orollari (Kurill orollarining bir qismi — Iturup, Kunashir, Shikotan, Xabomai orollari uchun Yaponiya bahs olib bormoqda) va Tinch okeandagi Saxalin oroli qarashlidir. Sharqdan Rossiya qirg'oqlarini Yapon, Oxota va Bering dengizi hamda Bering bo'g'ozlari, shimolda Barents, Karsk, Chukotka va Sharqiy Sibir dengizi, Laptevlar dengizi, janubda Qora va Azov dengizlari, g'arbda Boltiq dengizi va Fin bo'g'ozlari bilan tutashib ketgan. Chegaralarining umumiy uzunligi — 20139 km. Sohil bo'ylab chegara uzunligi — 37653 km. Rossiya Federatsiyasi maydon jihatdan dunyodagi eng yirik davlat hisoblanadi. G'arbda dunyodagi tekisliklarning eng yirigi — Sharqiy Yevropa tekisligi yastanib yotibdi. Rossiyaning deyarli butun Yevropa qismi joylashgan shimoli g'arbida (eng baland nuqtasi 1191 m) Xibin tog'lari, janubda Kavkaz tog'lari bor. Kavkaz tog'larida mamlakat va Yevropaning eng baland nuqtasi Elbrus (5642 m) cho'qqisi joylashgan. Tekislik maydonlari o'rtacha olganda dengiz sathidan 170 m balandlikda joylashgan. Bu hududda O'rta Rus, Valday, Volga balandliklari joylashgan. Janubda va janubi sharqda Qora dengiz bo'ylari va Kaspiy dengiz bo'ylari pasttekisliklari mavjud. Uraldan sharqda maydonlarining balandligi 1894 m bo'lgan yirik botqoqlik hududlariga ega G'arbiy Sibir tekisligi yastanib yotibdi. Yenisey va Lena daryolari orasida o'rtacha balandligi 500—700 metr bo'lgan hamda ba'zi hududlarida tog'li massivlar qad ko'targan

O'рта Sibir tog' tekisligi joylashgan. Hududning eng yuqori maydoni — Putoryanya yassitog'ligi (balandligi 1701 m). Tog' tekislikning janubida G'arbiy va Sharqiy Sayan tog' tizmalari qad ko'targan. Sharqda tog' tekisliklari Markaziy Yoqut tekisligi bilan almashinadi. Lena daryosi hamda Tinch okean qirg'oqlari orasida tog' tizmalari va tog' tekisliklaridan iborat bo'lgan Shimoli sharqiy Osiyo hududi joylashgan. Mamlakatning sharqiy qismi yirik daryolarning vohalarini hisobga olmaganda, tog'lik hududlardan iborat. Kamchatka yarimorolida 120 ta vulqon bo'lib, ulardan 23 tasi faoldir. Ulardan eng yirigi — Klyuchevskaya Sopka vulqoni (balandligi 4750 m). Mamlakatning yirik daryolari Volga, Shimoliy Dvina, Don, Irtish, Ob, Angara, Yenisey, Lena, Amur. Yirik ko'llari — Kaspiy dengizi dunyoda maydon jihatidan eng yirigi (376000 km<sup>2</sup>), Baykal — dunyodagi hajmi (23000 km<sup>3</sup>) va chuqurligi (1620 m) bo'yicha eng yirik ko'ldir. Rossiya turli-tuman qazilma boyliklarining yirik zaxiralariga ega. Ularning ichida eng asosiylari — neft, gaz, temir, ko'mir, oltin va boshqa strategik qazilma boyliklaridir. Mamlakat hududining yirikligiga qaramay qishloq xo'jaligida yerlarning nisbatan oz qismidan foydalanadi — haydaladigan yerlar mamlakat hududining 8% ini tashkil qiladi. Hududning katta qismi doimiy muzlik zonasiga to'g'ri keladi.

Iqlimi — mamlakatning katta qismi mo'tadil iqlim doirasida. Shimolining chekka hududlari va shimoliy orollar arktik iqlimga yaqin. Mamlakatning deyarli butun hududida kontinental iqlim hukm suradi. Rossiya hududining katta qismi o'rmonlar bilan qoplangan. Bu o'rmonlarda archa, pixta, kedr, eman, oqqayin va hokazo daraxtlar o'sadi. Arktika kengliklarida zamburug'lar, qutb polalari, iva, olxa kabi o'simliklar va daraxtlar o'sadi. Mamlakat faunasi boy va rangbarangdir. Arktika va tundra hududlarida shimoliy bug'u, qutb quyoni, tulenlar, morjlar, oq ayiqlar keng tarqalgan. Taygada ayiq, silovsin va hokazolar bor. Uzoq sharq o'rmonlarida ayiq, «qizil kitob»ga kiritilgan va kam sonli bo'lgan ussuriy yo'lbarzlari, bug'ular keng

tarqalgan. Cho'l zonalarida jayron, chiyabo'ri, ko'p sonli kemiruvchilar mavjud. Kavkaz regionida tog' echkisi, kavkaz bug'usi, ayiq, bars, sirtlonlar keng tarqalgan.

### ***Davlat tuzilishi va siyosiy partiyalari.***

Davlat tuzilishi — Federativ Respublika. Rossiya Federatsiyasi tarkibi 89 ta subyekt, jumladan 49 ta viloyat, 21 ta Respublika (Adigeya, Oltoy, Boshqirdiston, Buryatiya, Dog'iston, Ingushetiya, Kabardin-Balkar, Qalmiq, Qorachoy-Cherkes, Kareliya, Komi, Mari El, Mordoviya, Saxa (Yakutiya), Shimoliy Osetiya, Tatariston, Tiva, Udmurtiya, Xakasiya, Checheniston, Chuvash), 1 ta avtonom viloyat (Yahudiy), 10 ta okrug (Agin-Buryat, Komi-Permyak, Koryak, Nenes, Taymir, Ust-Ordinsk, Buryat, Xanti-Mansi, Chukotka, Evenk, Yamalo-Nenesk), 6 ta o'lka (Oltoy, Krasnodar, Krasnoyarsk, Primorsk, Stavropol, Xabarovsk)lardan iborat. Rossiya Federatsiyasi 1991-yil 24-avgustda o'z mustaqilligini e'lon qildi. Sobiq Ittifoq tarqalgunga qadar avvalgi nomi RSFSR. Milliy bayramlari — 12-iyun (Davlat suvereniteti to'g'risidagi Deklaratsiya qabul qilingan kun) va 12-dekabr (Konstitutsiya kuni). Davlat boshlig'i — prezident. Ijro etuvchi hokimiyat premyer-ministr boshchiligidagi hukumatga tegishlidir. Qonun chiqaruvchi hokimiyat ikki palatali parlament, yuqori palatasi — Federatsiya Kengashi va quyi palata — Davlat Dumasi tomonidan amalga oshiriladi.

Asosiy siyosiy partiyalari: Yagona Rossiya, Rossiya bizning uyimiz, Yabloko, Rossiya Federatsiyasi kommunistik partiyasi, Rossiya liberal-demokratik partiyasi, Rossiya agrar partiyasi.

### ***Iqtisodi, transport kommunikatsiyalari.***

Sobiq ittifoq tarqalib ketganidan so'ng Rossiya sovet iqtisodiyoti potentsiali bilan birga bir qator jiddiy muammolarni: harbiy ehtiyojlarni qondirishga ixtisoslashgan iqtisod, samaradorligi past bo'lgan ishlab chiqarishni meros qilib oldi. 2006-yil YIM miqdori 1408603 mln dollarni (aholi jon boshiga — 9966 doll.) tashkil etgan. Sanoatning deyarli barcha tarmoqlari mavjud (qazib oluvchi qayta ishlash, ishlab chiqarish). Eksporti asosini

neft va neft mahsulotlari, tabiiy gaz, ko'mir, rangli metall, ximikatlar, harbiy texnika, yog'och va undan yasalgan buyumlar tashkil etadi. Qishloq xo'jaligida dehqonchilik qishloq xo'jalik yalpi mahsulotlarining 40% ini, chorvachilik 60% dan ziyod qismini yetishtiradi. Asosiy qishloq xo'jalik o'simliklari: bug'doy, qandlavlagi, kungaboqar, kartoshka, sholi, arpa. O'tish davrida iqtisodiyotda tizim o'zgarishlari amalga oshirilmogda, xususiylashtirish jarayoni boshlandi, shu vaqtning o'zida aholi turmush darajasining keskin pasayishi va ishsizlar sonining ortishi ko'zga tashlandi. 1995-yil qattiq monetar siyosatining o'tkazilishi natijasida hukumat inflyatsiya darajasini oyiga 4—5% ga pasaytirishga muvaffaq bo'ldi, biroq mamlakat iqtisodida chet el sarmoyasi kirib kelishiga, tadbirkorlik uchun zarur bo'lgan huquqiy bazaning yaratilmaganligi va siyosiy xatarlarning yuqoriligi to'sqinlik qilmoqda. Asosiy savdo hamkorlari: Yevropa mamlakatlari, Shimoliy Amerika, Yaponiya, Uchinchi dunyo mamlakatlari.

Temiryo'llarining umumiy uzunligi — 87180 km. Avtomobil yo'llari — 879100 km (652500 km asfaltlangan). Rossiyada 120000 km (uzunligi 10 km dan ziyod bo'lgan) umumiy uzunligi 2300000 km daryolar mavjud (ba'zilari yil bo'yi kema qatnovi uchun yaroqli). Mamlakatning yirik portlari — Arxangelsk, Vladivostok, Kaliningrad, Murmansk, Novorossiysk, Naxodka, Magadan, Sankt-Peterburg, Tuapse; ichki portlari — Astraxan, Volgograd, Qozon, Krasnoyarsk, Moskva, Nijniy Novgorod, Rostov, Samara, Xabarovsk.

**Tarixi.** Zamonaviy Rossiya hududi Yevropa qismining janubida qadimda qabilalar hukmronlik qilib, ularning ba'zilari qudratli va yirik imperiyalarga asos solgan edi: kimmeriyalar taxminan m. a. 1000-yildan 700-yilgacha, skiflar m. a. 700-yildan 300-yilga qadar, sarmatlar m. a. 300-yildan 200-yilgacha. III asrda gotlar Dondan to Dunaygacha bo'lgan hududlarda, xunlar tomonidan 375-yilda tor-mor qilingan, gullab-yashnagan imperiyaga asos solgan. 560-yilda xunnlarni avarlar almashtirdi, VII asr boshlarida esa xazarlar o'z imperiyasiga asos soldi. Shu vaqtning o'zida Zamonaviy

Rossiya hududining shimoliy va markaziy qismlariga slavyan qabilalari kirib kela boshladi. O'z yerlarini xazar va bulg'orlardan himoya qilish uchun slavyan qabilalari yordam so'rab IX asrda Novgorod va Kiyevda muqim joylashgan varyaklarga murojaat qildilar. Varyak knyazlari Oleg, Olga, Svyatoslavlar pecheneglar, bulg'orlar hamda rus knyazliklarining madaniy hayotiga katta ta'sir ko'rsatayotgan Vizantiya imperiyasiga qarshi ham muvaffaqiyatli harbiy harakatlar olib bordilar. 988-yilda Vladimir I ulug' xristianlikni qabul qildi va uni rus aholisi o'rtasida tarqatdi. Kiyev Rusi XI asrga kelib Vladimir II Monomax davrida o'z taraqqiyotining yuqori nuqtasiga yetdi, biroq XII asrda rus davlatlari o'rtasida Vladimir-Suzdal knyazligi va Novgorod Respublikasi yetakchi o'rinlarga ega edilar. XIII asrda rus knyazliklari mo'g'ul-tatarlar bosqiniga duchor bo'lishdi. Chingizxonning nevarasi Botuxon Moskva, Suzdal, Kiyevni bosib olib, ikki yarim asr davomida ko'pgina rus knyazliklari qaram bo'lgan Oltin O'rdaga asos soldi. Shu vaqtning o'zida Novgorod avval shvedlarga, keyinchalik Tefton ordeni ritsarlariga (Neva jangi — 1240-yil, Muz ustidagi jang — 1242-yil) qarshi kurash olib borishga majbur bo'ldi. XIV asrda Moskva Rusning diniy markaziga aylandi va uning atrofida mo'g'ul-tatarlarga qarshi kurashish g'oyasi ostida ko'pgina rus knyazliklari birlasha boshladi (Kulikovo jangi — 1380-yil). XV asrda Moskva knyazligining mavqeyi keskin o'sdi, Ivan III davrida esa Moskoviya tarkibiga Yaroslavl, Rostov va Novgorod yerlari kirdi, 1547-yilda o'zini sar deb e'lon qilgan Ivan IV Grozniy Moskva davlati hududlarini sezilarli darajada kengaytirishga muvaffaq bo'ldi. XIV asrda kuchli markazlashgan davlatga aylangan Moskva knyazligi Volgabo'yi, Ural va G'arbiy Sibir hududlarini o'ziga bo'ysundirdi. Rech Pospolita bilan olib borilgan urush Moskva knyazlarining muvaffaqiyatsizligi bilan tugab, XVII asr boshlarida avval shvedlar, undan so'ng esa Polsha bosqinchilariga qarshi kurashishiga to'g'ri keldi. 1613-yildan 1917-yilgacha Rossiyada hukmronlik qilgan sulolaga asos solgan Mixail Romanov Rus sari etib saylandi.

XVII asr oxirida rus taxtiga o'tirgan Pyotr I mamlakatda bir qator jiddiy iqtisodiy va siyosiy islohotlarni amalga oshirdi; ta'lim, armiya, flot va ma'muriy boshqaruv idoralari tizimi qayta tashkil qilinib, Shimoliy urush (1700—1721-yy.) natijasida Rossiya Boltiq dengiziga chiqish yo'liga ega bo'ldi. Rossiya tarixining yorqin namoyandalaridan biri Yekaterina Buyuk, 1762-yilda o'z eri Pyotr III ga qarshi qaratilgan davlat to'ntarishi natijasida hokimiyat tepasiga keldi. Mamlakatni 1796-yilgacha boshqargan Yekaterina Buyuk Rossiya imperiyasi hududlarini sezilarli darajada kengaytirishga erishdi. 1812-yilda Rossiyaga, 1812-yil 14-sentabrda Moskvani ishg'ol qilgan Napoleon Bonapart boshchiligidagi fransuz qo'shinlari kirib keldi. Moskva ishg'ol qilinganligiga qaramay, fransuzlarning rus kompaniyasi to'la muvaffaqiyatsizlik bilan tugadi. 1825-yil Peterburgdagi Dekabristlar qo'zg'oloni rus inqilobiy harakatiga asos soldi. O'z hukmronligini 1825-yil Dekabristlar qo'zg'olonini bostirishdan boshlagan Nikolay I Rossiyani politsiyachi davlatga aylantirib, qattiq reaksiyon tuzum o'rnatdi. Nikolay I 1855-yil Rossiya halokatli mag'lubiyatga uchragan Qrim urushi davrida vafot etdi. Uning o'g'li Aleksandr I 1861-yilda krepostnoylik huquqini bekor qilib, sudlov, ta'lim va armiyani isloh qildi. XIX asrda Rossiya o'z hududlarini (Polsha, Finlyandiya), sharqqa (O'rta Osiyo, Sibir), janubga (Kavkaz) qarab kengaytirishni davom ettirdi. Yaponiya bilan olib borilgan urushdagi mag'lubiyat sar tuzumining zaifligini namoyon qildi va jiddiy ichki siyosiy inqirozga (1905-yilgi rus inqilobiga) olib kelishi bilan birga shu vaqtning o'zida muhim iqtisodiy islohotlarni amalga oshirish uchun zamin yaratdi. Stolipinning islohotchilik siyosati mamlakatda, sanoat va savdoning tez sur'atlar bilan rivoj topishi sezilarli iqtisodiy o'sishga olib keldi. 1914-yilda Avstro-Vengriya qo'shinlari tomonidan Serbiya bosib olinganidan so'ng Rossiya Fransiya va Buyuk Britaniya tarafida I jahon urushiga qo'shildi. 1917-yil fevralda urush natijasida zaiflashgan Rossiyada inqilob boshlandi va uning oqibatida sar Nikolay II taxtdan voz kechib, mamlakatdagi hokimiyat

Muvaqqat hukumat qo'liga o'tdi. Urushni davom ettirish tarafdorlari va qarshilar o'rtasidagi siyosiy kurash, inqilobiy kayfiyatning o'sib borishi 1917-yil oktabrida bo'lib o'tgan inqilobga olib keldi va uning oqibatida mamlakatdagi hokimiyatni bolsheviklar qo'lga kiritdi. Bir necha million kishi halok bo'lgan fuqarolar urushi tugaganidan so'ng sovet hokimiyati sobiq Rossiya imperiyasining katta qismida o'rnatilgan edi. «Harbiy kommunizm» siyosati davridan so'ng 1921-yili mamlakatda yangi iqtisodiy siyosat e'lon qilindi, natijada Sovet Rossiyasi 1927-yilga kelib ishlab chiqarishning urushgacha bo'lgan ko'rsatkichlariga yeta oldi. 1922-yil 30-dekabrda Sovet Ittifoqi tashkil etilib, uning tarkibiga Rossiya, Ukraina, Belorussiya va Kavkazorti Respublikalari kirdi. 1924-yilda esa SSSR tarkibiga O'zbekiston va Turkmaniston, 1929-yilda Tojikiston, 1940-yilda Estoniya, Latviya, Litva va Moldaviyalari qo'shildi. 1927-yilga kelib mamlakatdagi butun hokimiyatni o'z qo'llariga yig'a olgan Stalin, NEPdan voz kechib, iqtisodni qat'iy rejalashtirish va yerlarni kollektivlashtirish rejasini amalga oshirishga kirishdi. Stalin tomonidan o'zgacha fikrlovchilarga qarshi o'tkazilayotgan qatag'onlar 1934-yilda Kirov o'ldirilganidan so'ng yanada kuchaydi. 1941-yil 22-iyunda mamlakat hududiga Sovet Ittifoqi hududlarining Yevropa qismini tez fursatda ishg'ol qilgan nemis qo'shinlari bostirib kirdi. Biroq 1941-yil qishidagi Moskva ostonalaridagi va ayniqsa Stalingrad ostidagi 1943-yil nemis qo'shinlarining mag'lubiyati oqibatida urushning borishida tub burilish yasab, SSSR va uning ittifoqchilari g'alabasini ta'minladi. Urush tugagandan so'ng tez orada Sharqiy va Markaziy Yevropada o'z ta'sir doirasini kengaytirgan SSSR va g'arb mamlakatlari o'rtasida «Sovuq urush» davri boshlandi (Berlin qamali — 1947-yil, Koreya urushi — 1950—1953-yillar). G'arb bilan munosabatlarning iliqlashuvi Stalin vafotidan so'ng hokimiyat tepasiga 1956-yilda Stalin shaxsiga sig'inishni qattiq qoralagan N. S. Xrushchovning hokimiyat tepasiga kelganidan boshlanadi. 1960-yillarda iqtisodda islohotlarning o'tkazilishi ma'lum oqibatlarga olib keldi. Biroq



hamon davom etayotgan sanoat va qishloq xo'jaligining qat'iy markazdan turib rejalashtirilishi iqtisodiy tur-g'unlikka olib keldi hamda 1980-yillarning boshlariga kelib mamlakat iqtisodi past mehnat samaradorligi va budjetning harbiy sanoat tomonga og'ib ketganligi bilan tavsiflanadi. N. S. Xrushchyov davrida, keyinchalik L. I. Brejnev hokimiyati (1964—1982-yy.) davrida ham SSSR g'arb mamlakatlariga nisbatan «tinch hamjihatlik-da yashash» siyosatini o'tkazdi va Sharqiy Yevropa mamlakatlaridagi o'z ta'sirini qiyinchilik bilan ushlab turardi (Vengriyadagi qo'zg'olon — 1956-yil, Chexoslavakiya — 1968-yil, Polshada harbiy vaziyatning joriy qilinishi). 1979-yilda SSSR kommunistik tuzumni qo'l-lab-quvvatlash uchun Afg'onistonga o'z qo'shinlarini kiritdi, biroq bu Sovet Ittifoqining harakati mamlakat aholisi qarshiligiga va musulmon dunyosida katta e'tirozlarga sababchi bo'ldi. 1980-yil o'rtalarida M. S. Gorbachyov tashabbusi bilan amalga oshirilgan qayta qurish mamlakatdagi iqtisodiy muammolarni hal eta olmadi, ittifoqdosh respublikalar aholisining milliy o'zligini anglash hissi o'sishi ittifoq markazi zaiflashuvi-ga olib keldi. 1991-yil avgust to'ntarishi Sovet Ittifoqining tarqalib ketishiga turtki berdi va 8-dekabrda Rossiya Belorussiya va Ukraina, keyinchalik qolgan respublikalar tarkibiga kirgan, Boltiqbo'yi davlatlaridan tashqari, Mustaqil Davlatlar hamdo'stligi tashkil etil-ganligini e'lon qildilar. Mustaqil Rossiyaning birinchi prezidenti etib B. N. Yelsin saylandi va u 1996-yilda bo'lib o'tgan saylovlarda ikkinchi bor qayta saylandi. So'nggi yillarning zalvorli va shu vaqtning o'zida fojiali voqealaridan biri sifatida Rossiya parlamenti tarafdorlari va hukumat qo'shinlari o'rtasidagi 1993-yilgi qurolli to'qnashuvni hamda 1995-yilgi Chechenistondagi urushni ta'kidlash lozim. 1999-yil B. N. Yelsin o'z xohishiga ko'ra muddatdan oldin iste'foga chiqdi. 2000—2008-yillardagi V. V. Putin prezidentligi davrida Rossiya barcha sohalarda rivojlana boshladi. 2008-yil 2-yanvaridagi saylovlarda prezidentlik lavozimiga D. A. Medvedev saylandi.

## RUANDA

*Rasmiy nomi — Ruanda Respublikasi. Poytaxti — Kigali. Hududi — 26340 km<sup>2</sup>. Aholisi — 9833593 kishi (2007). Davlat tili — ingliz, fransuz va kinyaruanda (eng katta etnik guruhlarini — xutu (70%), pigmey (14%), va tutsilar (9%). Dini — katoliklar (65%), majusiylar (25%), protestantlar (9%), musulmonlar (1%). Pul birligi — Ruanda franki.*

**Geografik joylashuvi va tabiati.** Markaziy Afrika davlati. Janubda Burundi (chegara uzunligi — 290 km), sharqda Tanzaniya (217 km), g'arbda Qarbda Kongo Demokratik Respublikasi (217 km), shimolda Uganda (169 km) davlatlari bilan chegaradosh. Chegarasining umumiy uzunligi — 893 km. Mamlakat Sharqiy Afrika pasttekisligining g'arbiy qismida joylashgan. Ustunlik qiluvchi tepaliklar dengiz sathidan 1500—2000 m balandlikda joylashgan. Ruandaning yuqori nuqtasi — Xarisimbi tog'i (4507 m). Asosiy daryosi Koir-Nilning irmog'i. Mamlakatning yirik ko'li — Kivu kema qatnovi uchun yaroqlidir. Asosiy tabiat resurslari: oltin, volfram rudasi, tabiiy gaz, qalay.

Iqlimi — subekvatorial. O'simlik dunyosi inson faoliyati ta'sirida o'rmonlar o'rnini savannalar va evkalipt ekinzorlari egalladi. Tog' yonbag'irlarida fikus, palma, bambuk kabi daraxtlar uchraydi. Yirik hayvonlarni faqat Milliy bog'da uchratish mumkin. Bular timsoh, begemot, fil, antilopa va eng asosiysi odamsimon qora gorillalar.

**Davlat tuzilishi va siyosiy partiyalari.** Davlat boshqaruv shakli — respublika. Mamlakat tarkibi 11 ta prefekturadan iborat. Ruanda mustaqillikni 1962-yil 1-iyunda qo'lga kiritdi (bundan oldin Belgiya mustamlakasi) va shu kun milliy bayram sifatida nishonlanadi. Ijro etuvchi hokimiyat prezident (davlat boshlig'i) hamda premyer-ministriga tegishlidir. Qonun chiqaruvchi hokimiyatni bir palatali Milliy yig'in amalga oshiradi. Siyosiy partiyalari: Demokratiya va

taraqqiyot uchun milliy respublikachilar harakati, Xutu partiyasi, Ruanda vatanparvarlar fronti, Xristian-demokratlar partiyasi.

***Iqtisodi, transport kommunikatsiyalari.***

Qishloq xo'jaligi iqtisodiyotining asosini (YIM — 50%) tashkil qilib, qahva va choy umumiy eksport hajmining 90%ini tashkil qiladi. Sanoat ishlab chiqarish qishloq xo'jalik mahsulotlarini qayta ishlash (YIM — 17%) va tog'-kon sanoati, volfram va qalay rudasini qazib olish bilan cheklangan. 1994-yilda boshlangan fuqarolar urushi ham iqtisodning umumiy ahvoriga salbiy ta'sir qildi. 2006-yil YIM miqdori 11155 mln dollarni (aholi jon boshiga — 1134 doll.) tashkil etgan. Asosiy savdo hamkorlari — Germaniya, Belgiya, AQSH, Italiya.

***Tarixi.*** XVI asrga kelib hozirgi Ruanda hududida boshqaruv shakliga ko'ra absolut monarxiya bo'lgan davlat tashkil topdi. Yevropaliklar Ruandani 1858-yilda kashf qilishgan. 1898-yilda esa mamlakat hududi Urundi qirolligi bilan birgalikda Germaniya Sharqiy Afrikasi tarkibiga kirdi. 1923-yilda Belgiya Millatlar Ligasidan Ruanda—Urundi hududlarini boshqarishga mandat oldi. 1946-yilda Belgiya homiyligidagi va boshqaruvi ostidagi hududga aylangan Ruanda—Urundi 1960-yilda Kongo mustaqilligi e'lon qilingandan so'ng Zoir tarkibiga qo'shilgan va shu yilning o'zida undan ajralib chiqqan. 1961-yilda o'tkazilgan referendum oqibatida Ruanda—Urundi shu yilning o'zida respublika deb e'lon qilingan va Burundi hamda Ruandaga ajralib ketdi. 1962-yilda esa to'la mustaqillikni qo'lga kiritdi. 1973-yil davlat to'ntarilishi oqibatida hokimiyat tepasiga harbiylar kelib, parlamentni ham, siyosiy partiyalarni ham tarqatib yuborishdi. 1990-yilda ko'pchiligi 1959-yilda Ugandadan immigratsiya qilgan tutsi va xutu etnik guruhlar o'rtasida qonli to'qnashuvlar boshlanib ketdi. 1992-yilda mojaroni bostirishga erishildi va mamlakatda demokratiyalashtirish jarayoni boshlandi. Biroq 1994-yilda etnik to'qnashuvlar yangi kuch bilan avj oldi. Ugandadagi fuqarolar urushi o'zi bilan minglab qurbonlar va qo'shni mamlakatlarga, asosan Burundi va Zoirga millionlab emmigrantlarning qochib chiqishiga olib keldi.

## RUMINIYA

*Rasmiy nomi – Ruminiya Respublikasi. Poytaxti – Buxarest. Hududi – 237500 km<sup>2</sup>. Aholisi 22284801 kishi (2007). Rasmiy tili – rumin. Dini – pravoslavlar (70%), katoliklar (6%), qolganlari yahudiylar va musulmonlar. Pul birligi – ley.*

**Geografik joylashuvi va tabiati.** Yevropa qit'asining janubi sharqida joylashgan davlat. Sharqda Moldova (chegara uzunligi — 450 km), shimolda Ukraina (1531 km), janubda Bolgariya (608 km), janubi g'arbda Yugoslaviya (1476 km), g'arbda Vengriya (443 km) davlatlari bilan chegaradosh. Janubi sharqda Ruminiya Qora dengiz bilan tutashib ketgan. Chegaralarining umumiy uzunligi — 2508 km, sohil bo'ylab chegara uzunligi — 234 km. Ruminiya Bolqon yarim-orolining shimolida, Quyi Dunay havzasida joylashgan. Mamlakatning markaziy va shimoliy qismida Sharqiy va Janubiy Karpat tog'lari hamda Transilvan yassitog'ligi yastanib yotibdi. Ruminiyaning yuqori nuqtasi Moldoveanul tog'i (2544 m). G'arbda G'arbiy Rumin tog'lari joylashgan. Mamlakatning janubi sharqida Dobruja yassitog'ligi mavjud. Quyi Dunay tekisligi mamlakatning janubini egallagan. Shunday qilib, relyefi turfa va uyg'unlashgan holda taqsimlangan. Mamlakat markazida Karpat tog'lari yarim aylana hosil qilib hududning 31% ini egallagan, tepaliklar va tog' tekisliklari 33%, pastliklar esa 36% ni egallaydi. Mamlakatning asosiy daryosi — Dunay. Asosiy tabiiy resurslari — neft, tabiiy gaz, ko'mir, temir rudasi, rangli metallar. Haydaladigan yerlar mamlakat hududining 63% ini, yaylov va o'tloqlar 33% ga yaqin, o'rmonlar va o'rmonzorlar 28% ini tashkil qiladi.

Iqlimi — mo'tadil kontinental. O'rmonlarida buk, eman, oqqayin, grab va archa daraxtlari o'sadi. Hayvonot dunyosida ayiq, bug'i, tog' echkileri, quyon, qushlardan o'rdaklar, g'ozlar, oqqushlar, laylak va yozda uchib keladigan pelikanlar hamda flamingolar mavjud.

**Davlat tuzilishi, siyosiy partiyalari.** Davlat tuzilishi — respublika. Mamlakat 40 ta uyezd, maxsus maqomga ega bo'lgan Buxarest munitsipiyasiga bo'lingan. Usmoniylar imperiyasidan Ruminiya 1878-yilda mustaqillik oladi. Milliy bayram — 1 dekabr — barcha tarixiy rumin hududlarining yagona davlatga birlashgan kuni. Ijro etuvchi hokimiyat prezident (davlat boshlig'i) va hukumat boshlig'i premyer-ministriga tegishli. Qonun chiqaruvchi hokimiyatni Senat (yuqori palata) va Deputatlar palatasi (quyi palata)dan iborat parlament amalga oshiradi. Yirik siyosiy partiyalari: Ruminiyaning sotsial-demokratik partiyasi, Rumin milliy birligi partiyasi, Ruminiya Mars partiyasi, Mehnat Sotsialistik partiyasi, Ruminiya vengrlarining demokratik ittifoqi, Ruminiya agrar-demokratik partiyasi, Demokratik partiya.

**Iqtisodi, transport kommunikatsiyalari.** Ruminiya iqtisodi bozor iqtisodiga o'tish bosqichida. Ruminiyaning so'nggi yillardagi asosiy makroiqtisodiy ko'rsatkichlari mamlakatda iqtisodiy o'sish jarayoni davom etayotganligini tasdiqlamoqda. Sanoatning yaxshi rivojlangan tarmoqlari: tog'-kon sanoati, yog'ochni qayta ishlash, kimyo sanoati, mashinasozlik, metallurgiya, neft qazib olish va neftni qayta ishlash, oziq-ovqat. Ruminiya bug'doy va makkajo'xori yetishtiruvchi yirik davlat hisoblanadi.

2006-yil YIM miqdori 182343 mln dollarni (aholi jon boshiga — 8182 doll.) tashkil etgan. Asosiy savdo hamkorlari: YI mamlakatlari, Markaziy va Sharqiy Yevropa davlatlari.

Temiryo'llarining umumiy uzunligi — 11380 km (3758 km elektrlashtirilgan), avtoyo'llar — 72816 km. Asosiy portlar: Konstansa, Sulina (dengiz porti), Breila, Galau (Dunay daryosida).

**Tarixi.** II asrda hozirgi Ruminiya hududini rimliklar bosib oladilar va o'zlarining Dakiya viloyatini tashkil qilishadi. III asrdan boshlab mamlakat hududiga got, xunn, skif, avar qabilalari hujum qilib turdilar, VI—VII asrlarda esa bu yerlarga slavyan qabilalari kirib kelib o'troq hayot kechira boshladi. XIII asrda vengrlar Transilvaniyani bosib olishadi va rumin aholisini Dunay

vodiysiga siqib chiqaradi. XIV asrda yuqori iqtisodiy va madaniy taraqqiyot darajasiga ega bo'lgan Moldaviya va Valaxiya rumin knyazliklari tarkib topdi.

Stefan Buyuk va Minoy Jasurlarning qahramonona qarshiligiga qaramasdan, Moldaviya va Valaxiya turklar tomonidan bosib olindi. XVI—XX asrlarda turk hukmronligi ostida qolib ketdi. XIX asr boshlarida Moldaviya va Valaxiya Rossiya yordami bilan avtonomiyani qo'lga kiritdi, 1859-yilda esa Aleksandr Kuza boshqargan yagona Ruminiya davlatiga birlashtirildi. 1878-yilda Rossiya—Turkiya urushi davrida to'la mustaqillikni qo'lga kiritdi va 1881-yilda Avstro-Vengriya va hamda Germaniya bilan ittifoqchilik shartnomasini imzolagan Ruminiya qirollik deb e'lon qilindi. Biroq XX asr boshlariga kelib bu ittifoq zaiflashdi va Birinchi jahon urushi davrida Ruminiya qirol Ferdinand Rossiya va uning ittifoqchilari tarafida turib jangovar harakatlarda ishtirok etdi. Urush tugagach, Ruminiya o'z tarkibiga Transilvaniyani, Bukovina, Banata va Bessarabiyaning qo'shib olishga muvaffaq bo'ldi. 1929-yilda parlament boshqaruvi Jema-Kodreanu boshchiligidagi «Temir gvardiya» profashistik tuzumi bilan almashindi, 1938-yilda mamlakatda Antonesku diktaturasi o'rnatildi. 1939-yilda nemis qo'shinlari Shimoliy Transilvaniyani bosib olgani bilan bir vaqtda SSSR Bessarabiyaning qo'shib oldi (anneksiya). Fashistik Germaniya tarafida urush domiga tortilgan Ruminiya, Stalingrad jangidan so'ng qirol Mixay davlatining tashqi siyosiy yo'nalishini o'zgartirib ittifoqchilar tarafida jang qila boshladi. Shu vaqtning o'zida Antonesku diktaturasi ag'darildi va mamlakatda Milliy birdamlik hukumati tuzildi. Mamlakat ozod qilinganidan so'ng SSSR ta'siri doirasiga tushib qoldi va 1947-yilda qirol Mixay taxtdan voz kechgach, Ruminiya respublika deb e'lon qilindi. Hokimiyat tepasiga 1965-yilda kelgan Chaushesku Sovet Ittifoqi va sotsialistik mamlakatlar siyosatidan farq qiladigan tashqi siyosat yurita boshladi va shu vaqtning o'zida mamlakatda diktatorlik kommunistik tuzumini o'rnatdi. Bu tuzum 1989-yilda armiya qo'llab-quvvatlagan xalq qo'zg'oloni oqibatida ag'darildi. 1989-yil 25-dekabrda

«Milliy Qutqaruv Kengashi» Chaushesku va uning xotini Yelenani otib o'ldirish haqida buyruq berdi. 1990-yilning may oyida erkin saylovlar o'tkazilib, unda prezidentlik lavozimiga Iliyesku saylandi.

## SALVADOR

*Rasmiy nomi — El-Salvador Respublikasi. Poytaxti — San-Salvador. Hududi — 21393 km<sup>2</sup>. Aholisi — 6990022 kishi (2007). Davlat tili — ispan. Dini — katolik. Pul birligi — salvador koloni.*

**Geografik joylashuvi va tabiati.** Markaziy Amerikadagi davlat. Sharq va shimol tomondan Gonduras (chegaraning uzunligi 342 km), g'arb va shimoli g'arbda Gvatemala bilan (203 km) chegaradosh. Mamlakat janubda Tinch okeani, janubi sharqda esa Foneska qo'ltig'i suvlari bilan tutashib ketgan. Chegaralarining umumiy uzunligi 545 km, sohil bo'ylab chegara uzunligi — 307 km. Mamlakat hududi asosan vulqon etaklaridan iborat. Eng baland nuqtasi — Santa-Ana vulqoni (2381 m). Qirg'oq bo'ylab torgina qirg'oqbo'yi tekisligi cho'zilgan. Uning eni 10—20 km dan oshmaydi. Mamlakatning asosiy daryosi — Lempa. Asosiy tabiiy boyliklari: neft va gidroenergetik resurslar. Ishlov beriladigan maydoni — 27%, yaylovlar 29% ni tashkil etadi.

Iqlimi — tropik. Mamlakatda siyrak past bo'yli daraxtlar (chapparro, mimoza va b.) uchraydigan quruq savannalarga tez-tez duch kelish mumkin; Tinch okeani qirg'oqlarida eman va qarag'ayzor o'rmonlar saqlanib qolgan, qirg'oqqa yaqin yerlarda esa bambukzorlar mavjud. Salvadorda noyob balzamli (malhamli) daraxtlardan bir necha o'n minglabi o'sadi. Boshqa qimmatbaho turlardan ispan kordi, sariq daraxt, sapodilya, qizil daraxt ham uchraydi. Mamlakatning hayvonot olami ancha xilma-xil. Markaziy Amerika tapiri, chumolixo'r, bo'rsiq, dangasa, jayra va maymunlar ko'p uchraydi, shuningdek, qoplon, puma, otselotlar ham bor, sudra-

luchilardan esa bo'g'ma va zaharli ilonlarning boshqa turlari mavjud. Savannalarida kaltakesak, Meksika bug'usi, kayot va xilma-xil mayda kemiruvchilar yashaydilar. Daryolarida timsohlar bor. Qushlarning bir necha yuz xillari (to'tiqush, tukanlar, qarg'alar, yovvoyi g'ozlar, kolibrar va b.) hisobga olingan.

### ***Davlat tuzilishi va siyosiy partiyalari.***

Davlat tuzilishi — prezidentlik respublikasi. Mamlakat 14 departamentga bo'lingan. Salvador Ispaniyadan mustaqillikni qo'lga kiritishga 1821-yilning 15-sentabridan kurasha boshlagan, biroq faqat 1841-yildagina to'la mustaqillikka erishgan. Milliy bayrami — 15-sentabr — Mustaqillik kuni. Mamlakat va hukumat boshlig'i — prezident. Oliy qonunchilik organi — Qonunchilik Assambleyasi (bir palatali parlament). Eng yirik siyosiy partiyalari: Milliy respublika ittifoqi (ARENA), Xristian-demokratik partiya (XDP), Demokratik konvergensiya (FK), Salvador Kommunistik partiyasi (SKP).

### ***Iqtisodi, transport kommunikatsiyalari.***

Iqtisodiyotining asosiy tarmog'i — qishloq xo'jaligi bo'lib, u ichki milliy ishlab chiqarish (YIM)ning 25% i va eksportning 66% ga yaqinini ta'minlaydi (asosiy eksport mahsuloti — qahva, u umumiy eksport hajmining 45% ini tashkil qiladi). Boshqa qishloq xo'jalik ekinlari — shakarqamish, sholi, boshhoqli, donli va yog' olinadigan ekinlar. Oziq-ovqat sanoatidan (YIM — 18%) tashqari to'qimachilik, neft va kimyo sanoati ham rivojlangan. 2006-yil YIM miqdori 34396 mln dollarni (aholi jon boshiga — 4920 doll.) tashkil etgan. Asosiy savdo hamkorlari: AQSH, Germaniya, Vengriya, Meksika.

Temiryo'llarining umumiy uzunligi — 302 km, avtoyo'llar — 10000 km (shundan 1500 km asfaltlangan). Mamlakatning asosiy portlari: Akaxutla, Kutuko, La-Unon.

**Tarixi.** Avval mayyalar, keyin atsteklar imperiyalarining kattagina qismi bo'lgan hozirgi Salvador hududi ispanlar tomonidan 1523-yili kashf qilingan. Alvarado boshchiligidagi konkistadorlar mahalliy hindularning qariyb hammasini qirib tashladilar, 1528-yili esa San-Salvador va Sonsonate shaharlariga asos soldilar. Salvador



to 1821-yilgacha Gvatemala mustamlakasining bir qismi bo'lib, o'sha yili Ispaniyadan mustaqillikka erishdi.

1823-yili Salvador Markaziy Amerika Birlashgan Hududlari tarkibiga kirdi, to'la mustaqillikni esa 1841-yili qo'lga kiritdi. Mustaqillikka erishgandan so'ng mamlakat bir nechta harbiy diktaturalarni boshidan o'tkazdi. Ularning orasida Martines tuzumi (1933—1944) alohida o'rin tutadi. 1969-yili Salvador bilan Gonduras o'rtasida harbiy mojaro bo'lib o'tdi. 1979-yili mamlakatda hokimiyatni harbiy xunta egalab oldi. Xunta Farabundo Marti nomidagi Milliy ozodlik fronti isyonchilariga qarshi urush olib borishiga to'g'ri keldi. O'n yildan ko'proq davom etgan fuqarolar urushi 75000 kishining o'limi, lagerlarga minglab qamalganlar, shuningdek, jiddiy iqtisodiy inqirozga sabab bo'ldi. 1992-yili qarama-qarshi tomonlar o'rtasida tinchlik shartnomasining imzolinishi mamlakatda demokratiyalashtirish yo'lida ma'lum bir qadamlar qo'yilishiga imkon yaratdi.

## SAN-MARINO

*Rasmiy nomi — San-Marino Respublikasi. Poytaxti — San-Marino. Hududi — 61 km<sup>2</sup>. Aholisi — 28997 kishi (2007). Davlat tili — italyan. Dini — katolik. Pul birligi — yevro.*

**Geografik joylashuvi va tabiati.** Janubiy Yevropadagi davlat. Italiya hududida, Apennin yarim-oroqlining shimoliy qismida joylashgan (chegarasining uzunligi — 39 km). Mamlakat tik qoyali tog'larda joylashgan. Eng baland cho'qqisi — Titanoning (738 m) yaqinida poytaxti San-Marino joylashgan.

Iqlimi — subtropik. Mamlakat hududida bir nechta eman va kashtan daraxtzorlari saqlanib qolgan. Tog' etaklarida Makvis changalzorlari (drok, mirt, lavr, bodom) bor. Yoqimli hidli, efir moyli o'simliklar ko'p.

**Davlat tuzilishi, siyosiy partiyalari.** Davlat tuzilishi — respublika. Mamlakat 9 okrugdan iborat. Milliy bayrami — 3-sentabr — Respublikaga asos solin-

gan kun. Ijroiya hokimiyati ikkita teng huquqli kapitan-regentlarga (davlat boshliqlari) va Davlat Kongressiga (Vazirlar Mahkamasi) tegishli. Oliy qonunchilik organi — Katta general kengash (bir palatali parlament). Eng e'tiborli siyosiy partiyalari: San-Marino progressiv-demokratik partiyasi (SMPDP), San-Marino sotsialistik partiyasi (SMSP), San-Marino xristian-demokratik partiyasi (SMXDP).

### ***Iqtisodi, transport kommunikatsiyalari.***

Turizm iqtisodining eng muhim sohalaridan biri (San-Marinoga har yili 2 milliondan ziyodroq sayohatchilar tashrif buyuradi). Bu ichki milliy daromadning 60% ini tashkil qiladi. Daromadlarining yana bir muhim manbai — chet ellik kolleksionerlarga markalar sotish. Aholining turmush darajasini G'arbiy Yevropa mamlakatlarining shu sohadagi ko'rsatkichlariga qiyoslash mumkin. 2006-yil YIM miqdori 940 mln dollarni (aholi jon boshiga — 32417 doll.) tashkil etgan. Asosiy savdo hamkori — Italiya.

Avtomobil yo'llarining umumiy uzunligi — 104 km.

**Tarixi.** Afsonalarga ko'ra San-Marinoga 301-yilda tarki dunyo qilgan avliyo Marinus asos solgan. IX asrda hozirgi San-Marino hududi avtonom davlat bo'ldi, XIII asrda esa mustaqil respublika deb e'lon qilindi. Uni Rim papasi Nikolay IV 1291-yili tan oldi. San-Marino Napoleon urushlari davrida ham o'z mustaqilligini saqlab qoldi, uning mustaqilligi Vena Kongressi tomonidan 1815-yili ham tan olingan. 1862-yildan buyon mamlakat amalda Italiya protektorati ostida.

## **SAN-TOME VA PRINSIPI**

*Rasmiy nomi — San-Tome va Prinsipi Demokratik Respublikasi. Poytaxti — San-Tome. Hududi — 964 km<sup>2</sup>. Aholisi — 200309 kishi (2007). Davlat tili — portugal. Dini — katolik. Pul birligi — dobra.*

**Geografik joylashuvi va tabiati.** Afrika qit'asi qirg'oqlaridan uncha uzoq bo'lmagan Gvineya qo'l-

tig'idagi vulqondan hosil bo'lgan San-Tome, Prinsipi va bir qator mayda orollarda joylashgan davlat. Sohil bo'ylab chegara uzunligi — 209 km. Mamlakatning relyefi tog'li. Mamlakatning eng baland cho'qqisi Piko de-Tome (2024 m) bo'lib, u San-Tome orolida joylashgan. Asosiy tabiiy boyligi — baliq. Mamlakat hududining 75% ini o'rmon va changalzorlar egallagan.

Iqlimi — ekvatorial va tropik. Orollar quyuq ekvatorial o'rmonlar bilan qoplangan, qirg'oq bo'ylarida qalin mangro changalzorlari bor. Mamlakatning hayvonot dunyosi unchalik boy emas: o'rmonlarida maymunlar — gvereslar, drillar, makakalar ko'p; qushlar ham ko'p (kattakon bananxo'rlar, nishli qushlar); xilma-xil kaltakesaklar, buqalamunlar, ilonlar mavjud. Dengiz faunasi boy: ko'plab qisqichbaqasimonlar va chig'anoqlilar bor.

**Davlat tuzilishi, siyosiy partiyalari.** Davlat tuzilishi — respublika. San-Tome va Prinsipi davlati o'z mustaqilligini 1975-yilning 12-iyulida qo'lga kiritgan (avval Portugaliyaning dengizorti mustamlakasi edi). Bu sana milliy bayram — Mustaqillik kuni sifatida nishonlanadi. Qonunchilik portugal umumiy huquqiga asoslangan. Ijroiya hokimiyati prezidentga (davlat boshlig'i) va Bosh vazir boshchiligidagi hukumatga tegishli. Qonunchilik hokimiyati bir palatali parlament — Milliy Assambleya tomonidan amalga oshiriladi. Eng yirik siyosiy partiyasi — San-Tome va Prinsipini ozod qilish Harakati — Sotsial-demokratik partiyasi (MSLTP-SDP)

**Iqtisodi, transport kommunikatsiyalari.** Qishloq xo'jaligi iqtisodiyotining eng muhim tarmog'i hisoblanadi: kakao eksporti umumiy eksportning 85% ini tashkil qiladi. Boshqa eksport mahsulotlari: kokos yong'og'i, palma mevasi, kopra. Ayni paytda San-Tome oziq-ovqat mahsulotlarining 90% ini chetdan olib keladi. Baliqchilik rivojlangan. Turizmni rivojlantirish uchun keng imkoniyatlar mavjud. 2006-yil YIM miqdori 245 mln dollarni (aholi jon boshiga — 1223 doll.) tashkil etgan. Asosiy savdo hamkorlari: Germaniya, Portugaliya, Gollandiya, Xitoy.

Avtomobil yo'llarining umumiy uzunligi — 300 km.  
Portlari — Santo-Antonio, San-Tome.

**Tarixi.** San-Tome va Prinsipi orollari 1471-yili portugaliyaliklar tomonidan kashf qilingan. Ular bu koloniyalarni jinoyatchilar surgun qilinadigan joyga aylantirganlar. 1951-yili Portugaliyaning dengizorti provinsiyasi (viloyat) maqomini olgan San-Tome va Prinsipi 1975-yili mustaqil davlat bo'ldi.

## SAUDIYA ARABISTONI

*Rasmiy nomi — Saudiya Arabistoni Qirolligi.  
Poytaxti — Er-Riyod. Hududi — 2200000 km<sup>2</sup>.  
Aholisi — 27861773 kishi (2007). Davlat tili — arab. Dini — islom. Pul birligi — Saudiya riali.*

**Geografik joylashuvi va tabiati.** Bu davlat Janubi g'arbiy Osiyoda Arabiston yarimorolida joylashgan. Janubda Yaman (chegara uzunligi 1458 km), shimolda — Iroq (814 km), Iordaniya (728 km) va Quvayt (222 km), janubi sharqda Ummon (676 km) va Birlashgan Arab Amirliklari (457 km), sharqda Qatar bilan (60 km) chegaradosh. G'arbda mamlakat Qizil dengiz va Akaba qo'ltig'i hamda sharqda Fors qo'ltig'i bilan tutashib ketgan. Chegaralarining umumiy uzunligi — 4415 km, sohil bo'ylab chegara uzunligi — 640 km. Mamlakat hududi asosan sahrodan iborat. Qirg'oq bo'ylab torgina vodiylar joylashgan. Janubi g'arbida uncha katta bo'lmagan tog' tizmalari bor. Mamlakatning eng baland nuqtasi — Daka cho'qqisi (3353 m). Shimolda Suriya cho'lining bir qismi joylashgan. Mamlakatning janubi sharqiy qismini Katta saho (Rub-el-Xali) egallagan. Mamlakatning suv resurslari juda kam. Hududining markaziy qismidagi bir necha daryolar yozga borib qurib qoladi. Mamlakat hududida boy neft, tabiiy gaz konlari mavjud, shuningdek, temir rudasi, mis, oltin ham bor. Ishlov beriladigan yerlar hududining faqatgina bir foizini egallaydi, o'tloq va yaylovlar 39% qismida joylashgan.

Iqlimi — kontinental, subtropik va tropik. O'simlik-

lari asosan yarim sahro va sahro xarakteriga ega. Qishki, bahorgi yomg'irlar davrida yovvoyi achchiq tarvuzlar, astragal, saksovullar o'sadi. Tal va sudr deb ataluvchi yolg'iz daraxtlar onda-sonda uchraydi. Mamlakatning hayvonot dunyosi ancha xilma-xil. Bo'ri, shoqol, fenek tulkisi, qum kiyigi, nubiya tog' echkisi uchraydi. Kemiruvchi va sudraluvchilar — kichik bo'g'ma ilonlar, efa, agama va kaltakesaklar ko'p. Qushlar olami ham boy: burgutlar, kalxatlar, griflar, sapsan — yirtqichlar serob. Qirg'oq pasttekisliklari chigirtkalar ko'payish makonidir. Qizil dengizda va Fors qo'ltig'ida marjonlarning 2000 dan ziyod turi bor, ayniqsa, qora marjonlar qimmat baholanadi.

**Davlat tuzilishi, siyosiy partiyalari.** Davlat tuzilishi — mutlaq teokratik monarxiya. Mamlakat tarkibiga 13 ta viloyat kiradi. Saudiya Arabistoni 1932-yilning 23-sentabrida mustaqil davlat bo'lgan (milliy bayrami — Qirollik e'lon qilingan kun). Qonunchilik islom dini qonunlariga asoslangan. Davlat va hukumat boshlig'i — qirol.

**Iqtisodi, transport kommunikatsiyalari.** Iqtisodiyotining asosiy sohasi — neft qazib chiqaruvchi sanoat (YIMning 35%ini va amalda eksportdan keladigan daromadlarning hammasini tashkil qiladi). Dunyoda neftning eng katta zaxirasiga ega. Saudiya Arabistoni neftning eng yirik eksportchisi hisoblanadi va OPEKda yetakchi rol o'ynaydi. Qishloq xo'jaligi juda tez rivojlanmoqda (YIM — 10%), asosiy qishloq xo'jalik ekinlari: bug'doy, arpa, sitrus, xurmo (xurmo yetishtirish bo'yicha jahonda ikkinchi o'rinda). 2006-yil YIM miqdori 325513 mln dollarni (aholi jon boshiga — 11683 doll.) tashkil qildi. Makka shahri butun dunyo musulmonlari uchun muqaddas ziyoratgoh hisoblanadi, chunki bu yerda islom dinining asoschisi Muhammad payg'ambar dunyoga kelgan. Zam-zam qudug'i va Ibrohimga avliyo Jabroil tomonidan sovg'a qilingan qora tosh ham muqaddas hisoblanadi va ular ham shu shaharda joylashgan. Haram (Baytulloh) masjidi ham qadimiy, muqaddas Ka'ba atrofida qurilgan. Madinadagi Muhammad (s.a.v.) payg'ambar qabri

musulmonlar uchun Ka'badan keyin ikkinchi muqaddas ziyoratgoh hisoblanadi. Eng muhim savdo hamkorlari: AQSH, Angliya, Buyuk Britaniya, Germaniya, Fransiya.

Temiryo'llarining umumiy uzunligi — 886 km, avtomobil yo'llarining uzunligi — 74000 km (qattiq qoplamali yo'llari — 35000 km). Mamlakatning asosiy portlari: Jidda, Ras-Tannura, Yanbu.

**Tarixi.** Hozirgi Saudiya Arabistoni hududiga arab chorvador qabilalari m. a. IX asrdan boshlab o'rnanishganlar. Arabiston yarimorolining shimoliy qismini egalagan qabilalar yahudiy, bobil va fors madaniyati ta'sirida bo'lgan bir paytda Arabistonning janubidagi qabilalar o'zlarining alohida madaniyatini yaratdilar. 570-yili Makkada payg'ambar deb e'lon qilingan va barcha arab qabilalarini yangi, musulmon davlati Madinaga birlashtirgan Muhammad (s.a.v.) dunyoga keldi. Muhammad (s.a.v.) payg'ambarning izdoshlari bo'lgan xalifalar VII asrda islom dinini Yaqin Sharqqa va Misrga tarqatdilar. VIII asrda esa yangi din Osiyoning kattagina qismi va Shimoliy Afrikaga tarqaldi. Bog'dod xalifaligi paydo bo'lgandan keyin Saudiya Arabistonining roli sezilarli darajada pasaydi, ammo Makka musulmonlarining diniy markazi bo'lib qolaverdi. XIII asrda hozirgi Saudiya Arabistoni hududi Misr mamluklari hukmronligi ostida qoldi. 1517-yili esa Usmoniylar imperiyasi tarkibiga kirdi. XIX asr boshlariga kelib Saudiya Arabistonida vahobiylar davlati tashkil topdi va mustaqil davlat deb e'lon qilindi. Tez orada vahobiylar Misr askarlari tomonidan yarim-orolning markaziy qismiga siqib qo'yildilar, ammo XX asrning boshlariga kelib vahobiylarning yetakchisi Ibn Saudning qo'shinlari mamlakatning qariyb barcha hududida o'z nazoratlarini o'rnatdilar, 1932-yili esa Ibn Saud Saudiya Arabistoni qirolligi tuzilganligini e'lon qildi. 1982-yili shahzoda Faxd taxtga chiqdi va u Fors qo'ltig'idagi mojarolar paytida mamlakat hududiga Iroqqa qarshi ittifoq qo'shinlarini joylashtirishga ruxsat berdi. Ular esa bu yerdan 1991-yilning yanvarida Quvaytni ozod qilish bo'yicha harakatlarini boshladilar.

## SVAZILEND

*Rasmiy nomi — Svazilend Qirolligi. Poytaxti — Mbabane. Hududi — 17363 km<sup>2</sup>. Aholisi — 1135697 kishi (2007). Davlat tili — ingliz va svazi. Dini — xristianlik (60%) va majusiylar (40%). Pul birligi — lilangeni.*

**Geografik joylashuvi va tabiati.** Afrika qit'asining janubi sharqiy qismida joylashgan davlat. Janubda, janubi sharqda, g'arbda va shimolda JAR (chegara uzunligi — 430 km), sharqda esa Mozambik (105 km) bilan chegaradosh. Chegarasining umumiy uzunligi — 535 km. Mamlakat g'arbdan sharqqa tomon tepaliklari pasayib boruvchi Veld qirliklarida joylashgan. Eng baland cho'qqisi — 1445 m. Svazilendda bir nechta pasttekisliklar bor. Asosiy daryolari — Usutu, Kamati, Umbeluzi. Asosiy tabiiy boyliklari: ko'mir, yog'och, gidroenergetik imkoniyatlari, o'rmonlari, shuningdek, uncha katta bo'lmagan oltin va olmos konlari bor. Hududining 11%i haydaladigan yerlar, 62%i esa yaylov va o'tloqlar.

Iqlimi — subtropik va tropik. Svazilendning o'simlik dunyosi g'arbda savanna, sharqda esa kserofit changalzorlari bilan xarakterlanadi. Florasi juda boy: 2400 ga yaqin o'simlik turi mavjud — lishayniklar va paporotniklardan tortib magnoliya va fikuslargacha o'sadi. Faqat aloening 25 turi, orxideyalarning 12 turi, nilufar gullarining 10 turi bor. Yirik sutemizuvchilardan «ko'k» qo'toslar uchraydi. Shuningdek, aylana shoxli antilopalar, zebralar, begemotlar ham bor. Daryolarida timsohlar ko'p.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Svazilend 1968-yil 6-sentabrdan mustaqil davlat bo'ldi (undan oldin — Buyuk Britaniya protektorati). Bu sana — Milliy bayram — Mustaqillik kuni sifatida nishonlanadi. Davlat boshlig'i — qirol. Ijroiya hokimiyat Bosh vazir boshchiligidagi hukumat tomonidan boshqariladi. Qonunchilik hokimiyatini qirol va ikki pala-

tali parlament amalga oshiradi. Siyosiy partiyalari: Imbokodvo milliy harakati, Svazilend birlashgan fronti, Ngvane milliy-ozodlik kongressi.

**Iqtisodi, transport kommunikatsiyalari.** Iqtisodiyotining asosiy bo'g'ini — qishloq xo'jaligi (YIMning chorakka yaqin qismi). Unda mehnatga yaroqli aholining asosiy qismi band. Asosiy qishloq xo'jaligi ekinlari — shakarqamish, makkajo'xori, paxta, tamaki, sitrus mevalar. Qishloq xo'jalik mahsulotlarini qayta ishlash sanoatidan tashqari konchilik (ko'mir va asbest), yog'och sanoati rivojlangan. 2006-yil YIM miqdori 5552 mln dollarni (aholi jon boshiga — 4888 doll.) tashkil etgan. Asosiy savdo hamkorlari: JAR, Yaponiya, Belgiya, Buyuk Britaniya, Kanada.

**Tarixi.** Svazilend qirolligi hozirgi Svazilend hududida XVI asrda tashkil topgan. 1906-yili Britaniya protektorati bo'lishidan avval 1902-yilda Transvaal boshqaruvida edi. 1969-yili Svazilend mustaqil davlat deb e'lon qilindi. 1973-yilda esa qirol Sobxuza II konstitutsiyani bekor qildi va barcha siyosiy partiyalar faoliyatini taqiqladi. Hozirgi kunda Svazilend demokratik o'zgarishlar yo'lidan bormoqda.

## SEYSHEL OROLLARI

*Rasmiy nomi — Seyshel Orollari Respublikasi. Poytaxti — Viktoriya. Hududi — 405 km<sup>2</sup>. Aholisi — 82832 kishi (2007). Davlat tili — ingliz, fransuz va kreol. Dini — katolik. Pul birligi — seyshel rupiyasi.*

**Geografik joylashuvi va tabiati.** Hind okeanining g'arbiy qismida, Madagaskar orollarining shimoli sharqidagi Seyshel va Amirant orollarida joylashgan davlat. Sohil bo'ylab chegara uzunligi — 491 km. Maye, Praslen, Siluet, La-Dig singari yirikroq orollariga marmartoshlaridan iborat torgina qirg'oq bo'ylari va tepaliklar xarakterlidir. Maydaroq orollar esa tekis marjon balandliklaridan iborat. Mamlakatning eng baland nuqtasi 915 m. Asosiy tabiiy boyliklari: baliq, kopra.



Iqlimi — subekvatorial. Yirik orollarda doimiy ko'm-ko'k tropik o'simliklar saqlanib qolgan, palmalarning noyob turlari o'sadi, ularning orasida yalang'ochsimon seyshel palmasi, dengiz kokosi ham bor. Shuningdek, daraxtsimon paporotniklar ham uchrab turadi. Orollar ancha chetda joylashganligi tufayli faqat shu arxipelagdagina uchraydigan qushlar va sudralib yuruvchilar juda ko'p. Faqat Aldabrening o'zida ulkan toshbaqalar, qushlarning 14 ta kamyob turi uchraydi.

**Davlat tuzilishi, siyosiy partiyalari.** Davlat tuzilishi — respublika. Malalakat 13 ta kichik ma'muriy hududlarga bo'lingan. Seyshel orollari 1976-yilning 29-iyunida Buyuk Britaniyadan mustaqil bo'ladi. Milliy bayrami — 18-iyun — Millat kuni (1993-yili yangi konstitutsiya qabul qilingan kun). Davlat va hukumat boshlig'i — prezident. Oliy qonunchilik organi — Xalq majlisi (bir palatali parlament). Ro'yxatga olingan yettita siyosiy partiyalardan eng yiriklari — Seyshel xalqining progressiv fronti (SHPF), Demokratik partiya.

**Iqtisodi, transport kommunikatsiyalari.** Mehnatga layoqatli aholining 30%ga yaqini band bo'lgan turizm industriyasi valutasining 70% dan ko'prog'ini ta'minlaydi. Ishlab chiqarish baliqchilik va qishloq xo'jaligi bilan cheklangan. Qishloq xo'jaligida (YIMning 7% ga yaqini) asosiy savdo ekinlari — kokos yong'og'i, koritsa, vanil. Zaruriy oziq-ovqatning katta qismi chetdan olib kelinadi. 2006-yil YIM miqdori 1384 mln dollarni (aholi jon boshiga — 16708 doll.) tashkil etgan. Asosiy savdo hamkorlari: Fransiya, Buyuk Britaniya, Baxrayn, Keniya.

Avtomobil yo'llarining umumiy uzunligi — 260 km, asosiy porti — Viktoriya.

**Tarixi.** Portugallar tomonidan 1505-yili ochilgan Seyshel orollari 1742-yili Fransiya tomonidan mustamlaka qilib olindi. 1794-yili orollar Buyuk Britaniya boshqaruviga o'tdi. Angliya 1903-yili orollarni o'z mustamlakasi deb e'lon qildi. 1976-yili Seyshel orollari Buyuk Britaniya hamdo'stligi a'zosi bo'lib qolgan holda mustaqillikka erishdi. 1977-yili davlat to'ntarishi oqibatida sotsialistik davlat qurilishini e'lon qilgan

A. Rene mamlakat prezidenti bo'ldi. 1991-yili mamlakat boshqaruvining bir partiyali tizimi ko'ppartiyaviylik bilan almashtirildi.

## SENEGAL

*Rasmiy nomi — Senegal Respublikasi. Poytaxti — Dakar. Hududi — 196200 km<sup>2</sup>. Aholisi — 12532188 kishi (2007). Davlat tili — fransuz. Dini — islom. Pul birligi — afrika franki.*

**Geografik joylashuvi va tabiati.** Afrika qit'asining g'arbiy qismida joylashgan davlat. Shimolda Mavritaniya (chegara uzunligi — 813 km), janubda Gvineya-Bisau va Gvineya (330 km), sharqda Mali (419 km) bilan chegaradosh. Mamlakatning markaziy qismida Gambiya daryosi bo'ylab Gambiya davlati joylashgan (Gambiya bilan chegara uzunligi 740 km). G'arbda Senegal Atlantika okeani bilan tutashib ketgan. Chegaralarining umumiy uzunligi — 2640 km, qirg'oq bo'ylab chegara uzunligi — 531 km. Mamlakat hududining katta qismi pasttekisliklardan iborat. Senegalning faqatgina janubi g'arbida balandligi 500 metrga yetadigan Futa-Jallon tepaliklari bor. Asosiy daryosi — Senegal. Mamlakat hududida fosforit va temir rudasi, marmar konlari bor. Hududining 27% i ishlov beriladigan yerlar, 20% i esa o'tloq va yaylovlar.

Iqlimi — subekvatorial, mussonli. Senegal hududi asosan savannalardan iborat. Ko'p asrlardan buyon o'rmonli mavzelerde ekin ekish uchun olov qo'yib yer tozalash usuli daraxtzorlarning tez yo'qolishiga olib keldi. Faqatgina janubi g'arbda aralash o'rmonlar qisman saqlanib qolgan. Yashash sharoitlari o'zgarishi tufayli yirik yovvoyi hayvonlar qariyb qolmagan. Milliy bog'larda fil, jirafa, qo'tos va begemotlarni uchratish mumkin.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibida 10 ta viloyat bor. Senegal Fransiyadan mustaqillikni 1960-yili qo'lga kiritgan. 1982-yili Senegal va Gambiya konfederatsiyasi tuzildi, lekin u 1980-yili 30-sentabrda tarqalib ketdi.

Milliy bayrami — 4-aprel — Mustaqillik kuni (1960). Qonunchilik fransuz fuqarolik huquqiga asoslangan. Ijroiya hokimiyati prezident (davlat boshlig'i) va Bosh vazir (Vazirlar Kengashi boshlig'i) qo'lida. Qonunchilik hokimiyatini bir palatali parlament — Milliy Kengash amalga oshiradi. O'n sakkizta siyosiy partiyalaridan eng yiriklari: Senegal Sotsialistik partiyasi (SSP), Senegal demokratik partiyasi (SDP), Senegal mustaqillik va mehnat partiyasi.

**Iqtisodi, transport kommunikatsiyalari.** Iqtisodiyotining asosiy sohasi — baliqchilik. Ishlab chiqarish baliqni qayta ishlash va qishloq xo'jalik mahsulotlari, neftni tozalash va fosforit qazib chiqarish bilan cheklangan. Qishloq xo'jaligida (baliqchilik bilan birga YIM — 20%) mehnatga layoqatli aholining 75%i band. Asosiy qishloq xo'jalik mahsulotlari — yeryong'oq (ekin maydonlarining 40% ga yaqini mamlakat eksporti uchun juda muhim bo'lgan ana shu ekinni yetishtirish uchun foydalaniladi), makkajo'xori, tariq, sorgo, sholi, paxta. So'nggi yillarda turizm tez rivojlanmoqda. 2006-yil YIM miqdori 18242 mln dollarni (aholi jon boshiga — 1455 doll.) tashkil etgan. Asosiy savdo hamkorlari: YI mamlakatlari (asosan Fransiya), Mali, Kot-d'Ivuar, Nigeriya, Jazoir.

Temiryo'llarining umumiy uzunligi — 1034 km, avtomobil yo'llari — 14700 km ( qattiq qoplamali yo'llari — 3777 km), ichki suv yo'llari — 897 km. Mamlakatning asosiy portlari: Dakar, Kaolak.

**Tarixi.** IX asrda tukuler qabilalari yashaydigan hozirgi Senegal hududida Tekrur qirolligi shakllangan bo'lib, XIV asrda undan Serer va Ulof qirolliklari ajralib chiqqan. XVI asrda hozirgi Senegal hududidagi davlatlar Mali imperiyasi tarkibiga kiradi. XV asrdan boshlab mamlakat portugal dengizchilari tomonidan tadqiq etildi, biroq mamlakatni mustamlakaga aylantirish XVII asrning boshlarida fransuzlar tomonidan boshlandi. Inglizlar ikki marta — 1758—1779-yillari va 1807—1817-yillarida fransuzlarni Senegaldan quvib chiqarishdi, lekin 1854-yili Buyuk Britaniya bilan raqobatda Fransiya yengib chiqdi. 1895-yili esa Senegal fransuz mustamlakasi deb e'lon qilindi. Dakar Fransuz

g'arbiy Afrikasi poytaxti bo'lib qoldi. 1958-yili Fransuz hamjamiyati tarkibida o'zini o'zi boshqarish huquqini qo'lga kiritgan bu mamlakat 1959-yili Mustaqil Mali federatsiyasi tarkibiga kirdi, lekin 1960-yili federatsiyadan chiqdi va mustaqil davlat deb e'lon qilindi. 1963-yili mamlakatning yangi konstitutsiyasi qabul qilindi. Unga binoan Senegal prezidentlik respublikasi deb e'lon qilindi. 1982-yili Senegal Gambia bilan Senegambiya federatsiyasiga birlashdi. Biroq mavritan va senegal jamoalari o'rtasidagi kelishmovchiliklar 1989-yili federatsiyaning tarqalib ketishiga olib keldi.

## SEN-PYER VA MIKELON

*Rasmiy nomi — Sen-Pyer va Mikelon (Fransiyaning hududiy birligi). Poytaxti — Sen-Pyer. Hududi — 242 km<sup>2</sup>. Aholisi — 7111 kishi (2007). Davlat tili — fransuz. Dini — katolik. Pul birligi — Fransiya franki.*

**Geografik joylashuvi va tabiati.** Fransiyaning hududiy birligi bo'lib, Nyufaundlend (Kanada) orolining janubida, Atlantika okeanining shimoli g'arbida 8 ta mayda (eng yiriklari — Sen-Pyer, Langlad, Mikelon) orollardan iborat arxipelagda joylashgan davlat. Orollar toshli pasttekislik va yassitog'liklardan iborat.

Iqlimi — dengiz iqlimi. Orollarda to'tiqush, kolibri, hasharotlar ko'p. Dengizda ko'plab baliq turlari uchraydi.

**Davlat tuzilishi, siyosiy partiyalari.** Siyosiy tuzilishi — Fransiyaning hududiy birligi. Boshqaruv rahbari — prefekt, Fransiya hukumati tomonidan tayinlanadi. Ma'muriy hududlarga bo'linmagan. Siyosiy partiyalari: Fransiya partiyalarining mahalliy bo'limlari amal qiladi.

**Iqtisodi, transport kommunikatsiyalari.** Aholining asosiy mashg'uloti — baliq ovlash. Mahalliy sanoat asosini baliqni qayta ishlash tashkil etadi. Mashinasozlik, kemasozlik korxonalari mavjud. Iqlimi va yerning unumsizligi sababli qishloq xo'jaligi rivojlan-

magan. Mikelon orolida qoramol, choʻchqa, qoʻy boqiladi. 2006-yil YIM miqdori 48,3 mln dollarni (aholi jon boshiga — 6750 doll.) tashkil etgan. Asosiy savdo hamkorlari: Kanada, AQSH, Fransiya, Buyuk Britaniya, Niderlandiya.

Asosiy porti: Sen-Pyer. Xalqaro aeroport mavjud.

**Tarixi.** 1520-yili portugallar tomonidan kashf qilingan. 1604-yili fransuzlar tomonidan egallab olingan. 1816-yilgacha Buyuk Britaniya tarkibiga ham oʻtib turgan. 1946-yili Fransiyaning dengizorti hududi, 1976-yili dengizorti departamenti, 1985-yili Fransiya hududiy birligi maqomini oldi.

## SENT-VINSENT VA GRENADIN

*Rasmiy nomi — Sen-Vinsent va Grenadin. Poytaxti — Kingstaun. Hududi — 389 km<sup>2</sup>. Aholisi — 119913 kishi (2007). Davlat tili — ingliz. Dini — xristianlik. Pul birligi — sharqiy Karib dollari.*

**Geografik joylashuvi va tabiati.** Karib dengizining janubi sharqiy qismidagi Sent-Vinsent va Grenadin orollarida joylashgan davlat. Sohil boʻylab chegara uzunligi — 84 km. Mamlakat hududi vulqon otilishidan hosil boʻlgan tepaliklardan iborat orollar.

Iqlimi — tropik moʻtadil. Orollarning oʻrta qismi butunlay oʻrmon bilan qoplangan, biroq qimmatli turlari kam, asosan palma, non daraxtlari uchraydi.

**Davlat tuzilishi, siyosiy partiyalari.** Davlat tuzilishi — konstitutsion monarxiya, Britaniya hamdoʻstligi aʼzosi. Sent-Vinsent 1979-yilning 27-oktabrida mustaqil davlat boʻldi (avval Buyuk Britaniya mustamlakasi). Milliy bayramlari: 22-yanvar — Sent-Vinsent va Grenadin kuni, 27-oktabr — Millat kuni. Qonunchilik ingliz umumiy huquqiga asoslangan. Davlat rahbari — Britaniya monarxi (ayni paytda qirolicha Yelizaveta II), uning vakolatlarini general-gubernator amalga oshiradi. Ijroiya hokimiyat Bosh vazir boshchiligidagi Vazirlar Mahkamasiga tegishli. Oliy qonunchilik organi —

Majlis palatasi. Eng yirik siyosiy partiyalari: Yangi demokratik partiya (YDP), Sent-Vinsent leyboristik partiyasi (SVLP), Birlashgan xalq harakati (BXH), Progressiv demokratik partiya (PDP).

**Iqtisodi, transport kommunikatsiyalari.** Iqtisodiyotining eng muhim sohasi — qishloq xo'jaligi (banan — asosiy eksport mahsulotlaridan biri). Rivojlanib borayotgan turizm ham daromadning eng muhim manbalaridan biri hisoblanadi. Ishlab chiqarishi asosan qishloq xo'jalik mahsulotlarini qayta ishlashdan iborat. 2006-yil YIM miqdori 715 mln dollarni (aholi jon boshiga — 5962 doll.) tashkil etgan. Asosiy savdo hamkorlari: Buyuk Britaniya, AQSH, Karib havzasi davlatlari.

Avtomobil yo'llarining umumiy uzunligi — 1184 km. Porti — Kingstaun.

**Tarixi.** Sent-Vinsent oroli Kolumb tomonidan kashf qilingan va XVII asrgacha ispan mustamlakasi bo'lib qolaverdi. XVII—XVIII asrlarda orol Fransiya bilan Buyuk Britaniya o'rtasida talash bo'ldi. Sent-Vinsent va Grenadin 1762-yili Buyuk Britaniyaning to'la hukmronligi ostiga o'tdi va 1783-yili mustamlaka deb e'lon qilindi. 1958—1962-yillarda orollar Vest-Indiya Federatsiyasiga kirdi, 1979-yili esa mustaqil davlat deb e'lon qilindi.

## SENT-KITS VA NEVIS

*Rasmiy nomi — Sent-Kits va Nevis Federatsiyasi. Poytaxti — Baster. Hududi — 261 km<sup>2</sup>. Aholisi — 39747 kishi (2007). Davlat tili — ingliz. Dini — xristianlik. Pul birligi — Sharqiy Karib dollari.*

**Geografik joylashuvi va tabiati.** Karib havzasidagi ikki orolda (Sent-Kitts va Nevis) joylashgan davlat. Shamolli orollar guruhiga kiradi. Qirg'oq bo'ylab chegara uzunligi — 135 km. Ichki qoyali qismga ega orollar vulqon oqibatida paydo bo'lgan. Mamlakatning

eng yuqori nuqtasi — Mizeri tog‘i (1155 m) Sent-Kitts orolida joylashgan.

Iqlimi — tropik, mo‘tadil issiq. Orollarning o‘rmon bilan qoplangan tog‘lari juda ko‘rkam.

#### ***Davlat tuzilishi va siyosiy partiyalari.***

Davlat tuzilishi — konstitutsion monarxiya, Britaniya hamdo‘stligi a‘zosi. Mamlakat Buyuk Britaniyadan mustaqillikni 1983-yil 19-sentabrda qo‘lga kiritgan. Bu kun Milliy bayram (Mustaqillik kuni) sifatida nishonlanadi. Qonunchilik ingliz umumiy huquqiga asoslangan. Davlat boshlig‘i — Britaniya monarxi (ayni damda qirolicha Yelizaveta II). Ijroiya hokimiyati ham Bosh vazir boshchiligidagi hukumatga tegishli. Oliy qonunchilik organi — Milliy Majlis (bir palatali parlament). Eng yirik siyosiy partiyalari: Xalq birligi harakati (XBH), Leyboristik partiya (LP), Birlashgan milliy harakat (BMH), Nevis reformistik partiyasi (NRP).

#### ***Iqtisodi, transport kommunikatsiyalari.***

Mamlakat iqtisodiyoti an‘anaviy tarzda shakarqamish yetishtirish va qayta ishlash bilan bog‘liq (shakar — asosiy eksport mahsuloti). Boshqa qishloq xo‘jalik ekinlari: sholi, yams, banan. So‘nggi yillarda turizm tobora muhim ahamiyat kasb etmoqda. 2006-yil YIM miqdori 599 mln dollarni (aholi jon boshiga — 15070 doll.) tashkil etgan. Asosiy savdo hamkorlari: AQSH, KARIKOM mamlakatlari, Buyuk Britaniya.

Avtomobil yo‘llarining umumiy uzunligi — 300 km. Asosiy portlari: Baster (Sent-Kitts), Charlstaun (Nevis).

**Tarixi.** 1493-yili Kolumb kashf etgan bu orollar Ispaniya mustamlakasiga aylandi. XVII asrning boshlarida esa Buyuk Britaniya qo‘l ostiga o‘tdi. XVII—XVIII asrlarda orollar Buyuk Britaniya va Fransiya o‘rtasida talash bo‘ldi, biroq 1783-yili Parij shartnomasi Buyuk Britaniyaning Sent-Kitts va Nevisga bo‘lgan huquqini tasdiqladi. Britaniya hamdo‘stligi doirasida 1967-yili muxtoriyatni qo‘lga kiritgan orollar 1983-yilning sentabrida mustaqil davlat deb e‘lon qilindi.

## SENT-LYUSIYA

*Rasmiy nomi — Sent-Lyusiya. Poytaxti — Kastri. Hududi — 616 km<sup>2</sup>. Aholisi — 171361 kishi (2007). Davlat tili — ingliz. Dini — katolik. Pul birligi — sharqiy Karib dollari.*

**Geografik joylashuvi va tabiati.** Karib dengizining janubi sharqiy qismidagi Sent-Lyusiya orolida (Shamolli orollar) joylashgan davlat. Qirg'oq bo'ylab chegara uzunligi — 158 km. Vulqondan paydo bo'lgan orol. Shimoldan janubga tomon o'rmon bilan qoplangan tog'lar halqasi cho'zilgan. Mamlakatning eng baland nuqtasi — Jimi (950 m). Orolida bir nechta keng, hosildor vodiylar bor. Asosiy tabiiy boyligi — yog'och.

Iqlimi — tropik, mo'tadil. O'simlik olami juda boy, bu yerda daraxtlarning qimmatli turlari va ko'plab orxideyaga ega bo'lgan nam tropik o'rmonlar saqlanib qolgan. Hayvonot olami asosan qushlardan iborat. Qirg'oqqa yaqin dengiz suvlari baliq, qisqichbaqasimonlar va marjonlarga boy.

**Davlat tuzilishi, siyosiy partiyalari.** Davlat tuzilishi — konstitutsion monarxiya, Britaniya hamdo'stligi a'zosi. Mamlakat 1979-yilning 22-fevralida mustaqillik olgan (oldin Buyuk Britaniya mustamlakasi). Milliy bayrami — 13 dekabr — Millat kuni. Qonunchilik ingliz umumiy huquqiga asoslangan. Davlat boshlig'i — Britaniya monarxi (ayni paytda qirolicha Yelizaveta II), uning vakolatini general-gubernator bajaradi. Ijroiya hokimiyati Vazirlar Mahkamasiga tegishli. Qonunchilik hokimiyati Senat (yuqori palata) va Majlis palatasi (quyi palata)dan iborat ikki palatali parlament tomonidan amalga oshiriladi. Eng yirik siyosiy partiyalari: Birlashgan ishchilar partiyasi, Progressiv leyboristlar partiyasi (PLP), Leyboristlar taraqqiyot partiyasi.

**Iqtisodi, transport kommunikatsiyalari.** Iqtisodiyotining rivoji asosan qishloq xo'jaligi va turizm sohasida kuzatiladi. Mehnatga layoqatli aholining 43% i band bo'lgan qishloq xo'jaligi YIMning 16% ini tashkil etadi. Banan va kokos yong'oqlari eng muhim eksport



mahsulotlaridan hisoblanadi. Sanoat tarmoqlari orasida eng rivojlanganlari — to'qimachilik va oziq-ovqat sanoati. 2006-yil YIM miqdori 981 mln dollarni (aholi jon boshiga — 5724 doll.) tashkil etgan. Eng muhim hamkorlari: Buyuk Britaniya, AQSH, Karib havzasi mamlakatlari.

Avtomobil yo'llarining umumiy uzunligi — 760 km. Porti—Kastri.

**Tarixi.** 1502-yili Kolumb ochgan Sent-Lyusiya oroli 1635-yili fransuz mustamlakasi bo'lib qoldi. XII asrda orol navbati bilan fransuzlar qo'lidan inglizlar qo'liga o'tib yurdi, ammo 1814-yili Sent-Lyusiya butunlay Buyuk Britaniya qo'liga o'tdi. 1958—1967-yillarda Sent-Lyusiya Vest-Indiya Federatsiyasiga kirdi, 1979-yilning fevralida esa mustaqil davlat deb e'lon qilindi.

## SERBIYA

*Rasmiy nomi — Serbiya Respublikasi. Poytaxti — Belgrad. Hududi — 88361 km<sup>2</sup>. Aholisi — 10150505 kishi (2007). Tili — serb. Dini — pravoslav, musulmonlar ham bor. Pul birligi — serb dinori*

**Geografik joylashuvi va tabiati.** Serbiya Yevropaning janubi sharqida, Bolqon yarimorolining markazida joylashgan. Uning hududini G'arbiy va Markaziy Yevropa, Yaqin Sharq, Osiyo va Afrika bilan bog'lovchi magistrallar kesib o'tadi. 7 ta davlat bilan chegaradosh: Sharqda — Bolgariya, shimoli sharqda — Ruminiya, shimolda — Vengriya, g'arbda — Xorvatiya, Bosniya va Gersegovina, janubi g'arbiy hududlari Chernogoriya bilan chegaradosh. Umumiy chegara uzunligi — 2397 km.

Serbiyaning shimoliy qismlarida hosildor Voyevodina pasttekisliklari joylashgan. Markaziy qismida o'rmonlar bilan qoplangan tepaliklar bor. Janubida baland tog'lar, tog' daryolari kesib o'tadigan keng o'rmonli massivlar joylashgan.

Serbiya umumiy maydonining 55%i ishlov beriladigan, 24%i esa o'rmon bilan qoplangan yerlar hisoblan-

di, eng baland tog' — Prokletiye bo'lib, uning eng baland cho'qqisi — Jerivitsa (dengiz sathidan 2656 m baland) hisoblanadi. Yana 15 ta cho'qqilari 2000 m dan baland.

Iqlimi — mo'tadil kontinental, o'simlik va hayvonot dunyosi juda boy. O'rmonlarining 4/5 qismi bargli, 1/5 qismi ignabargli o'rmonlardir. Serbiya hududlarida ayiq, to'ng'iz, bo'ri, tulki, quyon, yovvoyi echki, ohu, silovsin, bug'u, tog' echkisi va hokazolar uchraydi. Qushlar dunyosi ham xilma-xil. Yevropa tabiatida mavjud bo'lgan 666 turdagi qushlardan 508 turi Serbiyada uchraydi. Daryo, ko'l va kanallarda har hil turdagi baliqlar ko'p. Serbiya hududlari rudalar, minerallarga boy: mis, oltin, kumush, qo'rg'oshin, rux, ko'mir va hokazolar.

#### ***Davlat tuzilishi va siyosiy partiyalari.***

Davlat tuzilishiga ko'ra parlamentar respublika. Ijro etuvchi hokimiyat umumiy, to'g'ridan to'g'ri saylovlarda 5 yil muddatga saylanadigan prezidentga va rais boshchiligidagi Ministrlar Kengashiga tegishli. Rais parlament tomonidan tasdiqlanadigan hukumat tuzadi. Qonun chiqaruvchi hokimiyat — 1 palatali parlament — Skupshina. Skupshina deputatlari (250 ta) 4 yil muddatga xalq tomonidan saylanadi.

#### ***Iqtisodi, transport kommunikatsiyalari.***

Sanoatining rivojlangan sohalari: oziq-ovqat, to'qimachilik, kimyo, metallga ishlov berish, avtomobil, qishloq xo'jalik texnikasini ishlab chiqarish, maishiy asbob-uskunalar, mineral o'g'itlar, dori-darmon, keng iste'mol mollarni va yog'ochni qayta ishlash sanoati yaxshi taraqqiy etgan. Qishloq xo'jaligida asosan makkajo'xori, bug'doy, qandlavlagi, kartoshka, olxo'ri va uzum yetishtiriladi. Chorvachilik ham taraqqiy etgan. 2006-yil YMM 41150 mlrd dollarni (aholi jon boshiga 4053 doll.) tashkil etgan.

***Tarixi.*** Hozirgi Serbiya hududlarida m. a. II ming yillikning 2-yarmida illiriy, frakiy, keyinchalik kelt qabilalari yashay boshlagan. VI—VII asrlarda Serbiya hududlarida slavyanlar paydo bo'lgan. IX asrning 2-yarmida serblar xristianlikni qabul qilgan. X asr o'rtalarida yirik

davlat — serb knyazligi paydo bo'lgan. 1217-yili qirollikka aylangan. 1389-yili Kosovo maydonidagi jangda serblar turk qo'shinlaridan mag'lubiyatga uchragan. Shundan so'ng Serbiya turklarga qaram bo'ldi, 1459-yili esa Turkiya tarkibiga qo'shib yuboriladi. XVIII asr oxiridagi Rossiya, Turkiya urushlari serb xalqining milliy ozodlik harakatiga turtki bo'ldi. Turkiya sultonining 1830—1833-yillardagi farmonlariga ko'ra Serbiya Turkiya panohi ostidagi o'zini o'zi idora qiladigan avtonom knyazlik deb e'lon qilindi. 1838-yili Turkiya sultoni Serbiyada konstitutsiya joriy qildi. 1918-yil 1-dekabrda Serb, Xorvat va Slovenlarning birlashgan qirolligi tuzildi. 1941-yil aprelda Serbiya nemis-fashist qo'shinlari tomonidan bosib olindi. Nemislar Belgradda general M. Nedich boshchiligida qo'g'irchoq «Serb hukumati»ni tuzishdi. 1945-yil 29-noyabrda Yugoslaviya Federativ Xalq Respublikasi e'lon qilingach Serbiya Yugoslaviya tarkibidagi respublikalardan biriga aylandi. XX asrning 90-yillari boshlarida YSFR parchalanishi oqibatida Serbiya Chernogoriya bilan birgalikda yagona konfederatsiyaga birlashdi. 2006-yil mayda o'tkazilgan xalq referendum natijalariga ko'ra mustaqil davlatga aylandi. AQSH va bir qator Farb mamlakatlari qo'llab-quvvatlashi tufayli Serbiyaning Kosovo avtonom hududi 2008-yil 17-mart kuni o'z mustaqilligini e'lon qildi. Uni 20 dan oshiq davlat tan oldi.

## SINGAPUR

*Rasmiy nomi — Singapur Respublikasi. Poytaxti — Singapur. Hududi — 622 km<sup>2</sup>. Aholisi — 4470797 kishi (2007). Davlat tili — ingliz, xitoy (mandarin lahjasi), malay, tamil. Dini — buddaviylik (30%), xristianlik (20%), islom (18%), induizm, taoizm, konfutsiylik (15%). Pul birligi — singapur dollari.*

**Geografik joylashuvi va tabiati.** Mamlakat Singapur oroli va 50 dan ziyod kichik orollarda joylashgan Janubi sharqiy Osiyodagi davlat. Singapur oroli

Malay yarimorolidan Joxor bo'g'ozi, Sumatra orolidan Singapur bo'g'ozi bilan ajratilib turadi. Qirg'oq bo'ylab chegara uzunligi — 193 km. Mamlakat landshafti — pasttekisliklar. Markazda tepaliklar joylashgan. Asosiy milliy boyligi — baliq. Iqlimi mussonli, ekvatorial. O'simliklar asosan tropik o'rmonlar qoldiqlaridan iborat, qirg'oq bo'ylarida mango changalzorlari bor. Orollarda paporotniklar va bambuklarning juda ko'p xillari mavjud, orxideyalarning ko'pligi hayratga soladi. Singapur faunasi, eng avvalo, qushlarning xilma-xilligi bilan ajralib turadi. Sutmizuvchilardan maymunlar va noyob jonzotlar — lemurlar yashaydilar.

**Davlat tuzilishi, siyosiy partiyalari.** Davlat tuzilishi — respublika. Malayziyadan mustaqilligini 1965-yil 9-avgustda qo'lga kiritgan (Milliy bayrami — Respublika Milliy kuni). Qonunchilik ingliz umumiy huquqiga asoslangan. Ijroiya hokimiyati prezidentga (davlat boshlig'i) va Bosh vazirga (hukumat boshlig'i) tegishli. Qonunchilik bir palatali parlament tomonidan amalga oshiriladi. Yigirmata siyosiy partiyalardan eng yirigi Xalq harakati partiyasi (XHP) bo'lib, u mustaqillikni qo'lga kiritgandan buyon hukmron partiya hisoblanadi.

**Iqtisodi, transport kommunikatsiyalari.** Singapurda sanoat, ayniqsa elektronika va kemasozlik sohalari yaxshi rivojlangan. Singapur — jahonning eng yirik savdo portlaridan biridir. Qishloq xo'jaligida asosan kauchuk yetishtiriladi. Kauchuk Singapurning asosiy eksport mahsuloti hisoblanadi. 2006-yil YIM miqdori 118226 mln dollarni (aholi jon boshiga — 26444 doll.) tashkil etgan. Asosiy savdo hamkorlari: AQSH, Malayziya, Yaponiya, Gonkong.

Temiryo'llarining umumiy uzunligi — 38 km. Avtomobil yo'llari uzunligi — 2597 km.

**Tarixi.** XIV asrgacha bugungi Singapur hududlari Shri-Vidjaya imperiyasi tarkibiga kirgan. Undan so'ng Majapa Xit podsholigi tomonidan bosib olingan. XIV asrda bu yerlarning Malakka sultonligi o'z mulkiga aylantirgan. 1819-yil ingliz Tomas Reflz bu hududlarni sulton Johordan sotib olib Singapur shahriga asos

solgan. Shundan so'ng Singapur Britaniya mustamlakachilik siyosatining asosiy tayanch nuqtalaridan biriga aylandi. II jahon urushi yillarida mamlakat yapon bosqinchilari tomonidan bosib olindi. Urushdan so'ng Singapur Britaniya mustamlakasi bo'lib qolaverdi. 1959-yil muxtoriyat huquqini oldi. 1965-yil avgustida Singapur o'zini mustaqil respublika deb e'lon qildi.

## SLOVAKIYA

*Rasmiy nomi — Slovakiya Respublikasi. Poytaxti — Bratislava. Hududi — 49035 km<sup>2</sup>. Aholisi — 5452987 kishi (2007). Davlat tili — slovak. Dini — katoliklar (60%), protestantlar (23%), pravoslavlar (12%). Pul birligi — slovak kronasi.*

**Geografik joylashuvi va tabiati.** Markaziy Yevropada joylashgan. Janubda — Vengriya, shimolda — Polsha, g'arbda — Chexiya va Avstriya, sharqda Ukraina bilan chegaradosh. Mamlakatning markaziy va janubiy qismi tekisliklardan iborat. Shimoli g'arbida va sharqida G'arbiy va Sharqiy Karpat tog'lari joylashgan. Shimolda Baland Tatra tog'lari bor. Asosiy daryolari: Dunay, Gron, Vag, Bodrog.

Iqlimi — mo'tadil, kontinental. Asosiy yerosti boyliklari: temir rudasi, surma, magneziiy, marganes. Mamlakatning 1/3 qismi o'rmonzorlardir (dub, buk, archa, qarag'ay). Hayvonot olami kambag'al (bo'ri, tulki, ayiq, quyon, bug'u, tipratikan, tustovuq, kaklik).

**Davlat tuzilishi, siyosiy partiyalari.** Slovakiyaning davlat tuzilishi — respublika. BMT va XVFA a'zosi. Davlat boshlig'i — prezident. Hukumat boshlig'i — Bosh vazir. Oliy qonun chiqaruvchi organ — Milliy Kengash. Ma'muriy jihatdan 8 hududga bo'linadi. Siyosiy partiyalari: Demokratik Slovakiya uchun harakat, Demokratik so'llar partiyasi, Slovakiya milliy partiyasi, Xristian-demokratik harakat.

**Iqtisodi, transport kommunikatsiyalari.** Slovakiya industrial-agrar mamlakat. Gandlov va Madri-Kamenda iqtisodiyoti uchun muhim bo'lgan ko'mir kon-

lari mavjud. Rossiyadan keladigan gaz va neft trassalari o'tadi. Tog'-kon sanoati rivojlangan. Hidroelektrostansiyalar ko'p. Slovakiyaning dehqonchilik uchun yaroqli yerlari hududining 1/3 qismini tashkil etadi (bug'doy, arpa, lavlagi, makkajo'xori, kartoshka yetishtiriladi). Vag vodiysida tamakichilik va bog'dorchilik rivojlangan. Mamlakatda chorvachilik ham taraqqiy etgan. Tog'li kurortlar mavjud. 2006-yil YIM miqdori 78262 mln dollarni (aholi jon boshiga — 14352 doll.) tashkil etgan. Asosiy savdo hamkorlari: Germaniya, Chexiya, Rossiya, Italiya, Polsha.

Asosiy daryo portlari: Bratislava, Komarno.

**Tarixi.** M. a. V asrda mamlakat hududida frakiy qabilalari yashagan. M. a. III asrda bu yerda keltlar paydo bo'ldi. I asrda mamlakat hududi rimliklar tomonidan egallangan. VI asrdan boshlab Slovakiyaga slavyan qabilalari ko'chib kela boshladi. X asrda Buyuk Moraviya davlati tarkibiga qo'shildi. XI asrda Vengriya qirolligiga tobe bo'ldi. XVI asrda Janubiy Slovakiya usmoniylar tomonidan istilo qilindi, qolgan qismi Gabsburglar imperiyasi tarkibiga o'tdi. XVII asrda mamlakat to'liq Gabsburglar Avstriyasi tarkibiga kiritildi. 1867-yildan Slovakiya yangi tashkil topgan Avstro-Vengriya tarkibida bo'ldi. 1918-yili Avstro-Vengriya tarqatilishi bilan Slovakiya Chexiya bilan birlashdi va Chexoslovakiya davlatini tashkil etdi. 1939-yili Germaniya «Myunxen bitimi»ga ko'ra Chexoslovakiyani egallab, «mustaqil Slovakiya» davlatini tashkil ettirdi. Slovakiya II jahon urushida Germaniya tarafida turib urushgan. 1945-yil Slovakiya sovet qo'shinlari tomonidan ozod etildi va kommunistik rejim o'rnatildi. 1968-yili Chexoslovakiyada demokratik islohotlar o'tkazildi, senzura bekor qilindi. Bunga javoban mamlakatga SSSR, GDR, Polsha va Bolgariya qo'shinlari kiritildi. Bu siyosiy holat «Praga bahori» nomini olgan. Kommunistik rejim qayta tiklandi. 1989-yili «yumshoq inqilob» natijasida kommunistlar hokimiyati ag'darildi. 1992-yili Chexiya bilan bo'lgan uzoq tortishuvlardan so'ng davlat ikki qismga — Chexiya va Slovakiyaga ajratildi. 1993-yil 1-yanvarda Slovakiya mustaqillik deklaratsiyasini e'lon qilib, BMTga a'zo bo'ldi.

## SLOVENIYA

*Rasmiy nomi — Sloveniya Respublikasi. Poytaxti — Lyublyana. Hududi — 20250 km<sup>2</sup>. Aholisi — 2006929 kishi (2007). Davlat tili — sloven. Dini — katoliklar (96%), pravoslavlar (1%), musulmonlar (1%). Pul birligi — tolar.*

**Geografik joylashuvi va tabiati.** Bolqon yarimorolining shimoliy qismida, Yevropaning janubi sharqida joylashgan davlat. Janubda va janubi sharqda — Xorvatiya, g'arbda — Italiya, shimolda — Avstriya, shimoli sharqda — Vengriya bilan chegaradosh. G'arbiy sohillari Adriatika dengizi bilan tutashgan. Mamlakat g'arbida Yuliy Alplari viloyati joylashgan. Sharqda tog'lar, daryo vodiylari bilan almashinib turadi. Mamlakat markazida baland bo'lmagan tog'lar ustunlik qiladi. Mamlakatning eng baland nuqtasi Triglav (2863 m) tog'idir. Asosiy daryolari: Drava va Sova. Karet ko'llari va tog' muzliklari uchrab turadi.

Iqlimi — mo'tadil kontinental. Foydali qazilmalaridan: qo'ng'ir ko'mir, qo'rg'oshin, rux, simob, uran va kumush mavjud. Mamlakat hududining 50%ini o'rmonlar egallagan. Eman, archa kabi daraxtlar keng tarqalgan. Hayvonlardan ayiq, qobon, silovsin, kiyik va ohularni uchratish mumkin.

**Davlat tuzilishi, siyosiy partiyalari.** Davlat boshlig'i — prezident. Qonun chiqaruvchi hokimiyatni ikki palatali parlament amalga oshiradi, u Davlat Kengashi hamda Davlat yig'inidan tashkil topgan. Ma'muriy jihatdan mamlakat 60 ta provinsiyaga bo'lingan. Yirik siyosiy partiyalari: Xristian-demokratlar partiyasi, Liberal demokratik partiyasi, Sotsial demokratik partiyasi, Xalq demokratik partiyasi, Sloveniya milliy partiyasi.

**Iqtisodi, transport kommunikatsiyalari.** Sloveniya — industrial-agrar davlat. Uning iqtisodi sanoat ishlab chiqarishga asoslangan. Ko'mir, qo'rg'oshin, rux rudalari qazib olinadi va qayta ishlanadi. Poytaxt Lyublyanada va Yesenitse shahrida og'ir sanoat

korxonalari joylashtirilgan. Ammo sanoat tarmoqlari asosini mashinasozlik, kimyo, yengil sanoat tashkil etadi. Metallurgiya, yog'ochni qayta ishlash, teriga ishlov berish, sport mollari ishlab chiqarish, to'qimachilik mahsulotlari ishlab chiqarish yaxshi taraqqiy etgan. Bu mahsulotlar tashqi bozorga chiqariladi. Yangi sanoat tarmoqlari elektron uskunasozi, kimyo va farmakologiya sanoati, transport mashinasozligi kabilardan iborat. Poligrafiya sohasini alohida qayd etib o'tish zarur. Qishloq xo'jalik ishlab chiqarishining 40%ini o'simliklar o'stirish, 55%ini chorvachilik, 5%ini uzumchilik va mevachilik tashkil etadi. Yaylov chorvachiligi Alp va Subalp viloyatlari hamda Karetnda keng tarqalgan. O'rmonchilik iqtisodning favqulodda muhim sohalaridan bo'lib qolmoqda. Hukumat keyingi yillarda turizm sohasidagi xususiy tadbirkorlikni rag'batlantirmoqda. Turizmdan kelib tushadigan daromadlar asosiy valuta tushumlari manbalaridan biridir. 2006-yil YIM miqdori 41498 mln dollarni (aholi jon boshiga — 20677doll.) tashkil etgan. Asosiy savdo hamkorlari: Germaniya, Italiya, Fransiya, Xorvatiya, Avstriya.

Asosiy portlari: Koper, Piran.

**Tarixi.** M. a. I asrda bu yerlar Rim imperiyasi tarkibiga kirgan. Sloveniya hududiga slavyanlar VI asrda kirib kelishgan. M. a. 628—258-yillarda bu hududlar Samo davlati, keyinchalik Karantaniya tarkibiga kirgan. XI—XIII asrlarda Sloveniya hududida bir qator feodal knyazliklar — Shtiriya, Kraina va boshqalar vujudga keldi. XVI asr boshlaridan mamlakatning deyarli butun hududi Avstriya Gabsburglari tomonidan bosib olingan edi. 1809—1813-yillarda Illiriya provinsiyalari sifatida Napoleon davlati tarkibiga kirgan. XIX asrning 70-yillarida madaniy va milliy avtonomiya shiorlari ostidagi milliy-ozodlik harakatlari kuchayib bordi. 1918-yili Sloveniya Serblar, Xorvatlar va Slovenlar qirolligi tarkibiga qo'shildi (1929-yildan Yugoslaviya davlati nomini oldi). 1941-yilda Yugoslaviya Germaniya, Italiya, Vengriya qo'shinlari tomonidan ishg'ol qilindi. Nemis bosqinchilariga qarshi kurashga Yugoslaviya Xalq ozodlik armiyasi otlandi. II jahon urushidan so'ng Sloveniya



Yugoslaviya federatsiyasi tarkibiga kirdi. Italiya bilan imzolangan tinchlik shartnomasiga ko'ra slovenlar ko'pchilikni tashkil qilgan hududlarning barchasi Yugoslaviya tasarrufiga topshirildi. Yugoslaviya tarkibida Sloveniya keng madaniy va iqtisodiy avtonomiyaga ega bo'ldi. 1980-yillarning oxirlarida Sloveniya siyosiy rahbariyati ko'ppartiyaviylik asosidagi saylovlarni o'tkazishga qaror qildi. 1990-yil aprelda Yugoslaviyada birinchi bor ko'ppartiyaviylik asosida demokratik saylovlar o'tkazildi. 1991-yil 21-avgustda Sloveniya mustaqillik to'g'risidagi deklaratsiyani qabul qildi. 1991-yil oktabrida to'la mustaqil davlatga aylandi. Sloveniya 1992-yil may oyida BMTga a'zo bo'ldi.

## SOLOMON OROLLARI

*Rasmiy nomi — Solomon Orollari. Poytaxti — Xoniara. Hududi — 28370 km<sup>2</sup>. Aholisi — 567438 kishi (2007). Davlat tili — ingliz. Dini — xristianlik. Pul birligi — solomon orollari dollari.*

**Geografik joylashuvi va tabiati.** Tinch okeanning janubiy qismida Solomon orollarida (Gvadalkanal, Nyu-Jorjiya, Malayta, Santa-Izabel, Santa-Krus orollari va boshq.) joylashgan davlat. Ko'pchilik orollarning relyefi tog'li: Marjon atollarida tekisliklar bor. Asosiy tabiiy resurslari: baliq, yog'och, oltin, qo'rg'oshin, sink, nikel, fosforitlar.

Iqlimi — uzoq davomli namlik mavsumi va issiq. Orollarning katta qismi noyob daraxt turlari mavjud bo'lgan o'rmonlar bilan qoplangan. Nisbatan quruq yerlarda savannalar, qirg'oq bo'ylarida mangro o'simliklari bor. Orollarning hayvonot dunyosi ancha kambag'al: xaltalilar, ko'rshapalaklar va kemiruvchilar uchraydi.

**Davlat tuzilishi, siyosiy partiyalari.** Davlat tuzilishi — konstitusion monarxiya. Mamlakat 7 ta okrugga bo'lingan. Solomon orollari 1978-yil 7-iyulda mustaqil davlat bo'lgan (ilgari — Buyuk Britaniyaning protektorati edi). Davlat boshlig'i — Britaniya monarxi

(hozirgi vaqtda qirolicha Yelizaveta II), ijroiya hokimiyat premyer-ministriga tegishli. Qonunchilik Milliy parlament tomonidan amalga oshiriladi. Siyosiy partiyalari: Xalq ittifoqi partiyasi, Solomon orollari birlashgan partiyasi, Solomon orollari liberal partiyasi, Solomon orollari leyboristlar partiyasi, Solomon orollari milliy harakati partiyasi.

***Iqtisodi, transport kommunikatsiyalari.***

Iqtisodiyotining asosini qishloq xo'jaligi, baliqchilik va o'rmonchilik (YIMning 70%i) tashkil etadi. Asosiy eksport qilinadigan mahsulotlari — baliq, yog'och, kopra, palma yog'i. Sanoat mahsulotlarining katta qismi va neft mahsulotlarini chetdan keltiradi. 2006-yil YIM miqdori 835 mln dollarni (aholi jon boshiga — 1471 doll.) tashkil etgan.

Asosiy savdo hamkorlari — Yaponiya, Buyuk Britaniya, AQSH, Tailand.

Temiryo'llari yo'q, avtomobil yo'llarining umumiy uzunligi — 1300 km. Porti — Xonjara.

***Tarixi.*** Solomon orollari 1568-yili ispan dengizchisi Mendonya de Neyra tomonidan kashf qilingan. Orollarning shimoliy qismi 1885-yili Germaniya protektorati deb e'lon qilingan, janubiy qismi esa Buyuk Britaniya mulklariga qo'shildi. 1899-yili Germaniya Buganvil va Buka orollaridan boshqa hamma orollarni Buyuk Britaniyaga berdi. Buning evaziga inglizlar Germaniyaning G'arbiy Samoani bosib olish huquqini tan olishdi. 1914-yili Buganvil va Buka Avstraliya qo'shinlari tomonidan bosib olindi va 1920-yili Avstraliya boshqaruvi ostiga o'tdi. Ikkinchi jahon urushida orollarning bir qismi yapon qo'shinlari tomonidan ishg'ol qilindi, ikkinchi jahon urushidan keyin esa Solomon orollari yana Britaniya protektoratiga aylandi. 1978-yili Solomon orollarining mustaqilligi e'lon qilindi va Britan hamdo'stligi davlatlari safiga kirdi.

## SOMALI

*Rasmiy nomi — Somali Demokratik Respublikasi. Poytaxti — Mogadisho. Hududi — 637657 km<sup>2</sup>. Aholisi — 9096369 kishi (2007). Davlat tili — somali va arab. Dini — islom (99% aholi musulmon sunniylar). Pul birligi — somali shillingi.*

**Geografik joylashuvi va tabiati.** Afrikaning sharqiy qismida, Somali yarimorolida joylashgan davlat. G'arbda Efiopiya (chegara uzunligi — 1660 km), janubi g'arbda Keniya (682 km), shimoli g'arbda Jibuti (58 km) bilan chegaradosh. Sharqda va janubda mamlakat Hind okeani bilan, shimolda Aden ko'rfazi bilan tutashib ketgan. Chegarasining umumiy uzunligi — 2340 km. Sohil bo'ylab chegara uzunligi esa — 3025 km. Mamlakat relyefi tekis va tepalikli tekisliklardan, shimolda tepaliklardan iborat. Somalida uran, temir rudasi, boksitlar, qo'rg'oshin, surma, mis zaxiralari bor.

Iqlimi — quruq va issiq tropik. Somalining deyarli 90% hududi yarimcho'llar va quruq savannalardan iborat. Bu yerda ko'p yillik o'tlar, akatsiyalar ko'p. O'rmonlarida palmalar, 20 metrli fikuslar bor. Savannalarda antilopa, zebra, jirafa va qoplonlar yashaydi. Daryo havzalarida fillar, karkidonlar uchraydi. Maymunlar ko'p. Somalining markaziy qismida balandligi 7 metrgacha bo'lgan termit uyalar bor.

**Davlat tuzilishi, siyosiy partiyalari.** Davlat tuzilishi — respublika. Mamlakat 18 ta viloyatga bo'lingan. Somali 1960-yil 1-iyuldan mustaqil (ilgari Buyuk Britaniya mustamlakasi bo'lgan) davlat hisoblanadi. Bu sana Milliy bayram — Mustaqillik kuni sifatida nishonlanadi. Ijroiya hokimiyat mamlakat konstitutsiyasiga ko'ra prezidentga va premyer-ministr boshchiligidagi Ministrlar Kengashiga tegishli. Fuqarolar urushi tufayli hukumat amalda mamlakatni nazorat qila olmayapti. Mamlakatda 15 dan ortiq urug'-qabilachilik asosida tuzilgan harbiy-siyosiy tashkilotlar bor.

Ulardan eng yiriklari — Birlashgan Somali kongressi, Somali milliy harakati, Somalini qutqarish demokratik fronti, Somali milliy alyansi.

### ***Iqtisodi, transport kommunikatsiyalari.***

Dunyoning eng kambag'al davlatlaridan biri bo'lgan Somalida iqtisodiyotning muhim sektori qishloq xo'jaligi (YIMning 40%i va taxminan eksportdan keladigan foydaning 65%ini tashkil qiladi) hisoblanadi. Qishloq xo'jaligida asosan chorvachilik bilan shug'ullaniladi. 2006-yil YIM miqdori 4809 mln dollarni (aholi jon boshiga — 529 doll.) tashkil etgan. Asosiy eksport qiladigan mahsuloti bananlar, bundan tashqari shakar-qamish, sorgo va makkajo'xori ham yetishtiriladi. Sanoati uncha katta bo'lmagan shakar, to'qimachilik va neft korxonalari bilan cheklangan. XX asrning 90-yillari boshida yuritilgan beqaror siyosiy holat ishlab chiqarish hajmining sezilarli darajada kamayishiga olib keldi. Asosiy savdo hamkorlari — AQSH, Italiya, Germaniya, Saudiya Arabistoni.

Avtomobil yo'llarining umumiy uzunligi — 15215 km. Mamlakat portlari: Barbara, Mogadisho.

**Tarixi.** II–VII asrlarda hozirgi Somali hududlari efioplarning Aksum davlati tarkibiga kirgan. VII asrdan Somaliga arablar kirib kelishdi. Ular bu yerda islom dinini va arab tilini yoyishdi, XIX asrgacha saqlanib turgan bir qator sultonliklarini tuzishdi. XIX asrning oxirlarida mamlakatni yevropaliklar tomonidan mustamlakalashtirish boshlandi. Hozirgi Somali hududlari Buyuk Britaniya, Italiya va Fransiya davlatlari o'rtasida bo'lib olindi. Britaniya Somalisi 1960-yil 26-iyunda mustaqillik oldi, 1960-yil 1-iyulda Italiya Somalisining mustaqilligi e'lon qilinganidan so'ng esa yagona Somali davlati tuzildi. 1969-yili harbiylar davlatto'ntarishi o'tkazib mamlakat prezidentini o'ldirishdi. 1977-yili Somali Efiopiyaga qarshi urush boshladi, biroq unda mag'lubiyatga uchradi. Mamlakatda boshlangan fuqarolar urushi 1991-yili general Barrening qulashiga va BMT homiyligidagi harbiy intervensiyaning boshlanishiga olib keldi. Biroq bu ham Somalidagi urushayotgan urug'larni o'zaro yarashtira olmadi. 2000-yili Jibuti shahrida mamlakatdagi boshboshdoqlikka chek qo'yish

maqsadida dala komandirlari uchrashuvi o'tkazildi, lekin bu uchrashuv natija bermadi. 2006-yili Islom Sudlari Ittifoqi tashkiloti mamlakat poytaxti Mogadisho ustidan to'liq nazorat o'rnatadi.

## SUDAN

*Rasmiy nomi — Sudan Respublikasi. Poytaxti — Xartum. Hududi — 2505813 km<sup>2</sup>. Aholisi — 39379358 kishi (2007). Davlat tili — arab. Dini — musulmonlar (70%), majusiylar (25%), xristianlar (5%). Pul birligi — sudan dinori.*

**Geografik joylashuvi va tabiati.** Afrika qit'asining shimoli sharqida joylashgan davlat. Sharqda Efiopiya va Eritreya (chegara uzunligi — 2221 km), g'arbda Chad respublikasi (1360 km), Markaziy Afrika Respublikasi (1165 km) va Liviya (383 km), shimolda Misr (1273 km), janubda Kongo Demokratik Respublikasi (628 km), Uganda (435 km) va Keniya (232 km) bilan chegaradosh. Sharqda Sudan Qizil dengiz bilan tutashib ketgan. Chegarasining umumiy uzunligi — 7697 km, sohil bo'ylab chegara uzunligi esa 853 km. Sudan Afrika davlatlari orasida hududi bo'yicha eng yirigi hisoblanadi. Uni 3 ta fizik-geografik regionga bo'lish mumkin: shimolda Liviya va Nubiya cho'llari 30% hududini egallagan; markazida Kardofan va Darfur tekisliklari bor; janubini keng botqoqlar va changalzorlar egallagan. Mamlakatning eng yuqori nuqtasi — Kineti tog'i (3187 m) bo'lib, u Sudanning janubi sharqida joylashgan. Mamlakatning asosiy daryolari — Nil, Oq Nil, Moviy Nil. Asosiy foydali qazilmalari: neft, temir rudasi, sink, mis, xrom, volfram, kumush. Haydaladigan yerlar mamlakat hududining 5%ini, o'tloq va yaylovlar 24ini, o'rmon va to'qayzorlar 20%ini egallaydi.

Iqlimi — issiq va quruq.

**Davlat tuzilishi, siyosiy partiyalari.** Davlat tuzilishi — respublika. Mamlakat 9 ta viloyatga bo'lingan. Sudan 1956-yili 1-yanvarda Misr va Buyuk

Britaniyadan mustaqillik olgan. Bu sana Milliy bayram sifatida nishonlanadi (Mustaqillik kuni). Qonunchilik ingliz umumiy huquqshunosligiga va islom huquqshunosligiga asoslangan. Ijroiya va qonun chiqaruvchi hokimiyat prezidentning (davlat va hukumat boshlig'i) va Milliy Assambleyaning qo'lida to'plangan. 1989-yil 30-iyundagi davlat to'ntarishidan so'ng siyosiy partiyalar faoliyati taqiqlab qo'yilgan.

### ***Iqtisodi, transport kommunikatsiyalari.***

Sudan iqtisodiyoti fuqarolar urushi, doimiy siyosiy beqarorlik va yuqori inflyatsiya tufayli chuqur inqirozni boshidan kechirmoqda. Iqtisodiyotda davlat sektori ustunlik qiladi. Xususiy sektorning asosini qishloq xo'jaligi va savdo tashkil qiladi. Iqtisodiyotining asosiy sektori bo'lgan qishloq xo'jaligi (YIMning 35%)da ishga yaroqli aholining 80%i band (eksportning yarmidan ko'prog'i paxta). Ishlab chiqarish asosan qishloq xo'jalik mahsulotlarini qayta ishlash bilan bog'liq. Noqulay ob-havo sharoiti mamlakatning iqtisodiy ahvolini yanada og'irlashtirmoqda. Hozirgi kunda Sudan aholi daromadining ko'rsatkichlari bo'yicha dunyoda oxirgi o'rinlaridan birini egallaydi. 2006-yil YIM miqdori 69379 mln dollarni (aholi jon boshiga — 1761 doll.) tashkil etgan. Asosiy savdo hamkorlari — G'arbiy Yevropa mamlakatlari, Saudiya Arabistoni, AQSH, Yaponiya, Sharqiy Yevropa mamlakatlari.

Temiryo'llarining umumiy uzunligi — 5516 km, avtomobil yo'llarining umumiy uzunligi — 20703 km, ichki suv yo'llari — 5310 km. Mamlakatning asosiy porti — Port-Sudan.

***Tarixi.*** M. a. III ming yillikda hozirgi Sudan hududida Nubiya sivilizatsiyasi shakllangan bo'lib, qadimgi Misr tarixi bilan chambarchas bog'liq. Nubiya shohligi Misr sivilizatsiyasi bilan munosabatlarini uzganidan so'ng m. a. 350-yili Efiopiya shohi tomonidan bosib olindi. VI asrga kelib hozirgi Sudan hududida bir nechta xristian davlatlari shakllandi. Biroq ular XV asrda qora tanli musulmonlar tomonidan bo'ysundirilib, Sennar sultonligini tuzishdi, bu vaqtda mamlakat g'arbida Darfur sultonligi ham tuzilgan edi. XVIII

asr oxirlarida ushbu musulmon davlatlarining zaiflashganligidan foydalanib 1820-yili Misr Sudanni bosib oldi. XIX asrning 60-yillarida Sudanda Misrning bosib olinishi bilan Buyuk Britaniyaning ta'siri kuchaya boshladi. 1951-yil oktabrida Misr qiroli Farrux Britaniya bilan kelishuvni buzib, o'zini Sudanning qirofi deb e'lon qildi. 1956-yil Sudan mustaqillikka erishdi. Sudan mustaqillikka erishganidan so'ng bir nechta davlat to'ntarishlarini o'z boshidan kechirdi. Ulardan biri 1971-yili sodir bo'lib, uning natijasida general Nimeyra hokimiyat tepasiga keldi. Nimeyra tez-tez sodir bo'lib turadigan qurg'ochilik va ochlik tufayli mamlakatni inqirozdan olib chiqa olmadi. Fuqarolar urushi 1985-yil Nimeyra hukumatining qulashiga olib keldi. 1986-yil esa mamlakatda demokratik saylovlar bo'lib o'tdi. Yangi tuzilgan hukumat ham 1989-yili general al-Bashir tomonidan ag'darildi. Shundan so'ng fuqarolar urushi yana butun mamlakatni qamrab oldi. XXI asr boshida Sudan hukumati ichki va tashqi siyosiy kuchlarni milliy totuvlikka da'vat etadi va Xartumda barcha siyosiy kuch vakillarining Umumiy kongressini o'tkazish tashabbusi bilan chiqadi.

## SURINAM

*Rasmiy nomi — Surinam Respublikasi. Poytaxti — Paramaribo. Hududi — 163820 km<sup>2</sup>. Aholisi — 471681 kishi (2007). Davlat tili — golland. Dini — induizm (27%), protestantlik (25%), katoliklar (23%), musulmonlar (20%), majusiylar (5%). Pul birligi — Surinam guldeni yoki florin.*

**Geografik joylashuvi va tabiati.** Janubiy Amerikaning shimoli sharqida joylashgan davlat. Janubda Braziliya (chegara uzunligi — 597 km), g'arbda Gayana (600 km), sharqda fransuz Gvianasi (510 km) bilan chegaradosh. Shimolda Surinam Atlantika okeani bilan tutashib ketgan. Chegarasining umumiy uzunligi — 1707 km. Sohil bo'ylab chegara uzunligi esa

386 km. Mamlakatning katta qismi balandligi 1280 m gacha bo'lgan Gvian yassitog'ligining shimoli sharqida joylashgan hududi asosan tepaliklardan iborat. Shimolda qirg'oqbo'yi botqoqlik tekisliklar bor. Bosh daryolari — Maroni, Karonteyn. Asosiy tabiiy resurslari: boksitlar, temir rudasi, yog'och, baliq, krevetkalar.

Iqlimi — subekvatorial issiq. Daraxtlarning noyob turlari mavjud bo'lgan doimiy yashil o'rmonlar Surinam hududining 90% ini egallaydi. Shimolda savannalar bor. Mamlakat faunasi tropik selvasiga xos.

**Davlat tuzilishi, siyosiy partiyalari.** Davlat tuzilishi — respublika. Mamlakat 10 ta okrugga bo'lingan. Surinam 1975-yili 25-noyabrda Niderlandiyadan mustaqillik olgan (ilgari Niderland Gvianasi bo'lgan). Milliy bayramlari: 25-fevral — Ozodlik va yangilanish kuni (1980), 25-noyabr — Mustaqillik e'lon qilingan kun (1975). Ijroiya hokimiyat prezidentga (davlat boshlig'i) va vitse-prezidentga (uning o'zi premyer-ministr) tegishli. Qonun chiqaruvchi hokimiyat bir palatali parlament — Milliy Assambleya tomonidan amalga oshiriladi.

Eng yirik siyosiy partiyalari: Demokratiya va taraqqiyot uchun yangi front, Milliy demokratik partiya, Surinam milliy partiyasi, Islohotlar taraqqiyot partiyasi.

**Iqtisodi, transport kommunikatsiyalari.** Surinam iqtisodiyoti 1982-yili Gollandiya moliyaviy yordam berishni to'xtatganidan so'ng og'ir qiyinchiliklarni boshdan kechirdi, shuningdek, siyosiy beqarorlik ham sanoat taraqqiyotiga va iqtisodiy islohotlarni amalga oshirishda o'zining salbiy ta'sirini ko'rsatdi. Sanoatining yetakchi tarmoqlari aluminiy ishlab chiqarish (umumiy eksport hajmining 70%i), boksitlar qazib olish, yog'ochni qayta ishlash. Qishloq xo'jaligida (YIMning 11%i) asosiy yetishtiriladigan ekin sholi (qishloq xo'jalik mahsulotlarining 60% i) hisoblanadi. 2006-yil YIM miqdori 2818 mln dollarni (aholi jon boshiga — 5974 doll.) tashkil etgan. Asosiy savdo hamkorlari — Norvegiya, Niderlandiya, AQSH, Germaniya, Braziliya.

Temiryo'llarining umumiy uzunligi — 166 km, avtomobil yo'llari — 8300 km, ichki suv yo'llari esa 1200 km. Asosiy porti — Paramaribo.



**Tarixi.** Hindularning aravak, varau va karib qabilalari istiqomat qilib kelgan hozirgi Surinam hududlari ilgari inglizlarga tegishli bo'lgan, 1667-yili esa Gollandiyaga berilgan. 1954-yili muxtor provinsiya maqomini olgan Surinam 1975-yili noyabrda mustaqil respublika bo'ldi. 1980-yilgi harbiy to'ntarishi oqibatida mamlakatda hokimiyat harbiylar qo'lga o'tdi. 1988-yili harbiylar hukumatni fuqarolik hukumatiga berganidan so'ng demokratiyaga qaytish boshlandi va mamlakatda erkin prezident saylovlari bo'lib o'tdi.

## SURIYA

*Rasmiy nomi — Suriya Arab Respublikasi. Poytaxti — Damashq. Hududi — 185200 km<sup>2</sup>. Aholisi — 19307895 kishi (2007). Davlat tili — arab. Dini — islom. Pul birligi — Suriya funti.*

**Geografik joylashuvi va tabiati.** Suriya Janubi G'arbiy Osiyoda joylashgan davlat. Shimolda Turkiya (chegara uzunligi — 822 km), sharqda Iroq (605 km), janubda Iordaniya (375 km) va Isroil (79 km), g'arbda Livan bilan (375 km) chegaradosh. Mamlakat hududining asosiy qismini tekisliklar egallagan. Janubda Suriya cho'llari joylashgan. G'arbda Suriya O'rtayer dengizi bilan tutashib ketgan.

Mamlakatning g'arbiy qismida Ansoriya va Antilivan tog' tizmalari joylashgan. Suriyaning eng baland cho'qqisi — Xerman (2814) ham shu yerda joylashgan. Asosiy daryolari: Frot va Al-Asi. Mamlakat neft, fosfat, marganes konlariga boy. Hududining 28%ida dehqonchilik qilinsa, 46%i yaylovlardan iborat.

Suriya iqlimi ancha iliq bo'lib, O'trayer dengizi sohillari boshqa hududlardan keskin farq qiladi.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Mamlakat 14 ta ma'muriy hududga bo'lingan. Suriya 1946-yil 17-aprelda o'z mustaqilligini qo'lga kiritgan. Davlat va ijroiya hokimiyat rahbari — prezident. Oliy qonun chiqaruvchi organi bir palatali parlament — Xalq Kengashi. Yirik

siyosiy partiyalari: Arab sotsialistik uyg'onish partiyasi, Milliy sotsialistik partiya, Taraqqiyot milliy fronti (7 ta partiyani birlashtirgan).

***Iqtisodi, transport kommunikatsiyalari.***

1991-yil bo'lib o'tgan Iroq—Quvayt urushidan so'ng Suriya arab va G'arbiy Yevropa davlatlaridan sezilarli darajada moliyaviy yordam oldi. Bu narsa mamlakatning tashqi qarzlarini to'lashga va neftni qayta ishlash sanoatini rivojlantirishga yordam berdi. Neft va fosforit qazib olish Suriya sanoatining asosini tashkil etadi. Qishloq xo'jaligi umummilliy mahsulotning 30% ini yetishtiradi. 2006-yil YIM miqdori 70155 mln dollarni (aholi jon boshiga — 3633 doll.) tashkil etgan. Asosiy ekinlar: paxta, bug'doy, arpa. Suriya o'z-o'zini oziq-ovqat mahsulotlari bilan ta'minlay olmaydi. Asosiy savdo hamkorlari: Yevropa Ittifoqi davlatlari.

Temiryo'llari uzunligi — 1998 km. Avtomobil yo'llari — 31569 km. Asosiy portlari — Tartus va Baniyaz.

***Tarixi.*** Bugungi Suriya hududlari tarixning turli davrlarida turli xil davlatlar tarkibiga kirgan. M. a. XVI asrda qadimgi Misr, m. a. XIV asrda Xett podsholigi, m. a. XII asrga kelib bu hududlar yahudiylar tomonidan ishg'ol qilingan. M. a. VII—VI asrlarda bu hududlar ossuriyaliklar tomonidan egallangan. M. a. 539-yilda forslar, m. a. 333-yilda Aleksandr Makedonskiy imperiyasi tarkibiga kirdi. M. a. III asrda salavkiylar sulolasi Suriya podsholigiga asos soldi. M. a. 64-yildan bu podsholik Rim imperiyasi tarkibiga kiritildi. 636-yilda bu hududlar arablar tomonidan bosib olindi. Keyin Suriya salibchilar tomonidan tashkil etilgan Quddus podsholigi tarkibiga kirdi. 1516-yildan 1920-yilgacha Suriya Usmoniylar imperiyasining tarkibiy qismi bo'lib qoldi. 1920-yili Fransiya Suriyani boshqarish huquqini oldi. 1914-yil sentabrda Suriya o'z mustaqilligini e'lon qilgan bo'lsa-da, amalda 1946-yilning 17-aprelidan to'la mustaqillikka erishdi. 1958-yilda Suriya va Misr yagona Birlashgan Arab Respublikasini tashkil etishadi. 1962-yili Suriya bu ittifoqdan chiqib mustaqil Suriya Arab

Respublikasini tuzadi. XX asrning 2-yarmida Isroil bilan urush harakatlari olib borgan.

## SYERRA-LEONE

*Rasmiy nomi — Syerra-Leone Respublikasi. Poytaxti — Fritaun. Hududi — 71740 km<sup>2</sup>. Aholisi — 6140154 kishi (2007). Davlat tili — ingliz. Dini — majusiylik (52%), islom (40%), xristianlik (8%). Pul birligi — leone.*

**Geografik joylashuvi va tabiati.** Afrika qit'asining g'arbiy qismida joylashgan davlat. Shimolda va sharqda Gvineya (chegara uzunligi 652 km), janubi sharqda Liberiya (306 km) bilan chegaradosh. G'arbda va janubi g'arbda mamlakat Atlantika okeani bilan tutashib ketgan. Chegarasining umumiy uzunligi — 958 km, sohil bo'ylab chegara uzunligi esa — 402 km. Mamlakat hududining katta qismi Leon-Liberiya tepaligida joylashgan. G'arbida va janubida qirg'oqbo'yi mangro botqoqliklari bor. Tabiiy resurslaridan nisbatan muhimlari — olmos, boksitlar, titan rudasi, temir rudasi, oltin. Ishlov beriladigan yerlar umumiy hududining 25% ini, o'tloq va yaylovlar 31% ini, o'rmon va to'qayzorlar 29% ini egallaydi.

Iqlimi — ekvatorial nam. Syerra-Leone hududlarining taxminan yarmini savannalar, sharqida tog'lar va janubida ekvatorial o'rmonlari bor. O'rmonlarda juda ko'p maymunlar (shimpanze, babuinlar, makakalar), qoplon, giyena, antilopa, zebralar bor, kichik begemotlar saqlanib qolgan. Shuningdek, noyob dengiz hayvoni — lamantin ham uchraydi.

**Davlat tuzilishi, siyosiy partiyalari.** Davlat tuzumi — harbiy tartib. Mamlakat tarkibida — G'arbiy viloyat va 3 ta provinsiya (sharqiy, shimoliy, janubiy) bor. Syerra-Leone 1961-yil 27-aprelda mustaqillikka erishgan (ilgari Buyuk Britaniyaning protektorati bo'lgan). Bu kun Milliy bayram (Respublika kuni) sifatida nishonlanadi. Qonunchilik ingliz huquqshunosligiga va mahalliy qabilalar qonunlariga asoslangan.

Butun hokimiyat Muvaqqat Milliy Boshqaruv Kengashiga tegishli. Mamlakat parlamenti (Deputatlar palatasi) 1992-yil 29-aprelda sodir bo'lgan davlat to'ntarishidan so'ng tarqatib yuborilgan. Siyosiy partiyalar: Syerra-Leone xalq partiyasi, Xalq demokratik partiyasi, Milliy birlik partiyasi.

***Iqtisodi, transport kommunikatsiyalari.***

Mamlakat iqtisodiyotida qishloq xo'jaligi ilg'or tarmoq hisoblanadi (YIMning 1/3 qismini tashkil qiladi). Asosiy eksport qiladigan mahsulotlari — qahva va kakao. YIMning 10%ini tashkil qiladigan sanoat (olmos, boksitlar, rutil) va qishloq xo'jalik mahsulotlarini qayta ishlash bilan cheklangan. 2006-yil YIM miqdori 4429 mln dollarni (aholi jon boshiga — 721 doll.) tashkil etgan. Asosiy savdo hamkorlari — AQSH, Buyuk Britaniya, Belgiya, Germaniya, Yaponiya, Xitoy, Nigeriya.

Avtomobil yo'llarining umumiy uzunligi — 7400 km (shundan 1150 km. tosh yotqizilgan yo'llar), ichki suv yo'llari — 800 km. Asosiy portlari — Bonte, Pepel, Fritaun.

***Tarixi.*** 1460-yili portugallar tomonidan ochilgan hozirgi Syerra-Leone hududlari uzoq vaqt davomida G'arbiy Afrikaning qul savdosi markazlaridan biri bo'lib keldi. 1787-yili Amerikada ozodlikka erishgan sobiq qullar Syerra-Leone qirg'oqlarida inglizlar yordamida o'z turar joylariga asos soldilar. 1808-yili Buyuk Britaniya mustamlakasiga aylantirilgan bu mamlakat 1961-yili Britan hamdo'stligi doirasida muxtoriyatga erishdi. 1971-yilgi davlat to'ntarishi natijasida Syerra-Leone mustaqil davlat deb e'lon qilindi. 1992-yili navbatdagi davlat to'ntarishi o'tkazildi va hokimiyatga harbiylar kelishdi. Ular parlamentni tarqatib yuborishdi va siyosiy partiyalar faoliyatini taqiqlab qo'yishdi.

## TAILAND

*Rasmiy nomi — Tailand Qirolligi (Pratet-Tai). Poytaxti — Bangkok. Hududi — 513115 km<sup>2</sup>. Aholisi — 65095420 kishi (2007). Davlat tili — tay. Dini — buddaviylik (95%). Pul birligi — bat.*

**Geografik joylashuvi va tabiati.** Janubi sharqiy Osiyodagi davlat. Shimol va g'arbda Tailand Myanma (chegara uzunligi — 1800 km), shimoli sharqda Laos (1754 km), janubi sharqda Kambodja (803 km), janubda Malayziya (506 km) bilan chegaradosh. Mamlakatning janubi g'arbida Andaman dengizi, janubi sharqida Siam qo'ltig'i joylashgan. Chegarasining umumiy uzunligi — 4863 km. Qirg'oq chizig'ining uzunligi — 3219 km. Mamlakat hududining yarmi pasttekisliklardan iborat. Ulardan eng yirigi Menam pasttepallig bo'lib, u mamlakatning asosiy daryosi Menam-Chao-Pral havzasida joylashgan. Mamlakatning sharqiy qismini Korat yassitog'ligi egallaydi. Tailandning shimoliy va g'arbiy qismi tog'lar bilan o'ralgan. Asosiy tog' tizmasi — Tanentaunji. Eng baland cho'qqisi — Intxanon (2595 m). Asosiy tabiiy boyliklari: tabiiy gaz, qalay, kauchuk, volfram, qo'rg'oshin, yog'och, baliq. Haydaladigan yerlar mamlakat hududining 34% ini, o'rmon va yaylovlar 30% ini tashkil qiladi.

Iqlimi — tropik. Tailandning florasi tropik bo'lib, o'simliklarning 10000 ga yaqin turi mavjud. O'rmonlarda yang, takyan, turli xil palmalar, terokarpus bambugi o'sadi. Hindiston fili, yo'lbars, qoplon, bengal mushugi, himolay ayig'i, hindiston bo'rsig'i, kiyikning bir necha turi, 70 turga yaqin ilon, qushxo'r o'rgimchak, 600 ga yaqin kapalak, turli hasharotlar hayvonot dunyosini tashkil etadi.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat tarkibiga 73 provinsiya (changvada) kiradi. Mustaqil Tailand davlati 1238-yilda tuzilgan. 5-dekabr qirolning tug'ilgan kuni milliy bayram hisoblanadi. Davlat boshlig'i — qirol.

Ijro etuvchi hokimiyat Bosh vazir boshchiligidagi hukumatga tegishli. Qonun chiqaruvchi hokimiyat Senat (yuqori palata) va Vakillar palatasi (quyi palata)dan iborat Milliy Assambleya tomonidan amalga oshiriladi. Asosiy siyosiy partiyalari: Demokratik partiya, Tay milliy partiyasi, Xalq partiyasi, Yangi umid partiyasi, Ijtimoiy harakat partiyasi, Paoangtam partiyasi.

### ***Iqtisodi, transport kommunikatsiyalari.***

Tailand Osiyodagi iqtisodiy rivojlangan davlatlardan biri. So'nggi yillarda iqtisodiy o'sish sanoat va xizmat ko'rsatish sohalarida kuzatilmoqda. Jadal rivojlanayotgan turizm mamlakatning asosiy valuta manbalaridan biriga aylandi. Sanoatning to'qimachilik, zargarlik, elektronika, qazib olish (Tailand volfram ishlab chiqarish bo'yicha ikkinchi, qalay ishlab chiqarish bo'yicha dunyoda uchinchi o'rinni egallaydi), qishloq xo'jaligi mahsulotlarini qayta ishlash sohalari rivojlangan. Qishloq xo'jaligi hozirgi kunda iqtisodda muhim o'rinni egallamaydi. Shunga qaramay qishloq xo'jaligi (YIM — 12%) mehnatga yaroqli aholining 60% i band. Tailand dunyoda guruch va kauchukning asosiy ishlab chiqaruvchisi va eksportchisi hisoblanadi. Asosiy savdo sheriklari: AQSH, Yaponiya, Singapur, Gonkong, Germaniya.

Temiryo'llarining umumiy uzunligi — 3940 km, avtomobil yo'llari — 44534 km, ichki suv yo'llari — 4000 km. 2006-yil YIM miqdori 510268 mln dollarni (aholi jon boshiga — 7838 doll.) tashkil etgan. Asosiy portlari: Bangkok, Sattaxip, Pattoni, Pxuket.

**Tarixi.** I asrda hozirgi Tailand hududining janubida Mon qirolligi vujudga keladi va VI—VII asrlarda o'zining qudrati cho'qqisiga ko'tariladi. IX asrdan mamlakat hududi kxmerlar imperiyasi hukmronligi ostida qoladi. VIII asrda hozirgi Xitoyning janubiy qismlarida o'z davlatlariga asos solgan tay qabilalari XIII asrda Menam daryosi bo'ylab janubga siljiydi va 1220-yilda Siam qirolligi tashkil etishadi. Siam qirolligi 1569—1584 hamda 1767—1782-yillarda Birmaga qaram bo'lgan. 1782-yilda taxtga hozirgi kungacha hukmronlik qilayotgan Rama sulolasi o'tiradi. Ingliz va Fransuz mustamlakalari bilan o'ralgan Siam mustamlakaga aylanishdan

qutulib qoladi va XIX asrning o'rtalarida Buyuk Britaniya hamda Fransiya bilan foydali bitimlar imzolaydi. 1932-yilda yangi Konstitutsiya qabul qilinadi. Konstitutsiyaga ko'ra parlament tuzilib, davlat boshqaruvi konstitutsion monarxiyaga aylantirildi. 1939-yildan davlat Tailand deb atala boshlaydi. II jahon urushiga Tailand Yaponiya tarafida kiradi, lekin 1944-yilda o'zining tashqi siyosatini o'zgartirib AQSHning ittifoqchisiga aylanadi. 1976-yilning oktabrida harbiy xunta hokimiyatni egallab, parlamentni tarqatib yuboradi va yangi Konstitutsiyani qabul qiladi. Qo'shni Kambodjaning Vyetnam qo'shinlari tomonidan okkupatsiya qilinishi Tailand hukumatiga ikkita yirik muammoni keltirib chiqaradi: Kambodjalik emigrantlarning ommaviy oqimi va Vyetnam bilan chegaradagi harbiy to'qnashuvlar. 1980-yilda hokimiyatga fuqarolar hukumati qaytadi, lekin navbatdagi davlat to'ntarishi (1932-yildan beri 16-si)dan so'ng hokimiyatga yana harbiylar keladi. 1992-yilda harbiy xuntaga qarshi aholi tomonidan uyushtirilgan ommaviy va qonli to'qnashuvlar bilan yakunlangan norozilik namoyishi demokratiyaning tiklanishiga olib keldi. Hozirgi kunda Tailand dunyoviy qonunlar va buddizm qoidalariga asoslangan demokratik davlatdir.

## TAYVAN

*Rasmiy nomi — Tayvan Respublikasi (Xitoy Respublikasi). Poytaxti — Taybey. Hududi — 36002 km<sup>2</sup>. Aholisi — 23218383 kishi (2007). Davlat tili — xitoy (mandarin). Dini — buddaviylik (45%), konfutsiylik va daosiylik (33%) uyg'unlashgan dinga e'tiqod qiladi. Pul birligi — Yangi Tayvan dollari.*

**Geografik joylashuvi va tabiati.** Sharqiy Osiyoda, Tayvan orolida joylashgan davlat. Sohilining uzunligi — 1448 km. Orolning sharqiy sohillari Tinch okeani, shimoli Sharqiy Xitoy dengizi, janubi Janubiy Xitoy dengizi bilan tutashib ketgan. Materikdan orolni

Tayvan bo'g'ozi ajratib turadi. Tayvanning shimolidan janubiga qadar Tayvanshan tog'i joylashgan. Eng yuqori cho'qqisi Yuysan (3997 m). Orolning g'arbiy qismi tekislikdan, sharqiy qismi esa qir-adirlardan iborat. Asosiy daryolari — Chjoshuysi, Donshuyxe. Orolida katta bo'lmagan neft, tabiiy gaz, ko'mir konlari bor. Haydaladigan yerlar 24% ni tashkil etadi.

Iqlimi — musson. Mamlakatning florasi xilma-xil bo'lib, 3800 ga yaqin o'simlik turlari mavjud. 2000 metrgacha bo'lgan balandlikda tropik va subtropik o'rmonlar, 2000 metrdan yuqori balandlikda bargli va ninabargli daraxtlar o'sadi. Hayvonot olami vakillaridan olmaxon, kiyik, formoza qora ayig'i, to'ng'iz kabi 60 ga yaqin sutemizuvchilar uchraydi. Sudraluvchilar va hasharotlar ko'p.

**Davlat tuzilishi, siyosiy partiyalari.** Konstitutsiyaga ko'ra Tayvan respublika hisoblanadi. Tayvanning Xitoydan mustaqil ekanligini jahon hamjamiyati tan olmagan. Ijro etuvchi hokimiyati prezident (davlat boshlig'i) va yun (palata) Bosh vaziriga tegishli. Qonun chiqaruvchi oliy organ — Milliy Majlis (qonun chiqaruvchi yun). Siyosiy partiyalari: Gomindan, Demokratik progressiv partiya, Yangi partiya, Ishchi partiyasi, Sotsial-demokratik partiya.

**Iqtisodi, transport kommunikatsiyalari.** Tayvan iqtisodi barqaror taraqqiyot bilan xarakterlanadi. So'nggi o'ttiz yil ichida YIMning yillik o'sishi o'rtacha 9% ni tashkil etgan. Sanoatining rivojlangan tarmoqlari: elektronika, kimyo, to'qimachilik, oziq-ovqat, kemasozlik, neft sanoati. Qishloq xo'jaligining (YIM — 4%) asosiy ekinlari: sholi, mevalar, choy. Chorvachilik va baliq ovlash rivojlangan. Tashqi savdo bo'yicha Tayvan hozirgi kunda dunyoda 13-o'rinni egallaydi. 2006-yil YIM miqdori 589534 mln dollarni (aholi jon boshiga — 25390 doll.) tashkil etgan. Asosiy savdo sheriklari: AQSH, Yaponiya, YI davlatlari.

Temiryo'llarining umumiy uzunligi — 1600 km, avtomobil yo'llari — 20041 km. Portlari: Gaosyun, Szilun, Xualyan.

**Tarixi.** XVII asrda Tayvanga kirib kela boshlagan xitoyliklar (xan elati) sekin-asta kelib chiqishi malayya-



liklardan bo'lgan mahalliy aholi bilan chatishib ketadi. Tayvan 1590-yilda portugallar tomonidan egallanadi. Portugallar orolga Formoza (ajoyib) deb nom berishadi. 1662—1682-yillarda Tayvan gollandlarga qaram bo'lgan. 1683-yili esa orol Xitoy imperiyasi tarkibiga kirgan. 1895-yilda orolni Yaponiya bosib olgan va 1945-yilgacha orol yaponlarga qaram bo'lgan. 1949-yilgi Xitoy inqilobidan so'ng Chan Kayshi boshliq hukumat orolga qochadi va Chan Kayshi umrining oxirigacha (1975) Tayvan respublikasi prezidenti bo'ladi. 1955-yilda Tayvan AQSH bilan o'zaro xavfsizlik to'g'risida shartnoma imzolaydi.

## TANZANIYA

*Rasmiy nomi – Tanzaniya Birlashgan Respublikasi. Poytaxti – Dodoma. Hududi – 945050 km<sup>2</sup>. Aholisi – 39384223 kishi (2007). Davlat tili – ingliz va suaxili. Dini – islom, xristian va mahalliy dinlar. Pul birligi – tanzaniya shillingi.*

**Geografik joylashuvi va tabiati.** Afrikaning janubi sharqiy qismidagi davlat. Shimolda Keniya (chegaraning uzunligi — 769 km) va Uganda (396 km), janubda Mozambik (756 km), Malavi (475 km) va Zambiya (338 km), g'arbda Burundi (451 km) va Ruanda (217 km) bilan chegaradosh. G'arbda Tanganika ko'li Tanzaniyani Kongo Demokratik Respublikasidan ajratib turadi. Mamlakatning sharqida esa Hind okeani joylashgan. Chegarasining umumiy uzunligi — 3402 km, sohil bo'ylab chegara uzunligi — 1424 km. Sohilbo'yi tekisliklardan iborat. Mamlakat hududining asosiy qismini dengiz sathidan o'rtacha 1200 m baland bo'lgan yassitog'lik tashkil qiladi. Shimoli sharq va janubi g'arbda kichik tog'lar bor. Afrikaning eng baland cho'qqisi — Kilimanjaro vulqoni (5895 m) Keniya bilan chegarada joylashgan. Afrikaning eng yirik uchta ko'llari — Tanganika, Viktoriya, Nyasa — qisman Tanzaniyaga tegishli. Qazilma boyliklardan

Tayvan bo'g'ozini ajratib turadi. Tayvanning shimolidan janubigacha qadar Tayvanshan tog'i joylashgan. Eng yuqori cho'qqisi Yuysan (3997 m). Orolning g'arbiy qismi tekislikdan, sharqiy qismi esa qir-adirlardan iborat. Asosiy daryolari — Chjoshuysi, Donshuyxe. Orolida katta bo'lmagan neft, tabiiy gaz, ko'mir konlari bor. Haydaladigan yerlar 24% ni tashkil etadi.

Iqlimi — musson. Mamlakatning florasi xilma-xil bo'lib, 3800 ga yaqin o'simlik turlari mavjud. 2000 metrgacha bo'lgan balandlikda tropik va subtropik o'rmonlar, 2000 metrdan yuqori balandlikda bargli va ninabargli daraxtlar o'sadi. Hayvonot olami vakillaridan olmaxon, kiyik, formoza qora ayig'i, to'ng'iz kabi 60 ga yaqin sutemizuvchilar uchraydi. Sudraluvchilar va hasharotlar ko'p.

**Davlat tuzilishi, siyosiy partiyalari.** Konstitutsiyaga ko'ra Tayvan respublika hisoblanadi. Tayvanning Xitoydan mustaqil ekanligini jahon hamjamiyati tan olmagan. Ijro etuvchi hokimiyati prezident (davlat boshlig'i) va yun (palata) Bosh vaziriga tegishli. Qonun chiqaruvchi oliy organ — Milliy Majlis (qonun chiqaruvchi yun). Siyosiy partiyalari: Gomindan, Demokratik progressiv partiya, Yangi partiya, Ishchi partiyasi, Sotsial-demokratik partiya.

**Iqtisodi, transport kommunikatsiyalari.** Tayvan iqtisodi barqaror taraqqiyot bilan xarakterlanadi. So'nggi o'ttiz yil ichida YIMning yillik o'sishi o'rtacha 9% ni tashkil etgan. Sanoatining rivojlangan tarmoqlari: elektronika, kimyo, to'qimachilik, oziq-ovqat, kemasozlik, neft sanoati. Qishloq xo'jaligining (YIM — 4%) asosiy ekinlari: sholi, mevalar, choy. Chorvachilik va baliq ovlash rivojlangan. Tashqi savdo bo'yicha Tayvan hozirgi kunda dunyoda 13-o'rinni egallaydi. 2006-yil YIM miqdori 589534 mln dollarni (aholi jon boshiga — 25390 doll.) tashkil etgan. Asosiy savdo sheriklari: AQSH, Yaponiya, Yil davlatlari.

Temiryo'llarining umumiy uzunligi — 1600 km, avtomobil yo'llari — 20041 km. Portlari: Gaosyun, Szilun, Xualyan.

**Tarixi.** XVII asrda Tayvanga kirib kela boshlagan xitoyliklar (xan elati) sekin-asta kelib chiqishi malayya-

liklardan bo'lgan mahalliy aholi bilan chatishib ketadi. Tayvan 1590-yilda portugallar tomonidan egallanadi. Portugallar orolga Formoza (ajoyib) deb nom berishadi. 1662—1682-yillarda Tayvan gollandlarga qaram bo'lgan. 1683-yili esa orol Xitoy imperiyasi tarkibiga kirgan. 1895-yilda orolni Yaponiya bosib olgan va 1945-yilgacha orol yaponlarga qaram bo'lgan. 1949-yilgi Xitoy inqilobidan so'ng Chan Kayshi boshliq hukumat orolga qochadi va Chan Kayshi umrining oxirigacha (1975) Tayvan respublikasi prezidenti bo'ladi. 1955-yilda Tayvan AQSH bilan o'zaro xavfsizlik to'g'risida shartnoma imzolaydi.

## TANZANIYA

*Rasmiy nomi — Tanzaniya Birlashgan Respublikasi. Poytaxti — Dodoma. Hududi — 945050 km<sup>2</sup>. Aholisi — 39384223 kishi (2007). Davlat tili — ingliz va suaxili. Dini — islom, xristian va mahalliy dinlar. Pul birligi — tanzaniya shillingi.*

*Geografik joylashuvi va tabiati.* Afrikaning janubi sharqiy qismidagi davlat. Shimolda Keniya (chegaraning uzunligi — 769 km) va Uganda (396 km), janubda Mozambik (756 km), Malavi (475 km) va Zambiya (338 km), g'arbda Burundi (451 km) va Ruanda (217 km) bilan chegaradosh. G'arbda Tanganika ko'li Tanzaniyani Kongo Demokratik Respublikasidan ajratib turadi. Mamlakatning sharqida esa Hind okeani joylashgan. Chegarasining umumiy uzunligi — 3402 km, sohil bo'ylab chegara uzunligi — 1424 km. Sohilbo'yi tekisliklardan iborat. Mamlakat hududining asosiy qismini dengiz sathidan o'rtacha 1200 m baland bo'lgan yassitog'lik tashkil qiladi. Shimoli sharq va janubi g'arbda kichik tog'lar bor. Afrikaning eng baland cho'qqisi — Kilimanjaro vulqoni (5895 m) Keniya bilan chegarada joylashgan. Afrikaning eng yirik uchta ko'llari — Tanganika, Viktoriya, Nyasa — qisman Tanzaniyaga tegishli. Qazilma boyliklardan

qalay, temir rudasi, ko'mir, fosforitlar, olmos, oltin bor. Mamlakat hududining 5% ini haydaladigan yerlar, 17% ini o'rmon va to'qaylar, o'tloq va yaylovlar 40% ini tashkil etadi.

Iqlimi — ekvatorial musson. O'simlik dunyosining asosini savanna o'simliklari va o'rmonlar tashkil etadi. Hayvonlardan jirafa, oq karkidon, fil, zebra, antilopalar va turli maymunlar uchraydi.

**Davlat tuzilishi, siyosiy partiyalari.** Davlat tuzumi — prezident respublikasi. Mamlakat tarkibiga 25 ta viloyat (20 tasi materikda, 5 tasi orollarda) kiradi. Tanganika mustaqillikka 1961-yilning 9-dekabrda erishadi. 1963-yilning 19-dekabrda esa Zanzibar mustaqillikka erishadi. 1964-yilning 26-aprelida Tanganika Zanzibar bilan birlashadi. 1964-yilning 29-oktabridan bu davlat Tanzaniya Birlashgan Respublikasi deb atala boshlaydi. Milliy bayramlari: 9-dekabr — Mustaqillik e'lon qilingan kun (1961), 26-aprel — Ittifoq kuni (1964). Ijro etuvchi hokimiyat prezident (davlat boshlig'i) va Bosh vazirga tegishli. Qonun chiqaruvchi hokimiyat prezident va Milliy Assambleya (parlament) tomonidan amalga oshiriladi. Siyosiy partiyalari: Inqilobiy partiya (Chama Cha Mapinduzi), Qayta tiklash va taraqqiyot uchun milliy konvensiya, Birlashgan fuqarolar fronti.

**Iqtisodi, transport kommunikatsiyalari.** Tanzaniya iqtisodi sezilarli darajada qishloq xo'jaligi (YIM — 58%) bilan bog'liq. Qishloq xo'jaligi mahsulotlari (asosan qahva, choy, paxta, tamaki, chinnigul) eksportning 85% ini tashkil etadi. Sanoat qishloq xo'jaligi mahsulotlarini qayta ishlash, olmos va neft qazib olish hamda neftni qayta ishlash bilan chegaralangan. 2006-yil YIM miqdori 24181 mln dollarni (aholi jon boshiga — 613 doll.) tashkil etgan. Asosiy savdo sheriklari: Germaniya, Buyuk Britaniya, AQSH, Yaponiya, Italiya.

Temiryo'llarining umumiy uzunligi — 3555 km, avtomobil yo'llari — 81900 km. Portlari: Dor-us-Salom, Mtvara, langa va Zanzibar (okean), Mvenda va Kigoma (daryo).

**Tarixi.** Tanganika sohillari va unga yaqin orollarda

(Zanzibar) VII—VIII asrlardayoq arablar o'rnatishgan edi. 1505-yilda bu hududlarga portugallar kirib keladi, ammo ular o'z ta'sirini XVII asrning oxirlarida yo'qotishadi. XVIII asrda Zanzibar Ummon sultonlariga qaram bo'ladi. Ummon sultonlari 1832-yilda o'z qarorgohlarini Zanzibarga ko'chirishadi. 1856-yilda mustaqil Zanzibar sultonligi tashkil topadi. 1890-yilda sultonlik Britaniya protektorati deb e'lon qilindi. Mamlakatning bantu qabilalari istiqomat qiladigan markaziy viloyatlarini mustamlakaga aylantirish XIX asrda inglizlar va nemislar tomonidan boshlanadi. 1885-yilda Tanganika hududida Germaniya Sharqiy Afrikasi Kompaniyasiga asos solinib, 1891-yilda bu hududlar Germaniya mustamlakasiga aylantiriladi. 1920-yilda Millatlar Ligasi Tanganikani boshqarish mandatini Buyuk Britaniyaga topshirdi. 1947-yilda bu yerlar BMT otalig'idagi hududlar maqomini oladi. Tanganika (1961) va Zanzibar (1963) mustaqillikka erishgandan so'ng 1964-yilning aprelida yagona davlat Tanzaniya tashkil topadi.

## TERKS VA KAYKOS OROLLARI

*Rasmiy nomi – Terks va Kaykos orollari (Buyuk Britaniya mulki). Poytaxti – Kokbern Taun. Hududi – 430 km'. Aholisi – 21304 kishi (2007). Davlat tili – ingliz. Dini – xristianlik (aholining ko'p qismi protestantlar). Pul birligi – AQSH dollari.*

**Geografik joylashuvi va tabiati.** Atlantika okeanida Bagam orollari arxipelagining janubi sharqiy qismida, Shimoliy va Janubiy Amerika o'rtasida joylashgan, 30 oroldan iborat (shulardan 8 tasida odam yashaydi). Orollar marjonli ohaktoshlar bilan qoplangan, qoyalar bilan o'ralgan. Terks va Kaykos orollarini Terks-Aylend qo'ltig'i ajratib turadi.

Iqlim — tropik, passatli. Orollarda mangozorlar, qarag'ayli o'rmonlar bor. To'tiqush, kolibri va boshqa turdagi qushlar yashaydi, hasharotlar ko'p.

**Davlat tuzilishi va siyosiy partiyalari.**

Davlat tuzilishi — Buyuk Britaniyaning dengizorti hududi. Mulkni Buyuk Britaniya qirolichasi tomonidan tayinlanadigan gubernator boshqaradi. Ma'muriy-hududiy jihatdan bo'linmagan. Siyosiy partiyalari: Xalq demokratik harakati, Milliy taraqqiyot partiyasi.

**Iqtisodi, transport kommunikatsiyalari.** Qurilish materiallari ishlab chiqaradigan, baliq konserva mahsulotlar tayyorlaydigan korxonalar bor. Makajo'xori, meva-sabzavotlar, agava yetishtiriladi. Asosiy savdo hamkorlari: AQSH, Buyuk Britaniya, Yamayka.

2006-yil YIM miqdori 216 mln dollarni (aholi jon boshiga — 1038 doll.) tashkil etgan. Asosiy portlari: Kokbern-Taun, Providensyales, Sol-Key, Kokbern-Xarbor.

**Tarixi.** Orollar 1512-yilda ispanlar tomonidan kashf etilgan va bu yerda odam yashamagan. XVII asrda bu yerga Bermud orollaridan mustamlakachilar kelib joylasha boshlagan. 1766-yilda orollar Buyuk Britaniya tasarrufiga o'tgan, lekin 1873-yildan 1962-yilgacha Yamayka tarkibida bo'lgan. 1959-yilda ichki o'z-o'zini boshqarish huquqiga ega bo'ldi.

## TOGO

*Rasmiy nomi — Togolez Respublikasi. Poytaxti — Lome. Hududi — 56785 km<sup>2</sup>. Aholisi — 5695136 kishi (2007). Davlat tili — fransuz. Dini — mahalliy dinlar (50%), xristianlik (35%), islom (15%). Pul birligi — Afrika franki.*

**Geografik joylashuvi va tabiati.** Afrikaning g'arbida joylashgan davlat. G'arbda Gana (chegaraning uzunligi — 877 km), sharqda Benin (644 km), shimolda Burkina-Faso (126 km) bilan chegaradosh. Janubda mamlakat sohillari Gvineya ko'rfazining suvlari bilan yuviladi. chegaraning umumiy uzunligi — 1647 km. Sohilining uzunligi — 56 km. Sohilbo'ylari pasttekstlikdan iborat. Mamlakat shimolida kichik tepaliklari mavjud savannalar joylashgan. Markaziy qism qirdirlardan iborat. Janubda balandligi 986 metrgacha

bo'lgan yassitog'liklar joylashgan. Asosiy daryo — Mono. Tabiiy boyliklari: fosforitlar, marmar. Haydaldigan yerlar hududning 25% ini, qolgan hududlarini o'rmon va to'qaylar tashkil etadi.

Iqlimi — subekvatorial. Mamlakatning janubiy qismida kokos palmalari bilan baobablar o'sadi. Markaziy va shimoliy qismlarda savanna o'simliklari o'sadi. Hayvonot olami qoplon, fil, begemot, arslon, antilopa, timsoh va maymunlardan iborat.

**Davlat tuzilishi, siyosiy partiyalari.** Davlat tuzilishi — respublika. Togo 1960-yilning 27-aprelida mustaqillikka erishadi (avval Fransiya mustamlakasi). Milliy bayrami — 27-aprel (Mustaqillik kuni). Ijro etuvchi hokimiyat prezident (davlat boshlig'i) va Vazirlar Kengashini boshqaradigan Bosh vazirga tegishli. Mamlakatda ro'yxatdan o'tgan 40 dan oshiq siyosiy partiyalardan eng yiriklari — Adolat va demokratiya uchun ittifoq, Demokratik oppozitsiya jamoasi (KOD-2), Yangilanish uchun faoliyat qo'mitasi (KAR), Togolez xalqi birlashmasi (RPT).

**Iqtisodi, transport kommunikatsiyalari.** Iqtisodning asosiy sektori — qishloq xo'jaligi (YIM — 35%). Qishloq xo'jaligida mehnatga layoqatli aholining 78%i band. Eksport umumiy hajmining taxminan uchdan bir qismi kakao, qahva, paxtaga to'g'ri keladi. Sanoatning asosiy tarmog'i — fosforitlarni qazib olish (eksportning 40%i). 2006-yil YIM miqdori 8541 mln dollarni (aholi jon boshiga — 1500 doll.) tashkil etgan. Asosiy savdo hamkorlari: YI, Afrika davlatlari, AQSH, Yaponiya.

Temiryo'llarining umumiy uzunligi — 515 km, avtomobil yo'llari — 662 km. Porti — Lome.

**Tarixi.** Hozirgi Togoning sohilbo'yi hududlari portugallar tomonidan XVI asrda kashf etiladi. XVIII asrda bu hudud G'arbiy Afrika qul savdosining asosiy savdo markazlaridan biriga aylanadi. 1884-yilda Togo Germaniyaning protektorati deb e'lon qilinadi. Birinchi jahon urushi davrida Togo britan va fransuz qo'shinlari tomonidan egallanadi. 1919-yildan Buyuk Britaniya va Fransiyaning hamkorligidagi boshqaruvi ostida qoladi. 1956-yilda Togoning Britaniya qismi

Oltin Qirg' oq (hozirgi Gana) tarkibiga kiradi, Fransiya Togosi esa muxtoriyatga erishadi. 1960-yilda Fransiya Togosi o'z mustaqilligini e'lon qildi. Togo Respublikasida 1960-yildan keyin bir necha bor harbiy davlat to'ntarishlari bo'lib o'tdi. 1991-yildan beri mamlakatda fuqarolik hukumati o'rnatilgan.

## TOJIKISTON

*Rasmiy nomi — Tojikiston Respublikasi. Poytaxti — Dushanbe. Hududi — 143100 km<sup>2</sup>. Aholisi — 7090904 kishi (2007). Davlat tili — tojik. Dini — islom. Pul birligi — somoniy.*

**Geografik joylashuvi va tabiati.** Markaziy Osiyoda joylashgan davlat. Janubda Afg'oniston (chegaraning uzunligi — 1206 km), shimol va g'arbda O'zbekiston (1161 km), shimolda Qirg'iziston (870 km), sharqda Xitoy (414 km) bilan chegaradosh. Chegaralarining umumiy uzunligi — 3651 km. Tojikiston hududining 90% dan oshig'ini tog'lar tashkil qilib, mamlakat hududining yarmidan oshig'i dengiz sathidan 3000 m balandlikda joylashgan. Tojikistonning shimoli g'arbiy va markaziy qismlarida Zarafshon, Turkiston, Hisor, Oltoy tog' tizmalari, janubi sharqida Pomir tog' tizmasi joylashgan. Eng baland cho'qqisi 7498 m. Tog' tizmalari bir-biridan vodiylar bilan ajralgan. Yirik vodiylari — Hisor va Vaxsh. Asosiy daryolari — Sirdaryo, Amudaryo. Yirik ko'li — Qorako'l. Asosiy tabiiy boyliklari: neft, gaz, ko'mir, uran, gidroresurslarga boy.

Iqlimi — kontinental. O'simlik dunyosi boy. Yaylov va tog'oldi o'simliklari, archa, yong'oq, olcha, jiyda ko'plab o'sadi. Shoqol, jayra, quyon, xongul, to'ng'iz, yovvoyi mushuk, qor barsi, arxar, yovvoyi parrandalar, kaltakesak, ilonlar (kapcha, gyurza, efa) faunasining asosini tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga Sug'd va Xatlon viloyatlari hamda Tog'li Badaxshon viloyati



kiradi. 1991-yil 9-sentabrda Tojikiston mustaqilligi e'lon qilinib, ushbu kun milliy bayram — Mustaqillik kuni deb qabul qilingan. Ijro etuvchi hokimiyat prezident (Oliy Kengashning raisi) va Bosh vazir boshchiligidagi Vazirlar Mahkamasiga tegishli. Qonun chiqaruvchi oliy organ — Oliy Kengash. Eng yirik siyosiy partiyalari: Erkin mehnat partiyasi, Tojikiston xalq partiyasi, Kommunistik partiya.

***Iqtisodi, transport kommunikatsiyalari.***

Tojikiston — agrar-industrial davlat. Fuqarolar urushi natijasida Tojikiston iqtisodi chuqur inqirozni boshidan kechirmoqda. Hukumat bozor munosabatlariga o'tishni qo'llayapti. Lekin mamlakat iqtisodida davlat ulushi hanuzgacha asosiydir. Kimyo, yengil sanoat, rangli metallurgiya, mashinasozlik, oziq-ovqat sanoatlari yaxshi rivojlangan. Qishloq xo'jaligining asosiy tarmog'i paxtachilikdir (paxta tolasi asosiy eksport mahsulotidir). Paxtachilikdan tashqari ipakchilik, bog'dorchilik, sabzavotlar va uzum yetishtirish yaxshi yo'lga qo'yilgan. 2006-yil YIM miqdori 7673 mln dollarni (aholi jon boshiga — 1082 doll.) tashkil etgan. Asosiy savdo sheriklari: Rossiya, O'zbekiston, Qirg'iziston, Turkmaniston.

Temiryo'llarining umumiy uzunligi — 480 km, avtomobil yo'llari — 29900 km.

***Tarixi.*** Hozirgi Tojikiston hududi m. a. VI asrda Ahamoniylar davlati tarkibiga, m. a. IV asrda esa makedoniyalik Iskandar imperiyasi tarkibiga kirgan. M. a. III asrdan Grek-Baqtriya, keyinroq Kushon davlatiga qaram bo'lgan. VIII asrda hozirgi Tojikiston hududiga arablar bostirib kiradi. IX—X asrlarda bu hududlar Samoniylar davlati, XII asrda Xorazmshohlar davlati, XIII asrda Mo'g'ullar davlati, XIV asrning ikkinchi yarmida Temur va temuriylar davlatiga qaram bo'lgan. XVI asrdan XIX asrning ikkinchi yarmigacha Buxoro xonligi (amirligi) tarkibiga kirgan. 1868-yili Rossiya imperiyasi hozirgi Tojikiston hududlarini bosib oladi. 1917-yilgi davlat to'ntarishidan so'ng Tojikiston hududida sovet hokimiyati o'rnatiladi. 1924-yildan Tojikiston ASSR O'zbekiston SSR tarkibiga kiradi. 1929-yildan

Tojikiston SSR maqomini oladi. 1991-yili mustaqillikka erishgandan so'ng Tojikistonda fuqarolar urushi boshlanadi. Hozirgi kunda Tojikiston demokratik jamiyat qurish yo'lidan bormoqda.

## TONGA

*Rasmiy nomi – Tonga Qirolligi. Poytaxti – Nukualofa. Hududi – 748 km<sup>2</sup>. Aholisi – 116973 kishi (2007). Davlat tili – tonga va ingliz. Dini – protestantlik (50%), katolik. Pul birligi – paanga.*

**Geografik joylashuvi va tabiati.** Tinch okeanning janubi g'arbiy qismidagi davlat. 150 dan oshiq orollarda joylashgan. Sohillarining umumiy uzunligi – 419 km. Orollarning aksariyati korallardan, qolganlari – vulqon natijasida vujudga kelgan.

Iqlimi – tropik. Tonganing o'simlik dunyosi asosan daraxtsimon paporotnik va kazuarinlarning tropik o'rmonlaridan iborat. Hayvonot dunyosini kaltakesaklar, ilonlar va hasharotlar tashkil etadi.

**Davlat tuzilishi, siyosiy partiyalari.** Davlat tuzumi – konstitutsion monarxiya. Tonga mustaqillikka 1970-yilning 4-iyunida erishdi (avval Buyuk Britaniya mustamlakasi). 4-iyun – Milliy bayrami (Mustaqillik kuni). Davlat boshlig'i – monarx. Ijro etuvchi hokimiyat Bosh vazir boshchiligidagi Vazirlar Mahkamasiga tegishli. Qonun chiqaruvchi oliy organ – qonun chiqaruvchi Assambleya (bir palatali parlament). Siyosiy partiyalari: Inson huquqlari uchun harakat, Xalq partiyasi.

**Iqtisodi, transport kommunikatsiyalari.** Iqtisodining asosiy tarmog'i qishloq xo'jaligidir (YIM – 50%). Kokos yong'og'i, banan, vanil donalari umumiy eksport hajmining 2/3 qismini tashkil etadi. Baliqchilik rivojlangan, oziq-ovqat mahsulotlari chet eldan, asosan Yangi Zelandiyadan import qilinadi. Sanoat sohasi YIMning 11% ini tashkil etadi. Chet el valutasini keltiradigan asosiy manba turizmdir. 2006-yil YIM miqdori 737 mln dollarni (aholi jon boshiga –

630 doll.) tashkil etgan. Asosiy savdo sheriklari: Yangi Zelandiya, Avstraliya, AQSH, Yaponiya.

Avtomobil yo'llarining umumiy uzunligi — 198 km. Asosiy porti — Nukualofa.

**Tarixi.** Aholisi polineziyaliklardan iborat bo'lgan hozirgi Tonga hududiga kiruvchi orollar 1616-yilda gollandlar tomonidan kashf etiladi. Uzoq davom etgan to'qnashuvlardan so'ng Tonga 1845-yilda mustaqil qirollikka aylanadi. Lekin 1900-yilda Tonga Buyuk Britaniya protektorati deb e'lon qilinadi. 1970-yilda Tonga mustaqillikka erishdi. Tonga Britaniya hamdo'stligi tarkibiga kiradi.

## TRINIDAD VA TOBAGO

*Rasmiy nomi* — *Trinidad va Tobago Respublikasi*. *Poytaxti* — *Port of Speyn*. *Hududi* — 5130 km<sup>2</sup>. *Aholisi* — 1081528 kishi (2007). *Davlat tili* — ingliz. *Dini* — katolik (32%), induizm (24%), anglikan (14%), boshqa protestant dinlari (14%), islom (6%). *Pul birligi* — *trinidad va tobago dollari*.

**Geografik joylashuvi va tabiati.** Karib dengizi havzasida, Trinidad, Tobago va bir qator mayda orollarda joylashgan davlat. Sohilining uzunligi — 362 km. Mamlakat hududining asosini kam sonli qir va past tog'lardan iborat tekisliklar tashkil etadi. Asosiy tabiiy boyliklari: neft va tabiiy gaz. Haydaladigan yerlar mamlakat hududining 14%ini, o'rmon va to'qaylar 44%ini tashkil etadi.

**Iqlimi** — subekvatorial. Trinidadning sharqiy qismida tropik o'rmonlar bo'lib, bu o'rmonlarda ispan kedri, maxogoni, qizil sandal, balsa kabi daraxtlar o'sadi. Butalardan bugenvill, puyya, yovvoyi poynssettiya keng tarqalgan. Pekari, otsetlot, opossum, agupi, maymunlar, ko'rshapalaklar orolning hayvonot dunyosini tashkil etadi. Toshbaqa, kaltakesak, ilonlar ko'p. Timsohlar uchraydi. Orollda kolibrning 40 dan ortiq turi bor.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga 9 graflik kiradi. Trinidad va Tobago mustaqillikka 1962-yilning 31-avgustida erishdi (ilgari Buyuk Britaniyaning mustamlakasi bo'lgan). Bu sana milliy bayram hisoblanadi (Mustaqillik kuni). Ijro etuvchi hokimiyat prezident (davlat boshlig'i) va Bosh vazir boshchiligidagi hukumatga tegishli. Qonun chiqaruvchi Oliy organi ikki palatali parlament. Parlament yuqori — Senat va quyi — Vakillar palatalaridan iborat. Yirik siyosiy partiyalari: Milliy xalq harakati, Birlashgan Milliy kongress, Birlik va taraqqiyot uchun harakat.

**Iqtisodi, transport kommunikatsiyalari.** Trinidad va Tobagoning iqtisodi asosini neft qazib chiqarish (YIMning choragini, umumiy eksport hajmining 80%ini tashkil etadi. Qishloq xo'jaligining (YIM — 5%) asosiy ekinlari: kakao donlari, qahva, shakarqamish, sitruslar. 2006-yil YIM miqdori 15761 mln dollarni (aholi jon boshiga — 14572 doll.) tashkil etgan. Asosiy savdo sheriklari: AQSH, Venesuela, Karib havzasi davlatlari, YI davlatlari.

Avtomobil yo'llarining umumiy uzunligi — 8000 km (4000 km asfaltlangan). Mamlakatning asosiy porti — Port-of-Speyn.

**Tarixi.** Trinidad oroli 1498-yilda Kolumb tomonidan kashf etiladi. Orol 1552-yilda Ispaniya, 1797-yilda Buyuk Britaniya mustamlakasiga aylanadi. Tobago oroli gollandlar tomonidan 1632-yilda mustamlakaga aylantiriladi. Keyinchalik orolga egalik qilish huquqi fransuzlarga o'tadi. 1814-yilda Napoleon mag'lubiyatga uchragach, orol Buyuk Britaniya mustamlakasiga aylanadi. 1888-yilda ikki orolning boshqaruvi birlashtiriladi. 1950-yilda Trinidad va Tobago o'zini o'zi boshqaruv huquqiga ega bo'ladi. 1962-yilda Trinidad va Tobago Britaniya hamdo'stligi tarkibidagi mustaqil davlatga aylanadi. 1976-yilda Trinidad va Tobagoda respublika tuzumi o'rnatildi.

## TUVALU

*Rasmiy nomi – Tuvalu. Poytaxti – Funafuti. Hududi – 26 km<sup>2</sup>. Aholisi – 11989 kishi (2007). Davlat tili – tuvalu va ingliz. Dini – protestantlik. Pul birligi – avstraliya dollari va tuvalu dollari.*

**Geografik joylashuvi va tabiati.** Tinch okeanining janubi g'arbiy qismidagi davlat. Sohilining umumiy uzunligi – 24 km. Shimoli g'arbdan janubi sharqqa tomon 600 km uzunlikdagi masofada joylashgan 9 ta marjon (korall) orollar Tuvaluni tashkil etadi. Asosiy orol – Funafuti. Asosiy tabiiy boyligi – baliq.

Iqlimi – subekvatorial. O'simlik dunyosi asosan paporotnik va mangozorlardan iborat. Hayvonot dunyosini cho'chqa, it, kalamush, dengiz qushlari, kaltakesaklar tashkil etadi.

**Davlat tuzilishi, siyosiy partiyalari.** Davlat tuzilishi – konstitutsion monarxiya. Britaniya hamdo'stligi tarkibidagi mustaqil davlat. Tuvalu mustaqillikka 1918-yilning 1-oktabrida erishdi (avvalgi nomi – Ellis orollari). 1-oktabr – Milliy bayram (Mustaqillik kuni). Davlat boshlig'i – Britaniya monarxi (hozirgi kunda qirolicha Yelizaveta II). Ijro etuvchi hokimiyat Britaniya monarxining vakili – general-gubernator va hukumat boshlig'i Bosh vaziriga tegishli. Qonun chiqaruvchi hokimiyat bir palatali parlament tomonidan amalga oshiriladi. Siyosiy partiyalari yo'q.

**Iqtisodi, transport kommunikatsiyalari.** Iqtisodi asosan baliqchilik va qishloq xo'jaligi mahsulotlarini qayta ishlashdan iborat. Eksport qilinadigan asosiy mahsulotlari – kokos yong'og'i va kopra (kokos yong'og'ining mag'zi). Turizmning rivojlanishiga orollarning juda uzoqda joylashganligi to'sqinlik qiladi. Hukumat marka va tangalar sotishdan ham katta daromad oladi. 2006-yil YIM miqdori 12 mln dollarni (aholi jon boshiga – 1000 doll.) tashkil etgan. Asosiy savdo sheriklari: Fiji, Avstraliya, Yangi Zelandiya.

Avtomobil yo'llarining umumiy uzunligi – 8 km. Portlari: Funafuti, Nukufetau.

**Tarixi.** Nikunua oroli ingliz J. Bayron tomonidan 1764-yilda kashf etiladi. Hozirgi Tuvalu hududini tashkil etuvchi qolgan orollar 1788-yilda Gilbert tomonidan kashf etiladi. 1892-yilda Gilbert va Ellis orollari Britaniyaning protektorati deb eʼlon qilinadi. 1915-yilda bu orollar Buyuk Britaniyaning mustamlakasiga aylanadi. 1974-yilda oʻtkazilgan referendum natijasiga koʻra Ellis orollari Tuvalu deb nomlangan mustaqil davlatga aylanadi. Gilbert orollari 1979-yilda mustaqillikka erishib Kiribati Respublikasini tashkil etadi.

## TUNIS

*Rasmiy nomi – Tunis Respublikasi. Poytaxti – Tunis. Hududi – 164150 km<sup>2</sup>. Aholisi – 10299331 kishi (2007). Davlat tili – arab. Davlat dini – islom. Pul birligi – tunis dinori.*

**Geografik joylashuvi va tabiati.** Shimoiy Afrikada joylashgan davlat. Gʻarbda Jazoir (chegaraning uzunligi – 965 km), janubda Liviya (459 km) bilan chegaradosh. Shimol va sharqdan mamlakat sohillarini Oʻrtayer dengizining suvlari yuvib turadi. Chegaraning umumiy uzunligi – 1424 km. Sohilining uzunligi – 1148 km. Mamlakat hududining 1/3 qismini Atlas togʻlari va mamlakat shimolidagi balandligi 1520 metrgacha boʻlgan yassitogʻlik tashkil etadi. Markaziy qismida ayrimlari dengiz sathidan pastda joylashgan shoʻr koʻllar (shott yoki chott) mavjud boʻlgan tekislik va pasttekisliklar bor. Janubda Sahroi Kabirning shimoliy qismi joylashgan. Asosiy daryosi – Majarda. Tunisda neft, temir rudasi, fosforitlar, qoʻrgʻoshin konlari bor.

Iqlimi – subtropik. Mamlakat shimolida agava, opunsa, yovvoyi zaytun, eman oʻsadi. Janubda tikanli butalar, lishayniklar, sahro daraxtlaridan talxa va etal oʻsadi. Yirik hayvonlardan Tunisda qora qoplon, togʻ qoʻyi uchraydi. Sahroda qoraxal silovsin, yovvoyi mushuk, gepard, shoqol, tulki kabi yirtqichlar, kichik gekkonlar, echkiemalar, ilonlar (qum boʻgʻma iloni,

efa, shoxdor qora ilon) uchraydi. Ayrim yillarda mamlakat hududi chigirtka bosqiniga duchor bo'ladi.

**Davlat tuzilishi, siyosiy partiyalari.** Davlat tuzilishi — prezident respublikasi. Davlat 20 provin-siyaga bo'lingan. O'z navbatida provinsiya 212 tumanni o'z ichiga oladi. Tunis 1956-yil 20-martda mustaqillikka erishadi (avval Fransiya mustamlakasi bo'lgan). 20-mart milliy bayram (Mustaqillik kuni) hisoblanadi. Qonunchiligi fransuz fuqarolik umumiy huquqiga va islom qonunlariga asoslangan. Davlat boshlig'i — prezident. Prezident Bosh vazir va huku-matni tayinlaydi. Qonun chiqaruvchi hokimiyat Deputatlar palatasi (bir palatali parlament)ga tegishli. Eng yirik siyosiy partiyalari: Demokratik konstitutsion uyushma, Yangilanish harakati, Demokratlar va sotsia-listlar harakati, Xalq birligi partiyasi, Progressiv sotsia-listik harakat.

**Iqtisodi, transport kommunikatsiyalari.** Tabiiy boyliklarga boy emasligiga qaramasdan, Tunis Afrikaning taraqqiy etgan davlatlari qatoriga kiradi. 2006-yil YIM miqdori 76508 mln dollarni (aholi jon boshiga — 7428 doll.) tashkil etgan. Haydaladigan yerlar hududining 20% ni, o'tloq va yaylovlar 19%ni tashkil etadi. Sanoatning eng rivojlangan tarmoqlari: tog'-kon (fosforitlar), to'qimachilik, oziq-ovqat. Qish-loq xo'jaligi (YIM — 16%) mamlakatni 80% ga oziq-ovqat mahsulotlari bilan ta'minlaydi. Qishloq xo'jaligida bug'doy, arpa yetishtirish va zaytun moyini ishlab chiqarish muhim o'rin egallaydi. Jadal rivojlanayotgan turizm iqtisodining asosiy tarmoqlari-dan biriga aylan-moqda. Asosiy savdo sheriklari: YI davlatlari, Yaqin Sharq davlatlari, AQSH, Jazoir.

Temiryo'llarining umumiy uzunligi — 2115 km, avtomobil yo'llari — 33000 km. Portlari: Bizerta, Sus, Tunis.

**Tarixi.** M. a. XII asrdayoq Tunis sohillarida dast-labki Finikiya koloniyalari, eng mashhuri Karfagen vujudga keladi. Mamlakatning markaziy qismlarida esa barbar qabilalari yashagan. M. a. VI asrda Karfagen imperiyasi o'z qudratining cho'qqisiga ko'tariladi. M. a. 146-yilda Karfagen qadimgi Rim bilan kurashda qulay-

di. Qadimgi Rim bu hududga lotin tili va Rim madaniyatini, III asrda esa xristianlikni olib kiradi. V asrda vandallar tomonidan egallanib talon-taroj qilingan hozirgi Tunis hududi 633-yilda Vizantiya imperiyasi tarkibiga kiradi. 647-yildan Tunisga arablar bostirib kiradi va o'z hokimiyatini o'rnatadi. IX—XII asrlarda Tunisda abbosiylar va fatimiylarning sharqiy sulolalari hukmronlik qiladi. 1159—1160-yillarda Abdulmo'min Shimoliy Afrikaning g'arbiy qismidagi musulmonlarni o'ziga bo'sundiradi va barbarlarning almuxiylar sulolasiga asos soladi. 1574-yilda Tunis hududi turklar tomonidan egallanib, XIX asrning oxirlariga qadar Usmoniylar imperiyasi tarkibiga kiradi. 1830-yilda Yevropa davlatlari bu hududga intervensiya uyushtirishadi. XIX asrning oxirida Tunis Fransiyaga qaram bo'ladi. Lekin bey rasman davlat boshlig'i hisoblangan. 1925-yilda Dastur partiyasining tuzilishidan boshlangan ozodlik kurashi natijasida Tunis 1956-yilning mart oyida mustaqillikka erishadi. 1957-yilning 25-iyulida Habib Burg'iba beyni hokimiyatdan chetlashtirib, Tunisni respublika deb e'lon qiladi. 1958—1963-yillarda fransuz qo'shinlari Tunis hududida xarbiy harakatlarni amalga oshirgan. XX asrning 70-yillarida neft zaxiralari hisobiga mamlakatning iqtisodiy rivojlanishi jadallashdi. XXI asr bo'sag'asida Tunisda islom fundamentalistlariga qarshi jiddiy kurash olib borildi.

## TURKIYA

*Rasmiy nomi — Turkiya Respublikasi. Poytaxti — Anqara. Hududi — 779452 km<sup>2</sup>. Aholisi — 71211981 kishi (2007). Davlat tili — turk. Dini — islom. Pul birligi — turk lirasini.*

**Geografik joylashuvi va tabiati.** Janubi g'arbiy Osiyo (hududining katta qismi) va Janubi sharqiy Yevropada joylashgan davlat. Mamlakatning Yevropa va Osiyodagi hududlarini bir-biridan Bosfor, Dardanell bo'g'ozlari hamda Marmar dengizi ajratib turadi. Janubda Suriya (chegaraning uzunligi — 822 km) va Iroq (331 km), sharqda Eron (499 km), shimoli



sharqda Armaniston (268 km), Gruziya (252 km), Ozarbayjon (Naxichevan viloyati — 9 km), shimoli g'arbda Bolgariya (240 km) va Gretsiya (206 km) bilan chegaradosh. Shimolda Qora dengiz, g'arbda va janubi g'arbda O'rtayer dengizi joylashgan. Chegarasining umumiy uzunligi — 2627 km. Sohil bo'ylab chegara uzunligi — 7200 km. Hududining katta qismini Kichik Osiyo va Armon tog'liklari egallagan. Mamlakatning eng baland cho'qqisi Katta Ararat tog'idir (5165 km). Mamlakatning markaziy qismida Anatoliya yassitog'ligi, janubda Tavr tog'lari, shimolda Pont tog'lari joylashgan. Asosiy daryolari: Frot, Dajla, Qizil Irmoq. Yirik ko'llari: Van, Tuz (sho'r ko'llar). Turkiyada ko'mir, temir rudasi, xrom, mis konlari bor. Haydalanadigan yerlar mamlakat hududining 30% ini, o'rmon va to'qaylar 26% ini, yaylov va o'tloqlar 12% ni tashkil etadi.

Iqlimi — subtropik, g'arbiy va janubiy sohilla O'rtayer dengizi iqlimiga xos, mamlakat ichkarisida kontinental. Turkiyaning florasida boy bo'lib, unda o'simliklarning 6700 turi uchraydi. Shularning uchdan bir qismi Turkiya hududidan boshqa joyda uchramaydi. Ohu, to'ng'iz, qoplon, ayiq, bo'rsiq, mufon, kemiruvchilar, Kichik Osiyo qora iloni, O'rtayer dengizi toshbaqasi, kaltakesak, agamalar hayvonot dunyosining asosini tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga 75 ta viloyat kiradi. 1923-yilning 29-oktabridan respublika hisoblanadi (avval — Usmoniylar imperiyasi). 29-oktabr milliy bayrami — Respublika e'ton qilingan kun. Ijro etuvchi hokimiyat prezident (davlat boshlig'i), Prezident Kengashi va Bosh vazirga tegishli. Qonun chiqaruvchi hokimiyatni bir palatali parlament Buyuk millat majlisi amalga oshiradi. Yirik siyosiy partiyalari: To'g'ri yo'l partiyasi, Sotsial-demokratik xalq partiyasi, Vatan partiyasi.

**Iqtisodi, transport kommunikatsiyalari.** Turkiya hozirgi kunda iqtisodiy jihatdan taraqqiy etgan davlatlar qatoriga kiradi. Sanoatining rivojlangan tarmoqlari: tog'-kon (ko'mir, xromit, mis, bor), metallurgiya, neft, to'qimachilik, oziq-ovqat, qurilish. Qishloq

xo'jaligida (YIM — 18%) tamaki, paxta, donli o'simliklar, dukkakkilar, sitruslar, qandlavlagi yetishtiriladi. Chorvachilik rivojlangan. Turkiya oziq-ovqatga bo'lgan ehtiyojini o'zi qoplaydi. Turizm rivojlangan. 2006-yil YIM miqdori 552990 mln dollarni (aholi jon boshiga — 7765 doll.) tashkil etgan. Asosiy savdo sheriklari: Germaniya, AQSH, Rossiya, Buyuk Britaniya.

Temiryo'llarining umumiy uzunligi — 8401 km, avtomobil yo'llari — 49615, ichki suv yo'llari — 1200 km. Asosiy portlari: Istanbul, Izmir.

**Tarixi.** Hozirgi Turkiya hududida m. a. 1900-yilda Xett davlati, m. a. XII asrda Frigiya, m. a. VII asrda Lidiya davlatlari vujudga keladi. M. a. VI asrda bu hududlar forslar davlati, m. a. 333-yildan makedoniya-lik Iskandar tomonidan bosib olinadi. M. a. II asrda Rim imperiyasi tarkibiga kiradi. V asrda hozirgi Turkiya hududlari Vizantiya imperiyasi tarkibiga kiradi. XI asrda Turkiya hududlarini saljuqiylar egallab, Egey dengizidan Turkistongacha bo'lgan hududlarda ulkan imperiya tashkil qilinadi. XIII asrning oxirida Saljuqlar davlati bir nechta kichik davlatlarga bo'linib ketadi. XIV asrda Usmoniylar barcha kichik davlatlarni birlashtirishga erishadi. 1453-yilda Vizantiyaning poytaxti Konstantinopol (Istanbul) zabt etiladi. Sulaymon davrida (1520—1566) Usmoniylar Janubiy Yevropa, O'rta Sharq va Shimoliy Afrika (Marokashdan tashqari)ni bo'ysundiradilar. XVII asrning boshlarida Usmoniylar davlati o'z qudratini yo'qota boshlaydi va Bolqon hamda Arabiston yarimorollaridagi ozodlik kurashlariga yetarli qarshilik ko'rsata olmaydi. XIX asrning oxiri XX asrning boshlarida Usmoniylar imperiyasi hudud jihatidan ancha qisqaradi. I jahon urushidan so'ng Usmoniylar davlati barcha mustamlakalaridan ayriladi. Sulton Mahmud VI tomonidan imzolangan Sevr shartnomasidan (1920) norozi bo'lgan Mustafa Kamol 1918-yilda Turkiyaga bostirib kirgan yunon qo'shinlariga qarshi kurashni boshlaydi. 1923-yilda Mustafa Kamol Otaturk Turkiyani Respublika deb e'lon qiladi va 1938-yilga qadar mamlakatni boshqaradi. Ikkinchi jahon urushi davrida Turkiya o'z neytralitetini e'lon qiladi. 1959-yilda Kipr mojarosi natijasida turk-yunon munosabatlari

yomonlashadi. 1974-yilda Turkiya qo'shinlari tomonidan Kipr orolining bir qismi bosib olinishi ikki davlat o'rtasidagi munosabatlarni yanada keskinlashtiradi. Iqtisodiy inqirozlar natijasida 1971 va 1980-yillarda harbiylar hokimiyatni egallashadi. Hozirgi kunda Turkiya hukumatining asosiy muammolaridan biri mustaqil Kurdiston davlatini tuzishga harakat qilayotgan kurdlar masalasidir.

## TURKMANISTON

*Rasmiy nomi – Turkmaniston Respublikasi. Poytaxti – Ashxobod. Hududi 488100 km<sup>2</sup>. Aholisi – 5142459 kishi (2007). Davlat tili – turkman. Dini – islom. Pul birligi – manat.*

**Geografik joylashuvi va tabiati.** Markaziy Osiyodagi davlat. Shimolda va sharqda O'zbekiston (chegaraning uzunligi — 1621 km), shimolda Qozog'iston (379 km), sharqda va janubda Afg'oniston (744 km), janubda Eron (922 km) bilan chegaradosh. G'arbda mamlakat Kaspiy dengizining suvlari bilan tutashgan. Chegarasining umumiy uzunligi — 3736 km. Sohilining uzunligi — 1768 km. Mamlakat hududining katta qismi pasttepalik bo'lib, unda Qoraqum sahrosi joylashgan. Sahroning maydoni — 375 ming kv. km. Mamlakatning shimoli g'arbida Kaspiy dengizi bo'yida Qora Bo'g'oz — Ko'l ko'rfazi joylashgan. Ko'rfaz dengiz sathidan 35 m past. Janub va janubi g'arbda Kopetdog' tog'lari bor. Yirik ko'l — Sariqamish sho'r ko'li. Asosiy daryo — Amudaryo. Turkmaniston neft, gaz, kaliy va osh tuzlari, rangli va noyob metallarga boy. Haydaladigan yerlar mamlakat hududining 2% ini, yaylovlar 69% ini tashkil etadi.

Iqlimi — keskin kontinental. O'simlik dunyosini cho'l va adir o'simliklari tashkil etadi. Sahroda jayron, shoqol, tulki, echkilar, kapcha iton, agama, tekislik va tog'larda tog' echkisi, gurza, toshbaqa, turli kemiruvchilar yashaydi.

**Davlat tuzilishi, siyosiy partiyalari.** Davlat

tuzilishi — prezident respublikasi. 1991-yilning 27-oktabrida Turkmaniston mustaqil bo'ldi. Mustaqillik kuni (27-oktabr) — Milliy bayram hisoblanadi. Davlat boshlig'i — prezident. Prezident Bosh vazir (Vazirlar Kengashi raisi)ni tayinlaydi. Qonun chiqaruvchi oliy organ — Majlis (bir palatali parlament). Ro'yxatdan o'tgan yagona siyosiy partiya — Turkmaniston demokratik partiyasi.

***Iqtisodi, transport kommunikatsiyalari.***

Sanoatining asosini neft va gaz qazib chiqarish va neftni qayta ishlash tashkil etadi. Qishloq xo'jaligida paxta, mevalar, sabzavotlar yetishtiriladi. Eksport qilinadigan asosiy mahsulotlari — paxta tolasi, dizel yoqitg'isi, mazut, qo'lda to'qilgan gilamlar. 2006-yil YIM miqdori 34620 mln dollarni (aholi jon boshiga — 6732 doll.) tashkil etgan. Asosiy savdo sheriklari — Rossiya, Ukraina, O'zbekiston, Qozog'iston, Ozarbayjon, Turkiya.

Temiryo'llarining umumiy uzunligi — 2120 km, avtomobil yo'llari — 13000 km. Asosiy porti — Turkmanboshi.

***Tarixi.*** M. a. I ming yillikda hozirgi Turkmaniston hududida Marg'iyona, Parfiya, Midiya davlatlari mavjud edi. M. a. VI asrlarda bu hududlar forslar davlati, m. a. IV asrda makedoniyalik Iskandar davlati tarkibiga kiradi. VIII asrda bu hududga arablar bostirib kiradi va mahalliy aholi orasida islom dinini targ'ib etadi. IX—X asrlarda bu hududlar Tohiriylar va Somoniylar davlatlari, XI—XIII asrlarda Saljuqiylar davlati tarkibiga kiradi. XIII asrda mo'g'ullar bostirib kiradi va hozirgi Turkmaniston yerlarini o'z imperiyasiga qo'shib olishadi. XIV asrning ikkinchisi yarmidan XV asrning oxirlarigacha Turkmaniston hududlari Temur va temuriylar davlatiga kiradi. XVII—XIX asrlarda hozirgi Turkmaniston hududlari Eron shohlari, Xiva va Buxoro xonlari o'rtasida talash bo'lgan. XIX asrning 80-yillarida bu hududlar Rossiya imperiyasi tomonidan bosib olinadi. 1917-yilgi davlat to'ntarilishidan so'ng Sovet hokimiyati o'rnatiladi. 1991-yilda Turkmaniston mustaqillikni qo'lga kiritadi.

## UGANDA

*Rasmiy nomi* Uganda Respublikasi. *Poytaxti* — Kampala. *Hududi* — 236600 km<sup>2</sup>. *Aholisi* — 30139648 kishi (2007). *Davlat tili* — ingliz. *Dini* — katolik (33%), protestanlik (33%), mahalliy dinlar (18%), islom (16%). *Pul birligi* — uganda shillingi.

**Geografik joylashuvi va tabiati.** Afrikaning sharqidagi davlat. Sharqda Keniya (chegara uzunligi — 933 km), g'arbda Kongo Demokratik Respublikasi (765 km), shimolda Sudan (435 km), janubda Tanzaniya (396 km) va Ruanda (169 km) bilan chegaradosh. Chegarasining umumiy uzunligi — 2698 km. Mamlakat asosan balandligi 1100—1500 m bo'lgan yassitog'likda joylashgan. G'arbda Ruvenzori tog' massivi bo'lib, unda mamlakatning eng baland cho'qqisi — Margarita tog'i (5109 m) joylashgan. Ugandada ko'llar ko'p. Ularning yiriklari — Mobutu-Sese-Seko, Koga, Eduard va Viktoriya (qisman). Asosiy daryo — Ail (irmoqlari bilan). Asosiy qazilma boyliklari: mis, kobalt. Mamlakat hududining 23%ini haydaladigan yerlar, 30%ini o'rmon va to'qaylar, 25%ini o'tloq va yaylovlar tashkil etadi.

Iqlimi — subekvatorial. Ugandaning asosiy qismini savannalar tashkil etadi. Aloy, zontsimon oqmiya, bassiy yong'og'i, kigemiya, temir daraxt o'sadi. Hayvonot olamini fil, begemot, jirafa, arslon, maymunlardan — tog' gorillasi, oq-qora kolobus, serkopitekus (kamdan kam uchraydi) tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat 10 ta provinsiyaga bo'lingan. Mustaqillikka Uganda 1962-yilning 9-oktabrida erishgan (avval Buyuk Britaniyaning protektorati). Bu kun milliy bayram (Mustaqillik kuni) hisoblanadi. Davlat boshlig'i — prezident. Ijro etuvchi hokimiyat prezident hamda Vazirlar Mahkamasini boshqaradigan Bosh vazirga tegishli. Qonun chiqaruvchi hokimiyat bir palatali parlament — Milliy Kengash tomonidan amalga oshiriladi. Yirik siyosiy partiyalari:

Demokratik partiya, Uganda Xalq kongressi, Konservativ partiya.

**Iqtisodi, transport kommunikatsiyalari.** Sanoatining asosiy tarmoqlari — tog'-kon, oziq-ovqat va yengil sanoat. Tuproqning unumdorligi va qulay iqlim sharoiti tufayli qishloq xo'jaligi rivojlanmoqda (YIM — 57%). Mamlakat eng ko'p daromadni asosiy eksport mahsuloti — qahvadan oladi. Qahvadan tashqari choy, paxta, tamaki eksport qilinadi. Mamlakat o'zini o'zi oziq-ovqat mahsulotlari bilan ta'minlaydi. 2006-yil YIM miqdori 40329 mln doll'arni (aholi jon boshiga — 1338 doll.) tashkil etgan. Asosiy savdo sheriklari: AQSH, Buyuk Britaniya, Keniya, Fransiya, Italiya, Ispaniya.

Temiryo'llarining umumiy uzunligi — 1300 km, avtomobil yo'llari — 26200 km (2000 km ga yaqini qattiq qoplamali). Asosiy porti: Dinja (Viktoriya ko'lida).

**Tarixi.** Hozirgi Uganda hududida dastlab Kitara davlati vujudga keladi. XV asrda markaziy Ugandada Unror davlati yetakchilik qiladi. XIX asrning o'rtalariga kelib Uganda qirolligining mavqeyi ortadi. 1862-yilda inglizlar Ugandaga kirib kelishadi. 1890-yildan Uganda Britaniya protektoratiga aylanadi. 1962-yilda Uganda mustaqillikka erishadi. 1963-yildan respublika deb e'lon qilinadi. Mustaqillikka erishilgandan so'ng mamlakatda bir necha bor harbiy to'ntarishlar bo'lib o'tadi. Shunday to'ntarishlardan birida 1971-yili hokimiyatga general Amin keladi. Diktator Amin hukmronligi yillarida 300000 ga yaqin aholi qirib yuboriladi, mamlakat iqtisodiyoti inqirozga yuz tutdi. Amin 1979-yilda Tanzaniya armiyasi yordamida hokimiyatdan chetlashtirildi. Shundan so'ng ham mamlakatda davlat to'ntarishlarini keltirib chiqaradigan fuqarolar urushi davom etadi. So'nggi davlat to'ntarishi Ugandada 1986-yilda amalga oshirilgan.

## UKRAINA

*Rasmiy nomi — Ukraina Respublikasi.  
Poytaxti — Kiyev. Hududi — 603700 km<sup>2</sup>.  
Aholisi — 46293659 kishi (2007). Davlat tili — ukrain.  
Dini — pravoslav. Pul birligi grivna.*

**Geografik joylashuvi va tabiati.** Sharqiy Yevropadagi davlat. Shimolda va sharqda Rossiya (chegara uzunligi — 1576 km), shimolda Belarus (891 km), janubi g'arbda Moldova (939 km), g'arbda Polsha (428 km), Vengriya (103 km) va Slovakiya (90 km) bilan chegaradosh. Janubda Ukraina Azov va Qora dengizlari bilan tutashgan. Mamlakat hududining asosiy qismini Sharqiy Yevropa tekisligi tashkil etadi. Shimolda Pomssk, markaziy qismida Dneprbo'yi, janubda Qora dengizbo'yi pasttekisliklari mavjud. Janubi g'arbda balandligi 2061 m gacha bo'lgan Ukraina Karpati, janubda balandligi 1545 m gacha bo'lgan Qrim tog'lari joylashgan. Asosiy daryolari — Dnepr, Shimoliy Dones, Prut, Janubiy Bug, Dunay. Bir nechta yirik suv omborlari bor. Asosiy qazilma boyliklari: qo'ng'ir ko'mir, toshko'mir, neft, tabiiy gaz, temir, marganes, simob, rux, qo'rg'oshin, titan, magniy, aluminiy, sirkoniy rudalari. Mamlakat hududining 56%ini haydaladigan yerlar, 12% ini o'tloq va yaylovlar tashkil etadi.

Iqlimi — kontinental. Ukrainada 4000 turga yaqin gul va paporotniksimon o'simliklar o'sadi. Mamlakat hududining 15% ga yaqinini o'rmonlar tashkil etadi. O'rmonlarda qarag'ay, eman, qora qayin, archa, terak, jo'ka, olxa, oq qayin, grab (qayinsimonlar), oq qarag'ay, qayrag'och o'sadi. Ukrainada sutemizuvchilarning 100 ga yaqin, qushlarning 360, baliqlarning 200 ga yaqin turi uchraydi. O'rmonlarda los, kosulya, to'ng'iz, olmaxon, qunduz, silovsin, o'rmon suvsari, Yevropa ohusi, ayiq, yovvoyi mushuk, Qrim ohusi, tulki, bo'rsiq, qizilishton, qorayaloq, qur, qarqur, ko'k turna uchraydi. Katta qo'shoyoq, ko'rsichqon, yumron-qoziq, dasht burguti, bezgaldoq, to'rg'ay, dasht qora iloni, sariq ilon, kaltakesaklar dasht faunasini tashkil etadi. Daryo bo'ylarida ondatra, daryo toshbaqasi, suvilon, qurbaqa, yovvoyi o'rdak, qarqara uchraydi.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga 24 ta viloyat va Qrim avtonom respublikasi kiradi. Ukraina 1991-yil 24-avgustda o'z mustaqilligini e'lon qiladi (avval SSSR tarkibida). 24-avgust — milliy bayram (Mustaqillik

kuni). Ijro etuvchi hokimiyat prezidenti (davlat boshlig'i) va Vazirlar Mahkamasini boshqaradigan Bosh vazirga tegishli. Qonun chiqaruvchi oliy organ — Rada. Yirik siyosiy partiyalari: Ukraina Xalq Ruhi, Ukraina respublika partiyasi, Ukraina demokratik partiyasi, Demokratik tiklanish partiyasi, Ukraina dehqon-demokratik partiyasi, Ukraina Xalq partiyasi.

#### ***Iqtisodi, transport kommunikatsiyalari.***

Ukraina rivojlangan sanoat tarmoqlariga ega. Sanoatning asosiy tarmoqlarini qora metallurgiya, rangli metallurgiya, mashinasozlik, energetik mashinasozlik va elektrotexnika sanoati, radioelektron sanoat, aviatsiya, traktorsozlik, kemasozlik, kimyo sanoatlari tashkil etadi. Qishloq xo'jaligi asosan donli ekinlar, texnik ekinlar va chorvachilikka ixtisoslashgan. Bug'doy, makkajo'xori, arpa, tariq, qandlavlagi, kungaboqar, kanop, kartoshka yetishtiriladi. Uzumchilik va bog'dorchilik rivojlangan. 2006-yil YIM miqdori 303280 mln dollarni (aholi jon boshiga — 6551 doll.) tashkil etgan. Asosiy savdo sheriklari: MDH va Boltiqbo'yi respublikalari, Germaniya, Polsha, Chexiya, Xitoy, Italiya, Shveysariya.

Temiryo'llarining umumiy uzunligi — 22800 km, avtomobil yo'llari — 273700 km, ichki suv yo'llari — 4500 km. Asosiy portlari: Nikolayev, Odessa, Xerson, Sevastopol.

**Tarixi.** Hozirgi Ukraina hududi m. a. VII asrda skiflar imperiyasi tarkibiga kirgan. III asrda gotlar Dondan Dunaygacha bo'lgan hududlarda o'z davlatlarini tashkil etishadi. Xunlardan so'ng bu hududlarga sharqiy slavyanlar va xazarlar kirib kelishadi va ikki o'rtada kurash boshlanadi. O'z hududlarini xazarlardan himoya qilish maqsadida slavyanlar varyaglarni yordamga chaqirishadi. Varyag knyazi Oleg 882-yilda Kiyev Rusiga asos soladi. 988-yilda Vladimir Buyuk xristianlikni qabul qiladi. Kiyev Rusi Yaroslav Mudriy (1019—1054) va Vladimir II Monomax (1113—1125) davrida gullab-yashnaydi. XIII asrda Botuxon boshchiligidagi mo'g'ul-tatar qo'shinlari Kiyev davlatini tugatadi. Kiyev davlati yerlari Polsha va Buyuk Litva Knyazligi o'rtasida bo'lib olinadi. 1647-yilda Andrusov shartnomasiga ko'ra sharqiy Ukraina yerlari Rossiya



tarkibiga kiradi. 1793-yilda Yekaterina butun Ukraina yerlari (Galitsiyadan tashqari, Galitsiya 1919-yilgacha Avstro-Vengriya imperiyasi tarkibiga kirgan) bosib oladi. 1917-yilning noyabrida Vinnichenko va Petlyura Kiyevda Ukraina Avtonom Respublikasini tuzishadi. Ular bilan bir vaqtda Xarkovda bolsheviklar Ukraina Sovet Respublikasini tuzishadi. Brest — Litva shartnomasidan so'ng 1918-yilning martida nemis qo'shinlari Ukrainani okkupatsiya qiladi va 1918-yilning dekabrighacha Petlyura hokimiyatni o'z qo'liga olguncha qolishadi. 1920-yilda Petlyura va bolsheviklar o'rtasidagi kurashga Polsha qo'shiladi va Riga shartnomasiga ko'ra g'arbiy Ukraina yerlari 1921-yilda Polshaga o'tadi. Sovet Ukrainasi esa 1922-yilda Sovet Ittifoqi tarkibiga kiradi. Ikkinchi Jahon urushi davrida Ukraina nemis qo'shinlari tomonidan okkupatsiya qilinadi. 1944-yilda Sovet qo'shinlari Ukrainadan nemislarni quvib chiqaradi. 1945-yilda Ukrainaga Sharqiy Galitsiya, Rutenya, Shimoliy Bukovina va Bessarabiyaning bir qismi qo'shitadi. 1945-yilda Qrim viloyati Ukraina tarkibiga kiradi. 1986-yilning 26-aprelida Ukraina hududida insoniyat tarixidagi eng fojiali halokatlardan biri — Chernobil atom elektrostansiyasida portlash ro'y beradi. 1991-yilda Ukraina o'z mustaqilligiga erishadi. 2004-yilning oxirida navbatdagi prezident saylovlarida prezidentlikka nomzodlardan birining tarafdorlari saylov natijalaridan norozi ekanliklarini bildirib tartibsizliklar uyushtirishadi. Mamlakatda «to'q sariq inqilob» deb nom olgan siyosiy inqiroz vujudga keladi.

## UMMON

*Rasmiy nomi — Ummon Sultonligi. Poytaxti — Maskat. Hududi - 306000 km<sup>2</sup>. Aholisi - 3202538 kishi (2007). Davlat tili arab. Dini — islom. Pul birligi — ummon riali.*

**Geografik joylashuvi va tabiati.** Arabiston yarimorolida joylashgan, janubi g'arbiy Osiyo davlati. G'arbda Saudiya Arabistoni (chegara uzunligi 676 km), janubi g'arbda Yaman (288 km) davlati bilan chegara-

dosh. Mamlakatning sharqiy va janubiy qirg'oqlarini Arab dengizi suvlari, shimoliy qirg'oqlarini Ummon ko'rfazi suvlari yuvib turadi. Quruqlikdagi chegaralarining umumiy uzunligi 2092 km. Mamlakatning katta qismi tog'li hududlardan iborat. Ummon ko'rfazi qirg'oqlari bo'ylab Hojar tog'i tik qoyalari yastanib yotibdi. Tog'lar va Ummon ko'rfazi o'rtasida tor Al-Botina pasttekisligi joylashgan. Mamlakatning markaziy qismida Rub-al-Xoli qumli cho'lining sharqiy chegarasi joylashgan. Ummon boy neft zaxiralariga ega bo'lib, foydali qazilmalardan mis, xrom va tabiiy gaz ham qazib olinadi.

Iqlimi — quruq cho'l zonasi.

**Davlat tuzilishi, siyosiy partiyalari.** Davlat tuzilishi — mutlaq monarxiya (sultonlik). Mamlakat tarkibiga 3 ta gubernatorlik (viloyat) — Maskat, Musondam, Zufar kiradi. Ummon 1650-yilda mustaqillikka erishgan (ilgari Portugaliya mustamlakasi). 18-noyabr amaldagi sultonning tug'ilgan kuni milliy bayram sifatida nishonlanadi. Qonunchilik islom qonunlari va ingliz umumiy huquqiga asoslangan bo'lib, sulton Oliy sud instansiyasi hisoblanadi. Davlat va hukumat boshlig'i sulton (sulton Qabus ibn Said ibn Teymur davlatni 1970-yil 23-iyuldan buyon boshqarib kelmoqda). Qonun chiqaruvchi hokimiyatni Milliy yig'in amalga oshiradi. Siyosiy partiyalar taqiqlangan.

**Iqtisodi, transport kommunikatsiyalari.** Mamlakat iqtisodi neftni qazib olish sanoatiga asoslangan. Neft yalpi milliy mahsulotning 40% ga yaqin qismini, eksportdan tushadigan daromadlarning 20% dan ziyodrog'ini tashkil qiladi. Qishloq xo'jaligida, baliqchilikni kiritgan holda, mehnatga layoqatli aholining 60% i band. Asosiy qishloq xo'jalik mahsulotlari: xurmo, banan, chorvachilik ham rivojlangan. Yiliga 100 ming tonnaga yaqin baliq ovlanadi. 2006-yil YIM miqdori 35851 mln dollarni (aholi jon boshiga — 11194 doll.) tashkil etgan. Asosiy savdo hamkorlari: Yaponiya, Janubiy Koreya, Buyuk Britaniya, Singapur, AQSH.

Avtomobil yo'llarining umumiy uzunligi — 26000 km (shundan 6000 km asfalt yo'llar). Port shahri — Maskat.

**Tarixi.** M. a. 536-yili zamonaviy Ummon hududi forslar tomonidan bosib olingan edi. Yangi davr boshlarida O'rtayer dengizi hamda Osiyo davlatlari o'rtasidagi savdoning asosiy qismi Ummon orqali o'tardi. VII asr o'rtalarida Ummon mamlakatga islomni olib kirgan arablar tomonidan bosib olinadi. XVI asrda portugaliyaliklar Maskatni ishg'ol qiladilar, biroq 1650-yilda mamlakatdan yevropaliklarni haydab chiqarib, Ummon mustaqillikni qo'lga kiritadi. 1741-yilda mamlakatdan eronlik bosqinchilarni quvib yuborgan Ahmad ibn Said avlodi 1733-yili Maskat sultonligiga asos soladi. Ibn Saidlar hozirgi kunlarda ham shu shaharlarda hukmronlik qilmoqdalar. 1798-yili Maskat va Buyuk Britaniya o'rtasida do'stlik, savdo hamda kema qatnovlari to'g'risidagi shartoma imzolangan. Bu shartnoma muddatlari 1891-yil hamda 1970-yillarda mamlakat rahbari «Ummon sultoni» unvonini olganidan so'ng ikki marotaba qayta uzaytirilgan.

## URUGVAY

*Rasmiy nomi - Sharqiy Urugvay Respublikasi. Poytaxti - Montevideo. Hududi - 176200 km<sup>2</sup>. Aholisi 3450575 kishi (2007). Davlat tili - ispan. Dini - katolik. Pul birligi - urugvay pyesosi.*

**Geografik joylashuvi va tabiati.** Janubiy Amerikaning janubi sharqiy qismida joylashgan davlat. Sharqda va shimolda Braziliya (chegara uzunligi — 985 km), g'arbda Argentina (579 km) bilan chegaradosh. Janub va sharq tomonidan Atlantika okeani bilan tutashgan. Chegarasining umumiy uzunligi — 1564 km, sohil bo'ylab chegara uzunligi — 660 km. Urugvay hudud jihatidan Janubiy Amerikadagi kichik davlatlardan biridir. Mamlakat relyefi kichik tepaliklari bo'lgan tekislikdan iborat. Hududning o'rtacha balandligi 200—300 m. Sohil bo'yida unumdor pasttepaliklar mavjud. Asosiy daryolari — Urugvay, Rionegro. Qazilma boyliklarga kambag'al. Asosiy tabiiy resurslarini

umumdor tuproq va gidroenergetik imkoniyatlar tashkil etadi. Mamlakat hududining 22% i haydaladigan yerlar, 78% i o'tloq va yaylovlardir.

Iqlimi — subtropik. O'simlik dunyosini asosan yaylov o'simliklari tashkil etadi. O'rmonlarida tropik daraxtlar o'sadi. Puma, tapir, to'ng'iz, tulki, kiyik, yovvoyi mushuk, chumolixo'r, kolibri, Amerika tuya-qushi, boyo'g'li, jo'rchi, yirik o'rgimchaklar va sudraluvchilar faunani tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga 19 ta departament kiradi. Urugvay Braziliyadan 1828-yil 25-avgustda mustaqillikka erishadi. Shu sana milliy bayram — Mustaqillik kuni hisoblanadi. Davlat va hukumat boshlig'i — prezident. Qonun chiqaruvchi hokimiyatni Senat (yuqori palata) va Vakillar palatasi (quyi palata) dan iborat Bosh Assambleya amalga oshiradi. Yirik siyosiy partiyalari: Milliy partiya (Blanko), Kolorado partiyasi, Xristian-demokratik partiya, Urugvay sotsialistik partiyasi, Urugvay kommunistik partiyasi.

**Iqtisodi, transport kommunikatsiyalari.** Sanoat go'sht va baliqni qayta ishlash, jun, teri, shakar, to'qimachilik mahsulotlarini ishlab chiqarish bilan bog'liq. Qishloq xo'jaligida katta maydonlar chorva boqish uchun ajratilgan. Asosiy ekinlari — bug'doy, sholi, sorgo. Regional iqtisodiy hamkorlik doirasida Urugvay Braziliya, Argentina va Paragvay bilan iqtisodiy aloqalar o'rnatgan. 2006-yil YIM miqdori 32174 mln dollarni (aholi jon boshiga — 9302 doll.) tashkil etgan. Asosiy savdo sheriklari: Braziliya, AQSH, Argentina, Xitoy, Italiya.

Temiryo'llarining umumiy uzunligi — 3000 km, avtomobil yo'llari 49900 km (6700 km qattiq qoplamali), ichki suv yo'llari — 1600 km. Porti — Montevideo.

**Tarixi.** Charrua va Guarani hududlari o'mashgan hozirgi Urugvay hududi 1516-yilda ispaniyalik Dias de Solis tomonidan kashf etiladi. XVII asrda boshlangan mustamlakachilik hindular orasida xristianlikni targ'ib etish bilan davom etgan. 1726-yilda Montevideoga asos solgan ispanlar XVIII asrda hozirgi Urugvay hududini

Rio-le-La-Plata vitse-qirolligi tarkibiga kiritadi. XIX asrning boshlarida mamlakatda mustaqillik uchun kurash boshlanadi, lekin 1816-yilda Urugvay portugallar tomonidan bosib olinib, Braziliyaga qo'shib yuboriladi. 1828-yilda mustaqillikka erishgandan so'ng Urugvayda balankos (konservatorlar) va kolorados (liberallar) tarafdorlari o'rtasida fuqarolar urushi boshlanadi.

Mamlakatning yirik siyosiy arboblardan biri Batle-Ordokes 1903—1915-yillarda demokratik jamiyatning poydevorini qo'yib beradi. Lekin uning vafotidan so'ng Urugvayda harbiy diktatura o'rnatiladi. 1952-yildan 1966-yilgacha mamlakatni kollegial hukumat boshqaradi. 1970-yilda mamlakatda tupamaros — milliy-ozodlik harakati tarafdorlarining qo'zg'oloni boshlandi. Qo'zg'olon 1972-yilda hukumat qo'shinlari tomonidan bostiriladi. 1973-yilda Urugvayda navbatdagi harbiy davlat to'ntarishi bo'lib, 1984-yildagina harbiylar hokimiyatni fuqarolar hukumatiga topshiradi.

## FALASTIN

*Rasmiy nomi — Falastin davlati. Poytaxti — yo'q (hukumat Ramolloh shahrida joylashgan), mamlakat ikkiga bo'lingan — Iordan daryosi g'arbiy sohili va G'azo sektoriga. Hududi — 26000 km<sup>2</sup>. Aholisi — 3997515 kishi (2007). Davlat tili — arab va ivrit. Dini — islom. Pul birligi — isroil shekeli hamda iordan dinori.*

**Geografik joylashuvi va tabiati.** Yaqin Sharqdagi mamlakat. Uzoq muddat davomida Isroil tomonidan bosib olingan Falastin davlati hududi hozirgi kunda Falastin ma'muriyati boshqaruvi ostidadir. Mamlakat ikki qismga bo'lingan: 1) Iordan daryosi g'arbiy sohili (maydoni — 5873 km) shimolda, g'arbda va janubda Isroil, sharqda esa Iordaniya bilan chegaradosh; 2) G'azo sektori (maydoni 378 km) janubda Misr bilan chegaradosh. Chegaralarining umumiy uzunligi — 468 km, sohil chizig'ining uzunligi — 40 km. Mamlakat hududi tepaliklardan iborat. Falastin tabiiy boyliklarga

boy emas. Ishlov beriladigan yerlar hududning 27% ini tashkil etadi, 32% i esa o'tloqlar va yaylovlardan iborat.

Falastin iqlimi O'rtayer dengizi hududiga xos issiq, yozda quruq, qishda yomg'irli. O'simlik dunyosida yashil eman, terpentin daraxti, Iyerusalim qarag'ayi, yassitog'lik, tog'li hududlarda — tabor emani va sinamora keng tarqalgan. Hayvonot dunyosi ham boy hisoblanib, 400 ga yaqin qush turlari, shulardan boyo'g'li, laylak ko'p uchraydi. Hayvonot dunyosida sirtlon, yovvoyi cho'chqa, quyon, tipratikan, ilon, kaltakesaklar keng tarqalgan.

**Davlat tuzilishi, siyosiy partiyalari.** Hozirgi kunda Falastinda mamlakat hududining Falastin ma'muriyati boshqaruvi ostiga o'tish jarayoni hamda davlat organlarini tashkil qilish va shakllantirish ishlari olib borilmoqda. Asosiy siyosiy partiyalari — Falastin Ozodligi tashkiloti (FATX) va Xamas.

**Iqtisodi, transport kommunikatsiyalari.** Falastinning iqtisodiy rivojlanishiga to'sqinlik qilgan omil bu uning uzoq davr Isroil qurolli kuchlari bosqini ostida bo'lganligidadir. Falastin aholisining katta qismi pul topish uchun Isroil va Fors ko'rfazi mamlakatlariga borib ishlaydilar. 1990-yilgi Fors ko'rfazidagi inqiroz ko'pgina falastinliklarni ortga qaytib g'arbiy sohil ishsizlari sonini to'ldirishga majbur qildi. 2006-yili YIM miqdori 2568 mln dollarni (aholi jon boshiga — 642 doll.) tashkil etgan.

**Tarixi.** M. a. III ming yillikda zamonaviy Falastin hududida qadimgi Xanaan sivilizatsiyasi tashkil etildi. M. a. XII asrda Falastinning qirg'oqbo'yi hududlari filistimlyanlar tomonidan, qolgan qismi esa Isroil — Iudey davlatiga asos solgan iudey qabilalari tomonidan bosib olindi. Iudey davlatlari qulaganidan so'ng Falastin Ahamoniylar, Ptolomeylar, Saljuqiylar, Nim imperiyasi, Vizantiya davlatlari tarkibiga kirgan. VII asrda Falastin arablar, XI asrda salibchilar tomonidan ishg'ol qilingan. 1516-yilda Falastin Usmoniylar imperiyasining bir qismi, uning inqirozidan so'ng ingliz protektorati bo'lgan. 1947-yilda BMT Falastin davlati hududida ikki davlat — arab va yahudiylar davlatlari tashkil etilishi

haqida e'lon qildi. Biroq Falastin davlatiga tegishli yerlarning katta qismi Isroil tomonidan ishg'ol qilingan bo'lsa, qolgan qismi Iordaniya davlati tomonidan qo'shib olindi. 1964-yilda tashkil etilgan Falastin Ozodligi Uyushmasi Yasir Arofat boshchiligida 1989-yilda Falastin davlati tuzilishi haqida e'lon qildi. 1997-yilda Isroil va Falastin Ozodligi Uyushmasi o'rtasida kelishuv imzolanib, unga ko'ra Isroil Falastinning avtonom bo'lish huquqini tan olgan. Biroq davlat institutlarini tashkil qilish hozirgi kunda murakkab ichki siyosiy sharoitda olib borilmoqda. 2000-yilda Falastinda Ikkinchi intifada boshlanib Falastin Ozodlik Uyushmasi rahbari Yosir Arofat hamda XAMAS asoschisi shayx Ahmad Yasin vafotiga qadar davom etdi. Falastin avtonomiyasiga Mahmud Abbas boshliq bo'ldi. 2005-yili Isroil o'z qo'shinlarini Fazo sektoridan olib chiqdi. 2006-yilda Falastin qonun chiqaruvchi kengashiga bo'lgan saylovlarda XAMAS tarafdorlari g'alabaga erishishdi. Mamlakatni fuqarolar urushi yoqasiga keltirib qo'ygan XAMAS va FATX Saudiya Arabistoni tashabbusi bilan o't ochishni to'xtatishdi, lekin ko'p vaqt o'tmay urush harakatlari yana avj olib ketdi.

## FARYER OROLLARI

*Rasmiy nomi – Faryer Orollari (Daniya mulki). Ma'muriy markazi – Torsxvan (ma'muriy markaz). Hududi – 1400 km<sup>2</sup>. Aholisi 47437 kishi (2007). Davlat tili – dat, faryer. Dini – lyuteranlik (95%). Pul birligi – daniya kronasi.*

**Geografik joylashuvi va tabiati.** Atlantika okeanining shimoli sharqiy qismida Norvegiya dengizida joylashgan davlat. Faryer orollari o'z ichiga 18 ta o'rganilgan va bir nechta o'rganilmagan orollarni qamrab oladi. Orollar vulqonli kelib chiqishga ega bo'lib, ularning yuzasi asosan cho'qqilidir. Eng baland nuqtasi — 882 m. Mamlakat iqlimi yumshoq qish va salqin yoz bilan tavsiflanadi. Orollarda asosan yaylov o'simliklari, torfyaniklarda mox va lishayniklar ko'plab

uchraydi. Qirg'oq suvlarida turli-tuman baliqlar hamda kitlar uchrab turadi. Qirg'oqlarida qushlar koloniyalari keng tarqalgan.

**Davlat tuzilishi va siyosiy partiyalari.** Faryer orollari — Daniya Qirolligining o'z-o'zini boshqaradigan dengizorti ma'muriy birligi. Davlat boshlig'i — Daniya monarxi. Kommissiонер uning manfaatlarini orollarda ifoda qiladi. Hukumat rahbari — premyer-ministr. Qonun chiqaruvchi organi — 32 deputatdan iborat parlament. Oliy ijro etuvchi organi — Landsstyur (koalitsion hukumat). Ma'muriy jihatdan 49 ta munitsipaliyaga bo'lingan.

**Iqtisodi, transport kommunikatsiyalari.** Iqtisodining asosiy tarmoqlari baliq ovlash va qayta ishlash, kemasozlik, qurilish va hunarmandchilik. Noqulay iqlim sharoiti va haydaladigan yerlarning yo'qligi tufayli qishloq xo'jaligi zaif rivojlangan. Baliqning jahon bozorlaridagi narxi o'sishi orollar iqtisodining tez sur'atlar bilan o'sishiga olib keldi. Bu o'z navbatida ishsizlikni kamaytirdi hamda ishchi kuchi yetishmovchiligini vujudga keltirdi. Baliq — orollarning asosiy eksport mahsulotidir. Orollar atrofida yaqinda ochilgan neft zaxiralari iqtisod tuzilishini asta-sekinlik bilan o'zgartirish va uning Daniyaga qaramligini kamaytirish ishonchini bermoqda. 2006-yil YIM miqdori 1000 mln dollarni (aholi jon boshiga — 21080 doll.) tashkil etgan. Asosiy savdo hamkorlari: Daniya, Germaniya, Fransiya.

**Tarixi.** Orollar VI asrda Irlandiya monaxlari tomonidan kashf qilingan bo'lib, bu yerda ular dastlabki makonlarga asos solishgan. IX asrda orollarga norvegiyaliklar kirib keldi. 1035-yildan boshlab Faryer orollari Norvegiya Qirolligining tarkibiy qismiga aylandi. Shundan so'ng 1380-yilda Norvegiya bilan birgalikda orollar Daniya Qirolligiga qo'shilib ketdi. Ikkinchi jahon urushi davrida orollar nemis bosqinchilarini to'xtatish maqsadida inglizlar tomonidan egallandi. 1948-yilda esa orollar hozirgi kundagi maqomini qo'lga kiritdi.



## FIDJI

*Rasmiy nomi* - *Fidji Respublikasi*. *Poytaxti* - *Suva*. *Hududi* - 18333 km<sup>2</sup>. *Aholisi* 924097 kishi (2007). *Davlat tili* - ingliz. *Dini* - protestantlik, iudaizm. *Pul birligi* - fidji dollari.

**Geografik joylashuvi va tabiati.** Tinch okeanining janubiy qismida Fidji orollarida (jami 844 ta orol) joylashgan davlat. Eng yirik orollari — Viti-Levu va Vanua-Levu. Sohil bo'ylab chegara uzunligi — 1129 km. Orollarning relyefi vulqonlar natijasida paydo bo'lgan tog' tizmalari mavjud yassitog'liklardan iborat. Asosiy tabiiy boyliklari: baliq, oltin, mis. Hududning 8% ini haydaladigan yerlar, 65% ini o'rmon va to'qaylar tashkil etadi.

Iqlimi — tropik, okean iqlimi. Tog' yonbag'irlari tropik o'rmonlar bilan qoplangan. Tekis hududlarda yaylov o'simliklari o'sadi. Fidjining hayvonot olami kambag'al. Ko'p tarqalgan sutemizuvchilar — ko'rshapalak va uchar tulki. Orollarga olib kelingan hayvonlardan mangustlar keng tarqalgan.

**Davlat tuzilishi, siyosiy partiyalari.** Davlat tuzilishi — respublika. Fidji mustaqillikka 1970-yilning 10-oktabrida erishdi (avval Buyuk Britaniya mustamlakasi). Shu sana milliy bayram hisoblanadi (Mustaqillik kuni). Qonunchiligi ingliz umumiy huquqiga asoslangan. Ijro etuvchi hokimiyat prezident (davlat boshlig'i) va Bosh vazir boshchiligidagi hukumatga tegishli. Qonun chiqaruvchi hokimiyat ikki palatali parlament tomonidan amalga oshiriladi. Yirik siyosiy partiyalari: Fidji siyosiy partiyasi, Fidji milliy birlashgan fronti, Yer egalari partiyasi, Milliy federativ partiya, Leyboristik partiya.

**Iqtisodi, transport kommunikatsiyalari.** Mamlakat iqtisodining asosiy tarmog'i — qishloq xo'jaligi (YIM — 23%). Asosiy eksport mahsulotlari — shakar va kopra (kokos mag'zi). Ishlab chiqarish asosan qishloq xo'jaligi mahsulotlari va baliqni qayta ishlash bilan bog'liq. Asosiy valuta manbayi turizm hisoblanadi.

2006-yil YTM miqdori 5167 mln dollarni (aholi jon boshiga — 5591 doll.) tashkil etgan. Asosiy savdo hamkorlari: Avstraliya, Yangi Zelandiya, Yaponiya, YI davlatlari.

**Tarixi.** Orollarning bir qismi 1634-yilda Tasman tomonidan, qolgan qismi 1774-yilda Kuk tomonidan kashf etilgan. 1874-yilda Fidji Buyuk Britaniya mustamlakasiga aylanadi, lekin ma'lum ma'noda o'zini o'zi boshqarish huquqini saqlab qoladi. Britaniya hamdo'stligi a'zosi Fidji mustaqillikka 1970-yilda erishadi. 1987-yilda podpolkovnik Rabuk boshchiligidagi davlat to'ntarishidan so'ng Fidjida respublika tuzumi o'rnatiladi.

## FILIPPIN

*Rasmiy nomi* *Filippin Respublikasi. Poytaxti* — *Manila. Hududi* — *299765 km<sup>2</sup>. Aholisi* — *87413542 kishi (2007). Davlat tili* *filippin. Dini* *katolik. Pul birligi* — *Filippin pyesasi.*

**Geografik joylashuvi va tabiati.** Tinch okeanining g'arbiy qismida, Malayya arxipelagining Filippin orollarida joylashgan davlat. Filippinga tegishli 7100 dan ortiq orollar bor. Eng yirik orollari — Luson, Mindanao, Samar, Panay, Palavan, Negros, Mindoro, Leyte. Mamlakat g'arbda Janubiy Xitoy, sharqda Filippin, Janubda Sulavesi dengizlari bilan tutashgan. Shimolda Filippin orollarini Tayvan orolidan Bashi bo'g'ozini ajratib turadi. Sohil bo'ylab chegara uzunligi — 36289 km. Eng yirik o'n bir orol mamlakat hududining 92% ini tashkil etadi. Eng baland cho'qqisi Mindanao orolidagi Apo tog'idir (2954 m). Asosiy tabiiy boyliklari: yog'och, neft, nikel, kobalt, kumush, oltin, mis. Mamlakat hududining 26% i haydalanadigan yerlar, 40% i o'rmon va to'qaylardir.

Iqlimi — tropik. Filippin hududining deyarli yarmini tropik o'rmonlar tashkil etib, bu o'rmonlarda palma, kauchuk daraxti, banyan, apitong, mayyapis, lauan, bambuk o'sadi. Dengiz sathidan 1200 m balandlikda buta va yaylov o'simliklari o'sadi. Ohu, mangust, qobon, turli qushlar va sudraluvchilar hayvonot olamini

tashkil etadi. Sohilbo'yi suvlarida turti xil baliqlar va molluskalar uchraydi.

**Davlat tuzilishi, siyosiy partiyalari.** Davlat tuzilishi — prezident respublikasi. Mamlakat tarkibiga 74 ta provinsiyani o'z ichiga olgan 12 ta ma'muriy hudud kiradi. Filippin AQSHdan o'z mustaqilligiga 1946-yilning 4-iyulida erishadi. Milliy bayrami — 12-iyun — Mustaqillik kuni (1898-yil Ispaniyadan). Davlat va hukumat boshlig'i — prezident. Qonun chiqaruvchi oliy organ Senat (yuqori) va Vakillar palatasidan (quyi) iborat Kongressdir. Yirik siyosiy partiyalari: Filippinliklarning demokratiya uchun kurashi, Lakas-Filippin demokratik partiyasi, Millatchilar partiyasi.

**Iqtisodi, transport kommunikatsiyalari.** Sanoatining eng rivojlangan tarmoqlari (YIM — 35%) elektronika, to'qimachilik, kimyo, yog'ochni qayta ishlash, oziq-ovqat, farmatsevtika. Qishloq xo'jaligi (YIM — 30%) ham mamlakat iqtisodida muhim o'rin egallaydi. Filippin kokos yong'oqlari va kokos mahsulotlarini eksport qiluvchi yirik davlat hisoblanadi. Sholi, makkajo'xori, shakarqamish, banan, ananas, mango yetishtiriladi. Chorvachilik rivojlangan. 2006-yil YIM miqdori 378225 mln dollarni (aholi jon boshiga — 4326 doll.) tashkil etgan. Asosiy savdo sheriklari: AQSH, Germaniya, Yaponiya, Gonkong, Buyuk Britaniya, Tayvan, Singapur.

Temiryo'llarining umumiy uzunligi — 378 km, avtomobil yo'llari — 156200 km, ichki suv yo'llari — 3219 km. Asosiy portlari: Davao, Manila, Sebu.

**Tarixi.** V asrdan boshlab hozirgi Filippin hududida turli xalqlar va madaniyatlarning qorishgan sivilizatsiyasi shakllanadi. VII—XV asrlarda Filippin hind-malaya dengiz qirolliklariga qaram bo'lgan. 1521-yilda portugaliyalik Magellan tomonidan kashf etilgan. XVI asrning dastlabki choragida ispan mustamlakasiga aylanadi va shu davrdan shahzoda Filipp (kelajakda qirol Filipp II) sharafiga Filippin deb ataladi. Ispan — Amerika urushi davrida Filippin AQSHga qaram bo'ladi (1898). Filippin qo'shinlari kurashga kirishib 1899-yilning yanvarida mamlakatni respublika deb e'lon qilishadi. Lekin amalda Filippin AQSHga qaramligicha

qolaveradi. 1942-yilda Filippin yapon qo'shinlari tomonidan bosib olinadi. 1946-yilda rasman mustaqillik e'lon qilinsa ham, iqtisodiy va siyosiy jihatdan Filippin uzoq muddat AQSH ta'siri ostida qoladi. 1968-yildan 1972-yilgacha xristian va musulmonlar o'rtasida fuqarolar urushi bo'ladi. 1965-yilda prezidentlikka saylangan Markos 1979-yilda harbiy davr qonunini qabul qiladi. 1986-yilda u hokimiyatni Korason Akinaga topshiradi. 1992-yilda Fidel Ramos prezident etib saylanadi.

## FINLYANDIYA

*Rasmiy nomi — Finlyandiya Respublikasi. Poytaxti — Xelsinki. Hududi — 338145 km<sup>2</sup>. Aholisi — 5238460 kishi (2007). Davlat tili — fin va shved. Dini — lyuteranlik (90%). Pul birligi — yevro.*

**Geografik joylashuvi va tabiati.** Shimoliy Yevropadagi davlat. Janub va sharqda Rossiya (chegaraning uzunligi — 1313 km), shimolda Norvegiya (729 km), g'arbda Shvetsiya (586 km) bilan chegaradosh. Mamlakatning g'arbini Botnik qo'ltig'i, janubini Fin qo'ltig'i suvlari yuvib turadi. chegaraning umumiy uzunligi — 2628 km, sohilining uzunligi — 1126 km. Mamlakat hududining katta qismi tekisliklardan iborat. Hududning 30% ini botqoqliklar tashkil etadi. Mamlakatning shimoliy g'arbida Laplandiya joylashgan, relyefi tog'li hududlarda o'zgaradi. Shu tog'larda mamlakatning eng yuqori nuqtasi — Xaltiotunturi (1328 m) tog'i joylashgan. Finlyandiya — ko'llar mamlakati. 60000 ga yaqin ko'l bor. Ko'llarning eng yiriklari — Pyayanne, Sayma, Inari, Piyelinen. Asosiy daryolari — Tornio, Kemi, Oulu. Mamlakat hududida titan, magniy, mis, rux, temir, nikel rudalari topilgan. Muhim tabiiy boyliklaridan biri yog'ochdir. Haydaladigan yerlar mamlakat hududining 8% ini, o'rmonlar 76% ini tashkil etadi.

Iqlimi — mo'tadil, shimolida kontinental. Finlyandiya hududining katta qismini o'rmonlar tashkil etadi. O'rmonlarda qarag'ay, archa, eman, zarang,

qoraqayin, qoraqarag'ay, shimolida tundra o'simliklari o'sadi. Shimol bug'usi, los, olmaxon, quyon, tulki, qunduz, ayiq, bo'ri, silovsin, 250 ga yaqin parranda va qush turlari hayvonot olamini tashkil etadi. Daryo va ko'llarida turli baliqlar ko'p.

**Davlat tuzilishi, siyosiy partiyalari.** Davlat tuzilishi — parlament respublikasi. Finlyandiya ma'muriy jihatdan 5 ta liyan (guberniya)ga, muxtoriyat huquqiga ega bo'lgan Aland orollariga bo'linadi. Lyanlar kixlakunta (uyezd)larga bo'lingan. Finlyandiya 1917-yil 6-dekabrda mustaqillikka erishadi (avval Rossiya mustamlakasi). 6-dekabr milliy bayram — Mustaqillik kuni hisoblanadi. Qonunlar shved umumiy huquqiga asoslangan. Ijro etuvchi hokimiyat prezident (davlat boshlig'i) va Bosh vazir boshchiligidagi hukumatga tegishli. Qonun chiqaruvchi oliy organ — parlament (bir palatali). Yirik siyosiy partiyalari: Finlyandiya markazi, Finlyandiya sotsial-demokratik partiyasi, Milliy koalitsion partiya, Liberal xalq partiyasi, Finlyandiya qishloq partiyasi.

**Iqtisodi, transport kommunikatsiyalari.** Finlyandiya qayta ishlash tarmoqlariga asoslangan rivojlangan bozor iqtisodiga ega. Bundan tashqari mashinasozlik, kemasozlik, kimyo, oziq-ovqat, to'qimachilik sanoatlari rivojlangan. Yog'och va bir qator qazilma boyliklarni hisobga olmaganda Finlyandiya xomashyo va energiya importiga qaram. Iqlim sharoiti tufayli qishloq xo'jaligi don yetishtirish va chorvachilik bilan cheklangan. 2006-yil YIM miqdori 155489 mln dollarni (aholi jon boshiga — 29682 doll.) tashkil etgan. Asosiy savdo hamkorlari: Germaniya, Shvetsiya, Buyuk Britaniya, AQSH, Fransiya, Yaponiya, Rossiya.

Temiryo'llarining umumiy uzunligi — 5924 km, avtomobil yo'llari — 78400 km, ichki suv yo'llari — 3700 km. Asosiy portlari: Kotka, Turku, Xelruxi.

**Tarixi.** I asrning oxirlarida Estoniyadan kelgan finlar hozirgi Finlyandiyaning janubiy hududida o'rna-shishadi. 800-yillarga kelib finlar Kareliyagacha yetib borishadi va fin-ugor guruhiga mansub boshqa elatlar bilan aralashib ketishadi. Keyinroq mamlakat janubini vikinglar egallashadi. 1150-yilda Finlyandiya to'liq

Shvetsiyaga qaram bo'ladi. Shvetsiya Finlyandiyaga xristianlikni olib keladi. 1809-yilda Finlyandiya rus podshosi Aleksandr I tomonidan bosib olinadi. Avvaliga Finlyandiya ma'lum avtonomiyaga ega bo'ladi. XIX asrning oxirlarida Finlyandiyada majburiy ruslashtirish siyosati amalga oshirila boshlaydi. Rossiyada inqilob bo'lgach, Finlyandiya mustaqillikka erishadi va qisqa muddatli monarxiyadan so'ng mamlakat respublika deb e'lon qilinadi. Sovet — fin urushida Finlyandiya mag'lubiyatga uchraydi. Ikki o'rtada tuzilgan sulhga ko'ra Finlyandiya Kareliya va Laplandiyadan ajraydi. 1960-yilda Finlyandiya Skandinaviya davlatlarining umumiy bozoriga a'zo bo'ladi.

## FOLKLEND OROLLARI

*Rasmiy nomi* — *Folklend (Malvin) Orollari*.  
*Poytaxti* — *Port-Stenli*. *Hududi* — *12200 km<sup>2</sup>*.  
*Aholisi* — *3105 kishi (2007)*. *Davlat tili* —  
*ingliz*. *Dini* — *xristianlik*. *Pul birligi* — *folklend funti*.

**Geografik joylashuvi va tabiati.** Folklend orollari — Atlantika okeanining janubi g'arbiy qismidagi arxipelag. Arxipelag ikki yirik — Soledad va Gran-Malvin orollaridan tashkil topgan. Bundan tashqari 200 ga yaqin mayda orollar ham uning tarkibiga kiradi. Orollar cho'kma jinslardan tashkil topgan. G'arbiy Folklend orolining eng yuqori nuqtasi — Adam tog'i (706 m).

Iqlimi — salqin okean iqlimi. O'simlik dunyosi kambag'al, torf botqoqliklari mavjud. Hayvonot dunyosida dengiz jonivorlari ustunlik qiladi, bu yerda: tulenlar, qisqichbaqalar, baliqlarning ko'plab turlari va qushlar juda ko'p.

**Davlat tuzilishi, siyosiy partiyalari.** Orollarni Buyuk Britaniya qirolichasi tomonidan tayinlanadigan gubernator boshqaradi. Ma'muriy-hududiy bo'linishga ega emas. Og'ir samolyotlarni qabul qilish uchun qo'nish maydoni va bazasi mavjud. Siyosiy partiyalari: Folklend orollarining milliy taraqqiyot partiyasi.

### ***Iqtisodi, transport kommunikatsiyalari.***

Mahalliy aholining asosiy mashg'uloti — qo'ychilik, baliqchilik. Qoramol va otlar ham boqiladi. Oziq-ovqat ishlab chiqarish va junga qayta ishlov berish fabrikalari ham mavjud. Kartoshka, karam, piyoz, lavlagi, arpa kabi madaniy o'simliklar yetishtiriladi. 2006-yil YIM miqdori 75 mln dollarni (aholi jon boshiga — 24154 doll.) tashkil etgan. Asosiy savdo hamkorlari: Buyuk Britaniya, Argentina.

**Tarixi.** Arxipelagni o'rganish uchun birinchi jiddiy urinish golland dengizchisi Sebald Veyert tomonidan amalga oshirildi. Orollarga Sebaldin orollari nomi berilib, ular geografik xaritalarga kiritildi. 1760-yil yanvarida inglizlar g'arbiy va sharqiy orollarni ajratib turgan bo'g'ozni kashf qilishdi va unga ingliz floti g'aznachisi lord Folklend nomini beradilar. Keyinchalik butun arxipelag shu nom bilan atala boshlandi. XVIII asrda orollarga San-Malo portidan yo'lga chiqqan fransuz dengizchilari serqatnov bo'lib qolishdi. Shu tariqa bu arxipelag o'zining ikkinchi, Malvin orollari nomiga ega bo'ldi. Bu nom rasman Argentina va Lotin Amerikasining boshqa mamlakatlarida ishlatiladi. 1764-yilda Malvin orollariga mashhur dengizchi Lui Antuan de Bugenvil boshchiligidagi dengiz ekspeditsiyasi kelib tushdi. U Soledadning sharqiy qirg'oqlarida doimiy manzilgoh — Port-Sen-Luiga asos soldi. Aynan shu yerda orollar Fransiya mulki deb e'lon qilindi. Buyuk Britaniya Fransiyani arxipelagdan siqib chiqarishga uringan. 1765-yilda ingliz dengizchisi Jon Bayron sharqiy Folklendga qurollangan otryad tushirib, Port-Egmont fortiga asos solib, orollarni ingliz mulki deb e'lon qildi. Angliya va Germaniya bilan olib borilgan yetti yillik urushda band bo'lgan Fransiya arxipelagni Ispaniyaga 25 ming funt-sterlingga sotib yubordi. Ispaniya va Angliya munosabatlari shu darajada keskinlashdiki, harbiy to'qnashuv yuz berishi tayin bo'lib qoldi. Uzoq davom etgan mojarolardan so'ng Ispaniya Angliyaga Port-Egmontni qaytarib berishi uchun rasmiy London arxipelag suverenitetidan voz kechishga majbur edi. Biroq inglizlar 1774-yil orollarni Buyuk Britaniya mulki deb e'lon qilgan holda o'z garnizonini olib chiqib

ketdi. Keyingi yillarda Riodelya-Plata vitse-qirolligining tarkibiy qismi deb eʼlon qilingan Malvin orollariga Ispaniya va Janubiy Amerikadan koʻchmanchilar kelib oʻmasha boshladi. XIX asr boshlarida Buyuk Britaniya butun La-Plata hududini bosib olishga urindi. Biroq inglizlar mahalliy aholining jiddiy qarshiligiga duch keldi. 1816-yili La-Plataning birlashgan provinsiyalari Ispaniyadan mustaqilligini eʼlon qilib, 1826-yilda Argentina respublikasini taʼsis etgan konstitutsiyani qabul qildi. Malvin orollari va kontinental shelf doirasidagi barcha ispan orollari respublika tarkibiga kiritildi. 1820-yilda kapitan Devid Juitt boshchiligidagi «Eroina» argentin fregati Malvin orollariga yetib keldi va bu yerda Argentina respublikasi bayrogʻi koʻtarildi. 1833-yilning 3-yanvarida inglizlar Soledaddan X. M. Mineda boshchiligidagi harbiy va fuqarolik hukumatni va shu yerda qolgan argentinaliklarni quvib chiqardi. Argentina hech qachon Buyuk Britaniyaning arxipelagga boʻlgan hududiy huquqlarini tan olmagan va bir yarim asr davomida orolning mustaqilligi tiklanishini talab qilib kelmoqda. 1982-yili Folklend orollariga egalik qilish uchun Buyuk Britaniya va Argentina oʻrtasida mojaro yuz beradi. Bir yarim oy davom etgan harbiy mojaro Argentinaning magʻlubiyati bilan tugaydi.

## FRANSIYA

*Rasmiy nomi – Fransiya Respublikasi. Poytaxti – Parij. Hududi – 551000 km<sup>2</sup>. Aholisi – 61024316 kishi (2007). Davlat tili – fransuz. Dini – katolik (90%). Pul birligi – yevro.*

**Geografik joylashuvi va tabiati.** Yevropaning gʻarbidagi davlat. Janubda Ispaniya (chegara uzunligi – 623 km) va Andorra (60 km), janubi sharqda Monako (4,4 km), shimoli sharqda Belgiya (620 km) va Lyuksemburg (73 km), sharqda Shveysariya (573 km) va Italiya (451 km) davlatlari bilan chegaradosh. Janubda mamlakat Oʻrtayer dengizi, gʻarbda Biskay koʻrfazi, shimoli gʻarbda La-Mansh va Pa-de-Kale boʻgʻozlari bilan tutashgan. Oʻrtayer dengizidagi



Korsika oroli, to'rtta dengizorti departamentlari — Martinika, Gvadelupa, Reyunon, Fransuz Gvianasi hamda dengizorti hududlari — Fransiya Polineziyasi, Yangi Kaledoniya, Sen-Pyer va Mikelon, Tinch okeanidagi bir qator arxipelaglar Fransiya tegishli. Chegarasining umumiy uzunligi (metropoliya va Korsika) — 28924 km, sohil bo'ylab chegara uzunligi — 3427 km. Mamlakatning g'arbi va shimoli tekisliklardan iborat. Markaz va sharqda o'rta balandlikdagi Markaziy massiv, Vogez, Yura tog'lari joylashgan. Janubi g'arbda Ispaniya bilan tabiiy chegara hosil qilgan Pireney tog'lari yotadi. Bu tog' tizmasining eng baland nuqtasi — Pik-de-Vinmal (3298 m). Mamlakatning janubi sharqida Fransiya va G'arbiy Yevropaning eng baland cho'qqisi — Monblan tog'i (4807 m) joylashgan Fransuz Alplari yotadi. Asosiy daryolari — Sena, Rona, Luara, Garonna. Ko'llar Fransiyada ko'p emas, eng yirik ko'l — Jeneva (katt qismi Shveysariyada joylashgan). Asosiy tabiiy boyliklari: ko'mir, temir rudasi, boksitlar, rux, baliq, yog'och. Haydaladigan yerlar hududning 32% ini, o'rmon va to'qaylar 27% ini, o'tloq va yaylovlar 23% ini tashkil etadi.

Iqlimi — mo'tadil, Korsika orolida subtropik. Mamlakatning to'rtidan bir qismini o'rmonlar tashkil etadi. O'rmonlarda eman, qarag'ay, qoraqayin, qayrag'och, oq qayin, archa, kashtan kabi daraxtlar, O'rtayer dengizi bo'ylarida zaytun, tok, palma, agavalar o'sadi. Hayvonot dunyosini ayiq, tog' echkisi, muflon, tulki, bo'rsiq, ohu, kosulya, to'ng'iz, olmaxon, kaklik, burgut, flamingo (janubda) tashkil etadi.

**Davlat tuzilishi, siyosiy partiyalari.** Davlat tuzilishi — prezidentlik respublikasi. Mamlakat tarkibiga 96 departamentga bo'lingan 22 ta viloyat kiradi. Bundan tashqari dengizorti departamentlar va dengizorti hududlar ham Fransiya tarkibiga kiradi. Birinchi respublika 1792-yilda e'lon qilingan. So'nggi Konstitutsiya (V respublika) 1958-yil 28-sentabrda qabul qilingan. Milliy bayram 14-iyul — Bastiliya olingan kun (1789). Davlat boshlig'i — prezident. Prezident Bosh vazir (Ministrlar Kengashi raisi)ni tayinlaydi. Qonun chiqaruvchi hokimiyat Senat (yuqori palata) va Milliy Majlis (quyi

palata)dan iborat parlament tomonidan amalga oshiriladi. Yirik siyosiy partiyalari: Respublikani qo'llash birlashmasi, Fransuz demokratik ittifoqi, Respublikachilar partiyasi, Fransuz sotsialistik partiyasi, So'l radikal harakat, Fransiya kommunistik partiyasi, Milliy front.

**Iqtisodi, transport kommunikatsiyalari.** Fransiya dunyoning yuqori taraqqiy etgan sanoat, katta qishloq xo'jaligi resurslariga ega bo'lgan mamlakatlardan biridir. Sanoatning asosiy tarmoqlari (YIMning 1/4 qismi): mashinasozlik, kimyo, avtomobil, samolyotsozlik, elektronika, metallurgiya, tog'-kon, to'qimachilik, oziq-ovqat. Unumdor yerlarning katta maydonlari, zamonaviy texnologiyalarning qo'llanilishi, hukumat subsidiyalari Fransiyaning G'arbiy Yevropada qishloq xo'jaligi mahsulotlarini yetishtiruvchi yetakchi davlatga aylantirdi. Mamlakat iqtisodida tobora xizmat ko'rsatish sohasining salmog'i ortmoqda. 2006-yil YIM miqdori 1744352 mln dollarni (aholi jon boshiga — 28584 doll.) tashkil etgan. Asosiy savdo hamkorlari: YH davlatlari, AQSH, Yaponiya.

Temiryo'llarining umumiy uzunligi — 34568 km (11674 km elektrlashtirilgan), avtomobil yo'llari — 1551400 km (803000 km asfaltlangan), ichki suv yo'llari — 15000 km. Asosiy portlari: Bordo, Gavr, Dyunkerk, Nant-Sen-Nazer, Ruan.

**Tarixi.** M. a. I asrning o'rtalarida Galliya (hoz. Fransiya) qadimgi Rim tomonidan bosib olinadi. Franklar Galliyaga V asrda kirib kelishadi. Frank qirolligi Karolinglar sulolasi vakili Karl Buyuk davrida qudrat cho'qqisiga ko'tariladi. 987-yilda hokimiyatga Kapetinglar sulolasi keladi. G'arbiy Yevropada Fransiyaning ta'siri XIII asrda Fillip II Avgust va Lyudovik IX davrida ortadi. XIV asrda hokimiyatga Valua sulolasi keladi. 1337-yildan 1453-yilgacha Fransiya Angliya bilan «Yuz yillik urush» olib boradi. Shu davrda ingliz qo'shinlariga qarshi ozodlik kurashini Janna d'Ark boshlaydi. XVIII asrning oxirida absolyutizmning inqirozga uchrashi avvaliga podsho hokimiyatining cheklanishiga (1789-yilda Bastiliyaning olinishi, Milliy Assambleyaning tuzilishi), keyinchalik esa I respublikaning tuzilishiga (1792) olib keldi. 1793-yilda

krepostnoylik huquqi bekor qilindi. 1799-yili Napoleon Bonapart davlat to'ntarishi o'tkazib diktatura o'rnatdi va 1804-yilda o'zini Napoleon I nomi bilan imperator deb e'lon qildi. Bosqinchilik urushlari natijasida Fransiya deyarli butun Markaziy va G'arbiy Yevropani o'ziga bo'ysundirdi. 1812-yilgi Rossiyaga yurish «Buyuk armiyaning» yakson qilinishi bilan tugadi. 1814-yilda rus qo'shinlari Parijni bosib olishdi, bu holat Fransiyada Burbonlar restavratsiyasiga olib keldi. 1815-yilda Napoleon qisqa muddatga hokimiyatga qaytdi («100 kun») va Vaterloo mag'lubiyatidan so'ng u butunlay hokimiyatni qo'ldan boy berdi. Fransiya inqilobdan oldingi chegaralarga qaytdi. 1830-yilgi inqilob burjua monarxiyasining o'rnatilishiga olib keldi. Navbatdagi 1848-yilgi inqilob natijasida Fransiyada II respublika e'lon qilindi. Imperator Napoleon III 1852-yili monarxiyani qayta tikladi. 1853—1856-yillarda Fransiya Rossiyaga qarshi Qrim urushida ishtirok etdi. 1870—1871-yillardagi Fransiya—Prussiya urushi Elzas va Lotaringiyaning boy berilishi bilan tugadi. 1871-yil — Parij Kommunasining tuzilishi va halokati. III Respublika Konstitutsiyasi 1875-yilda qabul qilindi. 1914—1918-yillarda Fransiya I Jahon urushida ishtirok etdi va g'alaba qozondi. Uning natijalariga ko'ra, Versal shartnomasi bo'yicha Elzas va Lotaringiyani o'ziga qaytarib oldi. Shuningdek, Saar viloyati, Togo va Kamerun ham Fransiyaga o'tdi. II Jahon urushi davrida Fransiya nemis qo'shinlari tomonidan okkupatsiya qilindi: mamlakat 2 qismga bo'lingdi (bosib olingan hududlar va Muxtor Fransiya davlati). 1944-yili Normandiyaga ittifoqchi qo'shinlar tushirildi va Fransiya ozod qilindi. 1946-yili IV Respublika Konstitutsiyasi qabul qilindi. Fransiya 1949-yili NATOga a'zo bo'lib kirdi. 1945—1954-yillarda Vyetnamdagi mustamlaka urushlari natijasida Fransiya Hindixitoyni boy berdi. 1957-yilda mamlakat YI a'zosi bo'ldi. 1958-yilda ijroiya hukumat huquqlarini kengaytirgan yangi Konstitutsiya (V Respublika) qabul qilindi. 1960-yili Fransiyada mustamlaka tizimining parchalanish jarayoni boshlandi. 1962-yili Jazoir mustaqillikka erishdi. 1966-yili Fransiya NATO harbiy tashkilotidan chiqdi. Fransiya 1970—1990-yillarda

Yevropa integratsiyasining faol tarafdori bo'lib keldi. 2005-yilda kelib chiqishi Osiyo va Afrikadan bo'lgan muhojirlarning morozilik chiqishlari qator tartibsizliklarni keltirib chiqardi. 2007-yil may oyidagi prezidentlik saylovlarida N. Sarkozi g'olib chiqdi.

## FRANSUZ POLINEZIYASI

*Rasmiy nomi – Fransuz Polineziyasi. Poytaxti – Papeete. Hududi – 4200 km<sup>2</sup>. Aholisi – 277056 kishi (2007). Davlat tili – fransuz. Dini – protestant-kalvinistlar (54%), katoliklar (30%). Pul birligi – afrika franki.*

**Geografik joylashuvi va tabiati.** Fransuz Polineziyasi – Okeaniyada, Tinch okeanning sharqiy qismida joylashgan. Fransuz Polineziyasi bir-biridan uzoq masofada joylashgan, jami 130 oroldan iborat, 5 arxipelagdan tashkil topgan. Fransuz Polineziyasining bir qismi vulqonlar natijasida paydo bo'lgan, bir qismi esa marjon orollari hisoblanadi. Shamol yo'lidagi tog' yonbag'ri orollar, doim yashil o'rmonlar, shamoldan panadagi orollar qoyalar bilan o'ralgan.

Iqlimi — ekvatorial, tropik passatti. Foydali qazilmalardan fosfat va kobalt konlariga ega. O'simlik dunyosi — orollarnikiga xos. Pandanus, kakos, non daraxti, palma o'sadi. Vodiylari tropik o'rmonlari bilan band. Hayvonat dunyosi sudralib yuruvchilar va qushlarga boy. Bu yerda albatros, chayka, to'ti, bulbul, kabutar va boshqalar ko'p tarqalgan.

**Davlat tuzilishi va siyosiy partiyalari.** Fransuz Polineziyasi — Fransiyaning dengizorti avtonom hududi. Boshqaruv boshlig'i — oliy komissar. Ijroiya hokimiyati rais boshchiligidagi hukumatga tegishli. Qonun chiqaruvchi organ — Hududiy Assambleya (41 deputat). Ma'muriy-hududiy jihatdan 5 okrugga bo'linadi. Siyosiy partiyalari: Sotsialistik partiya, Polineziya ittifoqi, Polineziya respublikasi uchun birlashuv.

**Iqtisodi, transport kommunikatsiyalari.** Iqtisodining asosini chet ellik turistlarga xizmat ko'rsatish, shuningdek, gavhar eksporti tashkil etadi. 80-yillarda orollarda fosfat va kobalt konlari ochildi. YIMda

qishloq xo'jaligining ulushi kam, mahsulotlarining asosiy qismini mayda xo'jaliklar beradi. Vanil, ananas, banan yetishtiriladi. Baliqchilik rivojlangan. 2006-yil YIM miqdori 4580 mln dollarni (aholi jon boshiga — 17500 doll.) tashkil etgan. Asosiy savdo hamkorlari: Fransiya, AQSH.

Asosiy dengiz porti — Papeeti (Tomti orolida).

**Tarixi.** Taxminan 2000 yil oldin bu orollarda dastlab odamlar Samoa arxipelagidan suzib kelishgan. 1495-yil yevropaliklar (ispan Mendanya) tomonidan Fransuz Polineziyasi orollari tarkibiga kiruvchi Markaz orollari kashf etildi. Yevropaliklar dastlab XIII asrda kelib o'rnamishganlar. XIX asrning 40-yillarida orollarning asosiy qismini Fransiya bosib oldi va o'z nazoratini o'rnatdi. 1885-yildan 1958-yilgacha bosib olingan hududlar Fransuz Okeaniyasi deb nomlandi. 1958-yil mamlakat Fransiyaning dengizorti hududi maqomini oldi. Polineziya Fransuz gubernatori tomonidan 1977-yil martgacha boshqarildi, keyin ichki o'z-o'zini boshqaruv huquqini qo'lga kiritdi, gubernator oliy komissariga almashtirildi. 1996-yilda Polineziya Fransiyaning avtonom hududi maqomini oldi. Fransiya orollar ustidan to'la nazoratni o'z qo'lida ushlab qoldi.

## XITOIY

*Rasmiy nomi - Xitoy Xalq Respublikasi. Poytaxti - Pekin. Hududi - 9597000 km<sup>2</sup>. Aholisi - 132217890 kishi (2007). Davlat tili - xitoy tilining mandarin dialekti. Dini - konfut siylik, daosiylik, buddaviylik, xristianlik, islom. Pul birligi - yuan.*

**Geografik joylashuvi va tabiati.** Osiyoning sharqidagi davlat. Shimoli sharqda (chegara uzunligi — 3633 km) va shimoli g'arbda Rossiya (40 km), shimolda Mongoliya (4670 km), shimoli sharqda Shimoliy Koreya (1416 km), shimoli g'arbda Qozog'iston (1533 km) va Qirg'iziston (858 km), g'arbda Pokiston (523 km), Tojikiston (414 km), Afg'oniston (76 km), janubi g'arbda va janubda Hindiston (3380 km), janub-

da Myanma (2185 km), Vyetnam (1281 km), Nepal (1236 km), Butan (470 km), Laos (423 km) janubi sharqda Makao (0,34 km) bilan chegaradosh. Janubda Janubiy Xitoy dengizi, sharqda Sariq va Sharqiy Xitoy dengizlari bilan tutash. Chegarasining umumiy uzunligi — 22140 km, sohil bo'ylab chegara uzunligi — 14500 km. Xitoy hududining kattaligi jihatidan dunyoda uchinchi o'rinda turadi. Xitoyning janubida Nanlin va Yunnan—Tuychjou tog'lari qad ko'targan. Janubi g'arbda Himolay—qaraqurum, Nanshanya, Kunlenya tog'lari bilan o'ralgan. O'rtacha balandligi taxminan 4500 m bo'lgan Tibet tog'lari joylashgan. Nepal bilan chegarada dunyodagi eng baland cho'qqi Jomolungma (Everest — 8848 m) joylashgan. G'arbda va shimoli g'arbda Tokla-Makan cho'li yotadi. Xitoyning shimolida Gobi cho'li yoyilgan. Shimoli sharqda Katta Xingan, Kichik Xingan tog'lari joylashgan. Asosiy daryolari — Yanszi, Xuanxe, Sungari, Sinszyan. Yerosti boyliklari quyidagilarga boy: temir rudasi, ko'mir, neft, simob, volfram, qalay, surma, marganes, molibden, rux, qo'rg'oshin, aluminiy, uran. Haydaladigan yerlar umumiy maydoning — 10%, o'tloq va maysazorlar — 31% ini egallaydi.

Iqlimi — hududining kattaligi tufayli iqlim turlicha: mo'tadil, subtropik va tropik. Xitoyning o'simlik dunyosi xarakter jihatidan ikki zonaga: sharqiy va g'arbiy qismlarga bo'linadi. Sharqiy qismda o'simliklar turi 25000 dan ortiq. G'arbiy qismda o'simliklar ko'proq bir yillikka ega. Braxmaputra vodiysida ignabargli o'rmonlar. qarag'ay va kedring har xil turlari o'sadi. Bo'ri, tulki, ayiq, yo'lbars, sibir suvsari, sibir ko'zani, oq sichqon, olmaxonlar va boshqalar yashaydi.

**Davlat tuzilishi va siyosiy partiyalari.** Xitoy Xalq Respublikasi (XXR) Konstitutsiyaga ko'ra xalq demokratik diktaturasi o'rnatilgan sotsialistik davlat. Mamlakat tarkibida — 22 provinsiya, 5 avtonom hudud va 3 markaziy — Pekin, Shanxay va Tyanszin bor. Xitoy Xalq Respublikasi 1949-yil 1-oktabrda tashkil topgan. 1-oktabr — Milliy bayram — XXR e'lon qilingan kun. Ijro etuvchi hokimiyat XXR raisi (davlat boshlig'i)ga, Umumxitoy xalq vakillari yig'ilishi doimiy qo'mitasi raisi,

Davlat Kengashi raisi (hukumat boshlig'i)ga tegishli. Davlat hokimiyatining qonun chiqaruvchi oliy organi — Umumxitoy xalq vakillari yig'ilishi. Mamlakatda boshqa siyosiy partiyalar paydo bo'lganiga qaramay, siyosiy hayotni Xitoy Kommunistik partiyasi belgilaydi.

**Iqtisodi, transport kommunikatsiyalari.** XX asming 80-yillarida Xitoy rahbarlari mamlakatni markazlashtirilgan iqtisodiyotdan bozor iqtisodiyotiga o'tkazishga kirishdi. Buning uchun qishloq xo'jaligida kollektivlashtirishdan fermerlik tizimiga o'tildi. Qishloq xo'jaligi yalpi milliy mahsulotning 30%ini ta'minlaydi. Sanoatning birmuncha rivojlangan tarmoqlari — metallurgiya, mashinasozlik, ko'mir qazib olish, neft qazib olish, to'qimachilik, kimyo, harbiy sanoat. 2006-yil YIM miqdori 7123712 mln dollarni (aholi jon boshiga — 5387 doll.) tashkil etgan. Asosiy savdo hamkorlari: Gonkong, Yaponiya, AQSH, Rossiya, Tayvan, Germaniya.

Temiryo'llarining umumiy uzunligi — taxminan 54000 km. Avtomobil yo'llari — 1300000 km, ichki suv yo'llari — 138600 km. Asosiy portlari: Guanchjou, Dalyan, Sindao, Shanxay.

**Tarixi.** Birinchi Xitoy sulolasi — Sin (m. a. XVIII—XI asrlar), m. a. XIV asrda In nomini olgan. M. a. 1111-yilda davlat chjou qabilalari tomonidan zabt etilgan. M. a. VII asrda Chjou davlati bir nechta podshohliklarga bo'linib ketgan. M. a. III asrda 36 ta provinsiyaga bo'lingan. Markazlashgan Sin imperiyasi paydo bo'ldi. Bu imperiya davrida xunlar hujumidan himoyalash maqsadida Buyuk Xitoy devori qurilgan. M. a. 206-yilda Sin imperiyasi o'rinda paydo bo'lgan Xan imperiyasi m. a. 140—87-yillarda o'z rivojlanishi-ning eng yuqori cho'qqisiga chiqqan. «Uch qirollik» davridan keyin mamlakatda hokimiyat 907-yilgacha hukmronlik qilgan Tan sulolasi qo'lga o'tgan. 1226-yilda mo'g'ullar bosqinidan keyin mamlakatda mo'g'ullardan bo'lgan Yuan sulolasi hukm surgan. 1368-yilda hokimiyat Xitoy imperatori qo'lga o'tadi va Min dinastiyasi davri boshlanadi. Xitoy hukmronlari 1628—1645-yillarda ko'tarilgan qo'zg'olonlarni bostirish uchun manchjur qabilalari ko'magiga tayanadi. Manchjurlar

1644-yilda hokimiyatni qo'lga kiritadi va 1912-yilgacha mamlakatni idora qiladi. Imperiya hududini Sibir, Oltoy, Pomir va Nepalgacha kengaytirgan manchjurlar hukumati XIX asrda ko'plab ichki va tashqi muammolarga duch keladi. 1912-yilda Sun Yatsen Gomindan hukumatiga asos soladi. Sun Yatsen o'limidan keyin Chan Kayshi gunuhi kommunistlar bilan aloqani uzib Nankinda milliy hukumat tuzadi. 1938-yilda yapon qo'shinlarining bostirib kirishidan keyin gomindanchilar bosqinchilarga qarshi kurashish uchun kommunistlar bilan birlashadilar. Gomindanchilar mag'lubiyatga uchrab, Tayvanga qochadi, kommunistlar esa Mao Szedun boshchiligida 1949-yil 1-oktabrda Xitoy Respublikasining tashkil topganini e'lon qiladi. Mao Sze Dun vafotidan so'ng XXR raisi etib saylangan Den Syaopin mamlakatni siyosiy va iqtisodiy islohotlar yo'liga boshladi. Natijada XXR dunyoning eng jadal rivojlanayotgan davlatlari qatoriga qo'shildi.

## XORVATIYA

*Rasmiy nomi – Xorvatiya Respublikasi. Poytaxti – Zagreb. Hududi – 56538 km<sup>2</sup>. Aholisi – 4486899 kishi (2007). Davlat tili – xorvat. Dini – katoliklar (77%), pravoslavlar (12%), musulmonlar (1,5%). Pul birligi – kuna.*

**Geografik joylashuvi va tabiati.** Yevropaning janubi sharqida, Bolqon yarimorolida joylashgan davlat. Sharqda va janubi sharqda Bosniya va Gersgovina (chegara uzunligi — 842 km), shimolda Sloveniya (455 km) va Vengriya (292 km), sharq va janubda Serbiya hamda Chernogoriya (254 km) bilan chegaradosh. Xorvatiyaga Adriatika dengizidagi eng yiriklari Krk, Sres, Xvar, Korchula, Brach kabi bir qator orollar tegishli. Chegarasining umumiy uzunligi — 1843 km, sohil bo'ylab chegara uzunligi — 5090 km (materik qismi — 1078 km, orollarniki — 4012 km). Mamlakat hududi asosan tekislik va pasttekisliklardan iborat. Adriatika dengizi sohilida Dinor tog'i (eng baland nuqtasi — Troglav cho'qqisi — 1913 m), Velebet tizmasi va Kapela



tizmasi joylashgan. Asosiy daryolari: Sava, Dunay. Xorvatiya neft, tabiiy gaz, ko'mir, marganes, xrom, temir rudalariga ega. Hududning 32% i haydaladigan yerlar, 18% i o'tloq va yaylovlar, 15% i o'rmon va to'qaylardir.

Iqlimi — O'rtayer dengizi tipidagi iqlim. Hududning katta qismi ignabargli o'rmonlar bilan qoplangan. Bargli o'rmonlar ham uchraydi. Adriatika dengizi sohillarida asosan butalar o'sadi. Hayvonot olami boy. Dalmatin orollarida mangustlar uchraydi.

**Davlat tuzilishi, siyosiy partiyalari.** Davlat tuzumi — parlament respublikasi. Mamlakat tarkibiga 102 jupaniy (ma'muriy hudud) kiradi. Xorvatiya mustaqillikka 1991-yilning 26-iyunida erishdi (avval YFSFR tarkibida bo'lgan). Ijro etuvchi hokimiyat prezident (davlat boshlig'i) va rais boshchiligidagi hukumatga tegishli. Qonun chiqaruvchi oliy organ — Xorvatiya Sobori (yuqori va quyi palatadan iborat). Yirik siyosiy partiyalari: Xristian-demokratik hamdo'stlik, Sotsial-demokratik partiya, Xalq partiyasi, Demokratik partiya, Sotsial-liberal partiya, Sotsialistik partiya, Xristian-demokratik partiyasi.

**Iqtisodi, transport kommunikatsiyalari.** Yugoslaviya tarqalguncha Xorvatiya Sloveniya kabi iqtisodiy jihatdan taraqqiy etgan hudud hisoblanardi. Serbiya bilan urush tugagandan so'ng Xorvatiya katta miqdordagi tashqi qarz, vayron etilgan infrastruktura, sobiq yugoslav respublikalari bilan iqtisodiy aloqalarining uzilganligi kabi muammolarni muvaffaqiyatli bartaraf etdi. Sanoatning taraqqiy etgan tarmoqlari: kemasozlik, neftni qayta ishlash, mashinasozlik, kimyo, yog'ochni qayta ishlash, elektrotexnika, elektronika, farmatsevtika, oziq-ovqat, to'qimachilik. Qishloq xo'jaligida dehqonchilik (makkajo'xori, bug'doy, qandlavlagi, kungaboqar, kanop) yetakchi. Uzum yetishtirish rivojlangan. Etnik guruhlar o'rtasidagi nizolar tugagandan so'ng turizm mamlakatning asosiy daromad manbayiga aylanmoqda. 2006-yil YIM miqdori 54796 mln dollarni (aholi jon boshiga — 12212 doll.) tashkil etgan. Asosiy savdo hamkorlari: YI davlatlari, Sobiq Yugoslaviya Respublikalari.

Temiryo'llarining umumiy uzunligi — 2698 km,

avtomobil yo'llari — 32071 km (23305 km qattiq qoplamali), ichki suv yo'llari — 785 km. Portlari: Dubrovnik, Rijeka, Split (dengiz), Vukovar, Osijek (daryo).

**Tarixi.** I asrda hozirgi Xorvatiya hududi Rim provinsiyasi Pannoniya tarkibiga kirgan. VII asrda Karpat tog'laridan ko'chib kelgan xorvatlar bu hududda 925-yili Xorvat qirolligiga asos soldi. 1102-yilda Xorvatiya Venger qirolligi tarkibiga kiradi va turk (1526—1599) hamda fransuz (1809—1813) okkupatsiyalarini hisoblamaganda 1918-yilgacha bu qirollikka tobe bo'ladi. 1919-yilda mamlakat serblar, xorvatlar va slovenlar qirolligi tarkibiga kiradi. 1941-yilda Pavelich rahnamoligidagi ustashlarning millatchilik harakati Germaniya va Italiya tan olgan mustaqil Xorvatiya davlatini tashkil etadi. Fashist Germaniyasining mag'lubiyatidan so'ng Xorvatiya Yugoslaviya tarkibiga kirdi. 1991-yilda Xorvatiya o'z mustaqilligini e'lon qiladi, natijada serblar va xorvatlar o'rtasida harbiy nizo kelib chiqadi. Qator janglar natijasida serblar ustidan g'alaba qozongan xorvatlar 1998-yilda mamlakat chegaralarini to'liq tiklashga muvaffaq bo'lishdi. 2005-yili Xorvatiya YI ga kirishga rozilik oldi.

## CHAD

*Rasmiy nomi - Chad Respublikasi. Poytaxti Ndjamena. Hududi - 1284000 km<sup>2</sup>. Aholisi - 10223884 kishi (2007). Davlat tili - fransuz va arab. Dini - musulmonlar (50%), xristianlar (25%), majusiylar (25%). Pul birligi - afrika franki.*

**Geografik joylashuvi va tabiati.** Markaziy Afrikadagi davlat. Sharqda — Sudan (chegara uzunligi — 1360 km), janubda — Markaziy Afrika Respublikasi (1197 km), g'arbda — Niger (1175 km), Kamerun (1094 km) va Nigeriya (87 km), shimolda — Liviya (1055 km) davlatlari bilan chegaradosh. Chegarasining umumiy uzunligi — 5968 km. Katta suvsiz tekisliklar mamlakatning markaziy qismida joylashgan. Shimoldagi hududlar Sahroi Kabir doirasi-

da. Shimoli g'arbda mamlakatning eng baland nuqtasi — Emi Kusi (3415 m) bo'lgan Tibesti tog'lari mavjud. Janubda pasttekisliklar joylashgan. Eng katta ko'li — Chad. Mavjud neft konlari ekspluatatsiya qilinmaydi, uran konlari bor. Hududining kattaligiga qaramay haydaladigan yerlar 2%, yaylov va o'tloqlar 36%, o'rmon va to'qaylar 11% ni tashkil qiladi.

Iqlimi — tropik cho'l iqlimidir. Asosan cho'l va savanna o'simliklari o'sadi. Daraxtlardan dum palmasi va boabab uchraydi. Fil, karkidon, yovvoyi ho'kiz, jirafa, antilopa, arslon, qoplon, gepard, shoqol, giyena, begemot, timsoh, flamingo, saqqoqush, maymunlardan pavian va kolobuslar hayvonot olamini tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat 14 ta prefekturaga bo'lingan. Chad mustaqillikka 1960-yilning 11-avgustida erishdi (avval fransuz Ekvatorial Afrikasi hududining bir qismi bo'lgan). 11-avgust — Milliy bayrami (Mustaqillik kuni). Ijro etuvchi hokimiyat — prezident (davlat boshlig'i) va Bosh vazir boshchiligidagi hukumatga tegishli. Qonun chiqaruvchi oliy organ — Milliy Konfederatsiya. Siyosiy partiyalar orasida eng obro'lisi hukmron Najot vatanparvartik harakatidir.

**Iqtisodi, transport kommunikatsiyalari.** Chad Afrikaning fuqarolar urushi, Liviya bilan nizolar, tez-tez bo'ladigan qurg'oqchiliklar tufayli nochor ahvoldagi iqtisodga ega bo'lgan kambag'al davlatlardan biridir. Iqtisodining asosiy tarmog'i — 80% mehnatga layoqatli aholi band bo'lgan qishloq xo'jaligi (YIMning 45% i)dir. Paxta umumiy eksport hajmining 48% ini tashkil etadi. Sorgo, yeryong'oq, sholi, tariq, kartoshka, maniok ekiladi. Chorvachilik rivojlangan. Sanoat qishloq xo'jaligi mahsulotlarini qayta ishlash va to'qimachilik bilan chegaralangan. 2006-yil YIM miqdori 20213 mln dollarni (aholi jon boshiga — 1977 doll.) tashkil etgan. Asosiy savdo hamkorlari — Fransiya, Nigeriya, Kamerun, AQSH.

Temiryo'llari yo'q, avtomobil yo'llarining umumiy uzunligi — 31322 km (asosan tuproq yo'llar), ichki suv yo'llari uzunligi — 2000 km.

**Tarixi.** IX asrning boshlarida hozirgi Chad hududi-da Kanem qirolligi tashkil topadi. XI asrda ushbu qirollik hukmdorlari islomni qabul qilishadi va o'z hududlarini kengaytirishadi. Chad ko'lidan g'arbda XIV asrda vujudga kelgan Borno qirolligi XVI asrda Kanemni o'ziga bo'ysundiradi. XIX asrning oxirida hozirgi Chad hududi Sudan imperatoriga qaram bo'ladi, keyinroq esa Fransiya bu hududlarni bosib oladi va 1910-yilda Chadni Fransuz Ekvatorial Afrikasi tarkibidagi mustamlaka deb e'lon qiladi. 1958-yilda fransuz hamdo'stligi doirasidagi muxtoriyatni qo'lga kiritgan. Chad 1960-yilning avgustida mustaqillikka erishadi. 1968-yilgi Milliy ozodlik fronti va hukumat o'rtasidagi to'qnashuvlardan so'ng mamlakatga fransuz qo'shinlari kiritiladi. Fransuz qo'shinlari Chadni 1975-yilda davlat to'ntarishi natijasida hokimiyatga general Mallum kelganidan so'ng tark etishadi. 1973-yildan 1989-yilgacha Chad Liviya bilan o'zining shimoliy hududlari uchun urush olib boradi. 1979-yilda Milliy ozodlik fronti va hukumat o'rtasida tinchlik shartnomasi tuziladi, lekin bu shartnoma tez orada buziladi va mamlakatda davlat to'ntarishlari bo'lib turgan (1982- va 1990-yy.), natijada fuqarolar urushi boshlanadi va hozirgi kunga qadar davom etib kelmoqda.

## CHERNOGORIYA

*Rasmiy nomi – Chernogoriya Respublikasi. Poytaxti – Setine. Hududi – 13,8 ming kv.km. Aholisi – 703505 kishi (2007). Tili – serb. Dini – pravoslav. Pul birligi – yevro (milliy valutasiga ega emas).*

**Geografik joylashuvi va tabiati.** Bolqon yarimorolining shimoliy qismida joylashgan. Shimoli g'arbda — Xorvatiya (chegara uzunligi — 14 km) shimolda Bosniya va Gersegovina (225 km), sharqda — Serbiya (203 km), janubda — Albaniya (172 km) bilan chegaradosh. G'arbiy sohillarini Adriatika dengizi suvlari yuvib turadi. Chernogoriya hududi sohilbo'yi, tekislik, yassitog'lik va tog'li hududlardan iborat.

Chernogoriyaning katta qismi Dinara tog'ligida joylashgan, eng baland joyi — Durmutor cho'qqisi (2522 m), janubi g'arbida Chernogoriya karstli platosi bor.

Iqlimi — mo'tadil kontinental.

**Davlat tuzilishi va siyosiy partiyalari.** Konstitutsiyasiga ko'ra Chernogoriya demokratik ijtimoiy va ekologik davlat hisoblanadi. Hokimiyat qonun chiqaruvchi, ijroiya va sud hokimiyatiga bo'linadi. Davlat boshlig'i prezident bo'lib, umumiy saylov yo'li bilan 5 yil muddatga saylanadi. Qonun chiqaruvchi organ — Skupchina (parlament). Ma'muriy-hududiy jihatidan 21 obshinaga bo'linadi.

**Iqtisodi, transport kommunikatsiyalari.** Qishloq xo'jaligi yaxshi rivojlangan. Alp tog'larida chorvachilik, g'allakorlik, bog'dorchilik, uzumchilik taraqqiy etgan. Sanoati mineral xomashyo qazib olish va unga ishlov berish, qishloq xo'jalik mahsulotlarini qayta ishlashga ixtisoslashgan. Boksit, qo'rg'oshin, rux rudalari, qo'ng'ir ko'mir, tuz qazib olinadi. Metallurgiya, aluminiy, yog'ochsozlik, elektrotexnika, kema ta'mirlash, to'qimachilik va tamaki korxonalari bor. 2006-yil YIM miqdori 2412 mln dollarni (aholi jon boshiga — 3428 doll.) tashkil etgan.

**Tarixi.** I asrda Chernogoriya hududi Rimning Dolmatsiya, 297-yildan Prevalitana provinsiyasiga qo'shilgan. 493-yildan Chernogoriya bir qismi ostgotlar davlatiga, 536-yildan esa Vizantiya tarkibiga kirdi. VII asrda Chernogoriya hududida slavyanlar joylashgan. IX asrda xristianlik qaror topdi. 1499-yilda Chernogoriya hududi Usmoniylar imperiyasi tarkibiga qo'shib olindi. Napoleon urushlari va serblarning mustaqillik uchun olib borgan kurashlarida (1804—1805) Chernogoriya Rossiya va Serbiya tomonida bo'ldi. 1852-yil Chernogoriya merosiy knyazlik deb e'lon qilindi. 1878-yili Berlin kongressi qaroriga binoan mustaqil davlat deb tan olindi. Chernogoriya 1918-yilda Serb, Xorvat va Slavyanlar qirolligi tarkibiga kirdi. 1945-yili 19-noyabrda YSFR e'lon qilingach, Chernogoriya Yugoslaviya tarkibiga kirdi. XX asrning 90-yillari boshlarida YSFR parchalanishi oqibatida Chernogoriya Serbiya bi-

lan birgalikda yagona konfederatsiyaga birlashdi. 2006-yil 21-mayda o'tkazilgan xalq referendumi natijalariga ko'ra Chernogoriya mustaqil davlatga aylandi.

## CHEXIYA

*Rasmiy nomi – Chexiya Respublikasi. Poytaxti – Praga. Hududi – 78864 km<sup>2</sup>. Aholisi – 10199540 kishi (2007). Davlat tili – chex. Dini – katolik (65%), protestantlar (15%), pravoslavlar (13%). Pul birligi – chex kronasi.*

**Geografik joylashuvi va tabiati.** Markaziy Yevropadagi davlat. Shimolda — Polsha (chegara uzunligi — 658 km), shimolda va g'arbda — Germaniya (646 km), janubda — Avstriya (362 km), sharqda — Slovakiya (214 km) davlatlari bilan chegaradosh. Chegarasining umumiy uzunligi — 1880 km. Mamlakat hududini shartli ravishda ikkiga bo'lish mumkin: g'arbda — Bogemiya, sharqda — Moraviya. Hududining g'arbiy qismi past tog'lar bilan o'ralgan tekisliklar, tepaliklar va yassitog'liklardan iborat. Bu hududlarda ruda tog'lari, Chex o'rmoni, Shumava joylashgan. Sudetdagi Snejka tog'i (1602 m) mamlakatning eng baland nuqtasi hisoblanadi. Sharqiy hududlar tepaliklardan iborat. Asosiy daryolari — Vltava, Morava, Laba (Elba), Oder. Asosiy tabiiy boyliklari — ko'mir, kaolin, grafit.

Iqlimi — mo'tadil kontinental. Tog'larida ignabargli o'rmonlar, tekis hududlarida eman, zarang, qoraqayin o'sadi. Qo'ng'ir ayiq, tulki, to'ng'iz, bo'ri, sernalar hayvonot olamini tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat 8 ta o'lkaga bo'lingan. Chexiya 1993-yil 1-yanvarda Chexoslovakiyaning parchalanishidan so'ng mustaqil davlatga aylandi. Milliy bayramlari — Kirill va Mefodiy kuni, 6-iyul — Yan Gus yondirilgan kun, 28-oktabr — Chexoslovakiya ozod etilgan kun. Davlat boshlig'i — prezident, ijro etuvchi hokimiyat rais boshchiligidagi hukumatga tegishli. Qonun chiqaruvchi hokimiyat Senat (yuqori palata) va Deputatlar palatasi (quyi palata)dan iborat parlamentga

tegishli. Yirik siyosiy partiyalari: Fuqarolik demokratik partiyasi, Chexiya va Moraviya kommunistik partiyasi, Chexoslovak xalq partiyasi, Fuqarolik demokratik alyansi, Chexoslovak sotsial-demokratik partiyasi.

**Iqtisodi, transport kommunikatsiyalari.**

Chexiya sobiq sotsialistik blok davlatlari orasida iqtisodda sezilarli o'zgarishlarga erishgan davlatdir. Sanoatining eng rivojlangan tarmoqlari: yoqilg'i-energetika, mashinasozlik, kimyo, to'qimachilik, oziq-ovqat. Mashinasozlik va transport uskunolari, yoqilg'i, kimyoviy moddalar, minerallar, metallar, qishloq xo'jaligi mahsulotlari eksport qilinadi. Rivojlangan qishloq xo'jaligi Chexiyaga oziq-ovqat mahsulotlari bilan o'z ehtiyojlarini qondirish imkonini beradi. 2006-yil YIM miqdori 197367 mln dollarni (aholi jon boshiga — 19350 doll.) tashkil etgan. Asosiy savdo hamkorlari: Germaniya, Slovakiya, Avstriya, Italiya, Rossiya.

Temiryo'llarining umumiy uzunligi — 9434 km, avtomobil yo'llari — 55890 km.

**Tarixi.** M. a. V asrda kelt qabilalari o'rnamashgan hozirgi Chexiya hududi V—IV asrlarda slavyan qabilasi chexlar tomonidan egallanadi. IX asrda Kirill va Mefodiy tomonidan xristianlik tarqatilgan Bogemiya IX asrning oxirlarida Buyuk Moraviya qirolligi tarkibiga kiradi. Chex qirolligi o'zining qudrat cho'qqisiga Muqaddas Rim imperiyasi imperatori Karl X hukmronligi davrida chiqadi. XV asrning boshlarida Praga universitetining rektori Yan Gus katolik cherkovini reformatsiya qilish tashabbusi bilan chiqadi, lekin 1415-yil 6-iyulda inkvizitsiya tomonidan yoqib yuboriladi. 1620-yilda Bogemiya o'zining avtonomiyasini yo'qotib, gabsburglarga tobe bo'ladi. 1918-yilda Avstriya — Vengriya imperiyasi parchalangandan so'ng mustaqil Chexoslovakiya Respublikasi e'lon qilinadi. 1939-yilda Sudet viloyati Germaniya tomonidan bosib olinadi, mamlakatning qolgan hududlari Germaniya protektorati deb e'lon qilinadi. Mamlakat nemis qo'shinlaridan ozod etilgach, kommunistlarning ta'siri kuchayadi va 1948-yilda ular hokimiyatni o'z qo'llariga olishadi. 1968-yilda Chexoslovakiya kommunistik partiyasining birinchi kotibi A. Dubchek

«odambashara sotsializm» qurish to'g'risida e'lon qiladi, lekin mamlakatni liberallashtirish 1968-yil 21-avgustda Varshava Shartnomasi (Ruminiyadan tashqari) davlatlarining qo'shinlari tomonidan to'xtatildi. Parlament raisligiga A. Dubchek, Respublika prezidentligiga V. Gavel saylanadi. Mamlakat aholisi 1992-yilgi referendumda Chexoslovakiyaning ikki davlatga bo'linishi uchun ovoz beradi va 1993-yil 1-yanvarda Chexiya Respublikasi tashkil topadi.

## CHILI

*Rasmiy nomi – Chili Respublikasi. Poytaxti – Santyago. Hududi – 756626 km<sup>2</sup>. Aholisi – 16272129 kishi (2007). Davlat tili – ispan. Dini – katolik. Pul birligi – chili pyesosi.*

**Geografik joylashuvi va tabiati.** Janubiy Amerikaning janubi g'arbiy sohilida joylashgan davlat. Sharqda — Argentina (chegara uzunligi — 5150 km) va Boliviya (861 km), shimola — Peru (160 km) davlatlari bilan chegaradosh. G'arbda va janubda mamlakat Tinch okeani bilan tutashgan. Chegarasining umumiy uzunligi — 6171 km. Sohil bo'ylab chegara uzunligi — 6435 km. Mamlakat shimoldan janubga Tinch okean bo'ylab 4300 km cho'zilgan. Chili hududini 3 ta fizik-geografik hudud tashkil etadi: sharqda — And tog'lari, markazda — Uzun vodiya va pasttog'lar, shimolda — Atakama cho'li joylashgan. Mamlakat markazida joylashgan vodiya uzunligi — 1000 km, eni — 40—80 km bo'lib, aholi zich joylashgan hudud hisoblanadi. Eng baland nuqtasi — Oxos-del-Salado (6880 m) tog'i. Vulqonlar ko'p, zilzilalar tez-tez bo'lib turadi. Asosiy daryolari: Loa, Elki, Maypo, Akongagua. Chilining janubida ko'llar bor. Asosiy tabiiy boyliklari: mis, temir rudasi, qimmatbaho metallar, molibden, yog'och. Haydaladigan yerlar hududining 7%, o'rmon va to'qaylar 21%, yaylov va o'tloqlar 18% ini tashkil etadi.

Iqlimi: shimolda — tropik cho'l, markazda — subtropik va o'rta dengiz tipli, janubida — mo'tadil okean tipli. Tamarugo, notofagus, kanelo, alerse daraxt-



lari mavjud. Hayvonot dunyosi puma, tulki, brone-noses, kiyik, kolokolo mushugi, skuns, magellan iti, kaltakesaklar, to'tiqush, o'rdak, kondorlardan iborat.

**Davlat tuzilishi, siyosiy partiyalari.** Davlat tuzilishi — respublika. 12 region va alohida poytaxt okrugi mamlakat tarkibiga kiradi. Mustaqillikka Chili 1810-yilning 18-sentabrida erishdi (avval Ispaniya mustamlakasi). Ushbu kun milliy bayram — Mustaqillik kuni deb qabul qilingan. Davlat va hukumat boshlig'i — prezident. Qonun chiqaruvchi oliy organ — Senat (yuqori palata) va Deputatlar (quyi palatasi)dan iborat Milliy Kongress. Asosiy siyosiy partiyalari: Xristian-demokratik partiya, Chili birlashgan sotsialistik partiyasi, Demokratiya uchun partiyasi.

**Iqtisodi, transport kommunikatsiyalari.** Mamlakat sanoatining asosiy tarmog'i tog'-kon sanoatidir. Chili mis eksport qilish bo'yicha dunyoda yetakchilardan hisoblanadi. Sanoatning boshqa tarmoqlarini metallurgiya, yog'ochni qayta ishlash, oziq-ovqat, to'qimachilik tashkil etadi. O'rmonchilik va baliqchilikni o'z ichiga olgan qishloq xo'jaligi YIMning 7% ini tashkil etadi. Chorvachilik rivojlangan. Bug'doy, dukaklilar, qandlavlagi, kartoshka, uzum, mevalar yetishtiriladi. Chili mevalar, baliq va yog'och mahsulotlarining yirik eksportchisidir. 2006-yil YIM miqdori 183286 mln dollarni (aholi jon boshiga — 11263 doll.) tashkil etgan. Asosiy savdo hamkorlari: YH davlatlari, AQSH, Yaponiya, Braziliya.

Temiryo'llarining umumiy uzunligi — 7766 km, avtomobil yo'llari — 79025 km, ichki suv yo'llari — 725 km. Asosiy portlari: Ikike, Valparaiso.

**Tarixi.** Araukanlar yashagan hozirgi Chili hududi 1520-yilda portugaliyalik dengizchi F. Magellan tomonidan kashf etiladi. 1536-yildan ispanlar mustamlakachilik siyosatini boshlashadi. 1541-yilda Santyagoga asos solinadi, Chili esa Peru vitse-qirolligi tarkibiga kiritiladi. Nodir metallarning yo'qligi va mamlakat materikning asosiy kommunikatsiyalaridan uzoqligi tufayli metropoliya Chiliga katta qiziqish bildirmasdi. 1818-yilda Ispaniyadan mustaqillikka erishgandan so'ng Chilida bir necha bor davlat to'ntarishlari bo'ladi. 1879—1883-

yillardagi Tinch okean urushi natijasida Chili mis konlariga boy bo'lgan Atakamaga ega bo'ladi. Mis konlaridan umumli foydalanish iqtisodiy taraqqiyotni yuqori darajaga olib chiqadi. 1964—1970-yillardagi xristian-demokratlar hukmronligidan so'ng hokimiyatga S. Alende boshliq sotsialistlar keladi. Bu hukumat iqtisodni davlat mulkiga aylantirish va yer islohoti o'tkazishini e'lon qiladi. 1973-yilning sentabrida mamlakatda harbiy to'ntarish bo'ladi. Prezident S. Alende o'ldiriladi, hokimiyatni esa general Pinochet boshliq harbiy xunta egallaydi. Iqtisodiy islohotlarning o'tkazilishi va chet el investitsiyalarining jalb qilinishi Pinochetga Chilini Janubiy Amerikada iqtisodiy jihatdan eng rivojlangan davlatlar qatoriga olib chiqish imkonini beradi. Biroq Chili xalqining ichki siyosatdan noroziligi va jahon hamjamiyatining harbiy xuntani qoralashi Pinochetni konstitutsiyaga o'zgartirishlar kiritishga majbur etadi. 1990-yilda parlament saylovlari o'tkaziladi va unda xristian-demokratlar g'olib chiqishadi. 1994-yilgi prezident saylovlarida ham xristian-demokratlar g'olib chiqishadi.

## SHARQIY TIMOR

*Rasmiy nomi - Sharqiy Timor. Poytaxti - Dili. Hududi - 14925 km<sup>2</sup>. Aholisi - 1085253 kishi (2007). Davlat tili - indonez. Dini - islom. Pul birligi - indoneziya rupiyasi.*

**Geografik joylashuvi va tabiati.** Timor orolining sharqiy qismida joylashgan, Indoneziya bilan chegaradosh.

**Davlat tuzilishi va siyosiy partiyalari.** Davlat organlari va siyosiy partiyalari shakllanish jarayonida.

**Iqtisodi, transport kommunikatsiyalari.** 2006-yil YIM miqdori 370 mln dollarni (aholi jon boshiga — 341 doll.) tashkil etgan.

**Tarixi.** 1999-yilda referendum o'tkazilib, aholining 78% i Indoneziyadan ajralib chiqish va mustaqillik uchun ovoz berdi. 2002-yil may oyida BMT dunyo xaritasida yangi Sharqiy Timor davlatining paydo bo'lganligi haqida e'lon qildi.

## SHVEYTSARIYA

*Rasmiy nomi - Shveysariya Konfederatsiyasi. Poytaxti - Bern. Hududi - 41288 km<sup>2</sup>. Aholisi - 7519318 kishi (2007). Davlat tili - nemis, fransuz, italyan, retoroman. Dini - katoliklar (50%), protestantlar (48%). Pul birligi - shveysariya franki.*

**Geografik joylashuvi va tabiati.** Markaziy Yevropadagi davlat. Janub va janubi sharqda — Italiya (chegaraning uzunligi 740 km), g'arb, janubi g'arb va shimoli g'arbda — Fransiya (573 km), shimolda — Germaniya (334 km), sharqda — Avstriya (164 km) va Lixtenshteyn (41 km) bilan chegaradosh. Chegarasining umumiy uzunligi — 1852 km. Shveysariya — tog'li mamlakat. Uning katta qismida Alp tog'lari joylashgan. Mamlakatning eng baland nuqtasi — Dyufur tog'i (4634 m). Alp muzliklarining maydoni — 2000 km<sup>2</sup>. Shimoli g'arbda Yura tog'lari bor. Markaziy qismda Shveysariya yassitog'ligi joylashgan. Asosiy daryolari: Reyn, Rona, Tichino. Yirik ko'llari: Jeneva, Boden. Asosiy tabiiy resurslari: yog'och, gidroenergetik potensial. Mamlakat hududining 10% i haydaladigan yerlardan, 40%i yaylov va o'tloqlardan iborat. Atlantika okeanining ta'siri va mamlakat orografik tuzilishining murakkabligi ko'pincha iqlimning nam bo'lishiga sabab bo'ladi. Shveysariyaning o'simlik dunyosi asosini ignabargli va subalp o'rmonlar tashkil etadi. Tog'larda saldanella, primula hamda Shveysariyaning norasmiy ramzi hisoblangan edelveys o'sadi. Yovvoyi echki, suvsar, quyon, sug'ur, ayiq, tulki, bo'ri, to'ng'iz, burgut, karqur hayvonot olamini tashkil etadi.

**Davlat tuzilishi, siyosiy partiyalari.** Davlat tuzilishi — federativ respublika. Mamlakat tarkibida 23 kanton bor (ulardan uchtasi yarim kantonlarga bo'lingan). Shveysariya Konfederatsiyasi 1291-yilning 1-avgustida tashkil topgan. Ushbu kun milliy bayram — Konfederatsiya tashkil topgan kun hisoblanadi. Federal konstitutsiya 1874-yilda qabul qilingan. Har bir kanton o'zining konstitutsiyasi, parlamenti va hukumatiga ega. Davlat va hukumat boshlig'i —

konfederatsiya prezidenti. Hukumat Federal Kengash deb nomlanadi. Qonun chiqaruvchi hokimiyat Kantonlar senati (yuqori palata) va Milliy Kengash (quyi palata)dan iborat ikki palatali parlament Federal Majlis tomonidan amalga oshiriladi. Yirik siyosiy partiyalari: Shveysariya radikal-demokratik partiyasi, Shveysariya xristian-demokratik partiyasi, Shveysariya sotsial-demokratik partiyasi.

***Iqtisodi, transport kommunikatsiyalari.***

Yuqori darajada rivojlangan sanoat davlati. Shveysariya aholi boshiga daromad darajasi bo'yicha jahonda yetakchi o'rinlardan birini egallaydi. Qazilma boyliklarining yo'qligiga qaramay Shveysariya jahon bozorlarida kuchli raqobatchi hisoblanadi, bundan tashqari bu davlat iqtisodiy barqarorlik va aholining bandligini yuqori darajada ushlab turadi. Metallga ishlov berish, mashinasozlik, uskunasoziq, kompyuter texnikasi, transport vositalari, soatsozlik, kimyo, oziq-ovqat, farmatsevtika sanoatining eng taraqqiy etgan tarmoqlaridir. Iqtisodining muhim tarmoqlaridan biri — bank ishi. Shveysariya dunyoning moliyaviy markazlaridan biri hisoblanadi. Qishloq xo'jaligi (YIMning 5% i) asosan chorvachilikka ixtisoslashgan. 2006-yil YIM miqdori 247602 mln dollarni (aholi jon boshiga — 32928 doll.) tashkil etgan. Asosiy savdo hamkorlari: YI davlatlari, AQSH, Yaponiya.

Temiryo'llarining umumiy uzunligi — 5174 km (99% elektrlashtirilgan), avtomobil yo'llari 61500 km, ichki suv yo'llari — 65 km. Asosiy daryo porti — Bazel.

***Tarixi.*** Kelt qabilalari — ret va gelvetlar yashagan hozirgi Shveysariya I asrda qadimgi Rim tomonidan bosib olinadi. V asrda bu hududga german qabilalaridan burgundlar va allemanlar kirib kelishadi va hozirgi Roman Shveysariyasi hamda Alleman Shveysariyasi joylashgan hududlarda o'rnatiladi. VI asrdan hozirgi Shveysariya hududi Franklar qirolligi, keyinroq Burgundiya, 1032-yildan Muqaddas Rim imperiyasi tarkibiga kirgan. XII—XIII asrlarda bu hududda bir qator mustaqil knyazliklar shakllanadi. Shular orasida XIII asrning oxirlariga kelib Gabsburg knyazligi obro' qozonadi. 1291-yilda uchta shveysar kantoni (Uri,

Shvits va Untervalden) ittifoq tuzib, gabsburglarga qarshi kurashadilar. Qator mag'lubiyatlar (1315-yil — Morgatan, 1351-yil — Syurix, 1386-yil — Zempaxdava va boshqalar)dan so'ng gabsburglar 1389-yilda Konfederatsiyani tan oladilar. 1498-yilda Konfederatsiyaga yana besh kanton qo'shiladi. Shveysariya Konfederatsiyasining harbiy qudrati Yevropa davlatlari tomonidan tan olinadi (Shveysariyaning rasman tan olinishi 1648-yilgi Vestfaliya shartnomasi bilan mustahkamlangan) va ular XV—XVI asrlarda yollanma shveysar qo'shinlarini harbiy yurishlarga jalb qila boshlashadi. Reformatsiya XVI asrda mamlakatni ikkiga bo'lib, fuqarolar urushini keltirib chiqaradi. Katolik va protestantlar o'rtasidagi janglardan birida protestant ruhoniysi U. Svingli halok bo'ladi. Shundan so'ng ikki o'rtada shartnoma tuzilib, unga ko'ra to'rt kantonda kalvinizm, yetti kantonda katolik dini tan olinadi. Shveysariya XVII asrda neytralitet e'lon qiladi. Neytralitet bir marotaba, 1798—1814-yilgi Napoleon urushi davrida buziladi. Lekin 1815-yilgi Vena kongressi Shveysariyaning xalqaro maqomini tasdiqlab, uning neytralligi va chegaralarining daxsizligini kafolatlaydi. Shu davrdan qo'shilmaslik siyosati mamlakat tashqi siyosatining asosiy yo'nalishlaridan biri bo'lib qoladi va Shveysariya bu siyosatga ikkita jahon urushlarida ham amal qildi.

## SHVETSIYA

*Rasmiy nomi — Shvetsiya Qirolligi. Poytaxti — Stokgolm. Hududi — 449964 km<sup>2</sup>. Aholisi — 9031088 kishi (2007). Davlat tili — shved. Dini — lyuteranlar (94%), katoliklar (1,5%). Pul birligi — shved kronasi.*

**Geografik joylashuvi va tabiati.** Skandinaviya yarimorolining katta qismini egallagan Shimoliy Yevropadagi davlat. Shvetsiyaga Boltiq dengizidagi Gotland va Aland orollari hamda mamlakat sohili yaqinidagi qator mayda orollar tegishli. Shvetsiya g'arbda va shimolda Norvegiya (chegara uzunligi — 1619 km), shimoli sharqda Finlyandiya (586 km)

davlatlari bilan chegaradosh. Sharqda Shvetsiya Boltiq dengizi va Botnika qo'ltig'i, janubi g'arbda Kattegat va Skagerrak bo'g'ozlari bilan tutashgan. Eresunn tor bo'g'ozini Shvetsiyani Daniyaga tegishli bo'lgan Zelandiya orolidan ajratib turadi. Chegarasining umumiy uzunligi — 2205 km, sohil bo'ylab chegara uzunligi — 3218 km. Mamlakat hududining asosiy qismi yassitog'liklar va tepaliklari bor tekisliklardan iborat. Shimol va g'arbda Skandinav tog'lari (eng baland nuqtasi — Kebnekayse tog'i — 2123 m) joylashgan. Mamlakat sharqida Norland yassitog'ligi joylashgan. Shvetsiyaning janubiy qismida ko'p sonli ko'llardan iborat vodiy bor. Yirik ko'llari — Vettern va Venern. Asosiy daryolari — Kaliks-Elv, Shellefte-Elf, Ume-Elf, Turne-Elf. Mamlakat temir rudasi, qo'rg'oshin, rux, mis, kumush va yog'ochga boy. Haydaladigan yerlar mamlakat hududining 7%, o'rmonlar va to'qaylar 64% ini tashkil etadi.

Iqlimi — mo'tadil. Mamlakat hududining yarmidan ko'prog'i o'rmonlardan iborat (23 mln ga). Ignabargli o'rmonlar ko'p. Mamlakat janubida aralash o'rmonlar mavjud. Shimolda asosan mox va lishayniklar o'sadi. Bug'u, kiyik, tulki, o'rmon suvsari, olmaxon, quyon, o'rdak va oqqushlar hayvonot dunyosini tashkil etadi. Daryolari va Boltiq dengizi turli baliqlarga boy.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat tarkibiga 24 len (guberniya) kiradi. Milliy bayrami — 6-iyun — Shved Bayrog'i kuni. Davlat boshlig'i — monarx. Ijro etuvchi hokimiyat — Vazirlar Mahkamasini boshqaradigan Bosh vazirga tegishli. Qonun chiqaruvchi hokimiyat — bir palatali parlament — Riksdag tomonidan amalga oshiriladi. Yirik siyosiy partiyalari: Shvetsiya xalq-demokratik ishchi partiyasi, Mo'tadil koalitsion partiya, Xalq partiyasi — liberallar, So'l partiya, Atrof-muhitni himoya qilish partiyasi.

**Iqtisodi, transport kommunikatsiyalari.** Shvetsiya samarali ijtimoiy ta'minot, aholining yuqor turmush darajasi hamda fuqarolarning ish bilan to'la bandligini ta'minlaydigan iqtisodiyotga ega. Mamlakat zo'r transport kommunikatsiyasiga va malakali ishchilarga ega. Iqtisodining asosini yog'ochni qayta ishlash

qog'oz-selluloza sanoati, metallurgiya, gidroenergetika va avtomobilsozlik tashkil etadi. Qishloq xo'jaligida chorvachilik muhim o'rin tutadi. Don mahsulotlari, qandlavlagi, kartoshka asosiy ekinlar hisoblanadi. So'nggi yillarda hukumat tomonidan o'tkazilayotgan islohotlar — soliqlarni kamaytirish, davlat korxonalarini xususiy-  
lashtirishdan iborat bo'lib, ular ishlab chiqarish hajmi-ning o'sishiga, narxlarning barqarorligini saqlab qolishga, ishsizlik darajasini kamaytirishga qaratilgan. 2006-yil YIM miqdori 265048 mln dollarni (aholi jon boshiga — 29348 doll.) tashkil etgan. Asosiy savdo hamkorlari: Germaniya, Buyuk Britaniya, Daniya, AQSH, Norvegiya.

Temiryo'llarining umumiy uzunligi — 12000 km. Avtomobil yo'llari — 135819 km (97818 km qattiq qoplamali), ichki suv yo'llari — 2052 km. Portlari — Evle, Gyoteborg, Kalmar, Malmyo, Stokgolm, Xelsingborg.

**Tarixi.** Hozirgi Shvetsiya hududida qadimda german qabilalari yashagan. VII—X asrlarda vikinglarning (sharqda ularni varyaglar deb atashgan) ta'siri sharqqa, avvaliga Boltiqbo'yiga, keyinroq Rossiyaga (IX asrda varyag knyazlari Novgorod va Kiyevni boshqarishga taklif etilgan) tarqalgan. 860-yilga kelib varyaglar Konstantinopol bilan savdo qilishgan. Xristianlikni mamlakatga 830-yilda frank missionerlari olib kirishgan. Bu din dastlabki xristian qirollar Olafe, Skotkonunge (XI asr) va, ayniqsa, XII asrda hukmronlik qilgan Erik IX (Avliyo) davrida keng tarqalgan. Erik IX (1150—1160) Finlyandiyaga qarshi urush boshlaydi. Finlyandiya XIII asrda Shvetsiya tomonidan bosib olinadi. 1359-yilda Shvetsiyaning Daniya va Norvegiya bilan birlashishi (Kalmar uniyasi) Shvetsiyani XVI asr boshigacha Daniyaga qaram qilib qo'yadi. Karl XII Rossiya, Daniya va Polshaga qarshi kurashgan Shimoliy urushda (1700—1721) shved armiyasi Poltava yaqinida mag'lubiyatga uchraydi va Shvetsiya XVII asrda Gustav II Adolf davrida egallagan hududlarni qo'ldan boy beradi. Karl XIII 1814-yilda Norvegiyani Shvetsiyaga qo'shib oladi (1905-yilgacha). XX asrda ikkala jahon urushlarida neytralitet e'lon qilgan Shvetsiyaning siyosiy hayotida sotsial-demokratlar mavqeyi ortadi. Sotsial-demokratik partiyaning yorqin

namoyandalaridan biri Shvetsiya Bosh vaziri 1986-yili terrorchi tomonidan o'ldirilgan Ulof Palmedir.

## SHIMOLIY KOREYA

*Rasmiy nomi – Koreya Xalq Demokratik Respublikasi. Poytaxti – Pxenyan. Hududi – 120538 km<sup>2</sup>. Aholisi – 23329389 kishi (2007). Davlat tili – koreys. Dini – budda va konfutsiylik (biroq diniy faoliyat amalda deyarli yo'q). Pul birligi – von.*

**Geografik joylashuvi va tabiati.** Sharqiy Osiyodagi davlat. Koreya yarimorolining shimoliy qismida joylashgan. Shimolda Xitoy (chegara uzunligi — 1416 km), janubda Janubiy Koreya (238 km), shimoli sharqda Rossiya bilan (17 km) chegaradosh. G'arbdan Sariq dengiz, sharqdan Yapon dengizi o'rab turadi. Chegarasining umumiy uzunligi — 1671 km, sohil bo'ylab chegara uzunligi — 3495 km. Mamlakat hududini asosan tepalik va tog'lar tashkil qiladi, ularning oralig'i torgina vodiylardan iborat. Mamlakatning eng baland nuqtasi — Pektusan tog'i (2750 m). Asosiy daryolari: Amnokkan, Tedongan, Tumangan. Asosiy tabiiy boyliklari: ko'mir, qo'rg'oshin, volfram, temir rudasi, mis, oltin rux, grafit, magnezit. Hududining 20% i haydaladigan yerlar, 74% i o'rmon va changalzorlar.

Iqlimi — mo'tadil mussonli. Mamlakatning tog'li tumanlari uchun ignabargli o'rmonlar xarakterli: qarag'ay, archa, koreys oq qarag'ayi, shuningdek, tol, terak, g'ujumlar ko'proq bo'lgan aralash o'rmonlar bor. Vodiylar amalda to'laligicha qishloq xo'jalik ekinlari bilan band. Bu yerlarda sholi, soya, javdar, makka-jo'xori va boshqoqli ekinlar ekiladi. Mamlakat hayvonot dunyosida yo'lbars, qoplon, ayiq, tulki, bo'rilarni uchratish mumkin. Qushlar olamida burgut, bekas, tuma va qirg'iylar bor.

**Davlat tuzilishi, siyosiy partiyalari.** Konstitutsiyasiga binoan KXDR suveren sotsialistik davlat hisoblanadi, amalda esa mamlakatda kommunistik rejim o'rnatilgan. Mamlakat tarkibida 9 ta viloyat va ikkita



markazga bo'ysunuvchi shahar bor. KXDR 1948-yil 9-sentabrda mustaqil davlat bo'ldi (avvallari Yaponiya imperiyasining Chosun viloyati edi). 9-sentabr — Milliy bayram — Mustaqillik kuni. Davlat boshlig'i — amalda cheklanmagan hokimiyatga ega bo'lgan prezident (Kim Ir Senning vafotidan so'ng, 1994-yildan beri mamlakatni prezident Kim Chen Ir boshqaradi). Ikkita vitse-prezident, Ma'muriy Kengash rahbari va to'qqizta vitse-rahbarlar prezidentga bo'ysunadilar. Yuqori qonunchilik organi — Xalq Oliy majlisi. Mamlakatda faqat bitta siyosiy partiya — Koreya Mehnat partiyasi ro'yxatga olingan.

#### *Iqtisodi, transport kommunikatsiyalari.*

Foydali qazilmalar va gidroenergetik resurslarning katta hajmi mamlakat sanoat taraqqiyotining asosini tashkil qiladi. Asosan qazib chiqarish sanoati (ko'mir, temir, magnet rudalari, grafit, mis, rux, qo'rg'oshin) va og'ir sanoat rivojlangan. Iqtisodiyot ustidan o'rnatilgan davlat nazorati hatto kommunistik rejim uchun ham juda qattiq. Qishloq xo'jaligi uchun yaroqli yerlarning barchasi kollektivlashtirilgan. Qishloq xo'jaligida (YIMning chorak qismiga yaqini) mehnatga layoqatli aholining 36%i band. Asosiy ekinlari — sholi, makkajo'xori, soya, kartoshka, boshqoli ekinlar. Iqtisodiy rivojlanish va turmush darajasi bo'yicha Shimoliy Koreya Janubiy Koreyadan ancha orqada. 2006-yil YIM miqdori 40000 mln dollarni (aholi jon boshiga — 1700 doll.) tashkil etgan. Asosiy savdo hamkorlari: Rossiya, Xitoy, Yaponiya, Germaniya, Gonkong, Singapur.

Temiryo'llarining umumiy uzunligi 4915 km, avtomobil yo'llari uzunligi 30000 km ga yaqin. Mamlakat portlari: Vonsan, Nampxo, Chxonjin, Xinnam.

*Tarixi.* M. a. II—I asrlarda hozirgi Koreyaning hududi Xitoyning mustamlakasi edi. M. a. 37-yili Koreya yarimorolining shimolida Koreys davlati Kogure paydo bo'ladi, janubiy qismi esa ikkita qirollikka: Pekche va Sillaga bo'lingandi. X asrning oxirlarida koreys davlatlari Koryo dinastiyasi hukmronligi ostida birlashtirildi. 1321-yili mo'g'ullar Koreyani bosib olganlarida qirol saroyidagilar Chejudo oroliga bekindilar. Li dinastiyasi hukmronligi yillarida (1392—1910) mamlakatga yaponlar (XVI asr oxiri) va manchjurlar

(XVIII asr) hujum qildilar, XIX asrda esa Xitoy, Yaponiya va Rossiya o'rtasida talash bo'ldi. 1910-yili Yaponiya tomonidan bosib olingan Koreya 1938-yili yapon bosqinchilariga qarshi kurash boshladi va 1943-yili mustaqillikka erishdi. Biroq sovet va Amerika qo'shinlari bosib olgan ikki zona 38-parallel bo'yicha ikki qismga bo'lindi. 1948-yili mamlakatning shimoliy qismida Koreya Xalq Demokratik Respublikasi e'lon qilindi. 1950—1953-yillarda Shimoliy va Janubiy Koreya o'rtasida urush davom etdi. Bu urush tugagandan keyin ham ikkala koreys davlatlari o'rtasida chegara mojarolari bo'lib turdi. Shimoldagi koreys davlatining dastlabki davridayoq undagi hokimiyat bir kishi — Kim Ir Senning qo'lida bo'ldi, u mamlakatda kommunistik diktatura o'rnatdi. Kim Ir Senning o'limidan so'ng hokimiyatni uning o'g'li Kim Chen Ir egalladi, uncha ko'p davom etmagan motam davridan so'ng u KXDR-ni prezident deb rasman e'lon qilindi.

## SHRI-LANKA

*Rasmiy nomi* Shri-Lanka Demokratik Sotsialistik Respublikasi. *Poytaxti* — Kolombo. *Hududi* — 65610 km<sup>2</sup>. *Aholisi* — 21002034 kishi (2007). *Davlat tili* — tamil, singal. *Dini* — buddaviylik (69%), hinduiylik (15%), xristianlik (8%), islom (7%). *Pul birligi* — shri-lanka rupiyasi.

**Geografik joylashuvi va tabiati.** Hindistonning janubiy sohillari yaqinidagi orolda joylashgan, Hind okeanidagi davlat. Osiyo qit'asidan Shri-Lankani Polk bo'g'oz va Manar qo'ltig'i ajratib turadi. Sohil bo'ylab chegara uzunligi — 1340 km. Mamlakat hududi asosan tekisliklardan iborat. Janubiy va markaziy qismlarida zinasimon tog'lar bor. Eng baland nuqtasi — Pidurutalagala cho'qqisi (2524 m). Asosiy daryosi—Maxaveli-Ganga. Asosiy tabiiy resurslari: olmos va boshqa qimmatbaho toshlar, fosfatlar, marmartoshi va baliq. Mamlakat hududining 16%ini haydaladigan yerlar, 32%ini o'rmon va to'qaylar tashkil etadi.

Iqlimi — ekvatorial, subekvatorial. Banyan, daraxtsimon paporotniklar, turli xil palmalar, atlas, sandal, eben daraxtlari florasining asosini tashkil etadi. Hayvonot dunyosini fil, qoplon, silovsin, shoqol, timsoh, turli maymunlar, ilonlar, kaltakesaklar tashkil etadi.

**Davlat tuzilishi, siyosiy partiyalari.** Davlat tuzilishi — prezident respublikasi. Mamlakat 8 provinsiyaga bo'lingan. Shri-Lanka 1948-yilning 4-fevralida mustaqillikka erishgan (avval: Seylon — Buyuk Britaniya mustamlakasi). 4-fevral — Milliy bayram — Mustaqillik kuni. Ijro etuvchi hokimiyat prezident va Vazirlar Mahkamasini boshqaradigan Bosh vazirga tegishli. Qonun chiqaruvchi hokimiyat bir palatali parlament tomonidan amalga oshiriladi. Yirik siyosiy partiyalari: Shri-Lanka ozodlik partiyasi, Birlashgan milliy partiya, Shri-Lanka xalq partiyasi, Shri-Lanka sotsialistik partiyasi, Yangi siyosiy partiya, Shri-Lanka kommunistik partiyasi, Tamil birlashgan ozodlik fronti, Milliy ozodlik fronti, «Tamil llamni qutqarish yo'lbarlari».

**Iqtisodi, transport kommunikatsiyalari.** Iqtisodining rivojlangan tarmoqlaridan biri — qishloq xo'jaligi. Sholi, shakarqamish, don ekinlari, dukkakli ekinlar, ziravorlar yetishtiriladi. Choy (dunyoda 3-o'ringda), kokos yong'og'i (umumiy eksport hajmining 1/3 qismi) eksport qilinadi. Ishlab chiqarish qishloq xo'jaligi mahsulotlari, baliqni qayta ishlash bilan chegaralangan. Turizm asosiy valuta manbalaridan biridir. 2006-yil YIM miqdori 81144 mln dollarni (aholi jon boshiga — 3863 doll.) tashkil etgan. Asosiy savdo hamkorlari: AQSH, Germaniya, Yaponiya, Buyuk Britaniya, Hindiston, Eron, Tayvan.

Temiryo'llarining umumiy uzunligi — 1948 km, avtomobil yo'llari — 75749 km (27637 km ga tosh yetqizilgan), ichki suv yo'llari — 430 km. Portlari — Galeye, Kolombo, Jafna, Negombo, Trinkomali.

**Tarixi.** Taxminan m. a. V asrda Shri-Lankaga Gang va Hind daryolari vodiylaridan hind-yevropa til oilasiga mansub qabilalar kirib kelishadi va orollarda Singal davlatiga asos soladi. Orol buddaviylikni targ'ib etish markazlaridan hisoblangan. Afsonalarga ko'ra buddaviylikni orolga Ashokaning o'g'li (yoki ukasi olib kelgan).

M. a. III asrning boshlaridan Shri-Lankaga Hindistonning janubidan tamillar kirib kela boshlaydi. Tamillar Shri-Lankada XII asrgacha hukmronlik qiladi. 1505-yili orolda portugallar paydo bo'lishdi va XVI asrning oxirida orolni mustamlakaga aylantirishadi. XVII asrda Shri-Lankani gollandlar egallab olishdi. 1802-yilda orol Buyuk Britaniyaga tobe bo'ldi. 1948-yilda Seylon Britaniya hamdo'stligi tarkibidagi mustaqil davlat deb e'lon qilindi. 1972-yildan mamlakat Shri-Lanka Respublikasi deb atala boshlandi. Tamillar va singallar o'rtasidagi etnik mojarolar XX asrning 80-yillari boshlarida fuqarolar urushiga aylandi. Fuqarolar urushiga barham berilgan bo'lsa-da, hanuzgacha ikki tomon o'rtasida keskinliklar mavjud.

## EKVADOR

*Rasmiy nomi – Ekvador Respublikasi. Poytaxti – Kito. Hududi – 283600 km<sup>2</sup>. Aholisi – 13877962 kishi (2007). Davlat tili – ispan. Dini – katolik. Pul birligi – sukre.*

**Geografik joylashuvi va tabiati.** Janubiy Amerikaning shimoli g'arbidagi davlat. Janub va sharqda Peru (chegaraning uzunligi — 1420 km), shimolda Kolumbiya (590 km) bilan chegaradosh. G'arbda Tinch okeani bilan tutashgan. Chegarasining umumiy uzunligi — 2010 km, sohil bo'ylab chegara uzunligi — 2237 km. Mamlakat uchta geografik hududga bo'linadi. G'arbda maksimal kengligi 150 km bo'lgan sohilbo'yi tekisligi — Kosta joylashgan. Mamlakat markazida, Sharqiy Kordilyera va G'arbiy Kordilyera tog'lari orasida uzunligi 600 km, kengligi 100—200 km, o'rtacha balandligi 2500 m bo'lgan Serra tog'ligi yotadi. Sharqiy Kordilyerada harakatdagi vulqonlar ko'p bo'lib, ular orasida 5230 m balandlikdagi Sangay vulqoni faolligi bilan ajralib turadi. G'arbiy Kordilyerada mamlakatning eng baland nuqtasi — Chamboroso (6310 m) joylashgan. Ekvadorning sharqiy qismini, deyarli yarim hududini, Oryende — Sharqiy changalzorlari egallaydi. Bu joylarga inson qadami yetmagan, aholi yashamaydi. Changalzorning ko'p qismlari tadqiq etilmagan.

Changalzordan Amazonkaga quyiladigan daryolar — Napo, Pastasa, Tigre va boshqa daryolar oqib o'tadi. Asosiy tabiiy resurslari: neft, yog'och, baliq. Hududining 6%ini haydaladigan yerlar, 51%ini o'rmon va to'qaylar, 17% ini yaylov va o'tloqlar tashkil etadi.

Iqlimi — sohilbo'yida ekvatorial, tog'li hududlarida salqin. Tekislik va tog' yonbag'irlari ekvatorial o'rmonlar bilan qoplangan. Tog'larda adir o'simliklari o'sadi. Hayvonot ofamini yaguar, ayiq, yovvoyi mushuk, skuns, laska, Galapagoss orollarida gigant dengiz toshbaqasi, dengiz iguanasi, pingvinlar tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat 21 provinsiyaga bo'lingan. Galapagoss orollari ham provinsiya maqomiga ega. 1822-yilning 24-mayida Ekvador Ispaniyadan o'z mustaqilligiga erishgan. Davlat va hukumat boshlig'i — prezident. Qonun chiqaruvchi oliy organ — Milliy Kongress (bir palatali parlament). Yirik siyosiy partiyalari: Respublika birligi partiyasi, Sotsial-xristian partiya, Konservativ partiya, Ekvador roldosistlar partiyasi, Demokratik so'l partiya.

**Iqtisodi, transport kommunikatsiyalari.** Sanoatning asosiy tarmog'i — neft qazib olish. Boshqa tarmoqlari — metallurgiya, qog'oz-selluloza, oziq-ovqat, to'qimachilik. Qishloq xo'jaligi (baliqchilik va o'rmonchilik bilan birga) YIMning 18%ini tashkil etadi. Banan, qahva, kakao donlari, baliq, krevetka eksport qilinadi. Chorvachilik rivojlangan. 2006-yil YIM miqdori 51330 mln dollarni (aholi jon boshiga — 3700 doll.) tashkil etgan. Asosiy savdo sheriklari: AQSH, Lotin Amerikasi davlatlari, Karib havzasi davlatlari, YI davlatlari, Yaponiya.

Temiryo'llarining umumiy uzunligi — 965 km, avtomobil yo'llari — 28000 km (3600 km asfaltlangan), ichki suv yo'llari — 1500 km. Asosiy portlari: Guayyakil, Esmeraldas.

**Tarixi.** XV asrda hozirgi Ekvador hududi inklar imperiyasi tarkibiga kirgan. 1526-yilda ispanlar tomonidan kashf etilgan Ekvador Pissaro va Belalkasara boshliq konkistadorlar tomonidan 1533-yilda zabt etiladi. 1822-yilda mamlakat ispan qo'shinlaridan ozod

bo'lib, Kito nomi bilan Buyuk Kolumbiya tarkibiga kiradi. 1830-yilning 13-mayidan Ekvador mustaqil respublika. 1941—1942-yillardagi Peru bilan urushdan so'ng mamlakat qator harbiy to'ntarishlarni boshidan kechirdi. 1979-yilda harbiylar hokimiyatni fuqarolik hukumatiga topshiradi.

## EKVATORIAL GVINEYA

*Rasmiy nomi — Ekvatorial Gvineya Respublikasi. Poytaxti — Malabo. Hududi — 28051 km<sup>2</sup>. Aholisi — 551524 kishi (2007). Davlat tili — ispan. Dini — katolik. Pul birligi — ekvele.*

**Geografik joylashuvi va tabiati.** Afrika qit'asining g'arbidagi davlat. Sharq va janubda Gabon (chegara uzunligi — 350 km), shimolda Kamerun (189 km) bilan chegaradosh. G'arbda mamlakat Gvineya ko'rfazi bilan tutashgan. Chegarasining umumiy uzunligi — 539 km, sohil bo'ylab chegara uzunligi — 296 km. Materikdagi hududdan tashqari Ekvatorial Gvineyaga Bioko, Annobon va qator mayda orollar tegishli. Ekvatorial Gvineya — tog'li mamlakat. Sohil bo'yidagi tekisliklar sekin-asta past tog'larga aylanib boradi. Orollar vulqon jismlaridan iborat. Asosiy daryolari — Miteleme va Benito. Asosiy tabiiy resurslari: marganes, uran, yog'och, neft.

Iqlimi — ekvatorial. O'simlik dunyosi Ebena, okume, akaju, ovenka, akoga, non, sandal daraxtlari, mimoza, fikuslardan iborat. Hayvonot dunyosini turli maymunlar, qoplon, fil, antilopa, kiyik, mangust, bir necha tur ilon, qush, hasharotlar tashkil etadi. Bioko orolida jayra uchraydi.

**Davlat tuzilishi, siyosiy partiyalari.** Davlat tuzilishi — prezident respublikasi. Mamlakat tarkibiga 7 ta provinsiya kiradi. 1968-yilning 12-oktabrida Ekvatorial Gvineya Ispaniyadan mustaqillikka erishdi (avvalgi nomi — Ispaniya Gvineyasi). Shu kun milliy bayram — Mustaqillik kuni hisoblanadi. Davlat boshlig'i — prezident, hukumatni Bosh vazir boshqaradi. Qonun chiqaruvchi hokimiyatni prezident parlament —

Xalq vakillari palatasi bilan birgalikda amalga oshiradi. Yirik siyosiy partiyalari: Ekvatorial Gvineya demokratik partiyasi, Xalq ittifoqi, Liberal-demokratik konvensiya, Sotsial-demokratik partiya.

**Iqtisodi, transport kommunikatsiyalari.** Mamlakat iqtisodi qishloq xo'jaligi, o'rmonchilik, baliqchilikka asoslangan (YIMning yarmi, eksport hajmining deyarli hammasi). Asosiy eksport mahsulotlari — qahva, yog'och, kakao donlari. Ishlab chiqarish yog'ochga ishlov berish va baliqni qayta ishlash bilan chegaralangan. Neft konlari o'rganilmogda. Titan, temir, uran, oltin, marganes konlari ochilmagan. 2006-yil YIM miqdori 2569 mln dollarni (aholi jon boshiga — 4659 doll.) tashkil etgan. Asosiy savdo sheriklari: Ispaniya, Nigeriya, Fransiya, Kamerun.

Avtomobil yo'llarining umumiy uzunligi — 2760 km. Portlari: Bata, Malabo.

**Tarixi.** Hozirgi Ekvatorial Gvineya hududi XV asrning oxirlarida portugallar tomonidan kashf etilgan. 1778-yili Portugaliya o'z mustamlakasini Ispaniya tasarrufiga o'tkazishga majbur bo'ladi. Mamlakat mustaqillikka erishguncha (1968) Ispan Gvineyasi deb atalgan. Prezident Nguema tomonidan o'rnatilgan avtoritar tuzum 1979-yilda polkovnik Mbasogo boshchiligidagi harbiy to'ntarishda ag'dariladi. Tez orada Ispaniya va AQSH bilan aloqalar tiklanib, neft qazib olish yo'lga qo'yildi. 1990-yillarda muxolifatchilarni ommaviy hibsga olish boshlandi.

## ERITREYA

*Rasmiy nomi — Eritreya davlati. Poytaxti — Asmera. Hududi — 125000 km<sup>2</sup>. Aholisi — 4906333 kishi (2007). Davlat tili — arab, tigre. Dini — islom, xristian. Pul birligi — efiopiya biri.*

**Geografik joylashuvi va tabiati.** Sharqiy Afrikadagi davlat. G'arbda va janubda Efiopiya (chegaraning uzunligi — 912 km), shimolda va shimoli g'arbda Sudan (605 km), janubi sharqda Jibuti (113 km)

bilan chegaradosh. Sharqda mamlakat Qizil dengiz bilan tutashgan. Chegarasining umumiy uzunligi — 1630 km, sohil bo'ylab chegara uzunligi — 1151 km. Eritreya tog'li mamlakatdir. Uning hududi Efiopiya tog'ligining bir qismi hisoblanadi. G'arbda tog'lik sekin-asta pasayib Sudan tekisligiga aylanadi. Sharqda esa sohilbo'yi tekisligi joylashgan. Eritreyada oltin, mis, temir, nikel, xrom, titan, neft konlari bor. Haydaladigan yerlar mamlakat hududining 3%ini, yaylov va o'tloqlar 40% ini tashkil etadi.

Iqlimi — quruq va issiq. O'simlik dunyosini cho'l o'simliklari tashkil etadi. Hayvonot olami timsoh, tuyaqush, burgut, marabu, kalxat va turli dengiz baliqlaridan iborat.

**Davlat tuzilishi, siyosiy partiyalari.** Davlat tuzilishi — respublika. Eritreya o'z mustaqilligini 1993-yilning 24-mayida e'lon qilgan (avval Efiopiyaning bir qismi). Milliy bayramlari: 24-may — Mustaqillik kuni va 1-sentabr — Mustaqillik uchun qurollangan kurash boshlangan kun (1961). Davlat va hukumat boshlig'i — prezident. Qonun chiqaruvchi oliy organ — Eritreya Milliy Assambleyasi. Yagona siyosiy partiya — Eritreyani ozod qilish milliy fronti.

**Iqtisodi, transport kommunikatsiyalari.** Eritreya jahonning iqtisodiy jihatdan kam taraqqiy etgan davlatlaridan biridir. Iqtisodining asosiy tarmog'i aholining 60% i band bo'lgan qishloq xo'jaligidir (YIMning 50%i, eksportning 70%i). 2006-yil YIM miqdori 4790 mln dollarni (aholi jon boshiga — 976 doll.) tashkil etgan. Sanoatining rivojlangan tarmoqlari: neftni qayta ishlash, yog'ochni qayta ishlash, to'qimachilik, teri-poyabzal, tikuvchilik, oziq-ovqat. Portlari: Aseb, Massaua.

**Tarixi.** Eritreya eramizgacha vujudga kelgan efioip qirolligi — Aksum tarkibiga kirgan. 1890-yildan Italiya mustamlakasi. 1941-yildan BMT mandatiga ko'ra Buyuk Britaniya tomonidan boshqarilgan. 1952-yilda Eritreya federatsiya a'zosi sifatida efioip imperiyasi tarkibiga kirgan. 1962-yilda, Efiopiya Eritreyani provinsiya deb e'lon qilgandan so'ng, mamlakatda mustaqillik uchun harakat boshlanib, bu harakat 1975-yilda keng



miqyosga ko'tariladi. Eritreyalik qo'zg'olonchilar hukumat qo'shinlaridan ustun kelgach, 1993-yilda Eritreya referendum natijalariga ko'ra mustaqil bo'ldi.

## ERON

*Rasmiy nomi* — Eron Islom Respublikasi.  
*Poytaxti* — Tehron. *Hududi* — 1648000 km<sup>2</sup>.  
*Davlat tili* — fors. *Aholisi* — 66047319 kishi (2007). *Dini* — islom. *Pul birligi* — Eron riali

**Geografik joylashuvi va tabiati.** Eron Janubi g'arbiy Osiyoda joylashgan. G'arbda Iroq (chegara uzunligi 1458 km) va Turkiya (4999 km), shimolda Turkmaniston (992 km), Ozarbayjon (611 km) va Armaniston (35 km), sharqda Afg'oniston (936 km) va Pokiston (909 km) bilan chegaradosh. Janubda Fors va Ormuz qo'ltiqlari, shimolda Kaspiy dengizi bilan tutash. Chegarasining umumiy uzunligi — 5440 km. Eronning katta qismini Eron tog'lig'i egallaydi. Shimolda Kaspiy dengizi qirg'oqlari bo'ylab Elburs tog'lari qad ko'targan. Shimoli sharqda Kopetdog' tizmasi joylashgan. G'arbiy chegaralar bo'ylab shimoli g'arbdan janubi sharqqa tomon Zagros tog'lari cho'zilgan. G'arbda Huziston tekisligi joylashgan. Mamlakat markazida Dashti-Kabir va Dashti-Lut cho'llari joylashgan. Eronda katta daryolar kam. Asosiy daryosi — Korun. Eng katta ko'li Urmiya — shimoli g'arbda joylashgan. Neft va tabiiy gaz konlariga boy. Shuningdek, boshqa foydali qazilmalari: ko'mir, temir rudasi, xrom, mis, rux, qalay, marganes, oltingugurt.

**Davlat tuzilishi va siyosiy partiyalari.** Davlat tuzilishi — islom respublikasi. Ma'muriy jihatdan 24 provinsiya (ostona)ga bo'linadi. 1906-yilda Konstitutsion monarxiya, 1979-yil 1-aprelda Eron Islom Respublikasi deb e'lon qilingan. (1-aprel — Milliy bayram). Ijroiya hokimiyati Oyatulloh (davlatning diniy boshlig'i) va prezidentga tegishli. Qonun chiqaruvchi hokimiyat — bir palatali parlament — Islom qo'mitasi Kengashi (majlis). Eron Islom Respublikasi (EIR) Konstitutsiyasiga ko'ra Eronda noislomiy

siyosiy partiya va tashkilotlar faoliyati taqiqlanadi. Shunga qaramasdan mamlakatda bir qator oppozitsion partiyalar: Eron Kurdistoni demokratik partiyasi (EKDP), Eron xalq partiyasi (EXP) va boshqalar faoliyat ko'rsatadi.

**Iqtisodi, transport kommunikatsiyalari.** Eron iqtisodiyotida ishlab chiqarish vositalari, birinchi navbatda neft qazib olish va neftni qayta ishlash sanoat korxonalari davlat mulkini tashkil etadi. 2006-yil YIM miqdori 505019 mln dollarni (aholi jon boshiga — 7646 doll.) tashkil etgan. Qishloq xo'jaligi mamlakatning asosiy qishloq xo'jalik mahsulotlariga bo'lgan ehtiyojlarini qondirish imkoniyatiga ega emas. Asosiy savdo hamkorlari: Yaponiya, Italiya, Germaniya.

Temiryo'llarining uzunligi — 4850 km, avtomobil yo'llari — 140072 km, ichki suv yo'llari — 904 km. Mamlakatning asosiy porti Eron — Iroq urushi davrida kuchli vayron qilingan.

**Tarixi.** Forslar dastlab m. a. IX asrlarga oid Ossuniya manbalarida tilga olinadi. M. a. 556—550-yillarda Buyuk Kir II qadimgi dunyoda buyuk imperiyani yaratgan fors podsholari sulolasiga asos soldi. Doro I (M. a. 522—486-yillarda) davrida imperiya o'zining rivojlanish cho'qqisiga ko'tarildi. Imperiya hududi Hindistondan O'rtaer dengizigacha kengaydi. Misr, Kichik Osiyo va Frakiya yerlari imperiya tarkibiga kiritildi. M. a. V asr oxirlarida forslarning ekspansiyasi greklar tomonidan to'xtatildi. M. a. 330-yilda Fors imperiyasi Aleksandr Makedonskiy qo'shinlari tomonidan zabt etildi. M. a. 224-yilda mamlakatni to'rt asr davomida idora qilgan sasoniyalar sulolasi hokimiyat tepasiga keldi. Fors imperiyasi VI asr oxirlarida va VII asr boshlarida rivojlanishning eng yuqori darajasiga ko'tarildi.

Arablar bosqini imperiyani zaiflashtirdi, islom dini kiritildi. XI asrda mamlakat saljuqiylar tomonidan zabt etilgandan so'ng islom-fors sivilizatsiyasi inqirozga uchradi. 1221—1222-yillarda Chingizxon, XIV asrda Amir Temur tomonidan bosib olindi. XVI asr boshlarida mamlakat yana forslar — safaviylar sulolasi tomonidan boshqarildi. XVIII—XIX asrlarda bu hudud-

da Eronni o'z ta'siriga kiritishga intilgan Rossiya va Buyuk Britaniyaga qarshi kurashishgan bir qancha fors sulolalari almashdi. 1925-yilda hokimiyatga kelgan pahlaviylar sulolasi mamlakatni 1979-yilgacha shoh Muhammad Rizo Pahlaviy hukumatga qarshi chiqishlar natijasida taxtdan ag'darilguniga qadar idora qildi. 1934-yildan boshlab mamlakat Eron deb nomlana boshlandi. 1980-yilda Eron Islom Respublikasi deb e'lon qilindi.

## ESTONIYA

*Rasmiy nomi – Estoniya Respublikasi. Poytaxti – Tallin. Hududi – 45000 km<sup>2</sup>. Aholisi – 1324904 kishi (2007). Davlat tili – eston. Dini – lyuteran, pravoslav. Pul birligi – eston kronasi.*

**Geografik joylashuvi va tabiati.** Sharqiy Yevropaning shimoli g'arbidagi davlat. Sharqda Rossiya (chegaraning uzunligi — 280 km), janubda Latviya (267 km) bilan chegaradosh. G'arbda Estoniya Boltiq dengizi, shimolda Fin ko'rfazi bilan tutashgan. Chegarasining umumiy uzunligi — 557 km, sohil bo'ylab chegara uzunligi — 1393 km. Mamlakat hududining katta qismini tekisliklar tashkil etadi. Mamlakatning janubi sharqida qirliklar bor. Asosiy tabiiy resurslar: yonuvchi slanetslar, fosforitlar, torf, neft, kahrabo. Haydaladigan yerlar hududning 22% ini, o'rmon va to'qaylar 35% ini tashkil etadi. Iqlimi dengiz iqlimidan kontinentalga o'tuvchi. Estoniyaning shimolida va g'arbida keng bargli o'rmonlar, janubi va janubi sharqida ignabargli o'rmonlar o'sadi. Los, kosulya, qobon, quyon, tulki, silovsin, bo'rsiq, bo'ri, ayiq, turli qushlar va baliqlar faunani tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat tarkibiga 15 uezd va markazga bo'ysunuvchi 6 shahar kiradi. 1991-yilning 20-avgustida Estoniya o'z mustaqilligini e'lon qilgan (avval SSSR tarkibiga kirgan). Milliy bayram 24-fevral — Mustaqillik kuni (1918) hisoblanadi. Ijro etuvchi hokimiyat prezident (davlat boshlig'i) va Bosh

vazir boshliq hukumatga tegishli. Qonun chiqaruvchi oliy organ — Riigikogu (parlament). Yirik siyosiy partiyalari: Estoniya sotsial-demokratik partiyasi, Qishloq partiyasi, Estoniya yer ittifoqi.

**Iqtisodi, transport kommunikatsiyalari.** Hozirgi kunda Estoniya iqtisodida bir qator islohotlar o'tkazilmoqda. Sanoatining rivojlangan tarmoqlari: slanes qazib olish va qayta ishlash, yog'ochni qayta ishlash, kimyo, mashinasozlik, metallni qayta ishlash, qurilish mahsulotlarini ishlab chiqarish, yengil sanoat, oziq-ovqat sanoati. Qishloq xo'jaligi asosan go'sht-sut chorvachiligiga ixtisoslashgan. 2006-yil YIM miqdori 18563 mln dollarni (aholi jon boshiga — 14010 doll.) tashkil etgan. Asosiy savdo sheriklari: Rossiya, Finlyandiya, Shvetsiya, Germaniya.

Temiryo'llarining umumiy uzunligi — 1000 km, avtomobil yo'llari — 14800 km, ichki suv yo'llari — 500 km. Asosiy port — Tallin.

**Tarixi.** XIII asrda estonlar avval nemislar, keyinroq daniyaliklar tomonidan bo'ysundiriladi. Daniyaliklar 12—13-yili Tallinga asos solishadi. 1346-yilda hozirgi Estoniya hududini Teyton ordeni Daniyadan sotib oladi. Ivan Grozniy hukmronligi davrida Rossiya Narva va Tartuni bosib oladi. Teyton ordeni parchalangandan so'ng (1561) Estoniya Shvetsiya, Daniya va Rech Pospolita o'rtasida bo'lib olinadi. XVII asrda Estoniya mamlakatga lyuteranlikni olib kelgan Shvetsiyaga qaram bo'ladi. Shimoliy urush (1700—1721) davrida Estoniya Pyotr I tomonidan zabt etilib, Nishtadt shartnomasiga ko'ra Rossiya tasarrufiga o'tadi. 1917-yilning fevral inqilobidan so'ng Estoniya mustaqillikka erishadi, lekin 1917-yilning noyabrda bolsheviklar mamlakatda sovet hokimiyatini o'rnatadi. Nemislar Estoniyani 1918-yilda bosib oladi va Estoniya muvaqqat hukumati 24-fevralda e'lon qilinadi. Bu mustaqillik Germaniyaning kapitulyatsiyasidan so'ng, 1920-yilda tan olinadi. 1934-yilda mamlakatda diktatura. 1940-yilda sovet qo'shinlari bostirib kirishi oqibatida sovet hokimiyati o'rnatiladi. 1944-yilda nemis qo'shinlaridan ozod qilingan Estoniya 1991-yilgacha SSSR tarkibiga kiradi. 1991-yilda Estoniya yana o'z mustaqilligini e'lon qiladi.

## EFIPIYA

*Rasmiy nomi – Efiopiya Federativ Demokra tik Respublikasi. Poytaxti – Addis-Abeba. Hududi – 1221894 km<sup>2</sup>. Aholisi – 76601732 kishi (2007). Davlat tili – amxar. Dini – pravoslav (45%), islom (35%), majusiylilik (12%). Pul birligi – bir.*

**Geografik joylashuvi va tabiati.** Afrikaning sharqidagi davlat. Sharqda va janubi sharqda Somali (chegara uzunligi — 1626 km), g'arbda va shimoli g'arbda Sudan (1606 km), shimoli sharqda Eritreya (912 km) va Jibuti (337 km), janubi g'arbda Keniya (830 km) bilan chegaradosh. Chegarasining umumiy uzunligi — 5311 km. Mamlakat hududining katta qismini Efiop tog'ligi (eng baland nuqtasi Ras-Dashen tog'i — 4623 m) egallaydi. Efiopiya oz miqdordagi oltin, platina, mis zaxiralariga ega. Mamlakat hududining 12%ini haydaladigan yerlar, 41%ini o'tloq va yaylovlar, 24%ini o'rmon va butazorlar tashkil etadi.

Iqlimi — subekvatorial. O'simlik dunyosi turli bo'lib, tropik va cho'l o'simliklaridan atp o'simliklarigacha o'sadi. Hayvonot dunyosini arslon, qoplon, fil, gippopotam, jirafa, karkidon, antilopa, silovsin, maymun, turli qushlar va hasharotlar tashkil etadi.

**Davlat tuzilishi, siyosiy partiyalari.** Davlat tuzilishi — respublika. Mamlakat 9 ta milliy-ma'muriy shtatlarga va poytaxt hududiga bo'lingan. Hozirgi Efiopiya hududi m. a. I ming yillikdayoq Sava podsholigi bo'lgan. 1889-yilda Efiopiya Italiyaning prorektoratiga aylangan. 1895-yilda mustaqillikka erishgan. Milliy bayramlari: 2-mart Adua yaqinidagi g'alaba kuni (1896) va 6-aprel — G'alaba kuni (1941). Ijro etuvchi hokimiyat Muvaqqat hukumatga, qonun chiqaruvchi hokimiyat — Muvaqqat hukumat va Vakillar Kengashiga tegishli. Davlat boshlig'i — prezident. Mamlakatda 100 dan ortiq turli siyosiy partiyalar ro'yxatdan o'tgan. Ulardan eng yirigi — Efiopiya xalqlari inqilobiy-demokratik fronti.

**Iqtisodi, transport kommunikatsiyalari.** Iqtisodi qishloq xo'jaligiga (YIMning 45% i, eksport-

ning 90% ini) asoslangan Efiopiya Afrikaning qashshoq mamlakatlari qatoriga kiradi. 2006-yil YIM miqdori 56888 mln dollarni (aholi jon boshiga — 742 doll.) tashkil etgan. Asosiy eksport mahsuloti — qahva (eksport tushumlarining 60% ini). Ishlab chiqarish asosan qishloq xo'jaligi mahsulotlarini qayta ishlash hamda oltin qazib chiqarish bilan bog'liq. Asosiy savdo sheriklari: Germaniya, Yaponiya, Fransiya, Italiya, Saudiya Arabistoni.

Temiryo'llarining umumiy uzunligi — 988 km, avtomobil yo'llari — 44300 km (3650 km asfaltlangan).

**Tarixi.** Rivoyatlarga ko'ra qadimda hozirgi Efiopiya hududi Sava podshohligining bir qismi hisoblangan. II asrning oxirlarida shakllangan Aksum podshohligi VI—VII asrlarda zaiflashadi. Musulmon sulolasi Zagve (X—XIII asrlar) hukmdorligidan so'ng, hokimiyatga 1270-yilda xristian (kont) sulaymoniyalar sulolasi keladi. Islom ta'siriga qarshi turish maqsadida Efiopiya hukmdorlari XVI—XVII asrlarda Yevropa davlatlaridan yordam so'rashadi. XIX asrning oxirida, Suvaysh kanali ochilgandan so'ng Efiopiya o'ziga Italiya, Fransiya, Angliya kabi davlatlarning e'tiborini jalb qila boshlaydi. 1889-yilda Italiya va Efiopiya o'rtasida imzolangan shartnomani ikki tomon o'zicha tushunadi. Efiopiyani o'z prorektorati sifatida ko'rishni xohlagan Italiya, mamlakatga o'zining harbiy ekspeditsiyasini jo'natadi. Ammo bu ekspeditsiya 1896-yilda mag'lubiyatga uchraydi. 1935-yilda Mussolini Somalida yashayotgan italiyaliklarning manfaatini himoya qilish bahonasida Efiopiyaga o'z qo'shinlarini kiritadi. Natijada Efiopiya va Somali bilan birlashib, Italiyaning Sharqiy Afrika mustamlakasini hosil qiladi. 1941-yilda britaniyaliklar Efiopiyani ozod qilishadi. Eritreyada milliy kayfiyatlarining ko'tarilishi, Somali bilan harbiy to'qnashuvlar, ocharchilik va qurg'oqchilik mamlakatda chuqur ijtimoiy-iqtisodiy va siyosiy inqirozni keltirib chiqaradi. 1974-yilda harbiy to'ntarish orqali imperator Selassiy taxtdan ag'dariladi. 1975-yilda Efiopiya respublika deb e'lon qilinadi. 1977-yilda navbatdagi harbiy to'ntarish oqibatida hokimiyatga Mengistu keladi. Sovet tuzumi tarafdori bo'lgan bu hokimiyat 1991-yilning 28-mayi-

gacha hukmronlik qiladi. 1993-yilda Eritreya mustaqil davlat sifatida Efiopiya dan ajrab chiqadi.

## YAMAYKA

*Rasmiy nomi - Yamayka. Poytaxti - Kingston. Hududi - 10957 km<sup>2</sup>. Aholisi - 2819077 kishi (2007). Davlat tili - ingliz. Dini - protestantlik. Pul birligi - yamayka dollari.*

**Geografik joylashuvi va tabiati.** Karib dengizida, Yamayka oroli va bir qancha mayda orollarda joylashgan davlat. Sohil bo'ylab chegara uzunligi — 1022 km. Orolning katta qismini yassitog'lik va balandligi 2256 m gacha bo'lgan tog'lar egallaydi. Qirg'oq atroflari tor tekislikdan iborat. Asosiy tabiiy resurslari: boksitlar, gips, ohaktosh, marmar. Hududning 19% ini haydaladigan yerlar, 28% ini o'rmon va to'qaylar, yaylov va o'tloqlar 18% ini tashkil etadi.

Iqlimi — tropik. O'simlik dunyosi inson faoliyati tufayli qashshoqlashgan. Hozir o'rmonlar mamlakat hududining 1/5 qismini egallaydi. Tog' atroflarida adir o'simliklari o'sadi. Turli qushlar va ko'rshapalaklar orasida ko'plab uchraydi. Yovvoyi sutemizuvchilar deyarli yo'q. Sudraluvchilardan toshbaqa, zaharsiz ilon, timsoh, kaltakesaklar uchraydi.

**Davlat tuzilishi, siyosiy partiyalari.** Davlat tuzilishi — konstitusion monarxiya, Britaniya hamdo'stligi a'zosi. Mamlakat 14 okrugga bo'lingan. Yamayka 1962-yilning 6-avgustida mustaqil bo'ldi (avval Buyuk Britaniya mustamlakasi). Qonunlari ingliz umumiy huquqiga asoslangan. Davlat boshlig'i — Britaniya monarxi (hozirgi kunda — Yelizaveta II). Orolni uning vakili general-gubernator boshqaradi. Ijro etuvchi hokimiyat general-gubernator bilan Bosh vazir boshliq hukumatga tegishli. Qonun chiqaruvchi hokimiyat Senat (yuqori palata) va Vakillar palatasidan (quyi) iborat parlamentga tegishli. Yirik siyosiy partiyalar: Milliy xalq partiyasi, Yamayka leyboristlar partiyasi, Milliy Demokratik harakat.

**Iqtisodi, transport kommunikatsiyalari.**

Sanoatning asosiy tarmoqlari — boksitlar qazib olishi va aluminiy ishlab chiqarish. Chet el valutasining asosiy manbai turizm hisoblanadi. Qishloq xo'jaligi (YIM ning 10% ini) umumiy eksport hakamining 17%ini ta'minlaydi. Eksport qilinadigan asosiy ekinlar — shakarqamish, banan. 2006-yil YIM miqdori 10531 mln dollarni (aholi jon boshiga — 3735 doll.) tashkil etgan. Asosiy savdo sheriklari: AQSH, Buyuk Britaniya, Kanada, Trinidad va Tobago.

Temiryo'llarining umumiy uzunligi — 294 km, avtomobil yo'llari — 18200 km. Asosiy port — Kingston.

**Tarixi.** 1494-yilda Kolumb tomonidan kashf etilgan orol, hindularning katta qismini qirib tashlagan ispanlarning mustamlakasiga aylanadi. XVI asr boshlarida orolga Afrikadan qullar keltirila boshlanadi. 1655-yildan Britaniya mustamlakasi bo'lgan. Yamayka 1958-yildan o'zini o'zi boshqarish huquqiga ega bo'ldi. 1962-yildan Britaniya hamdo'stligi tarkibidagi mustaqil davlat.

## YAMAN

*Rasmiy nomi — Yaman Respublikasi. Poytaxti — Sana. Hududi — 527970 km<sup>2</sup>. Aholisi — 22153442 kishi (2007). Davlat tili — arab. Dini — islom. Pul birligi — yaman riali.*

**Geografik joylashuvi va tabiati.** Janubi g'arbiy Osiyoda, Arabiston yarimorolida joylashgan davlat. Shimolda va shimoli sharqda Saudiya Arabistoni (chegara uzunligi — 1458 km), sharqda Ummon (288 km) bilan chegaradosh. G'arbda Qizil dengiz, janubda Aden ko'rfazi bilan tutash. Chegarasining umumiy uzunligi — 1746 km. Hududining katta qismini tog'li yerlar (eng baland nuqtasi An-Nabi-Shaib tog'i — 3600 m) egallagan. Shimolda va sharqda cho'llar joylashgan. Foydali qazilmalari: neft, tabiiy gaz, oltin, temir, mis, gips, toshko'mir, kvarts, oltingugurt, yarim qimmatbaho toshlar.

**Davlat tuzilishi va siyosiy partiyalari.** Davlat tuzilishi respublika. Ma'muriy jihatdan 17



provinsiyaga bo'linadi. Yaman Respublikasi Yaman Arab Respublikasi (YAR) va Yaman Xalq Demokratik Respublikasi (YXDR)ning birlashishi bilan 1990-yil 22-mayda tashkil topdi. Bu kun «Yaman birligi kuni» sifatida nishonlanadi. Boshqa milliy bayramlari — 26-sentabr — Inqilob kuni, 30 noyabr — Mustaqillik kuni. Ijro etuvchi hokimiyat — Prezident Kengashi (Prezident Kengashi raisi katta vakolatga ega) va premyer-ministr rahbarligidagi Vazirlar Kengashiga tegishli. Qonun chiqaruvchi organ — bir palatali parlament — Deputatlar palatasi. Asosiy siyosiy partiyalari: Umumiy xalq kongressi (UXK) va Yaman sotsialistik partiyasi (YSP).

***Iqtisodi, transport kommunikatsiyalari.***

Hukumat siyosatining strategik yo'nalishlari neft sanoatini rivojlantirish, shuningdek, qishloq xo'jalik ishlab chiqarishni yaxshilash, erkin iqtisodiy hududlar yaratish. Qishloq xo'jaligi YIMning 25%ini ta'minlaydi. Shunga qaramasdan, Yaman oziq-ovqat mahsulotlarining 70%ini chetdan keltirishga majbur. Agar Sana shahri mamlakatning siyosiy markazi bo'lsa, janubiy shahar Aden Yamanning iqtisodiy va savdo markazidir. 2006-yil YIM miqdori 17554 mln dollarni (aholi jon boshiga — 792 doll.) tashkil etgan. Asosiy savdo hamkorlari — Germaniya, Buyuk Britaniya, AQSH.

Avtomobil yo'llarining umumiy uzunligi — 51390 km. Portlari: Aden, Al-Mukallo, Salif, Xodeydo.

***Tarixi.*** M. a. I ming yillikda Yaman hududida Xadramaut, Kataban, Ausan, Saba, Main davlatlari vujudga kelgan. Yaman IV asrda Efiopiya, VI asrda forslar tomonidan zabt etilgan. VIII asrda mamlakat hududida islom dini tarqaldi. X asrda mamlakatda Zeydiylar sulolasi hukmronligi o'rnatildi. XVI asrda Yaman Usmoniylar imperiyasi tarkibiga kiritildi. 1633-yilda Yaman hududida yana mustaqil davlat — Zeydiylar imomligi tashkil topdi. 1839-yilda Aden inglizlar tomonidan okkupatsiya qilindi. Yamanning shimolida XIX asrning 70-yillarida inglizlar hukmronligi o'rnatildi. XX asrning boshlarida mamlakat Shimoliy Yaman va Janubiy Yamanga bo'linadi. 1918-yilda Shimoliy Yaman mustaqillikka erishdi. 1962-yil

Konstitutsion monarxiya respublikaga aylandi. Janubiy Yaman mustaqillikka 1967-yilda erishdi. 1970-yildan boshlab Yaman Xalq Demokratik Respublikasi deb atala boshladi. 1980-yillarda boshlangan ikki davlat o'rtasidagi muzokaralar natijasida 1990-yil 21-mayda ikki davlat birlashib, yagona davlat tashkil topdi.

## YANGI ZELANDIYA

*Rasmiy nomi - Yangi Zelandiya. Poytaxti - Vellington. Hududi - 268680 km<sup>2</sup>. Aholisi - 4084008 kishi (2007). Davlat tili ingliz. Dini - xristianlik. Pul birligi - yangi zelandiya dollari.*

**Geografik joylashuvi va tabiati.** Tinch okeanining janubiy qismida ikkita yirik orolda (Kuk bo'g'ozini ajratib turadigan shimoliy va janubiy orollarda) va bir nechta mayda orollarda (Styuart, Chaterm, Kermadek, Kempbell) joylashgan davlat. Sharqda — Tinch okeani, shimolda — Fidji dengizi, g'arbda esa orollarni Avstraliya materigidan ajratib turadigan Tasman dengizi bilan tutashib ketgan. Bundan tashqari, Yangi Zelandiya Tinch okeanining markaziy qismida joylashgan Tokelau, Kuk, Niue orollariga ham egalik qiladi. Sohil bo'ylab chegara uzunligi — 15134 km. Qirg'oqlari joylarda fordlar bilan ajralgan. Hududining katta qismini tog'lar, qoyalar va tepaliklar egallagan. 200 dan ko'proq cho'qqilarning balandligi 2300 m dan oshiq. Eng yuqori nuqtasi Kuk tog'i (3754 m)da joylashgan. Faol harakatdagi vulqonlar, geyzerlar, issiq mineral buloqlar bor. Tez-tez zilzila bo'lib turadi. Mamlakatda vulqonlar natijasida paydo bo'lgan ko'llar juda ko'p bo'lib, ulardan eng yirigi — Taupo (606 m<sup>2</sup>) ko'lidir. Bosh daryosi — Uaikato. Asosiy tabiiy resurslari — tabiiy gaz, temir rudasi, ko'mir, mis, oltin, gidroenergetik resurslar. Umumiy yerlarining yarmidan ko'prog'i (53%)ni o'tloq va yaylovlar, 38% hududini o'rmon va to'qayzorlar egallaydi.

Iqlimi — mo'tadil. Janubiy orolning tekisliklari va shimoliy orolning bir qismi tassek (qumlikda o'sadigan

o'simliklar) bilan qoplangan. Tog'larda janub buki o'rmonlari, shimoliy orolda esa subtropik o'rmonlar bor. Orollarning faunasi juda o'ziga xos. Yangi Zelandiyadagi qushlarning 90%i endemiklardir. Bu yerda hayvonlarning ayrim guruhlari umuman yo'q. Kam uchraydigan, uchmaydigan qushlarning ko'pchilik turlari — kivi, kakapo to'tisi, juda kam uchraydigan takaxe qushi ham uchraydi. Yangi Zelandiyada uchraydigan eng qadimgi umurtqalilardan — tuatara yoki gatteriyalar bu yerda mamontlar paydo bo'lgunga qadar ham istiqomat qilishgan.

**Davlat tuzilishi, siyosiy partiyalari.** Davlat tuzilishi — konstitutsion monarxiya. Mamlakat Buyuk Britaniya hamdo'stligi tarkibiga kiradi. Yangi Zelandiya 10 ta provinsiyaga bo'lingan. Mamlakat 1907-yil 26-sentabrda Buyuk Britaniyadan mustaqillik olgan. Qonunchilik ingliz umumiy huquqiga asoslangan. Milliy bayrami — 6-fevral — Vaytongi kuni (1840). Davlat boshlig'i rasmiy ravishda britan monarxi (hozirgi kunda qirolicha Yelizaveta II) hisoblanadi, uning nomidan general-gubernator ish yuritadi. Amalda ijroiya hokimiyat premyer-ministr boshchiligidagi hukumatga tegishli. Oliy qonun chiqaruvchi organ — Vakillar palatasi (bir palatali parlament)dir. Yirik siyosiy partiyalari: Yangi Zelandiya Milliy partiyasi, Yangi Zelandiya leyboristlar partiyasi, Mana Motuxake (Bizning meros).

**Iqtisodi, transport kommunikatsiyalari.** Oxirgi o'n yillik davomida hukumat Buyuk Britaniyaga bog'liq bo'lgan va agrar iqtisodiyot yo'nalishini erkin bozor munosabatlariga asoslangan jahon iqtisodiyotiga moslashtirishga qaratilgan chora-tadbirlarni amalga oshirmoqda. 2006-yil YIM miqdori 93047 mln dollarni (aholi jon boshiga — 22783 doll.) tashkil etgan. Sanoatining nisbatan taraqqiy etgan tarmoqlari: oziq-ovqat ishlab chiqarish, selluloza-qog'oz, kimyo, mashinasozlik, to'qimachilik. Yuksak darajada rivojlangan qishloq xo'jaligida (YIM — 9%) peshqadam o'rinni chorvachilik egallaydi (qishloq xo'jalik mahsulotlarining 80%ini beradi). Mamlakat iqtisodiyotida o'rmonchilik va baliqchilik ham muhim o'rin tutadi. Muhim savdo

hamkorlari — YI mamlakatlari, Yaponiya, Avstraliya, AQSH.

Temiryo'llarining umumiy uzunligi — 4716 km, avtomobil yo'llari — 92648 km (49547 km qattiq qoplamali yo'llar), ichki suv yo'llari esa — 1609 km. Mamlakatning asosiy portlari — Vellington, Oklend.

**Tarixi.** Maori xalqlari istiqomat qilib kelgan Yangi Zelandiya 1642-yili A. Tasman tomonidan kashf etilgan. XX asrda inglizlar tomonidan mamlakatni mustamlakalashtirish maorilar qarshilik ko'rsatganligi tufayli (1842—1846, 1860—1868-yillardagi maori urushlari) juda sekinlik bilan bordi. 1851-yilda Buyuk Britaniya mustamlakasi deb e'lon qilingan Yangi Zelandiya 1907-yili dominion maqomini qo'lga kiritdi. Britan hamdo'stligi tarkibida mustaqillikka esa 1931-yili erishdi. Fransiya tomonidan Tinch okeanida yadro sinovlarining o'tkazilishi Yangi Zelandiya tomonidan qattiq qoralandi, 1985-yilgi «Gripis ishi»dan keyin esa ikki davlat o'rtasidagi munosabatlar yanada keskinlashdi.

## YANGI KALDONIYA

*Rasmiy nomi* Yangi Kaledoniya. *Poytaxti* Numea. *Hududi* — 19100 km<sup>2</sup>. *Aholisi* — 221753 kishi (2007). *Davlat tili* — fransuz. *Dini* — katoliklar (60%), protestant kalvinchilar (30%). *Pul birligi* — kaledoniya franki.

**Geografik joylashuvi va tabiati.** Fransiyaning mulki, Okeaniyada, Tinch okeanining janubi g'arbiy qismida joylashgan. Fransiyaning «dengizorti hududi» Yangi Kaledoniya (asosiy orol), Luayote va Cheterfild orollari guruhidan, Pen va boshqa orollardan iborat. Orollarning qirg'oqlari marjon riflari bilan o'ralgan bo'lib, dunyoda eng uzun (600 km) to'siqli riflarni tashkil etadi. Yangi Kaledoniya orolining sharqida vulqon otilishi natijasida paydo bo'lgan yassitog'lik mavjud. Eng yuqori cho'qqisi — Pane tog'i (1628). Mayda daryolar tarmog'i mavjud. Asosiy qazilma boyliklari: nikel (dunyo zaxiralarining 20% i), kobalt, xrom, temir rudasi, marganes, mis, ko'mir.

Iqlimi — tropik. 3000 ga yaqin o'simlik turlari mavjud. 10% hududi o'rmonlar bilan qoplangan (araukariya, agatis va boshqa daraxtlar). 61 turdagi qushlar, ko'plab ilonlar mavjud.

**Daolat tuzilishi, siyosiy partiyalari.** 1946-yildan Fransiya mulki. Hudud boshqaruvini Oliy komissar amalga oshiradi. Qonun chiqaruvchi hokimiyat — hudud Kongressi (54 deputat 6 yilga 3 ta provinsiya nomidan saylanadi). Fransiya parlamenti — Milliy yig'inda Yangi Kaledoniya 2 deputat va 1 senator vakilligiga ega. Ma'muriy jihatdan 3 provinsiyaga bo'lingan. Siyosiy partiyalari: Respublika tarkibida Kaledoniya uchun birlashma, Kanaklar ozodligi milliy sotsialistik fronti, Yangi Kaledoniya barcha uchun.

**Iqtisodi, transport kommunikatsiyalari.** Iqtisodiyoti asosini tog'-kon sanoati tashkil etadi. Yangi Kaledoniya nikelning eng yirik zaxiralari egasidir (nikel eksporti valuta daromadlarining 75% ini tashkil etadi). Metallurgiya, qishloq xo'jalik mahsulotlarini qayta ishlash, qurilish materiallari va mebel ishlab chiqarish korxonalari bor. Qishloq xo'jaligida aholining 70%i band. Chorvachilik va baliqchilik rivojlanib bormoqda. 2006-yil YIM miqdori 3158 mln dollarni (aholi jon boshiga — 15000 doll.) tashkil etgan. Asosiy savdo hamkorlari: Fransiya, AQSH, Avstraliya, Yaponiya.

Asosiy dengiz porti: Numea.

**Tarixi.** 1774-yili melaneziyaliklar yashayotgan bu orollar ingliz sayyohi J. Kuk tomonidan kashf qilingan va Shotlandiyaning eski nomi bilan Kaledoniya deb atalgan. 1843-yili orollarga fransuz katolik missionerlari yetib kelishdi. 1853-yildan Fransiya qarashli. 1860-yildan esa mustamlakaga aylantirilgan. 1864—1896-yillarda Yangi Kaledoniya siyosiy mahbuslar surgun qilinadigan joyga aylantirildi. Bu yerga 4000 ga yaqin Parij Kommunasini ishtirokchilari ham surgun qilingan. 1879-yili mahalliy aholining yirik qo'zg'oloni fransuzlar tomonidan ayovsiz bostirildi. Yangi Kaledoniya 1946-yildan Fransiyaning «dengizorti hududi» maqomiga erishdi. 1984-yilning noyabrigacha Fransiya hukumati-ning Oliy komissari tomonidan boshqarilgan. 1988-yili Fransiyada o'tkazilgan referendumga ko'ra 1989-yildan

bevosita boshqaruv bekor qilinib, avtonomiya kuchaytirildi. 1998-yili Fransiya Bosh vaziri L. Jospen imzolagan shartnomaga ko'ra Yangi Kaledoniyada 20 yillik mustaqillikka o'tish davri e'lon qilindi.

## YAPONIYA

*Rasmiy nomi — Yaponiya. Poytaxti — Tokio. Hududi — 377535 km<sup>2</sup>. Aholisi — 127417000 kishi (2007). Davlat tili yapon. Dini — sintoizm, buddaviylik, xristianlik. Pul birligi — iyena.*

**Geografik joylashuvi va tabiati.** Sharqiy Osiyoda, Tinch okeandagi Xonsyu, Kyusyu, Xokkaydo, Sikoku va qator mayda orollarda (hammasi bo'lib 3900 orol) joylashgan davlat. Sohil bo'ylab chegara uzunligi — 29751 km. Mamlakat landshafti tog'lar va tekisliklardan iborat. Baland tog'larning aksariyatida harakatdagi vulqonlar bo'lib, mamlakatda hammasi bo'lib 60 ta faol vulqonlar mavjud. Mamlakatning eng katta tekisligi — Kanto (Xonsyu o.). Eng uzun daryosi — Sinano (Xonsyu o.). Eng yirik ko'li — Biva (672 km<sup>2</sup>). Asosiy tabiiy boyliklari: toshko'mir, mis, qo'rg'oshin, rux rudasi, baliq. Haydaladigan yerlar hududining 13% ini o'rmon va to'qaylar 67% ini egallaydi.

Iqlimi — mussonli, shimolida mo'tadil, janubida subtropik. Yaponiya hududining 2/3 qismi o'rmonlar bilan qoplangan. Mamlakatning markazi subtropik, janubi tropik, Xokkaydo oroli aralash o'rmonlar bilan qoplangan. O'rmonlarida eman, qarag'ay, bir necha tur palma, banan, fikus, bambuk, daraxtsimon paprotniklar, endemik daraxtlar, 1500—2000 m balandlikda adir o'simliklari o'sadi. Yapon orollarining hayvonot olami bir-biridan farq qiladi. Janubiy orollar uchun tropik fauna xos bo'lib, bu orollarda bir necha tur maymunlar, ko'rshapalaklar, qoraquyon — «nuro — osash», ko'k qush «ruri — kasegu», «xabu» zaharli iloni uchraydi. Yapon arxipelagining markaziy orollarida bo'ri, tulki, yoqutsimon it, bo'rsiq, kiyik, quyon, olmaxon, yapon manakasi, yapon qora ayig'i, ulkan salamandra hayvonot olamini tashkil etadi. Xokkaydo

orolining hayvonot olami qo'ng'ir ayiq, larik sichqoni, oqsuvsar, sibir soboli, tulen, dengiz mushuklaridan iborat. Yaponiya atrofidagi dengizlarda turli baliqlar ko'plab uchraydi.

**Davlat tuzilishi, siyosiy partiyalari.** Davlat tuzilishi — konstitusion monarxiya. Mamlakat tarkibiga 47 prefektura kiradi. Afsonaga ko'ra Yapon davlatiga m. a. 660-yilda imperator Dzimmu asos solgan. Milliy bayrami — 23-dekabr — Imperator tug'ilgan kun. Davlat boshlig'i — imperator (imperator Akixito mamlakatni 1989-yilning 7-yanvaridan boshqarmoqda). Amalda ijro etuvchi hokimiyat Vazirlar Mahkamasini boshqaradigan Bosh vazirga tegishli. Qonun chiqaruvchi hokimiyat Maslahatchilar palatasi (yuqori) va Vakillar palatasi (quyi)dan iborat parlament tomonidan amalga oshiriladi. Yirik siyosiy partiyalari: Yaponiya demokratik partiyasi, Liberal-demokratik partiya, Yaponiya kommunistik partiyasi, «Sakigake» partiyasi.

**Iqtisodi, transport kommunikatsiyalari.** Iqtisodiy qudrati jihatidan jahonda AQSHdan keyin ikkinchi o'rinni egallaydi. Iqtisodining asosiy tarmog'i bo'lgan sanoat, xomashyo va yonilg'i importiga qaram. 2006-yil YIM miqdori 3774086 mln dollarni (aholi jon boshiga — 29619 doll.) tashkil etgan. Yuksak texnologiyalarga asoslangan aloqa informatika vositalarini ishlab chiqarish, biotexnologiya tarmoqlari taraqqiy etmoqda. Yaponiya kema, avtomobil, traktor, metallga ishlov beruvchi uskunalar, turmush elektronikasi, robotlarni ishlab chiqarish bo'yicha dunyoda birinchi o'rinni egallaydi. Yaponiya jahonda ishlab chiqariladigan rangli televizorlarning 60% ini, po'latning 14,3% ini, sun'iy totalarning 12,3% ini ishlab chiqaradi. Qishloq xo'jaligining YIMdagi uushi — 2,2%. Qishloq xo'jaligi mahsulotlari import qilinadi. Jahonda ovlanadigan baliqning 15% i yapon baliqchilik flotiga tegishlidir. Asosiy savdo sheriklari: Janubiy-sharqiy Osiyo davlatlari, AQSH, G'arbiy Yevropa davlatlari, Xitoy.

Temiryo'llarining umumiy uzunligi — 27327 km, avtomobil yo'llari — 111974 km (4400 km tezyurar yo'llar, 46805 km — davlat yo'llari, 128539 km — prefektura yo'llari), ichki suv yo'llari — 1770 km.

Asosiy portlari: Muroran, Kitakuysyu, Kobe, Osaka, Tokio, Yokogama, Kawasaki, Kagosila, Nagoya, Nagasaki.

**Tarixi.** M. a. 660-yilda imperator Dzimmu dastlabki davlatga asos soladi. Bir necha asrlar mobaynida Yaponiya Xitoy va Koreya madaniyati ta'siri ostida qolgan. Aynan shu davlatlardan VI asrda Yaponiyaga buddaviylik dini kirib keladi. 522-yilda Yamato sulolasi hokimiyatga keladi va Nara shahrini poytaxt deb e'lon qilib, Xitoy ma'muriy boshqaruv tizimini Yaponiyada joriy etishadi. 794-yildan Xeyan davri boshlanib, poytaxti Kiotoga ko'chiriladi. IX asrda yapon yozuvi shakllanadi. XI asrdan rasman hukmdor bo'lib, amalda hokimiyat syogun qo'liga o'tadi. Mamlakat poytaxti Kamakuraga ko'chiriladi. Samuraylar mamlakatda dzen-buddizmning tarqalishiga o'z hissalarini qo'shishadi. 1274- va 1281-yillarda yaponlar mo'g'ullar hujumini qaytarishadi. O'zaro urushlardan so'ng 1615-yilda Tokugava syogunati boshlanadi. XVII asrda Yaponiyada yevropaliklar — avval portugallar, keyinroq gollandlar paydo bo'ladi. Shunga qaramay Yaponiya XIX asrning o'rtalarigacha chet elliklar uchun yopiq bo'lgan. 1867-yilda Tokugava sulolasining so'nggi syoguni Esinobu hokimiyatni imperator Mukixotoga topshiradi. Poytaxt Edu (Tokio)ga ko'chiriladi. Yaponiya kuchli davlatga aylangach, 1894-yilda Tayvanni, 1905-yilda Rossiyani Susima jangida mag'lub etib Port-Artur va Janubiy Saxalinni egallab oladi. 1910-yilda Koreyani, ikkala jahon urushlari oralig'ida Tinch okeanidagi qator orollarni bosib oladi. 1931-yilda yapon qo'shinlari Manchjuriyaga bostirib kiradi, 1937-yilda Xitoyning qolgan hududlariga bosqinchilik boshlanadi. Ikkinchi jahon urushiga Yaponiya 1941-yilning 7 dekabrda AQSHning Pyori—Xarbor harbiy bazasiga hujum qilish bilan kiradi. Urush davrida Yaponiya Angliya va Fransiyaning Janubiy-Sharqiy Osiyodagi mustamlakalarini bosib oladi. Ittifoqchi qo'shinlarning hujumi, Xirosima va Nagasakiga atom bombalarining tashlanishi natijasida Yaponiya 1945-yilning 2-sentabrda taslim bo'lganini e'lon qiladi. O'z mustamlakalarini yo'qotganligi va urushdan og'ir ahvolda chiqqanligiga qaramay,



siyosiy hayotning demokratlashtirilishi va jadal texnologik taraqqiyot oqibatida Yaponiya iqtisodiy jihatdan taraqqiy etgan hamda eng boy davlatlardan biriga aylandi.

## QATAR

*Rasmiy nomi* — *Qatar davlati*. *Poytaxti* — *Doxa*. *Hududi* — 11437 km<sup>2</sup>. *Aholisi* — 882268 kishi (2007). *Davlat tili* — arab. *Dini* — islom. *Pul birligi* — *Qatar riali*

**Geografik joylashuvi va tabiati.** Qatar Osiyoning janubi g'arbida, Qatar yarimoroli (Arabiston yarimorolining sharqiy sohillari)da joylashgan. Janubda Saudiya Arabistoni (chegara uzunligi — 40 km) va BAA (Birlashgan Arab Amirliklari) (20 km) bilan chegaradosh. Qatar yarimoroli hamma tomonidan Fors qo'ltig'i suvlari bilan o'ralgan. Chegarasining umumiy uzunligi — 60 km. Landshafti cho'lli tekisliklardan tashkil topgan. Asosiy tabiiy resurslari: neft va tabiiy gaz.

**Davlat tuzilishi va siyosiy partiyalari.** Davlat tuzilishi — mutlaq monarxiya. 1971-yil 3-sentabrda mustaqil davlatga aylangan (avval Buyuk Britaniya protektorati edi). Milliy bayrami — 3-sentabr — Mustaqillik kuni. Davlat boshlig'i — amir. Siyosiy partiyalar faoliyati taqiqlangan.

**Iqtisodi, transport kommunikatsiyalari.** Neft qazib olish iqtisodining asosini tashkil etadi. Tabiiy gaz qazib olish va eksport qilish ham iqtisodda muhim o'rin tutadi. 2006-yil YIM miqdori 23640 mln dollarni (aholi jon boshiga — 26794 doll.) tashkil etgan. Asosiy savdo hamkorlari: Yaponiya va Buyuk Britaniya.

Avtomobil yo'llarining umumiy uzunligi — 1500 km. Portlari: Doxa, Umm-Said, Xalul.

**Tarixi.** VII asrdan arab xalifaligining bir qismi, VIII—XIV asrlarda Bahrayn amirlari hukmronligida bo'lgan. XVI asrda Qatar Usmoniylar imperiyasi tarkibiga kiritildi. 1916-yilda Britaniya protektoratiga aylantirilgan. 1971-yilda Qatar mustaqil davlat deb e'lon qilindi.

## QIRG'IZISTON

*Rasmiy nomi — Qirg'iziston Respublikasi. Poytaxti — Bishkek. Hududi — 198500 km<sup>2</sup>. Aholisi — 5302253 kishi (2007). Davlat tili — qirg'iz. Dini — islom, shuningdek, xristianlar ham bor. Pul birligi — som.*

**Geografik joylashuvi va tabiati.** O'rta Osiyoning shimoli sharqidagi davlat. G'arbda O'zbekiston (chegara uzunli 1099 km), shimolda Qozog'iston (1051 km), janubda Tojikiston (870 km) va Xitoy (858 km) bilan chegaradosh. Mamlakatning shimoliy sharqida Tyan-Shan (eng baland nuqtasi — 7439 m), janubi g'arbda Pomir—Oltoy tog' tizmasi joylashgan. Asosiy daryosi—Norin. Eng katta ko'li — Issiqko'l. Yer osti boyliklari — oltin, surma, ko'mir, neft, gazga boy. Haydaladigan yerlar hududining 7%, o'tloq va maysazorlar 42% ini egallaydi.

Iqlimi — kontinental.

**Davlat tuzilishi va siyosiy partiyalari.** Davlat tuzilishi — respublika. Mamlakat 6 viloyatga bo'linadi. Qirg'iziston 1991-yil SSSRning parchalanishidan keyin mustaqillikka erishgan. Milliy bayrami — 31-avgust — Mustaqillik kuni. Ijro etuvchi hokimiyat prezident (davlat boshlig'i) va hukumat boshlig'i premyer-ministrga tegishli. Qonun chiqaruvchi hokimiyatni bir palatali parlament amalga oshiradi. Siyosiy partiyalari: Qirg'iziston Demokratik harakati, Qirg'iziston Respublika partiyasi, Erkin Qirg'iziston, Qirg'iziston kommunistlar partiyasi.

**Iqtisodi, transport kommunikatsiyasi.** Mamlakat bozor iqtisodiyotiga o'tish bosqichida turibdi. Bir muncha rivojlangan sanoat tarmoqlari rangli metallurgiya, mashinasozlik, yengil va oziq-ovqat sanoati, qishloq xo'jaligining yetakchi tarmoqlari, chorvachilik, paxtachilik va boshqalar. 2006-yil YIM miqdori 9834 mln dollarni (aholi jon boshiga — 1854 doll.) tashkil etgan. Asosiy savdo hamkorlari — Rossiya, Ukraina, O'zbekiston, Qozog'iston va boshqa MDH mamlakatlari.

Temiryo'llarining umumiy uzunligi — 370 km.  
Avtomobil yo'llari uzunligi — 30300 km.

**Tarixi.** VI asrdan XII asrgacha hozirgi Qirg'iziston hududlari Turk xoqonligi tarkibiga kirgan. XIII asrda mo'g'ullar tomonidan bosib olingan Qirg'iziston XVII asrda Oyrat xonligi, XIX asr boshlarida Qo'qon xonligi tarkibiga kiritildi. 1870-yil Rossiya imperiyasining Turkiston general-gubernatorligi tarkibiga kiritildi. 1918-yilda Turkiston Respublikasining bir qismi, 1924-yildan Qora-Qirg'iz Avtonom viloyati, 1924-yildan Qirg'iziston avtonom viloyati (oblasti), 1936-yilda Ittifoq Respublikasi maqomini oldi. Sovet Ittifoqi parchalanib ketgandan keyin Qirg'iziston mustaqilligi 1991-yil 31-avgustda e'lon qilindi. 2005-yilda «Lotalar inqilobi» natijasida Asqar Akayev o'rniga prezident etib Kurmanbek Bakiyev saylandi.

## QOZOG'ISTON

*Rasmiy nomi — Qozog'iston Respublikasi.  
Poytaxti — Astana. Hududi — 2717300 km<sup>2</sup>.  
Aholisi — 15401170 kishi (2007). Davlat tili — qozog. Dini — islom (47%), pravoslav (44%), protestantlik (2%) Pul birligi — tenge.*

**Geografik joylashuvi va tabiati.** Markaziy Osiyodagi davlat. Shimolda Rossiya (chegara uzunligi — 6846 km), janubda O'zbekiston (2203 km), Qirg'iziston (1051 km) va Turkmaniston (379 km), sharqda Xitoy bilan chegaradosh. Qozog'istonning g'arbiy qismi Kaspiy dengizi, janubda Orol dengizi bilan tutash. Umumiy chegara uzunligi — 12012 km. Mamlakat hududi sharqda Oltoydan G'arbda Volganing quyi qismigacha, shimolda G'arbiy Sibir tekisligidan janubda Tyan-Shan tog'larigacha cho'zilgan. G'arbda Kaspiybo'yi pasttekisligi va Mang'ishloq yarimoroli joylashgan. Shimoli g'arbda Ural va Mug'ojar tizma tog'larining janubiy tarmoqlari yotibdi. Mug'ojardan shimoli sharqda To'rg'ay yassitog'ligi, janubda Turon pasttekisligi va Qizilqum cho'li joylashgan. Sharqda va janubi sharqda Oltoyning janubiy tizmalari qad ko'targan. Janubda Betpak-Dala va

Muyunqum cho'llari bor. Asosiy daryolari — Irtish, Ural, Chu, Sirdaryo. Qozog'iston hududida Balxash ko'li va qisman Orol va Kaspiy dengizi joylashgan. Yerosti boyliklari ko'plab foydali qazilmalarga boy: uran, rux, oltin, mis, molibden, neft, fosforit, boksit, temir, marganes, qo'rg'oshin.

**Davlat tuzilishi, siyosiy partiyalari.** Davlat tuzilishi — prezident respublikasi. Ma'muriy jihatdan 20 ta oblast (viloyat)ga bo'linadi. Qozog'iston o'z mustaqilligini 1991-yil 16-dekabrda Sovet Ittifoqi tarqalgandan keyin e'lon qilgan. 16-dekabr — Milliy bayram — Respublika kuni. Davlat boshlig'i — prezident. Qonun chiqaruvchi oliy organ — bir palatali parlament — Yuqori Kengash. Asosiy siyosiy partiyalari: Qozog'iston xalq birligi ittifoqi (QXBI), Qozog'iston sotsialistik partiyasi (QSP), Qozog'iston xalq kongressi (QXK), Respublikachilar partiyasi.

**Iqtisodi, transport kommunikatsiyalari.** SSSR tarqalib ketganidan keyin Qozog'istonda ishlab chiqarishning inqirozga yuz tutishi kuzatiladi. Lekin xomashyo zaxiralari boyligi va ishlab chiqarish bazasiga ega ekanligi Qozog'iston iqtisodiyotining boshqa MDH davlatlariga nisbatan yaxshiroq ahvolda bo'lishiga yordam berdi. 2006-yil YIM miqdori 112091 mln dollarni (aholi jon boshiga — 7278 doll.) tashkil etgan. Birmuncha rivojlangan sanoat tarmoqlari: rangli va qora metallurgiya, tog'-kon sanoati, mashinasozlik, neftni qayta ishlash sanoati. Qozog'iston ko'p miqdorda jun, paxta, kartoshka, g'alla yetishtiradi. Asosiy savdo hamkorlari: Rossiya, Ukraina, O'zbekiston, Xitoy.

Temiryo'llarining umumiy uzunligi — 14460 km, avtomobil yo'llari — 189000 km.

**Tarixi.** Hozirgi Qozog'iston hududida turkiy qabilalar VI—VIII asrlarda Turk xoqonligi, IX—XII asrlarda Qoroxoniylar podshohligi hukmronligida yashaganlar. XIII asrda mo'g'ullar bosqinidan keyin Qozog'iston Mo'g'ul imperiyasi tarkibiga kiritiladi. XIX asrda mamlakatni mustamlakaga aylantirish uchun harakat faollashadi, hozirgi Olma-Ota, Astana qal'alari barpo etiladi. 1886-yil Qozog'istonning butun hududi Rossiyaning Turkiston provinsiyasiga kiritiladi. 1917-yil

noyabrda Ali Xon Bukey Qozog'istonni mustaqil davlat deb e'lon qiladi va milliy davlatga asos soladi. Lekin 1919-yilda Qizil Armiya mamlakatni bosib olib, 1920-yilda Sovet avtonom respublikasi, 1936-yildan boshlab Qozog'iston Sovet Sotsialistik Respublikasi deb e'lon qilinadi. 1991-yil SSSR tarqalganidan keyin Qozog'iston mustaqil davlatga ay lanadi.

## QUVAYT

*Rasmiy nomi – Quvayt Davlati. Poytaxti – Al-Quvayt. Hududi – 17818 km<sup>2</sup>. Aholisi – 2430575 kishi (2007). Davlat tili – arab. Dini islom. Pul birligi - quvayt dinori.*

**Geografik joylashuvi va tabiati.** Osiyo qit'asining janubi g'arbiy qismidagi davlat. Janubda Saudiya Arabistoni (chegara uzunligi — 222 km), shimolda va shimoli g'arbda Iroq (242 km) bilan chegaradosh. Chegarasining umumiy uzunligi — 499 km. Hududining katta qismi cho'lli pasttekisliklardan iborat. Asosiy tabiiy resurslari: neft, tabiiy gaz.

Iqlimi — yilning katta qismida issiq havo hukmronlik qiladi.

**Davlat tuzilishi va siyosiy partiyalari.** Davlat tuzilishi — konstitutsion monarxiya. Mamlakat tarkibi — 5 ta gubernatorlikdan iborat. Quvayt 1961-yil 19-iyunda Buyuk Britaniyadan mustaqillikni qo'lga kiritgan. Milliy bayrami — 25-fevral — Milliy kun. Davlat boshlig'i — amir. Qonun chiqaruvchi hokimiyatni amir va bir palatali parlament — Milliy Majlis amalga oshiradi. Siyosiy partiyalari yo'q.

**Iqtisodi, transport kommunikatsiyalari.** 2006-yil YIM miqdori 43310 mln dollarni (aholi jon boshiga — 17818 doll.) tashkil etgan. Iqtisodining asosini neft qazib olish va neftni qayta ishlash sanoati tashkil etadi. Asosiy savdo hamkordlari: Fransiya, AQSH, Italiya, Yaponiya.

Temiryo'llari yo'q. Avtomobil yo'llarining umumiy uzunligi — 4270 km. Muhim portlari: Mina-Saud, Mina-Abdulloh, Mina-al-Ahmadi.

**Tarixi.** VII asrdan Quvayt arab xalifaligi tarkibiga, XVI asrdan boshlab Usmoniylar imperiyasi tarkibiga kirgan. 1756-yilda avtonomiya maqomini olgan Quvayt amirligi 1899-yil Britaniya protektoratiga aylandi. 1961-yilda mustaqillikni qo'lga kiritadi. 1990-yil mamlakat Iroq tomonidan bosib olinadi va Iroqning 19-provinsiyasi deb e'lon qilinadi. 1991-yil yanvarda BMT Xavfsizlik Kengashi qarori bilan ittifoqchilar qo'shinlari Quvaytni ozod qilish harakatini boshlaydi va bu harakat fevralda muvaffaqiyatli yakunlanadi.

## G'ARBIY SAMOA

*Rasmiy nomi – Samoa Mustaqil Davlati. Poytaxti – Apia. Hududi – 2831 km<sup>2</sup>. Aholisi – 180517 kishi (2007). Davlat tili – samoa va ingliz. Dini – aholisining yarmidan ko'prog'i protestantlar, katoliklar (55%). Pul birligi – tala.*

**Geografik joylashuvi va tabiati.** Samoa arxipelagining g'arbiy qismidagi orollarda joylashgan. Okeaniyaning janubi sharqidagi davlat. Orollar relyefi sohil tekisliklaridan va vulqonli tog'lardan iborat.

**Davlat tuzilishi va siyosiy partiyalari.** Davlat tuzilishi – konstitutsion monarxiya. Mamlakat ma'muriy jihatdan 11 ta okrugga bo'lingan. 1962-yil mustaqillikka erishgan. Qonunchilik ingliz umumiy huquqi va mahalliy an'analarga asoslangan. Davlat boshlig'i 5 yilga parlament tomonidan saylanadi. Ijro etuvchi hokimiyat premyer-ministr boshchiligidagi hokimiyatga tegishli. Asosiy siyosiy partiyalari: Inson huquqlarini himoya qilish partiyasi (IHHQP), Xristian-demokratik partiya (XDP), G'arbiy Samoa milliy partiyasi (G'SMP).

**Iqtisodi, transport kommunikatsiyalari.** Iqtisodining asosini qishloq xo'jaligi tashkil etadi. Sanoat ishlab chiqarishi kichik korxonalar va qishloq xo'jalik mahsulotlarini qayta ishlash, oziq-ovqat mahsulotlari ishlab chiqarish va b. bilan cheklangan. Turizm mamlakat iqtisodiyotining muhim tarmog'iga aylanib

bormoqda. 2006-yil YIM miqdori 1019 mln dollarni (aholi jon boshiga — 5644 doll.) tashkil etgan.

Asosiy savdo hamkorlari: Yangi Zelandiya, Avstraliya, Germaniya.

Temiryo'llari yo'q. Avtomobil yo'llarining umumiy uzunligi — 2242 km. Asosiy portlari: Apia, Asou.

**Tarixi.** 1722-yilda gollandlar tomonidan kashf qilingan. Samoa orollari Buyuk Britaniya, AQSH va Germaniya o'rtasidagi tortishuvlarga sabab bo'lgan. 1899-yil dekabrda orollarning g'arbiy qismi Germaniya qo'l ostiga o'tdi. 1914-yil avgustda G'arbiy Samoa o'z hukmronligini 1962-yilgacha o'rnatgan Yangi Zelandiya tomonidan bosib olindi. 1962-yil mustaqillikni qo'lga kiritdi.

## G'ARBIY SAHROI KABIR

*Rasmiy nomi — G'arbiy Sahroi Kabir. Poytaxti — El-Ayun. Hududi — 266000 km<sup>2</sup>. Aholisi — 381127 kishi (2007). Davlat tili — arab. Dini — islom. Pul birligi — pesta.*

**Geografik joylashuvi va tabiati.** G'arbiy Afrikada joylashgan. Janubda va janubi sharqda Mavritani (chegara uzunligi — 1561 km), sharqda Jazoir (42 km), shimolda Marokash (443 km) bilan chegaradosh. Umumiy chegara uzunligi — 2046 km. Mamlakat hududining asosiy qismi suv manbalari kam bo'lgan qumliklardan iborat. Asosiy foydali qazilmalari: temir rudasi, fosfarit,

**Davlat tuzilishi, siyosiy partiyalari.** Davlat tuzilishi — prezident respublikasi. Davlat boshlig'i — prezident, qonun chiqaruvchi hokimiyat — Sahroi Kabir Milliy Kengashi. Hududning huquqiy maqomi va mustaqilligi haqidagi savol hozirgi kunda o'z yechimini topgani yo'q. Davlatni 70 dan ortiq davlat tan olgan.

**Iqtisodi, transport kommunikatsiyalari.** Aholi daromadining asosiy manbayi — baliq ovlash va fosforitlar qazib olish. Savdo va tashqi iqtisodiy aloqalar Marokash hukumati tomonidan nazorat qilinadi. Marokash G'arbiy Sahroi Kabirga da'vogar va uning

boshqaruvida rahbarlik qiladi. Shuning uchun ham asosiy savdo hamkorlari Marokash savdo hamkorlarining umumiy ro'yxatiga kiradi.

Avtomobil yo'llarining umumiy uzunligi 6200 km. Asosiy portlari — El-Ayun, Ad-Dakla.

**Tarixi.** Hozirgi G'arbiy Sahroi Kabir hududi XIX asr oxirlarigacha Ispaniya qirolligi qo'l ostiga o'tgunga qadar shimoli G'arbiy Afrikadagi turli davlatlar tarkibida bo'lgan. 1975-yilda Ispaniya, Mavritaniya va Marokash o'rtasida Ispaniyaning G'arbiy Sahroi Kabir hududlarini Mavritaniya va Marokashga berishga roziligi to'g'risida bitim imzolandi. 1976-yil Jazoir mamlakatning Mavritaniya va Marokash o'rtasida bo'lib olinishiga qarshi chiqadi. POLISARIO ozodlik Frontini va 1976-yil 28-fevralda e'lon qilingan Sahroi Kabir Arab Demokratik Respublikasi (SADR)ni qo'llab-quvvatladi. 1979-yilda Mavritaniya G'arbiy Sahroi Kabirning janubiy qismlaridan voz kechganidan keyin mamlakatning butun hududi Marokash nazorati ostiga o'tdi. 1991-yil BMT rahbarligida POLISARIO Fronti va Marokash qo'shinlari o'rtasida harbiy harakatlarning to'xtatilishi haqidagi bitimning imzolanishiga erishildi.

## HINDISTON

*Rasmiy nomi — Hindiston Respublikasi. Poytaxti — Dehli. Hududi — 3287732 km<sup>2</sup>. Aholisi — 1131191071 kishi (2007). Davlat tili — hind va ingliz tillari, yana 14 ta til (bengal, tamil, tellugu va boshqalar) mamlakatning turli shtatlarida rasmiy til sifatida ishlatiladi. Dini — hinduizm (82,6%), islom (11,4%), xristian (2,4%), sikh (2%), buddizm (0,7%). Pul birligi — hind rupiysi.*

**Geografik joylashuvi va tabiati.** Hindiston — Janubiy Osiyodagi davlat. Sharqda Bangladesh (chegara uzunligi — 4053 km) va Myanma (1463 km), shimolda Xitoy (3380 km), Nepal (1690 km) va Butan (605 km), g'arbda Pokiston (2912 km) bilan chegaradosh. Mamlakat hududini uchta tabiiy zonaga ajratish



mumkin. Dekan yassitog'lari deyarli butun Hindiston yarimorolini egallagan G'arbiy va Sharqiy Gat tog' tizmalarini o'z ichiga olgan. Hind — Gang tekisligi o'z navbatida ikki qismdan iborat: Sharqda Ganga va Braxmaputra vodiysi, shimoli sharqda Tar sahrosi. Shimoliy qismi dunyoning eng baland tog'lari — Himolay bilan o'ralgan. Mamlakatning asosiy daryolari — Ganga, Hind, Braxmaputra, Godovari. Foydali qazilmalari: ko'mir (ko'mir zaxiralari bo'yicha dunyoda 4-o'rinda), temir rudasi, tabiiy gaz, neft, marganes, titan, xromit, olmos, ohaktosh, boksit. Hududining 55% i ekin ekitadigan yerlar, 23% i o'rmon va changalzorlardan iborat.

***Davlat tuzilishi, siyosiy partiyalari.*** Davlat tuzilishi — federativ respublika. Mamlakat 25 ta shtat va 7 ta ittifoqdosh hududga bo'linadi. 1947-yil 15-avgustda mustaqillikka erishgan. Qonunchilik ingliz umumiy huquqiga asoslangan. Milliy bayrami — 26-yanvar — respublika e'lon qilingan kun (1950-yil). Ijroiya hokimiyati prezident (davlat boshlig'i)ga va premyer-ministr boshchiligidagi hukumatga tegishli. Qonun chiqaruvchi oliy organ ikki palatali parlament (Sansad). Asosiy partiyalari: Hindiston Milliy Kongressi (HMK), Bxaratiya Janata partiyasi (BJP).

***Iqtisodi, transport kommunikatsiyalari.*** Hindiston sanoatida to'qimachilik, mashinasozlik, tog'kon, neftni qazib olish neftni qayta ishlash, farmatsevtika, elektronika va kimyo sanoati muhim o'rin tutadi. Qishloq xo'jalik mahsulotlari YIMning 30% ini tashkil etadi. 2006-yil YIM miqdori 3362960 mln dollarni (aholi jon boshiga — 2972 doll.) tashkil etgan.

Temiryo'llarining umumiy uzunligi — 61850 km. Avtomobil yo'llari — 1970000 km (960000 km qattiq qoplamali). Ichki suv yo'llari — 16180 km. Asosiy portlari: Bombay, Madras.

***Tarixi.*** Hozirgi Hindiston hududida insoniyatning qadimgi sivilizatsiyalaridan biri paydo bo'lgan. M. a. 3-ming yillik o'rtalaridan m. a. 2-ming yillik o'rtalari-gacha Hindiston hududida hind-oriy qabitalari vayron qilingan Xarappa sivilizatsiyasi rivojlandi. M. a. VI asrda Hindistonning shimoli g'arbiy qismi Fors

imperiyasi hukmronligiga o'tdi. Musulmon bosqinchilari bosqiniga qadar (X asr oxiri) Hindiston hududida hinduizm madaniyati va dini rivojlangan turli davlatlar hukmronlik qilgan. 1398—1399-yillarda Amir Temur tomonidan Hindistonning katta qismi bosib olindi va Dehli saltanati o'zining ko'pgina vassallaridan ajralib, kuchsizlanib qoldi. Zahiriddin Bobur 1526-yilda Dehlini bosib olib, mamlakat hududida XVIII asrgacha, ya'ni yevropaliklar tomonidan bosib olinguniga qadar o'zining rivojlanishi cho'qqisiga erishgan buyuk imperiyaga asos soldi. Bu hududda o'z ta'sir doirasiga ega bo'lish uchun kurash Fransiya va Angliya o'rtasida kechdi va Angliyaning g'alabasi bilan tugadi. Britaniya tomonidan yangi mustamlakani o'zlashtirish XVIII asrning oxiri va XIX asrning boshlarida faollashdi. 1818-yilda hindlarning oxirgi qarshiligi sindirildi. XX asrning 40-yillarida Maxatma Gandi rahbarligidagi Milliy Ozodlik harakati 1947-yil mamlakatning mustaqillikka erishishiga olib keldi, lekin mamlakat ikki qismga — Hindiston va Pokiston Islom Respublikasiga bo'lindi. Hindiston mustaqillikka erishgandan keyin 1960-yilda Xitoy, 1965-yilda esa Pokiston bilan harbiy mojarolarga (Pokiston bilan Jammu va Kashmir shtatlari hududi bo'yicha mojaro hozirgi vaqtda ham davom etmoqda) tortildi. Hindistonda bir necha marta diniy va milliy mojarolar ham (1984-yilda premyer-ministr Indira Gandi va uning o'g'li Radjiv Gandining 1991-yilda o'ldirilishi) yuzaga keldi. 1991-yilda boshlangan islohotlar, aholining ko'pligi va shu bilan bog'liq bo'lgan muammolarga qaramay, Hindiston iqtisodini dunyoda eng tez rivojlanayotgan davlatlar qatoriga qo'shdi.

## MUNDARIJA

Kirish .....	3	Virgin orollari (Buyuk	
O'zbekiston .....	4	Britaniya) .....	80
Avstraliya .....	8	Vyetnam .....	81
Avstriya .....	10	Gabon .....	83
Albaniya .....	12	Gaiti .....	84
Amerika Qo'shma Shtatlari	14	Gayana .....	86
Angiliya .....	20	Gambiya .....	87
Angola .....	21	Gana .....	88
Andorra .....	23	Gvadelupa .....	90
Antigua va Barbuda .....	24	Gvatemala .....	91
Antil orollari .....	25	Gviana .....	92
Anzin .....	26	Gvineya .....	94
Argentina .....	27	Gvineya-Bisau .....	95
Armaniston .....	29	Germaniya .....	96
Aruba .....	31	Gibraltar .....	99
Afg'oniston .....	32	Gonduras .....	100
Bagam orollari .....	34	Gonkong .....	101
Bangladesh .....	36	Grenada .....	102
Barbados .....	37	Grenlandiya .....	103
Bahrayn .....	38	Gretsiya .....	105
Beliz .....	40	Gruziya .....	106
Belorus .....	41	Guam .....	108
Belgiya .....	44	Daniya .....	110
Benin .....	46	Dominika .....	111
Bermud orollari .....	47	Dominikan Respublikasi	112
Birlashgan Arab Amirliklari	48	Jazoir .....	114
Bolgariya .....	50	Janubiy Afrika	
Boliviya .....	53	Respublikasi .....	116
Bosniya va Gersegovina .....	54	Janubiy Koreya .....	118
Botsvana .....	56	Jibuti .....	120
Braziliya .....	58	Zambiya .....	121
Bruney .....	60	Zimbabve .....	122
Burkina-Faso .....	61	Indoneziya .....	124
Burundi .....	63	Iordaniya .....	127
Butan .....	65	Irlandiya .....	129
Buyuk Britaniya .....	66	Iroq .....	131
Vanuatu .....	71	Islandiya .....	133
Vatikan .....	72	Ispaniya .....	134
Vengriya .....	73	Isroil .....	136
Venesuela .....	76	Italiya .....	138
Virgin orollari .....	78	Kabo-Verde .....	141

Kayman orollari .....	142	Moldova .....	213
Kambodja .....	143	Monako .....	215
Kamerun .....	145	Mongoliya .....	217
Kanada .....	147	Montserrat .....	219
Keniya .....	149	Muqaddas Yelena oroli.....	220
Kipr .....	151	Myanma (Birma) .....	221
Kiribati .....	153	Namibiya .....	224
Kolumbiya .....	154	Nauru .....	225
Komor orollari .....	156	Nepal .....	226
Kongo .....	157	Niger .....	228
Kongo Demokratik		Nigeriya .....	230
Respublikasi .....	158	Niderlandiya .....	232
Kosta-Rika .....	160	Nikaragua .....	234
Kot-d'Ivuar .....	161	Norvegiya .....	237
Kuba .....	163	Ozarbayjon .....	239
Laos .....	165	Palau .....	241
Latviya .....	166	Panama .....	242
Lesoto .....	168	Papua-Yangi Gvineya	244
Liberiya .....	170	Paragvay .....	246
Livan .....	171	Peru .....	248
Liviya .....	174	Pokiston .....	250
Litva .....	175	Poisha .....	253
Lixtenshteyn .....	177	Portugaliya .....	256
Lyuksemburg .....	179	Puerto-Riko .....	259
Mavrikiy .....	181	Reyunion .....	260
Mavritaniya .....	182	Rossiya .....	261
Madagaskar .....	184	Ruanda .....	270
Mayotta .....	186	Ruminiya .....	272
Makedonija .....	187	Salvador .....	275
Malavi .....	189	San-Marino .....	277
Malayziya .....	191	San-Tome va Prinsipi	278
Mali .....	193	Saudiya Arabistoni .....	280
Maldiv .....	195	Svazilend .....	283
Malta .....	196	Seyshel orollari .....	284
Markaziy Afrika		Senegal .....	286
Respublikasi .....	198	Sen-Pyer va Mikelon .....	288
Marokash .....	200	Sent-Vinsent va Grenadin	289
Martinika .....	202	Sent-Kits va Nevis .....	290
Marshall orollari .....	203	Sent-Lyusiya .....	292
Meksika .....	205	Serbiya .....	293
Mikroneziya .....	208	Singapur .....	295
Misr .....	208	Slovakiya .....	297
Mozambik .....	211	Sloveniya .....	299

Solomon orollari.....	301	Xitoy.....	359
Somali.....	303	Xorvatiya.....	362
Sudan.....	305	Chad.....	364
Surinam.....	307	Chernogoriya.....	366
Suriya.....	309	Chexiya.....	368
Syerra-Leone.....	311	Chili.....	370
Tailand.....	313	Sharqiy Timor.....	372
Tayvan.....	315	Shveysariya.....	373
Tanzaniya.....	317	Shvetsiya.....	375
Terks va Kaykos orollari...	319	Shimoliy Koreya.....	378
Togo.....	320	Shri-Lanka.....	380
Tojikiston.....	322	Ekvador.....	382
Tonga.....	324	Ekvatorial Gvineya.....	384
Trinidad va Tobago.....	325	Eritreya.....	385
Tuvalu.....	327	Eron.....	387
Tunis.....	328	Estoniya.....	389
Turkiya.....	330	Efiopiya.....	391
Turkmaniston.....	333	Yamayka.....	393
Uganda.....	335	Yaman.....	394
Ukraina.....	336	Yangi Zelandiya.....	396
Ummon.....	339	Yangi Kaledoniya.....	398
Urugvay.....	341	Yaponiya.....	400
Falastin.....	343	Qatar.....	403
Faryer orollari.....	345	Qirg'iziston.....	404
Fidji.....	347	Qozog'iston.....	405
Filippin.....	348	Quvayt.....	407
Finlyandiya.....	350	G'arbiy Samoa.....	408
Folkland orollari.....	352	G'arbiy Sahroi Kabir.....	409
Fransiya.....	354	Hindiston.....	410
Fransuz Polineziyasi.....	358		